


بَرَزْدُ وَاجِكِ حِكَايَتِي

محرری :

کمال راغب



« جمهوریت » غزته سنده تفرقه ایدلش ملی روماندر



استانبول

جمهوریت مطبعه سی

۱۳۴۱

برازد واجك مطایسی

محرری :

کمال راغب



« جمهوریت » غزته سنده تفرقه ایدیلش ملی روماندر

A NOTE TO THE READER:

Because of its value and condition
this volume has been microfilmed
to preserve its content.

Please check the Libraries' catalog
for location of a copy of that
microform.

Thank you,
The Preservation Office

12/3/1990

PL 248

R 24 B5

1922

فاخر ، تره‌ندن ایندیکی زمان آرقداشلرینی بولمقدن بوس بوتون اُمیدینی کسیدی . اوچی ده بوراده برلشمک ایچون سوزلشمشلردی . اونلری تره‌نده کورمه‌یجه ، بلکه داها اول کملشدر ، دیه بر اُمید قالیوردی ؛ حالبوکه استاسیوننده یوقدیلر . عجبا ، بوندن صوکرایی تره‌نله‌می کله‌جکلر ؟ .. چاره‌سز یاریم ساعت داها بکلیه‌جکدی .

قیرلره دوغرو برکزمه یایمق تکلیفنی ، برقاق کون اول ، فاخر اورتایه آتدیغی زمان آرقداشلی شهرک کورولتوسندن بر کون اولسون اوزاقلاشوب طبیعتله یالکیز قالمق خولیا سنی سه‌وینجه قارشیلامشیر ؛ پروغرامی زنکین برذوقله حاضرلامشلردی . فقط ایشته هیچ بریسی کله‌یوردی ؛ یارین بربرینه راست کلدکلی زمان هپسی : « والله فاخر ، نه قدر ایستیوردم ... » دیه سوزه باشلایه‌جق ، ناصل اولوب ده تره‌نی قاقیردقیرینی ، یاخود نه درجه آغیر بر مانعک آلتندن قالقامادقیرینی آ کلاته‌جقلردی .

شمدی فاخر ، بر قولنی چانطه‌سینه دایایارق استاسیونده تره‌نی بکلیور ؛ اونلردن برینی هنوز یا تاغنده میشیلدارکن ، اوته‌کنی ده مثلاً قاضی کوی واپورینک آلت قاماراسنده بر مکتبلی قیزله فیصیلدا شیرکن کورو یورمش کبی اولویوردی . یا هیچ کملز لسه ؟ .. ایشته کوزهل بر کون بوشنه کچمشدی ؛ بوکا او قادار قیریلیوردی که ...

تره‌ن کلدی ؛ استاسیونه بردن طاشان ، داغیلان قادین ، ارکک یوزلرجه کنج ، سوسلو انسانک جانلی ، تلاشلی کلوب کچیشلری آراسنده آرقداشلرینی بوشنه آرادی : کله‌دیله ...

یولجیلردن تصادف ایتدیکی برایکی طانیدق اونک یانندن کچرکن کوله‌رک آشنالق ایتدیله ؛ فقط خاطر صورارکن ، هپسنده ، کیده‌جکلری یره کچ

قالقندن قورقويورمش كېي استعجال ايدهن برطور واردى . بو ، فاخره بوس بوتون غريبلك حسي ويردى . استانبوله دونه جك تره ن ايكي بچق ساعت صو كرا ايدى . جان صيقينتيسى ايله استاسيونك قارشوسنده كي محليجي يه كيردى .

ايسته كسر برايكي كورهك ايله يوغورت يه دى ؛ چانطاسنى ده اورايه براقوب ديشاري چيقدى ، بر آز يورودى . ايلريده قاپوسنه « تلاقى اخوان محفلى » ديه لوحه آصيلي بر كوشكدن يو كسك سسلر ، پول وزار شاقيرديلى دويولويوردى ؛ كوشه يي دونر كن اورادن چيقان برقاق كيشي ايله قارشيلاشدى . اچلارنده اورتا ياشلى دوزكون كينمش بر آدام ، اوزاقدن فاخرى كورونجه هم اوكا اشارت ايدىيور ، همده قونوشدقلىرى بحثدن آريلاميه رق ياننده كنه :

— نه قادار « آنباله » اولسهك حقك وار ، دىيوردى . هم اووه رتوره « رولانس » ياپيور ؛ همده اوچ كاغد آليور . بو قادار معناسز بلوفه قارشى طبعي « سوررولانس » ياپاجقسك . برده باقيورسك كه حريف « فول » يامش ! .. اولور شى دكل ...

صو كرا فاخره دوندى ؛ قولنى طوتارق :

— بزه مي كيدييورسك ، ديدى . اي كه عقلنه كلش ! ..

دوقتور محي الدين شوقى بك ، اونك حرمتله طانيديغي انسانلرك اك باشنده ايدى . دوكتورله فاخره باباسى فكري بك ، چوق سهويشن ايكي آرقداشديلر . فاخر ، باباسنك ياننده همان هر زمان محي الدين شوقى بكى كورمش ، چوجوقلقدن بري اوافق بر نزله يه بيله اوغراسه اونك شفقتله ، اهتمامله اوقشايان اللرنده كنديني بولمايه آليشمشدى . اوك ايچنده بري خسته لاندغي زمان دوكتور محي الدين ، ساده فن آدمى صفى ايله دكل ، اك وفاكار بر اقربا كېي اورتادن اكسيك اولمازدى . فكري بكك ئولومله بوغوشديغي فجييع سنه لرده ده پك سهيرهك تبسملرينى اوكا ، محي الدين شوقى بكه بورجلو قالملردي .

فاخره باباسى اولد كدن صو كرا دوكتوره قارشى حرمتي ، سهو كيسى عيني قوتله ياشادى . فقط صو كرا ، حياتندن آلتى سنه سي كيجه ياتيسى مكتبنده ايكي

سنه سی ده عسکر لکده کچر کن اونلری اوقادار صیق صیق زیارت ایده مزاوملشدی .
بر آراق محی الدین بک رفیقہ سی فحامت خانم خستہ لاندی ؛ اسویچرہ یہ کیتدی .
دوقتورده محاربہ سنہ لرندہ کندی پاینہ دوشن ایشلر آراسندہ دیدینیور ، طشرہ یہ
کیدوب کلیوردی . صو کرا فحامت خانم اسویچرہ دن دونمش ، فقط دوقتورلر
شہردن اوزاق ، آچیق یرلری توصیہ ایتدکاری ایچون بو طرفلرہ طاشنمشلردی .
او کونلر ، فاخرلکده اک فلاکتلی ، اک پریشان دوری ایدی . مکتبدن
حیقوب حیاته ایلک آدمی آتارکن بر فلاکت طوفانہ اوغرامشدی . متارکدن
صو کرا استانبولی واستانبولیلری آلت اوست ایدن بحر انک یانندہ آنہ سی ده
نجیع بر « قانسہر » دن ایکلیور ، صوک نفسلرینی آلیوردی .

فاخر ، کندیس ایچون چارپان بو صوک قلبدن ده محروم ، بوس بوتون
یالکز ، بوس بوتون کیمسہ سز قالنجہ کوز یاشلرینی ، آنادولو طوپراغنک
هنوز بر کوشہ سنی ایچین طوتوشدیران استقلال آلتندہ قوروتما یہ قوشدی .
درد بش آی صو کرا بر ایش ایچون تکرار استانبولہ کلدیکی زمان محی الدین
شوقی بکہ کوپری باشندہ راست کلشدی . بوبابا دوستی او کون واپورہ یتشمہ یہ
قوشویوردی ؛ اوزون اوزادی یہ قونوشامادیلر .

شمدی فاخرلہ قارشى قارشى یہ کلنجہ محی الدین بک چوق سہوینمش
کوروندی :

« بزہ می کیدیورسک ؟ » دیدیکی زمان اودہ ، خایر دیہمدی . بورایہ
قادر کلوبده جان صقینتیسندن سواقلرده دولاشدیغنی اعتراف ایتک پک عیب
اولماز میدی ..؟

دوقتورک آرقاداشلری برر ایکیشر کندی کوشکلرینہ داغیلدیلر . فاخر ،
هرشیدن اول فحامت خانمی صورتی . او ، اسویچرہ دن پک زندہ ، پک مکمل
دونمشدی . فقط بورادہ کی یاشایش نہ قادر اولسہ سناتور یوملرک شرائطنہ
بکزه مدیکی ایچون صوک کونلرده براز سینیرلہ ندیکی اولویوردی . دوقتور
محی الدین ، قاریسنک بو حالندن متأثر اولدیغنی سویلرکن بر طرفدن ده پک محقق

برتهلکه يي هر حالده آتلاشمس اولماسنه قارشى آز چوق متشکر کورونويوردى .
براز بونلردن ، براز پولتيقه دن ، براز فاخرک حياتندن بحث ايده ايده يولى
بيتيرديلر . محى الدين بك :

— شمدى بوس بوتون يالکز قالدک ها ، واه اوغلم واه . . . ديه باشنى
صاللارکن تمیز ، ساده ، برذوقله دوزلتلمش کوچوک برباغچه دن کچديلر ؛ قايدن
کيرنجه محى الدين شوقى بك ، قاريسنه :

— باق ، کيم کلدى . . . ديه سسله ندى . صوکره مرديون باشنه قادار
يورويوب تلاشلى تلاشلى باغيردى :

— دادى ، يمک حاضر مى ، يمک ؟ . . . آچلقدن باييليورم ! . . .
او ، ذاتاً پک آچيق ، پک تمیز يوره کلی برآدامدى ؛ ياشى ايلريله دجکهايشى
بوس بوتون راحت ، جان بسله مه يه وورمشدى .

فيخامت خانم ، فاخرى التفاتله قارشيلادى ؛ قوجاسى يالکز کندينى
دوشونويور ، ياقالغنى ، بويون باغنى قوپارير کي چوزه رکن بسله مه يه سسله نيوردى :
— يکانه ! . . . أنتاريمى ؟ . . .

فيخامت خانم ، برازجه فضله جه اصول پرست ، فاخرى سنه لردن برى
کورمه مش ، شمدى ده مسافر کي طوتارق ، قوجاسنه بويله اوکله وقتى صويونمانک
مناسبت آلمايه جغنى آکلاتمايه چاليشيوردى . اوته کي هيچ اورالرده دکل :
— اوح ، دييوردى . صباحدن برى تمام اوچ خسته يه کيتدم ؛ بيتدم
والله . . . صوکراده . . .

کولويور ، صاقلامق ايستيورمش کي ياپيوردى :
— صوکراده ، داريلاجقسک آما ، براز ارچند بکه اوغرام . . .
فيخامت خانم :

— اويله يا ، ديه براز تلاشلى ، براز قيزغين جواب ويردى . سزک کي
بکمر اولماسه ارچند بکک يارالرينى کيم تداوى ايده جک ؟ . . .
صوکره ، فاخره دوندى :

— بو ارجمند بكي سز طانمازسكنز ! . اوراده هر كون ، هر دقيقه عمليات
ياپيلير ؛ قان آما عملياتي . . . فقطيشيل چوخالي ماصالرك باشنده . . . بزم بكت ده
ماشالله قاني پك چوقدر ؛ اوراده كي سولوكلره نه مدير مسه ايچي راحت ايتمز ! . .
دوقتور محي الدين اوتوده ائتاريسني كيوب قانايه ياييلمش ، برطرفدن فاخره :
— ياهو ، اونى ديكله رسهك سن ده بنى قومار باز ظن ايدە جكسك . . . پارا
نروده ؛ آله كاغديله آلميورم . . . ديور برطرفدن ده يكانه يه :
— والله ، هيچ حالم يوق قيزم ، ديه فيصلديوردى ، يمكي بورايه كتيرك ،
بوراسى داها صيجاق ، شمدى آشاغى يه قادار كيم اينه جك ! . .
يكانه صوفاده :

— كوچوك خانم ! . . يمكي ينه يوقارى ايتيورلر . . ديه سسله نيركن
فاخر قاپينك آراسندن نارين بر كولكهك كچديكنى كوردى . بو ، محي الدين
شوقى بكت قيزى معلا ايدى . فاخر ، اونك دوغديغنى خاطر لاردى . باباسنك
صاغلغنده صيق صيق كوروركن صوكرالرى هر برى برطرفه داغيلنجه تصادفلر
پك سه يره لمشدى . ساده آرا صره آنه سندن معلانك ايلكنه ، اينجه لكنه دائر
حكايله ر دوياردى صوك دفعه اونى برقاق سنه اول تونلك باشنده آلمان مكتبنه
كيدركن كورمشدى . اوزاقدن خيزلى خيزلى اطرافنه باقماندن كچن بو قويو
قهوه رنكى چارشافلى خيال پك كبار ، پك وقوردى .

دوقتور ائتاريسني كييدكن صوكر قانايه سه ريلش ، اوكونكى پوسته ايله
كلن « پرس مديقال » ي قاريشديريركن فخامت خانم قوجاسنى فاخره چكيشد .
يريور ، كنديسنه ده دويورمق ايچون عنادينه يوكسك سسله ، اونك ناصل
تنبل تنبل ياشاديغنى آكلاتيوردى :

— بكم ساده اويوسون ، رومان اوقوسون ، استاسيونده كي اجزاخانه ده
چان چان ايتسون ، صوكراده پاراسى وارسه قلوبده قومار اويناسون ، يوقسه
اوينايانلرى سير ايتسون . . . نهوه كلير كلز ، نه ائتاريسنى دار كيوب قانايه يه
قورولسون ! . . برطرفدن هر كون جاني بر باشقه يمك ، برباشقه طاتلى ايستهر ؛

پارا نرەدە ، برئەو نەايەلە كچينير . بونلرى دوشوندىكى يوق كە ... والله فاخر بك
بزم بك حالى بويە ، آماھر كۈنمى ھەر كۈن ... ھالم چاليشيور ، تجارت ياپيور ،
اورادن اورايە كزوب پارا قازانيرر ، بزمكى

محى الدين بك ، غزتە سنك اوتەكى صحيفە سنە كچر كن :

— قاريچم ، دىيوردى . نەياپالم شىمدى كويده اسكىسى كې خستە قالمادى كە ...

— خستە اولدىغى زمان دە سن بويەلە سك ... خستە يە كوتورمك ايچون

آزمى آرابا ايله قاپى يە قادار كلدىلردە آرتىق صويوندم دىە كىتمەدك ؟ .

صوكر افاخرە دونەرك :

— اونك ياپدىغنى چوجوق بىلە ياپماز ، كچ كلدىكلرى ايچون خستەلرە نە

دىسە بكنيرسكنر ؟ . (سسنى قالىنلاتوب باغىراق) صباحدن برى اجزا خانەدە

ايدم ، عقلكنر نرەدە ايدى ، دىمزمى ؟ .. ھىچ ، فاخر بك ، خستەلغك وقتى ساعى

اولورمى ؟ .

محى الدين شوقى بك دالغىن ، قىدسز غزتەسى قارىشديرر كن ميرىلدا نيوردى :

— نەياپالم ، قوجاك ايشتە يويە ... كچنوب كىدييورز ...

فخامت خانم بوقىدسز لغە قارشى بوس بوتون سىنيرلەنش كوروندى :

— پكى آما ، سنك وجود كدە نە كرامت وار ؟ مادام كە سن قازا نيورسك .

صاتوب صاتوب يىەجك اولدقن صوكر ا سكا نە لزوم وار ؟ اوقادارىنى بن دە

ياپارم ؟ .

يكانە ايلە دادى ماصەيى دوزەلتيورلر ، صوفرايى اودادە حاضر لايورلردى .

معلا دە كىردى ؛ فاخرى خفيفجە سلاملادى . بو ، كورمە يەلى بويومش ، سەرپلش ،

بك جاذب بر كنچ قىز اولمشدى . محى الدين بك ، صوفرايە اوطورور كن فاخر

قىمىلدامدىغنە دقت ايتدى .

— نە او قارنى طوق كې دورويورسك ؛ ديدى . يوقسە دعوتى بكليورسك ؟ ..

فاخر ، استاسيوندە براز برشى يەدىكى سويلەدى . او ، اينانميورمش كې

ايدى :

— هله شو مناسبسىزلكه باق . ديدى . هم بزه كليورسك ، هم ده قارنىكى ديشارى ده دويورويورسك ، بونه معناسز شى !. هايدى ، هايدى ، اوطور !. فاخر : « سزه كليوردم كه .. » ديه مزدى . محى الدين شوقى بك ، « آماصاچا ها ... » ديه سويلنه رك يمك حاولوسنى انتارىسنىك ياقاسنه سوقاركن فخرامت خانم قوجاسنىك بو حالنى عارسز چوجوقلره بگزه تيور ، اوتەكى اورالرده دكل ، حالا فاخره چاتيوردى :

— بو عقلالاق ذاتاسنده كوچو كدن برى واردر .. شوقادار بر يومور جاقدك ، صانكه قوص قوجه بر آدام كې اوطورور ، بويوك آداملر كې قونوشوردك ... باباك آزارلادىغى وقت شويله بر صوراتكى آصوب اودادن چيقىشك واردر ، هيچ كوزمك او كندن كىتمز ؟. آيول ، يكانه !.. هانى چوربايه ليمون ؟.. دوردى ، دوقتور ، قارىسى ، قىزى برده فاخر صوفرايه اوطور مشلردى . قوجاسى ، فخرامت خانمك تعريضلرينه آلدير مامقله برابرلافى باشقه طرفه چه ويرمك ايچون :

— يا، سنىك خبرك يوق ، دييوردى . فاخر آنادولويه كىتمش كمش ؛ صاقين كىمسەنىك ياننده سويله مەيىك ، اوغلانىك طان طونه كىتدىكى كوندرا ها ... پكى فاخر ، آكلاتسەك ، بورادن ناصل چىقدىكنز ، سياحت او قادار صيقى ايكن ... فاخر كولدى :

— بر كىجه يارىسى ، داغدن داغه آشارق ...

— نه ، يايانمى كىتك ؟ ..

— اودت ، قرق اوچ كونلك بر سياحت ...

— پكى بويله بر يولجلىق نرەدن عقلكه كلدى ؟

— اسكىدن چاليشديغى غزته ده كى باش محرر سزائى جودت بكى طانيرسكنز ،

مبعوث ... استانبولده بر چوق تورك منورلرينك توقيف ايدىلدىكى زمانلردى ؛

اوده بوغاز اينچى ساحلنده بريره كىزلمشدى ؛ بنى آراتمش ، كىدوب بولدم .

ملكىتك طالعهده قوپان فيرطنه لرى دوشونه رك اوزون اوزون قونوشدق . تورك

دشمنلری، بومملکتی قورتاراجق مفکوردی، او مفکوردنك صاحبلىنى بوغمايه قرار ویرمشلر، ایشه بورادن باشلامشلردی. بیلورسکیز، اوتە کیلرک سوقاقلرده قادینلر مزه ساتاشدقلری، ئەولریمزه کیروب ددە بزه: « سز چیقک ! » دیدکلری، « شامپانیا قدحلرندن اوچ دانە اکسیک، نه یاپدیکنز؟ . » دیه ئەو صاحبنه دایاق آتدقلری کونلردی... بک اوغلندن کچه میوردیکنز، طانیدیغکنز آدملر سزه چارپارق قالدیریمدن آشاغی آتیورلر، کوپری اوزرندە فسکیزی آلوب پارچالایورلر، ترامویدە قالقوب یریکزی ویرمدیککنز ایچون ایتە قاقە دیشاری چیقاریورلر، سوقاقده ایگری باقدک، یان باصدک دیه جزا آلیورلر، « یاھو قباحتم نه؟ » دیه سورسە کنز بش یرینه اون لیرا ایستیورلر، هر آغز آچدقە بش لیرا ضم ایدیورلردی.

برزمانلر بخشیش ایچون یالتاقلانان بربریکنرک چراغی، پاسته چیدە غارصون دیه طانیدیغکنز برپالیقاریا شمدی بیلیم هانکی دولت پولیسنه ترجان اولمش، سزی سوقاقده چویرتیور، اوستکنزی آرامق بهانه سیله جزدانکنزی چالیور، عربیان خانندە کونلرجه قیرباجله آبدستخانه ییقاتیوردی. انسان کیجه اوینه براز کچ دونسه جاده اوزرندە صویویورلردی، اوزاقدن کورنلر صورمايه دکل، باقمايه جسارت ایدە میوردی. آرتق هر ایشکنز بوزولمش، نه اولاجنی بللی دکل، برقاریشقلقدر کیدیوردی. اسکی باطرونم، آرقاداشلریله برابر قاچمايه قرار ویرمشدی. ذاتاً قاچاسه لر بو کون یارین طوتومالری محققدی. بکاده کل دیدی. دوشونمە یه بيله لزوم کورمە دن پکی دیدم. او کون بازار ایرتسی ایدی. صالی یه، اولمازسه چارشانبایه یوله چیقاجقدق. یکرمی دوت ساعت ایچندە حاضر لاندیم؛ اما او یله بر حاضر لانیس که... چوجوقلق، کنجلك کونلرینه هاند آجی، طاتلی بیك تورلو خاطره لری یاد ایدە رک آیریلدیغمنز بو کوزەل یرلرە، مظفر اولمادن، مغلوبیت لکە سنی تمیزلە مە دن برداها دونمک قابل اولیه جقدی. »

فاخر سسز، محترز، نازک برکنج، هر زمان چوق لافە قاریشمازکن بعضاً

بردن جانلانیر، پک نحیف کورونن بنیه سی ایچون حتی پک چوقلرنجه کولونج صایلاجق برشدتله آتشله نیر، سکیز اون سنه لک سپور مراقندن قالما بر قوته مالک اولدیغی هیچ ده بللی اولیه جق قادار کوچوک ونارین یومروقلرینی صیقهرق سویلر، سویلردی. بو طائله یی اوزون زماندن بری کورمه مشدی. شمدی بردن بره اونلرک آراسنده کی کرکینلک، نه قادار لطیفه رنکلی اولسه ده اونی شاشیرتمش ایکن سیاحت بحثی آچیلجه یاواش یاواش بودورغونلقدن صیریلیوردی. محی الدین بک، آراده برباشنی صاللایه رق حکایه یه قارشى دویدیغی علاقہ یی کویسته ریور، برطرفندن ده: «یکانه، طورشو بیتدی می، طورشو! ..» دیه سسله نیرکن فیخامت خانمه:

— ناصل، دییوردی. بورادن یایان آنقره یه؟ .. تام بنم خرجم دکلی؟ ..
صو کرا فاخره:

— ای آکلات باقلم، ناصل قاچدیکنز؟ .. هیچ کورهن اولدی می؟
حریفلر شبه لندکلرینی یوله دوردوروب چویریورلر، سزبویله پالدر کولدور قولایلقله کیدیورسکیزده کیمسه فرقه وارمیور می؟
— مردیوهن کوینه کیدن یولک کنارنده برر ایکیشر طوپلانمای قرارلا -
شدیر مشدق. یکر می، یکر می بش کیشی قادار طوتان اصل قافله اوراده بکلیه جکدی.
بز آقشام اوزری بش واپوریه کچدک. درت آرقاداش اورایه قادار صانکه کزیورمش کبی یایان کیتدک...

او صرده معلا باباسنه طورشو چیقارمق ایچون دیشاری چیقدی؛ فاخر بوندن استفاده ایدرک دو قتوره فیصلدادی:

— اوته کیلر فرقنده اولمادی اما آزالسون باشمزه باشقه تورلو برقضا کلیوردی. بز اوچ آرقاداش صحرای جدیدی کچدکدن صو کرا کویه اینن یولک کنارنده برقیرده او طور مشدق؛ قارشیمزده کی کوشک مکرشبه لی ایمش؛ اورانک مداوملری ده آلاجه قارانلقده تام بزم او طور دیغمز یرده دولاشیرلر مش.
جامعات آلتنده کی قهوه دن محله لی بزى کوروب شبه لشمزلر. یول آرقاداشلرندن

ایکسی، چونکه ایکشر اوچر هپ او جوارده داغیلمشوق ، چشمه دن صو
ایچرکن ایشک فرقه وارمشلرده کلوب بزه خبر ویردیله؛ یوقسه ...

محی الدین بك قهقهه ایله تماملادی :

— یوقسه ، محله لیدن دایاغی یه دیکز کیتدی ایدی ها !!

فاخر دوام ایتدی :

— قاراللق چوکدی . ییلدیزی ، شفاف فقط برآز سرین ، رطوبتلی
بر کیجه ایدی ؛ اوزاقدن قوربنه سسلری دویولویور ، یاواش یاواش بزه
دوغرو کلیوردی ، پاروله مز بویه قوربنه کی باغیرمقدی . بزه جواب ویردک .
کلن سکز اون آرقاداشله برابر بر ساعت قدر یورودکن صو کره بر مزارلقده
بزی بکله ینرله بولوشوق . جوارده کوچوک بر کوی اولدیغی ایچون هیچ
سس چیقارمامایه چالشیوردق . بوراده صاقلی سلاخلری داغیتدیله . هیمزک
آز چوق برآز یوکی واردی . چانطالری ، توفنکلری اوموزه ووروب کیجه
یاریسنه دوغرو یوله چیقوق . آنا یولی براقش داغلردن کیدیوردق . بعضاً
دیزلرمزه قادار چامورلو صولره کیردیکمز اولویوردی . برآرهللق قلاغوز بیه
یولی شاشیردی . بر موشامبانک آلتنده کبریت چاقه رق پوصله ایله موقعمزی
تعینه چالشیوردق . بوراده تحف بر شی اولدی . یکرمی بش کشیدن فضله
ایدک ؛ ایچمزه مبعوثلر واردی ، مکتب عالی مأذونی فلان هیمز اوقور
یازار آدماردق ؛ هیچ بریمزه قطب ییلدیزی بوله میوردق . مکتبده کی نظریات
ایشه یارامادی . حتی «بوی سقاوت» کزینتیارنده او کزینکلرمزی ده هیجاندن
اونوتمش ، شاشیرمش کی ایدک . آراده : « بنم کوزلرم کورسهیدی ، قطب
ییلدیزی بولوردم .» دییه بر سس دویولدی ؛ او صقنتی ایچنده هپ کولدک .
صو کرادن طانیشدیغ بو ذات «***» اعضاسندن معروف کور رضا بکدی .

— هانی شو کاتب مسئولدی ، صو کره مبعوت فلان اولدی . او دکلی؟

— اوهت ... بو آدامده کی اراده نک قدرتنه پک حیرانم . تصور ایدک ،

کوزلرنده کی فجیع بر ضعفه رغماً بر ایله باستوننه ، بر ایله ده آرقاداشنک قولنه

دایانه رق بو مشقتلی یولجیلخی متانتله باشاردی . حاصلی ، صباحه قدر داغلرده سرسری، دولاشدق . افق ، سیدلی بر رنگله آغیریرکن آز قالسون بقال کوینه دوشویوردق . مطلقا ایشتمشکزدرد ، بوراسی خاطری صایلاجق قادار روم اشقیاسی چیتاران بر کوی ... هله او زمان حریفلرک قانه ، آتسه صوصایوب قودوردقلى کونلردی . کوچ حاله یولی بولوب صاماندرده کیزلندک . صو باشنده بر ایکی ساعت دیکه نوب تکرار یوله چیققدق . بر آن اول تهلهکی منطقه دن اوزاقلاشمق ایچون « تپه اوردن » کوینه قادار عادتا قوشار کی یورویش او قادار مشکلاتلی اولدی که ...

فخامت خانم — آنقرده یه قادار هپ بویله می کیتدیکیز ؟

فاخر — خایر خانم افندی . یولجیلق بیک تورلو ماجرا ایچنده کچدی . مثلاً یدی کون صوکره « قایماز » دیدکلری کویه واردق . آطه پازاری بورادن طقوز ساعتدی . « قایماز » ده راستلادیغمز مفرزه ایله آز قالسون بربرمزه آتش آچیوردق . صوکره عینی غایه اطرافنده برلشدیکمز آکلاشینجه اونلردن او گرنندک که آطه پازاری ، کیوه طرفلرینه او کونلرده چرکس اشقیاسی کیرمش . اکر باشقه یولدن کیتسه یدک بزده اونلرک اُلنه دوشه جکدک . هپ برابر « قدره » طرفلرینه چکیلدک . کوچوک آرسلان ، دای مسعود، سلیمان بک چته لری ده هپ جوارده طوپلانندی ...

فخامت خانم — آی، سزده چته لرله برلشدیکیز ، دیمک ...

محی الدین بک — آیول ، ذاتاً اونلرده چته ! . . استانبولدن سلاحی اوموزلایوب یوله چیققمق ، نه دیمک ؟ شو حالده فاخر ، سن ده اعدام فتواسی ایله محکومسک ! . . آمان سنک بو حالکه او قورقونج چته جیلر آردسند بولونشکی کوز او کنه کتیریورمده ... اولور شی دکل ! . .

فاخر — او . . . محیط انسانی چوق دکیشدیریور ، دوقتور بک ! . . اوراده کوندن کونه اوزایان صاقالی ایله ، داغده ، بایرده یاته یاته بام باشقه اولان فاخری سزده طانیه مادیکنز ! . .

مەللا ، قىدىسىز ، دىشلرىنىڭ ايكىسى كورونەجك قادار يارى آزالق دوداقلرى
 ايله انسانە ايلك باقىشده صفوت وصافيت حسى ويرەن بر كىنج قىزدى . بو ايلك
 چورابلىرى ، مەكەل برماقاصىدن چىقمىش قوستومى ، اينجە قراواتى ايله يك
 اعتىئالى كىنىمىش كىنج چوجوغك — كىندى تەبىرىلە — سانكە سيار جىبخانە كى
 بلندن اوموزىنە قادار فىشنىكلر ، بومبالرلە مسلح چتەجىلر حقندە آكلاتدىغى
 شىلردن حتى بر آزالق صىقىلىوردى . حكاىەنك باشندە طاتلى ماوى كوزلرى
 ھې او قىدىسىزلقە ، ھې او صفوتلە ، سانكە بر آزارە دولاشىر كىن ياواش
 ياواش فاخر ك حكاىەسىلە علاقەدار اولمايە ياشلامىشدى . محى الدين شوقى بك :
 — سو كرا فاخر ، دىدى . آطە بازارى دوشونجە ناصل كىتدىكىز ؟
 — قندردە اون بش كون بىكلەدك . يوللر آچىلمىدقن باشقە قوجە ايلنە
 دشمن سارقايە باشلادى . قندردەن رجعت ايدركىن يولمىزى شاشىرتدقن
 سو كرا « كىفكن » ە كلك . اوخ ، دوقتور بك ، بورادە بر چتەجىنك حىاتنە
 اوقادار ايمىرندىم كە ... قارا دىكز دە بر كىفكن آطەسى وارىا ، بىز كىتدىكىمىز زمان
 اورادە اون سكىز كىشىيە راستلادق . ساحل اھالىسىندن ، ھې چلىك وچالال
 آدمىلر ... رىئىسلىرى ىتمىش ياشندە ، فقط قىرقدىن فضلە كوستىرمىز ... زمىرد
 كى آطەنك اىچندە ، اينجى كى بىياز بىر بنادە اوطورويورلر ؛ سانكە جنت ! ..
 بونلر ، بىلدىكىمىز عادى اشقىا فلان دكل ؛ قارشىدە جىبەجىلر ، كىفكن دىە
 برايكى كوى وار ؛ بورالرك اھالىسىنى شىلەدن ، يكى كويدىن چىقان اشقىبايە
 قارشى محافظە ايدىيورلر . بىز دە پىك بويوك براىلىكلرى دوقوندى : كىتدىكىمىز زمان
 قورقونجى بىر فورطنە واردى . فقط قارادە كى تەلەكە داھا بويوك اولدىغى اىچون
 نە اولورسە اولسون تا قالرە بىنوب دىكزە آچىلاچقدق . او كونكى فورطنەدن
 قاچان بىرونان رومور كورى ، آرقاسىندە دە بردوبا باغلى ، كىفكن قوينە كىلوب
 صىغىندى . فرصت ، بوفرستىدى . آطەنك قەھرىمانلرى قايقىلرلە كىدوب
 رومور كورى يا قالادىلر . ايرتسى كونى رومور كورە بىنوب ار كلىيە چىقدق .
 اورادىن دە اينە بولىيە كلك . باقىمىز ، اك اوفاق حادثەلرك ، بعضاً استانبول دە

نه غریب عکسلی اولویور . اینه بولی یه واردیغمز کون استانبول غزته لری
المره کچدی : « قندره ده کی باغیلر ، دیوردی . داغیلمشلر وبونلردن درتیوز
کشیك برقوت کفکن آطه سندن سمت مجهوله دوغرو فرار ایله مش ، ططف
بک معیتده کی یوز کشی ده مذکور آطه به التجا ایتشلردر . . » دورتیوز
کشی دیدیکی بز اولاجقدق . یکر می برکشی ایدک . اوته کی یوز کشی ده
یالکز دورت آرقاداشمزدی !..

آرتیق صوفرادن قالدیورلردی . دوقتور محی الدین قانابه یه اوزانیر کن :
— پکی ، آناطولیدن نیه کلدک ، فاخر ؟ دیدی .

— کیده رکن یانمره هیچ برشی آلاماشدق . آلدیغمز کوچوک چانطه لر
بیله آغیر کلیور ، طاشماز اولویوردی . اک زیاده بنم یوکمک آغیر اولدیغنی
کوره نلر : « یازیق ، دیورلردی . بونلری برر برر آتاجقسک !.. » انسانک
بویله یوجلیقده جان قایغوسنه دوشدیکی اویله دقیقه لر اولابیلیردیکی آرقاسنده کی
البسه بیله طاشماز اولور . سپورجیلقدن ، ایزجیلکدن قالان بر آلیشقیقله بن برقات
چاشیر ، بریطانیه دن عبارت اشیامی صوکنه قدار طاشیه بیلدم . فقط اورایه واردقدن
صوکره قش چو کمکه باشلادی . آرقداشلردن بر چوغی عائله لرینی آلدیریورلر ؛
اوته بری نه لازمه کتیرتیورلردی . بن استانبوله بر عائله دن دکل ، حسرتلی
برباقیشله افته دالاجق برچفت کوزدن بیله محرومدم . یوله کلیرکن هر کس
بولدیغنی چاره لرله مکتوبلر یازار ، کیمیمی چوجغنک رسمه کوز یاشلری
دوکردی . دوشونویوردم ، دوشونویوردم ، بنم بویله خاطر لانه جق بر
شیئم یوقدی . ها ، ساده بزم قلوبک استانبول شانیونلغی ایچون یاپاجنی
فوت بول مسابقه سنده حاضر بولونامیه جقدم ؛ اوکا یانیوردم !.. آرقداشلرم
بکا ایمره نیورلردی . دنیا امورنده دکل ، دیورلردی . بیلیم عجیبا اویله می ،
یوقسه اصل محرومیت بومیدی ؟ . . بن ایسه بویله یوقسول بر یوجلیقده
اوزاقلره باقوب کنیدی ایچون ده چارپان برقلب بولوندیغنی دوشونمه نی ،
اونلری هر کون آرتان بر حسرتله خاطر لارکن ، اونلرک خیالنه کیتدکجه

صوقولورکن هر آدیم آتیشده بالعکس بوس بوتون اوزاقلاشمش اولمای
خیالپرستلکمه داها مونس بولویوردم .

محی الدین شوقی بك :

— هله هله ، ایشی شاعرلکه ووردك ، ینه نیچون كلك ، اونى
آ كلاته جقدن . . .

— اوت اونى دییوردم ؛ قیش چوكدی ، بن استانبولدن بر آزاوته
بری کتیرتمك امکاتی بولامادم . اوصرده پك چوقلری هیچ مشکلات
چکمه دن ، همده بر یولجی کبی واپورله استانبولدن چیقابیلیوردی . آرقداشلردن
بریسى رسمی بر وظیفه ایله کیدوب کله جکدی ؛ بنده بش اون کون ظرفنده
دونمك نیتيله اونکله برابر یوله چیقدم .

— بورایه کلنجه ، طبعی قاپانه صیقیشدك !

— اویله اولدی . بز او قادار احتیاطه رعایت ایدهرک یوله چیقمشدق .
کلدیکم زمان باقدم که هرکس دویمش . بر چوقلری بنمله قونوشمای ، سلام
ویرمه یی بیله ایسته مه دی . هرکس کندى باشندن قورقویور ، مخالف پارتینك
و اونلره وارداجی اولان برقاق غزته نك « باغیلر ! » دییه قوپاردقلری قیامته
قارشى صوصویورلردى . وضعیت اسکینندن چوق فضله فنالاشمشدى ؛
اوزون مدت شوراده بوراده کیزله نهمیه مجبور اولدم .

— شیمدی تکرار کیده جکمیسك ؟ . .

— طبعی ، ايلك فرصته . . .

فاخرک ترس بر حرکته قهوه سنى پانطالوننه داملاتدیغنى کوردهن محی الدین
شوقی بك :

— توء ، الله مستحقکى ویرسون ، ديه آلاى ایتدی . بن سنى بیلدم
بیله لی بحریکسزسك به ! . . بر قهوه یی دوکمه دن ایچه مین آدام ناصل اولوردم
قومیه جیلق یاپار ؟ . .

فخامت خانم قوجاسنه هجوم ایچون ینه وسیله بولمشدى :

— سن ، ماشالله پك بجرىكلىسك ، ديدى . نه دور يورسك ، كندك كيتسه كه . . . محى الدين بك قانايه بوس بوتون اوزانه رق فاخره :
— اوكله يمكندن صوكر ابراز شكرله مه دن واز كچه م. دير كن قارىسنه ده لاف يتشدير مكدن كرى قالمىوردى :

— بن نوتى صاودم آيول ! . . اسكيدن ده : « بيقدم بوفر قه جيلقدن ، براز نهوده يوزكى كورده ميورز » ديه باشمك نه تى ييردك . اويله يا ، شيمدى آرتيق اسكيدك .

فخامت خانم ، ينه قوجه سنك تنبالكندن طوتدوردى . هپ عيني نقراتله هجوم ايدييور ، عالمك ناصل چاليشديغنى ، نهولرينه ناصل باقدقاريني ، آت آرابا آلدقاريني صايوب دو كويوردى . فاخر ، بوپك نازك وچوق ذكى قادينك وجودجه اولديغنى قادار روحاده مرضيله شمش اولديغنى كورويوردى . اسويچرده ده كى تداوى ، بوراده كى حياتك انتظام ورفاهى آنجاق كسيك براوكسوروكى سيلاهه مشدى . يوقسه ياناقلرينك رنكى ، وجودينك دولغونلغى ، زنده لى ايله انسان فخامت خانمك خسته لغنه حكم ايدمه زدى . فقط اومشئوم علتك تخريباتى صانكه يالكز اعصاب اوزرند عظيم برجران توليد ايتمش كى زواللى قادين نفس آمايه بيله كوچ يتشه جك قادار حرارتله سويليور ، سويليوردى . معلا ، بعضاً باباسنى آنه سنه ، بعضاً اونى اوتنه كنه قارشى مدافعه ايدهرك موازنه ي بولمايه چاليشيوردى . كندينك ده باشقه دردى واردى . لاف آردسنده ، ايكيده بر :

— بابا ، دييوردى . « اورپنتون » كياورولرندن برى ينه خسته . . . هيچ يم يمور ، دورديغى يرده تيترييور ! . . .

محى الدين شوقى بك ، آرتيق كندندن كچمش ، دوداقلرنده خفيف بركانلر ياپان دهرين نفسلردن باشقه بر جواب ويريوردى .

فخامت خانم ، معلا ، فاخر ، اوچى بر آزده باغچه يه چيقديلر . يكي چيقان جيوجيولرى مسافرلرينه كوسترديلر . اراده فخامت خانم سنا تور يوم حياتندن

بحث ایدیور؛ معلا، طاووقلر، اوردکلر، هندیلرله دولو کومسک خصوصیتلرینه عائد چوجوقچه شیر آ کلاتیوردی. اک کوزده کدیس پاموق، بوتون قاپی یولداشلقلرینه رغماً کومسک کیزلی بر دشمنیدی. جیوجیولردن برینی نجهله مک ایچون کوزلرنده آلهولر طوتوشدینی زمان معلا یتشوب بر فاجعه نك اوکنه کچیور؛ صو کرا بعضاًده خروسلر پاموغک مینی مینی بیاض یوماقلر کبی یووارلانان یاورولرینی غاغلادجه بوسفر اونلری قووالایارق کومسه حبس ایدیوردی. آه، بو ایکی قاپی یولداشک آراسنده بر آز دیریلک دوزنلک تأسیس ایده بیاسهیدی...

فاخر، بوییرمی یاشنده، دولغون کوکسلی وجودله، ایچنده یدی یاشنده بیکرله یاقیشه جق شیر اوچوشان یاری آراق دوداقلرک، قویوماوی کوزلرک معناسی آراسنده کی اوزاقلغه هیچ اینانامیور کیدی.

تا اوزاقلردن تره نك سسی دیولدی. فاخر کیمه یه حاضرلاندی. کلشکن بوکیجه قالماسنی، فخرمت خانم برقچ کره تکرارایتدی. صو کرا باشقه بر آقشام کله سی ایچون سوز آلمادن بر اقادی. بورانک مهتاب کیجه لرنده کی کوزلکی صاییور:

— بر مهتاب کیجه سی مطلقا بکهرز، دییوردی.

صو کرا: «فاخر بک کیدیور!...» دیه محی الدین بکه سسلندیلر. او، اویقوسنک آراسنده: «نه خلط ایتش؟... نیه قالمیورسک، فاخر؟...» دیه کوزلرینی اویوشدوریور، صو کرا:

— اویله یا، شیشلی یه آلیشمش آدام بوراده کلوب داغ باشنده قالمازیا... بنده اولسه م... دیه میریلدانییوردی.

فخرمت خانم ینه آتیلدی:

— سنده قالمازسک، دکلی؟... نه دورویورسک، کیم طوتویور؟ شو نهوک ایچنده متاع دیه آلدیغک بر لامبهک وار، اونی آلکه ویریر سوقاق قاپیسنی کوستریریرم. [ماصه نك اوزرنده کی «رادیوم» لامباسنی کوسترییوردی]

فاخر بك . . . ايشته بزم بېك بوتون اشيایى بو . . . اون سكر ليرايه آلدی .
هر كون بوزولور ، بكمزده ياپاجغم ديه يوزى كوزى قاپ قارا اوغراشير !
كيتسون ، ايسته ديكى يرده ياقوب دردينه يانسون ! . .
فاخر ، بوشاقا ايله قارشىق سرزنش لردن صيقيمايه باشلامشدى . دوكتورله ،
فيخامت خانم له وداعلاشدى . معلا ، اونى قاپويه قادار تشييع ايتدى . فاخر ،
بو سنه لردن صكره كوردىكى كنج قيزه وداع ايچون آلنى اوزاتدينى زمان معلا ده ،
صانكه شاشيرمش كې متردد بر حال واردى . اورادن چيقنجه ، محلبجيدن
چانطه سنى آلوب تره نه يتشدى .

فاخر ، انقلاب سنه لرینك يتشديرديكى آز چوق مرضى كنجلردن برى
ايدى ؛ بعضاً دوم دوز ، بسىط اوزانيركن ، صوكره بردن اوچوروملرله
ددرينه شن ، شاهفه لرله يوكسه لن بر روح ؛ وارمى يوقى بلای اولمايه جق قادار
سسز چارپاركن آنسزین فيرطنه لرله كورله ين بر قلب .
دها زياده غرب اصوللريه تربيه ايدلمشدى . غرب مدنيتك مالی اولان
كتابلر ، فكرلر ايچنده بعضاً هضم ايدى ، بعضاً هضم سزلق حماسه اوغرايه رق
بويودى ؛ فقط نه ده اولسه ينه شرقى قالمش ، شرقك بوتون مرضى حساسيتى ،
خيالپرستلىكى ايله ازلدن طلسملاشمشدى .
اوده همان هر كس كې ، حياتك طقسان طقوز بيك انقلابه اوزانان تسبيحنى
چكمش اويله بر كنجدى كه چوجوقلغنده عسكرلكه ، پاشالغه هوسله ندى .
اون درت ، اون بش ياشلرنده هر اوقودينى رومانده كى قهرمانى كندى روحنده
ياشيور كې بولدى . ياواش ياواش تنه لرى ، يالكزلى سوه ورك محيطندن
آرقاداشلردن آيرىمايه باشلادى . شاعر اولدى . اوقودينى رومانلردن بكندكارينك
يوز صحيفه ده ، بيك صحيفه ده بيتمه سنه كوكل راضى اولاماز ، كندى ده اوكا

بکزر رومانلریازمق، اونلره بر ذیل ابداع ایتک احتیاجنی دویاردی. صو کر ابر زمان
ککش حرارتیه وطنیرو اولمشدی. اسکی عثمانلی اولکک سنک هر او جندن کلن هادتلری باشقه،
لسانلری باشقه، یارادیلشلاری باشقه طلبه نك مکتب باغچه سنده اوبك اوبك طویلاندقلری
وقت تورکجه دن غیری لسانلره قونوشماسی اوکا کندی ملیتنی او کر تمش ؛
اتحاد جیلق ، احرارلق مناقشه لری ایله ، تورکچیلک بحثلری ایله باغیرمش
دیدیشمش، حتی دو کوشمشدی .

آرقاداشلرینک طویلاندیغی قهوه لر ، بیراخانه لر یرینه ، شاعرلک اونى
مهتابلی کیجه لرده حریت تپه سنه ، لودوس غروب لرنده کاغد خانه صیرتارینه
چکر واک بویوک سلطنتک یالکزلقده ، اک زنکین شعرك محرومیتده اولدیغنی
الهام ایدهرکن یاشی بویودکجه علمدن ، علمجیلکدن ذوق آلمایه باشلادی .
دون اوقادارسه و دیکی رومانلردن بوکون بردن صوئومش ومثلا طاوانلره
قادار رومانلره ، خزته لرله دولو کتبخانه سنک یانماسی اینلک کونلرده اونک
ایچون آرتق یاشامقده معنابراقماش ایکن صو کر اصو کر ابالعکس اونلرک کابوسندن
قور تولدم دیه سهوینمشدی. دارالفنونده، کتبخانه لرده کوزلرینی خسته ایده جک
قادار اوقور، اوقور، اوقور کن بعضا ریاضی کوروشلرله ، بعضا مثبت دوشونجه لرله
حقیقتی بولدم ظننه دوشردی . فقط آراده برینه تکرار شاعر وخولیا پرور
اولور ، فضولی یی اوقورکن صاف ، تمیز ، اینجه وطیعی بر هاشق کبی دویار ،
جنابی اوقورکن صنعتی باشقه کوزله کورمه یه باشلار، اینجه ، متبسم، بر آزده مستهزی
بر صنعتکارک دهاسنی ادراکه چالیشیردی . فاخرده هرکنج کبی ئوغو ایله
رومانتیک اولمش ، روسو ایله بشریته داریلش ، موسه یی اوقودقجه یالکزلغه
طایمشدی .

آریستودن بوکونه قدر بوتون فیلولوزوفلرک کندی فکرلرینی ماضیدن
تجریده ایچون چابالامالرینه رغماً هپ بر برینک تأثیری آلتنده قوردقلری نصوصی
تدقیق ایدهرک اوده فلسفه نك هر عصرده کی انقلابی ، هر ملتده کی تاقی ومحا که
باشقه لقلرینی کندی قناسنده ده کچیرمشدی. آراده شعرله فلسفه یی قاریشدیرمش

ألنه تصوف اثرلری کچدکجه بعضاً برتک مصرعک ده رینلککنده برتک کله ایله مست اولمش ، نهایت حیاتهده کی انکسارلر ، خولیارلرندن همان هپسنگ حقیقته چارپدقجه داغیلماسی اونى بوس بوتون بدین ایتش ، هرشیدن شبههیه آلیشديرمشدی .

کیتدکجه اوکا اوپله برحال کلشدی که بعضاً طالع بر شیده یاردیم ایتسه شاشیریر ، سهوینجلی بر خبر دویسه اینامازدی .

چوق دفعه ساکن کورونوردی . نادراً اشتراک ایتدیکی مجلسلرده چوق لافه قاریشماز ، صانکه اسکیدن پک سهویدیکی مناقشه لردن شیمدی یورولمش کی حراتلی بحثلره کیرمکدن قورقاردی . بعضاده بردن بره خرچینلاشیر ، هرشیده قیزار ، هرکسه قاوغا ایدردی . پک بویوک حقارتلره ، فناقلره کولدیکی لاقید قالدینی اولورکن بر هیچ ایچونده بردن بره طوتوشور ، چیلغین بر فورانله اک سهویدیکی قیلیری قیرار ، اک قیمتلی شیر ی چیکنردی . اوقادار که دهلیاکنه حکم ایده نلربيله اولوردی .

فاخر ، چوق سفیه ، عیاش بر بابانک اوغلی ایدی . فکری بک ، کنجکلکنده پک خلوق بر آدامکن رفیقه سنه ، فاخرک آنه سنه ایلک دفعه طالب اولان ، فقط چاپقین یارادیلشده اولدینی ایچون رد ایدیلن بر آرقاداشنک انتقامنه اوغرامش ، اونک ایلله باشدن چیقاریلشدی .

اوزماندن صوکر فکری بک قاریسی ، برتک اوغلنی اونوتمش ؛ اوچ بش دالقاووق روحلی آرقاشک سوروکله دیکی ایچکی وسه وکی هالمرنده وارینی یوغنی صاحچش صاوورمشدی . دوقتور محی الدین شوقی ، اونک بو پریشانیسنه اک صمیمی حسله مانع اولمایه چالیشان ، هر فرصته اوکا یوواسنی سهویرمک ایچون اوغراشان بر دوستدی .

فاخرک باباسنه قارشى دویدینی قورقو ، سهوکی ایچون بوش یر بر اقامشدی ایلک بیرا یودومنی آلتی یاشنده ایکن یوزینی بوروشدیرارق ، برپا کت چوقو- لاتامقابانده باباسنک نلندن ایچدیکنی خاطرلاردی . بو ، کوچوککن بویوک

کورونمه یه یلته نن ، بویوکلر کبی قونوشان چوجوغی فکری بک برآراق
تیاترولره ، بیراخانهلره قادار برابر طاشیرکن اونک اولا : « بک بابا .. چوق
ایچمه سه کزه ... » دیه ویرلاماسندن ، صو کرا صو کرا : « بک بابا .. اوته کیلرک
پاراسنی نیه سز ویریورسکز ؟ » دیه ایشنه قاریشماسندن ، هرسوقاقده کوردیکی
اوه کلنجه آنه سینه یتشدیرمه سندن بیقمش ، بریره کوتورمن اولمشدی .

فاخر آنه سنک فلاکتی ، عائله ایچنه چوکن محرومیتی ، نهایت هپ
او ایچکینک ، هپ او ایچکی عالمترینک یوزندن باباسنک ده اوتوز بش یاشنده
ئولی ویردیکنی کوردکن صو کرا ایشته یکر مییدی یاشنه گلش آغزینه برداملا
راقی قویماشدی . اولری بک اوغلنه پک یاقیندی ؛ هرشیئی یاپایلمک فرصتی
واردی . فقط او ، آنه سندن اذن آلدجه هپ پهلوان کورشلرینه ، آت
جانبازلرینه کیدردی . مکتبدن ، سمتلرندن طانیدینی اوقادار آرقاداشی واردی ،
اونی بر تورلو کنیدلرینه بکرتهمه مشلردی . فاخر ، اونلرک اکلندکلری
یره - اوده پک نادر - کیتسه اشتراک ایتمز ، بلکه برآزده جان صیقان بر
سیرجی اولوردی . اهاجلی بر بابانک ، بدبخت وخسته قللی بر آنه نک ویرده دیکنی
حیات تربیه سنی کندی کوزلریه ، کندی انسیاقیله بولمایه چالیشور کیدی .
فقط اک کوچوک تجربه لرک ، اک بسیط درس لرک ده اوکاپک بهالی یه کلدیکی اولویوردی .
بوراسنی فاخر ، شویله آکلاتیردی .

— برآمهریقالیدن بوقس درسی آلیوردم . ایلاک کونی داها یکی آدیون
کیمشدک ؛ صوراتم بر یومروق ووردی : « ایشته ، دیدی . بوکا (دیره کت
دوغوش) دیرلر ... بو ، برنجی درس ! ... » درسی او کړندم آما دوداغم
چکه مه قادار یرتیلمشدی . اونک کبی حیاته کی هر آجی حقیقت ده کندی
طانتیرکن مطلقا بریاره ، برصیزی براقیور ...

مکتبدن چیقنجه ، تیرده تیرده آیاغنی دکزه صوقان بر قورقاق عجمیلکی
ایله حیاته کیره رکن و کیردکن صو کره بیک تورلو آقینتینک اوکنه دوشدی .
کندی دوشونجه لرندن ، کندی خولیالردن پک آزداکارلق یاپایلیدیکی ایچون

بلکه شخصیتى بر آرز محافظه ايتدی، لکن چوق بدبخت اولدی .
اونك بويويشنده اراده سنك، غرورينك چوق تأثيری اولمشدی . مثلاً پك
كوچو ككن خسته لقلی، جيليز بر چو جوقدی . مکتبده بوتون آرقاداشلری اونى دوکه .
بيليرلردی . اوزمانلر، نماز قیلدقدن صو کره ایکی دهاسی واردی : « یاربى ! .. صنفده هر
زمان برنجی قالایم . ۲۵ شعبان قادار بکاده قوت احسان ایت ! .. » شعبان که مکتبک ال
قبادایسی ایدی ، بر چلمه آتجه فاخری یره یو وارلیوردی !
او قودى ، او قودى ، کوزلرینی یوراجق ، سینیرلرینی بوزاجق ، قفاسنده
فیرطنه لر یا پاچق قادار او قودى . قوتلنمك ایچونده ژیمناستیکه ، سپوره
هوسله ندی . بر زمان کلدی که بر جانباز کبی پرده نده لر آتار ، مارا تون یاریشنه
حاضر لانیر کبی قوشار ، جمال کبی آغیرلقلر ، کولاله لر قالدیریردی ؛ سپور
میدانلرنده دیدیشمه سی زمان اولمش ، عضلاتی سوء تشکله اوغراته جق قادار
افراطه وارمشدی . اراده سی ، غرورى اونى بدبختلقدن دکل فقط کولونج اولمقدن
چوق دفعه قور تارمشدی . مثلاً ، پك چوقلرینك عاشق اولابیله جکی موقعلرده او،
صرتی دوئمش آرقاسنه باقمادن اوزاقلاشمشدی . اون یدی ، اون سکیزنده چو جوقجه
شاعر ، کنج قیز کبی خولیا پرور ایکن عاشق اولمق ایسته مش ، عشقی سه و مش ،
فقط عاشق اولاجق کیمسه یی بولامامشدی . داغلرده ، دکز کنارلرنده
کزه رکن شعرلرینی هپ اوخیل سه و کیلیسنه اتحاف ایددر ؛ خولیا لرینی
سه و کینك یالکیز مفهومنه قوراردی . ایسته یکر می یدی سنه دراو قادار قادین ،
او قادار کنج قیز طانیش ، هم چوق یاقیندن طانیدینی اولمش ، فقط هیچ
برینی سه وده مشدی . مخیل ازدواج رؤیالری ، شعرلی مسعود او بارق
قورومی اونك ده قلبی هیجانله دولدوردینی زمانلر اولدی . فقط کیت کیده
او قادار قورقمشدی که کندى قفاسنه ، کندى قلبنه مالک اولونجه سعادتک
بوش برماصال اولاجغنه عقلی ایرمش ؛ شعرده ، سودایه ایناماز اولمش ؛ پارلاق
ازدواج رؤیالرینی ، سعادت خولیا لرینی استخفافه باشلامشدی . سه و مک و سه و مک ،
سه و دیکنى و سه و یلدیکنی ظن ایتک ، بونلر نه بوش شیلردی یاربى ... هانیا ،

هانیا بوتون شو سه وەن ، سه ویلن ، بربری ایچون چیلدیران، ئولن انسانلردن بردانه مسعود وارمیدی ؟ .. سنه لردن صو کرا بیکرله فدا کارلق مقابلنده نهایت قاووشولان او مخیل ازدواجلرک صوکی نه اولویوردی . هپ هپ عینی شی دگلی ؟ .. سو کیلیمی آلایم بربرمزک اولالم باشقه برشی ایسته مه یز دیه نلر، یارین دوغاجق چوجوغک ایلک کونی قونداق ، صو کرا ماما صو کرا جیجی، صو کرا دودوک، صو کرا پاتیک و صو کرا داها نلر ، نلر ایسته یه جگنی هیچ دوشونمورلردی .

فاخر کنجدی شیمدیلك صحتی چوق مکملدی ؛ دیدیشمکدن ، ماجرادن یورولموریدی . چانطاسنی قایدیغی کبی دنیا نك او براوجنه کیده بیلیردی . آنه سی ده ئولد کدن صو کرا برکون یالکیز ، برکون تیزه سنک یاننده ، برکون آناتولیده داغ باشارنده یاشارکن نه ولنه یی دوشونموریدی بیله ... « آرتیق تام وقتک ، نه ولنه لیسک ... » دیه نلره قارشى دوداغنی بو کویور ، پکی اما کیمله ، ناصل ؟ دید کدن صو کرا : « هله باقالم .. » دیه اوموزلرینی سیلکیوردی .

آرتیق او ، تکرار آناتولیه کیتک ایچون حاضر لانیوردی . استانبولک کوزه للکارینی چوق سه وهردی . بوسه و کینک هیجانی ، حتی صیزیلرینی صوک سیاحتنده داها زیاده دویمشدی . کیتمه دن اول برچوق کوزه ل یرلری تکرار کنزیور؛ چوجوقلق خاطره لرینی ، او یرلرده ناصل خولیا لرله دولاشدیغنی یاد ایدیوردی . محی الدین شوقی بکک هائله سی کویلرینک مهتاب کیجه لرینی چوق مدح ایتشلردی . فاخر ، براستانبوللی ایچون پک عیب ، فقط او کویده برکیجه اولسون کچیرمه مشدی . کیتمه دن اول بو ذوقی ده طاقمق ایسته دی . محی الدین بک ، ذاتاً چوق ایی برآدامدی ، فخرامت خانم ده او عصبی دوره لرینک خارجنده غایت نازک برقادین اولویوردی . حتی مسافرلرینه اکرامدن ، التفاتدن

کندی غرورینی ده اوقشایان برذوق بولویوردی ده نیله بیایر. اونلره برمکتوب یازوب بو آرزوسندن بحث ایتدی. محی الدین بکدن آلدیغی جواب اوزرینه ده کویه کیتدی. فاخره قارشی اوقادار کبار و مکرم دوراندیلر که اوراده قالدیغی ایکی کیجه یه براوچنجی، بر دردنجی علاوه ایتک پک قابلدی؛ فقط نه دنسه چوق صیقیلدی. یالکز، ایلک کونی هپ برابر بر آرابا ایله توریا مشلردی. صو کرا فاخر یالکز باشنه جوارده کی معروف بر تپه یه چیقدی. کیجه لری مهتاب پک براق، فقط هوالر چوق صوئوق اولویوردی. فاخرینه یالکز، حتی کیجه یاریسنه دوغرو جوارده کی قوروده، دکز کنارنده دولاشدی. او یله ایکن یینه آراده بر طویلاندقچه فخامت خانم هر فرصته قوجاسنه هجوم ایدیور، هر ثانیه مناقشه اکسیک اولمیوردی.

مارت کلیوردی؛ اوطوردقلری کوشکک برسنه لک کیراسنی پشین ویرمک لازمدی. دو ققور ایچون اوصیرالرده آلتی یوز لیرای بولوب ویرمک قابل دکلدی. فخامت خانمک ده حاضر پاراسی یوقدی. شورادن قیصا جققر، اوتهدن اکلیه جکقر، نهایت خانم افدینک کویه لرینی رهینه قویا جققردی؛ هله بو کاپک طو تولو یوردی. فخامت خانمک ارکک قارده شی فریدون بکله ده آرالرنده بر بورا کچمش اولاجققدی که فاخرک مکتبده ایکن پک نازک، پک کبار دییه طانیدیغی بو کنجک اوکون دورغون بر حالی واردی بر ایش بهانه سیله استانبوله کیتدی. عائله اوجاغنده نه سهن بو طالتسز هوا، اوکا آلیشمایان هر کسی شاشیرتوب سر سمله ته جک قادار بونالیتیجی ایدی. فخامت خانمک هپ پارا اوستنده دولاشان حکایه لری، هپ پارادن بحث ایدن شکایتلری یالکز قالدقلری زمان بر تورلوبیتوب توکنمیوردی. قادینجیز او مبذول سوزلرینه نفس یتیشدیره میهرک قیزاریور، طیقانیور، آکلاتیور، آکلاتیوردی. اونک ایچون حیاته ده سعادت ده پارا، صحت ده پارا، هرشی پارا ایدی!.. دو ققور محی الدین، تنها بر ثانیه ده فاخره دیمشدی که:

— نه چاره او غلوم.. سهنک بو موسملری اونک اک عصبی دوره لریدر؛

خسته لغک ایجابابی...

معلا، اطرافنده اولوب بیتن شیلردن خبری اولمایان برچو چوق کبی سا کندی. آنه سیله باباسنک آراسنده کی مناقشه لری لطیفه یه دوکمک، طاتلی یه باغلامق ایچون چالیشدیغی ده اولیور، فقط داها زیاده آنه سنه حق ویرر کبی کورو نو یوردی. حتی آراده بر، محی الدین شوقی بکک لاقیدلکندن، اها جیلکندن اونک ده شکایت ایدر کبی طورلری واردی. فاخر، کیمه حق ویره جکندن متردد، یالکز اونلرک آراسنده معلانک نه زیلوب، نه رییه ن حاله آجیمشدی. شو ایکی کون ایچنده معلانک اشتراک ایتدیکی بمشیر: دیکیش سالوننده آچیلان سرکی، تیزه سنک یایدیردیغی یکی چارشاف، چیو جیولرینک حتی، فلان غزته نک رومان تفرقه سنده کی مادمازل بیلیم کیمک آجیقلی عاقبتی کبی شیلردی. هله اون بش کون اول تکر کدینک قایدیغی پیلیج، معلانک قلبنده او یله بر ماتم بر اققشدی که هر وسیله ده بونک حکایه سی تازه لیوردی.

فاخر، بوندن صو کرا اوزون مدت اونلره اوغرامادی. بر طاقم وقایع ظهور ایتش، سیاحت ایچون یوله چیقه جی کونی تأخیره مجبور اولمشدی. بر کون دو قتوره تونلک باشنده کتبخانه لرک برنده راستلادی؛ محی الدین بک اونی تکرار دعوت ایتدی. آرتیق بهارکک کوزهل کونلری ایدی؛ کویلری قالابالقا شمشدی؛ هله مهتاب کز مه لری، دکر کنار پیاسه لری پک مستنا ایدی: «کل، بش اون کون هوا آلیرسک..» دییه اوستته دوشدی.

فاخرینه بر مهتاب هفته سنده چانطاسنی حاضرلادی. دو قتورک کوشکنه واردینی زمان فخامت خانمی، صاحب لری کسک، کسکین باقیشلی، اوزون بویلی برقادینله طاوولا اوینار بولدی. «مادام بهزاد پاشا!» دیه طانیتدیلر. فخامت خانمک باشنی چه ویردیکی ثانیه ده ایکی پول چالارکن فاخره کوزلریله اشارت وجرمده اشترا دعوت ایدن مادام بهزاد پاشا، یا خود ساده جه ده لفین ایلک دقیقه دن اعتباراً اوکاپک شوخ، پک چیلغین کورونمشدی. فاخر، اول صمیمی بردوست، تکلیفسز بر مسافر صاندی؛ صو کرا دو قتورک نه ونده کراجی اولدقارینی آکلادی. نهایت حکایه نک تفصیلاتی ده او کره ندی. پاشا چوق نازک، جو مرد زنکین

کورون برآدامدی. محی الدین شوقی بك اونى براكلنتى یرنده طانیشدی .
 دهلفینی تداوی ایچون برقاچ دفعه اونلرد کیتمش، احباب اولمش؛ ذاتاً کوشکده
 کندیلرینه بویوک کلیور، برقاتنه بهزاد پاشا مسافراولمش، پایلرینه نه دوشرسه
 او مصرفهده اشتراك ایده جکدی. برابر طوپلانیورلر، برابر او طورویورلر،
 برابر کزیورلر، یمکی برابر ییورلردی. فاخر حیاتهده بك چوق قادین طانیق
 فرصتی بولمش، هله خیلی چاپقینلق عالملى کورمشدی؛ مادام بهزاد پاشایی
 بك کوزی طوتمادی. قادین، پاشایی هروسيلهده آزارلیور؛ برکون نارکیله
 شیشه سنی قیریور، برکون راقی صوراحیسنی پنجره دن آتیور، هر دقیقه قاوغا
 ایدیور، آراده بر عقلنه اُسدیکی کبی تره نه آتلا یوب استانبوله کیدیور،
 قیزدیغی زمانده بوس بوتون قاچه یه قالیوردی .

نته کیم دهلفینک پاشایه نکاحلی دکل مترس اولدیغی صوکرآ آکلاشیلدی .
 حتی یاواش یاواش او کرندیلرکه بهزاد پاشانک آریجه قاریسی، چوجوقلری ده
 وارمش .

محی الدین شوقی بك چوق تمیز یوره کلی برآدامدی . صرف دهلفینک
 خسته لغنه آجیدیغی ایچون برایلک حسیله، صافدرونجه حرکت ایتدیکی کورو-
 لویوردی . فیخامت خانمده آکلاشیلان برآز مادی استفاده مقصدیله بوکاراضی
 اولمشدی .

فاخر بودفعه دو قئورده بر هفته قادار مسافر قالدی . اوکا کوستردکلری
 اکرامه پایان یوقدی . عادتاً براولاد، برقاردهش معامله سی ایدیورلر، او قادار
 سه وییورلردی . فیخامت خانمک کچن ایلک بهارده کی خویسوزلقلری ده سیلنمش،
 اونک یرینه بوس بوتون طانماز برقادین کچمشدی .

قونوشورکن، شوندن، بوندن بحث ایدرکن او یله رحیم بر طورى،
 او درجه ایجه دویوشلری واردی که ...

دو قئورله آرالرنده کی خویسزلق شیمدی ایکی سه وکیلینک سرزنشلى،
 ستملى کبی طاتلی اولمشدی. معلاده مسعود، بر حیات، پر خنده کورونویوردی .

فاخر ، يالکز اونك دهلفين ايله آرقاداشلقلريني پك بكنمدي . بوچايقين ، شوخ قادين آرادە بر قولاغنه بر شي فيصيلة ادقجه ، معلا قيب قرمزي كسييله رك دوداقلريني ايصيرييور ، بعضاً آكلاشيلان اوتە كينك ياپدينى شاقا اوقادار مناسبسىز اولويوردى كه : «توه ، قاقاچوجوق !» ديه يانندن قاچيوردى . فاخر : «ايوادة ، دييوردى . بر كون بواينجى كې ياوروجق ده بوزولويورە جك !..» او كراسندن بر آز تصرفه مقابل عجباً بوتهلكي اونلر حس ايتيورلرميدي ؟ محى الدين بك ، بوكا هيچ اهميت ويرييور كيدي ؛ قيزنده كي متانته اوقادار آميندى .

نهايت بر هيچ ، فقط پك طاتسىز بر حادته فاخر ك بوقورقوسنه صانكه حق ويردى . ساده بوقادار دكل ، اونده هنوز پك شعورلى بررنكه كيرمه ين تمايللارده بلكه بووسيله ايله بليرمش اولدى ؛ حتى كنديسى پك بيهوده بر عصيان ايله انكاره چاليشدينى . حالده بيله بوندن صوكر او شعورسىز تمايللار بر حقيقت شكلنى آلدى :

بر كون دهلفين ، سالونده فاخرله يالکز ، پيانوي قاريشديرييوردي ؛ بردن دوندى :

— رجا ايدەرم ، فاخر بك ، ديدى . نه دوريورسكز ؟ ..

فاخر ، بوقادينك چياغينلقلريني پك چابوق او كره نديكي ايچون بويله تحف بر سؤال قارشوسنده شاشيرمادى :

— عفو ايدەرسكز ، ديدى . بوراده بولونوشم سزى راحتسىز ايدەيورسه ... اوتە كي شيطانجه كولدى :

— خاير ، بنى دكل ، فقط بر باشقه سنى ... بر باشقه سنى راحتسىز ايدە بيلير !.. فاخر ، دهلفينك ايماسنده كي هادى دوشونجه يي درحال آكلادى ؛ فقط : — عجباً كيمى ؟ ديه رك آكلاماش كوروندى .

— هايدى جانم ؛ ايشى آكلامامازلغه وورماييكز ... ايشته اونى ، معلا يي .. فاخر ك ايچى قانادى ؛ معلا ايله آرالرنده هيچ ، هيچ برشى كچمه مشكن ، بر برلرينه حتى سوره كلى بر باقىشله كوزلرى چه وريله مشكن بوقادينك تعريضلرينه

سبب نه ایدی؟.. معلاده بکندیکی برچوق شیلریوق دکلدی. فقط اوکا چاقین، چیرکین برکوزله باقق عقلنه کله مشدی. ازدواج ایسه، اوو، هیچ قابلیدی؟ فخرات خانمک کوردیکی ثروت، احتشام رؤیاسنه نظراً مطلقاً چوق زنکین بر داماد تخیل ایتدیکنه شبهه یوقدی، یا کندیسی، بوانقلاب سنه لرنده نه اولاجنی بلای اولیان برکنجدن باشقه برشی دکلدی که...

ایچنده، نه اولدیننی کسدرمه دیکی قاریشیق دارلقارله، فاخر ایرته سی کونی تکرار استانبوله دوندی. فقط بوندن صوکر محی الدین شوقی بکه صیق صیق کوروشمک وسیله لری چیقمشدی.

محی الدین بک فاخرک ترزیسنی پک بکنمشدی. اورایه برابر کیدیورلر، قوماشی فاخر انتخاب ایدیور، اولچولرده، پرووالرده وفاق ایدیوردی. صوکر امثلاً، البسه نک ترزیدن آلنه جنی کوندو قورتورکینه تنبالکی طوتویور، استانبوله ایتمه اوشه نیور. اوزمان ایش فاخره دوشویور؛ صوک کونی محی الدین بک حسابی شاشیرمش اولویور؛ اوکا یکر می اوتوز لیرا بورجلانیوردی. داها صوکر بهزاد پاشا ایله آیریلشاردی. پاشاده کی آلا جقلرک آرقاسنده دولاشمق ده فاخره قالیوردی. صیق صیق اونلری زیارت ایدیور، اوفاق تفک ایشلرینه یارامق ایچون آتیلیور، بویله جه او عائله نک یاواش یاواش هر دردینه اورناق اولوبوردی.

فخرات خانمک جیجیلی بیجیلی شیلره قارشى ضعفنی پک قولای آکلایان فاخر، اونلری زیارت ایدرکن بر قوطو شکرله مه یاپدیرمای، بیسکوی، میوه کی اوفاق تفک شیلره خاطر صورمای ده اونو تمیوردی. اوته کی بونلری کوردکجه داریلیور: «بوهرزمان، هرزمان اولماز که.» دییوردی.

فقط کورولیوردی که فاخردن اوده چوق ممنوندی. حتی کوستریان مسافر برورلیکک، التفاتک اصل منبی فخرات خانمده ایدی. محی الدین بک همان هیچ شیئه قاریشمیور، ساده هائله ارکانندن بر اولاد کی باقدیننی بوکنجی پک سهویور، پک بکنیوردی.

معلا ، هرزمانکی کبی صاف ، هرزمانکی کبی قیدسز برچوجوقدی . بعض
قصورلری یوق دکلدی . مثلاً پک بسیط رومانلر اوقویور ، اک ابتدائی حسلر
اوزرنده علاقه دارلق کوسته ریوردی . حتی اوندهده براز مادی اندیشه لرله
چارپان برقاب واردی . او یله ایکن ینه معلا کبی برکنج قیزه بوعصرده تصادف
ایدیه بیلیرمیدی ؟ .. اوقادار تمیز اوقادار آیی خویلو ایدی که ...

فاخر ، بر بایرام کونی اونلری زیارته کیتمشدی . دونوشده تام قاپیدن
چیقارکن معلا ، بردن صوردی :

— فاخر پک ، آرتیق آناتولی یه دونمکدن واز کچدیکز ، بوراده
قالیورسکز ، دکلی ؟ .

اونک هرزمان ده رین برصفوت فیصیلدار کبی یاری آچیق دوران دوداقلری
شو برقاق کله ایله قیمیلدارکن صانکه بوس بوتون باشقه بر سحره مالکدی .
فاخره خطاب ایدیشی اوقادار آز کورولش برشیئدی که ... هله شیمدی یه
قادار اونک آناتولی سیاحتندن هیچ خبری یوقش ، یاخودده اونوتمش کبی
کورونوردی . فاخر باشنی قالدیردی ، معلانک کوزلرینه برثانیه ایچون باقدقن
صو کرا ساده جه :

— اوهت . دیدی .

بوقرار ، دنیله بیلیرکه ، آنجاق او ثانیه ده ویریلشدی .

*
* *

فاخر ، آرتق « بارقه » غزته سنده چالیشمایه باشلامشدی . مکتبدن چیققدن
صو کره برقاق سنه غزته جیلک ایتش ، بونده بویوک بر استعداد کوسترمش
ایکن انقلابلر ، بحرانلر ، او غزته یی قاپاتمش ، اجنبی سانسور بوتون مفکوره
صاحبی قلماری قیرمشدی . « بارقه » اسکیدن چالیشدیغی کبی هائله صیجاقلغی
ایچنده دونن بر غزته دکلدی . محررلر ، بیک تورلو قیده تابعیلر . فاخرده چوق

یورولویور، بویورغونلغك كندی استعدادی ایله متناسب اولمایان بسیط ایشلره مصروف اولماسنه اوزولویوردی. فقط چاره سز، باباسندن میراث یمه مش، طالعنن معجزه لی بریاردیم کورمه مش، ریا ایله، دالقاووققلقه بویینی ایگمه یین هرکنج کبی اوده محرومیتك معین مرحله لرندن کچه جکدی.

بوش وقتلری یوق کبی ایدی؛ جمعه کونلری بیله چالیشیورلردی. غزته یکی چیقمش، هنوز طوتولما مشدی. فضله مصرف قالدیرامادینی ایچون بوتون ایشلری یوکلەنن اوچ بش کنجیدی. کونك برنده سانسور غزته یی اوچ کون قاپادی. دوقتور ککیلری آیلردن بری کورمه مشدی؛ حال بوکه اونلر: «نه زمان ایسترسهك، ناصل وقت بولورسهك کل، ایسته دیکك قدار قال!». دیه چاغیریورلردی. شو ایکی کونلك مجبوری تعطیلده بر آز نفس آلمق ایچون اونلره کیتدی. معلا اوده یوقدی. صورمایه جسارت ایدهمدی، فقط اونك قزل طوپراقده خاله سینه مسافرلکه کیتدیکنی لاف آراسنده اوکره نجه یه قدار یوره کنی صیقان بوچارپنتی نه ایدی عجبا؟

ایرتسی کون صباح کز مه سنی یاپدقن صو کرا استاسیوندن کچرکن سببنی دوشونمەدن تره نی بکه دی. معلا، اوزون بویلو برکنج خانمله ایندی. ایلک کوروشده فاخری صانکه اسکیدن طانیورمش کبی کورونن مبجل، معلانك خاله زاده سی ایدی.

هپ برابر اوده کلایلر. معلا اوکله دن صو کرا مبجلی تکرار قزل طوپراغه کوتوره جکدی. فحامت خانم، فاخره: «ایسترسه کز سزده برابر کیدك. کز مش اولورسکز.» دیدی. تام بونی قونوشویورلردی، دوقتورله برابر ده لفین کلدی. مادام بهزاد پاشا بیکت هواسی یارامادیغندن یینه اونلرک کویینه طاشنایی چوق ایستدکلرندن بحث ایدیوردی.

یمکدن صو کرا ده، بر آراق، صانکه یینه اورایه طاشنق ایچون توسط رجا ایدیورمش کبی فاخری باغچه یه جاغیردی. مطلقا استانبوله برابر دونمك، اونی برابر کوتورمك ایستیوردی. بونك ایچون اولاهیچ یوقدن

سبیلر کوستریور، فقط نهایت : « مطلقا، مطلقا . . . » دیه اصرار ایدرکن کوزلریله هرشی وعد ایدیوردی.
فاخر کویه کله جکی کون بک اوغلنده اوکا تصادفاتیش، لاف آراسنده ده لغین:

— بن ده کلک ایستیورم، دیمشدی. ذاتاً بو برکلم ایچون دو قتوری کوره جکدم. سزک اوراده اولدیغکنز داهائی. . تکرار کویه طاشنق ایچون ده قونوشورز.

بونلر آیاق اوستنده خاطرده کلوب سویله ن شیلرعد اولونه بیلیردی. هله مادام بهزادپاشانک بویله معناسز هوسلرینی صیق صیق کورمه یه اوده آلیشمشدی. کنج قادین تا، ایلک دفعه اولارق معلا ایچون ایمالی شیلر سویلدیکی کوندن بری هر لافی هپ بونک اوستنه کتیره رک طاقلیور، فقط بعضاده کندیسنک چیلغین آرزولره دوشمه یه آماده اولدیغنی احساس ایده جک کی معالی طورلری اولیوردی. بو کون اونده ینه بو چیلغین نوبت لک ایصیتمه سی طو توشمشدی، شمدی ده :
— بن سزک ایچون کلدیم ! . . دییوردی.

باغچه ده یالکزدیلر. مېجل کوشکک پنجره سندن اونلره باقدیننی پک ده حس ایتدیرمه مه یه چالیشه رق صانکه اطرافنی سیر ایدیورمش کی صارقیور؛ معلا، باشقه شیلره مشغول، آشاغی یوقاری اینوب چیقیوردی. کیمک خاطرینه کلیردی که مېجلی پنجره دن کوزتله مه یه تشویق ایدن معلا اولایلسون؟ .

فاخر، بو آقشام کویده قالا جغنی سویله مش، برآز اولده قزیل طوپراغه کیتمه یی وعد ایتشکن شیمدی قالقوب ده لفینه برابر استانبوله دونه مزدی. طبیعی اعتذار ایتدی. فقط شیمدی یه قادار آره لرنده نهایت بورالره قادار دوکوله جک هیچ برشی کچمه مشکن بو قادینک بردن بره هرشی وعد ایدرجه سنه آچیلما سی نه دندی؟. عجبا بو، ساده جه هانی شوقادینلرک سبیسز قصقا نجلقلرندن بریمیدی؟. هم مادام که بربرلرینه قارشى بویله باش دوندوروجی، کوزقارار تیجی آرزولره دوشمه لری هیچ خاطرده کله یه جک برشیئدی، او حالده قصقا نجلغه ده

بوقدی . ذاتاً مخلوقاتك دیشیسی قیصقاج دكلدر، دیهن فیوزوف احتمال كه پك حقی دكیدی ؟..

براز صوكره اوچی، معلا، مبجل، فاخر، هپسنة وداع ایدوب كوشكدن
 حیقیدیلر . مادام بهزاد پاشا، هیچ اومولیان بر خشونتله غرورینه چارپان بو
 — بلكه عمرنده ایلک — ردك آلتنده ازیلدیكنی صانكه بلای ایتهمك ایچون سالونده
 پیانو چالیوردی . فاخر ك نظرنده بورایه قدر هیچدن عبارت قالان شو حادته نك
 اصل اهمیتی بوس بوتون باشقه ایدی . ده لفینك تكلیفی اطرافنده فضله دوشونمك
 احتیاجنی حس ایتهدی بیله ؛ فقط اوته کی ، اوده بو کون براز ده کیشمش
 کیدی . معلا ، کندیسنة پك آز ، پك بوش وسیله لرله خطاب ایدر ، هله
 مثلا بویله بریره کیتمك ایچون لاف آچیلسه هیچ قاریشمق ایسته میورمش کبی،
 قیدسز دوروردی . حال بو كه بو کون اوده فاخری برابر قیزیل طوپراغه
 کوتورمك ایچون قاچدغه سوز آچش، آچیلان سوزلری هپ بورایه کتیرمش ؛
 اوسته لك اوکا قارشى پك نشئلی ، پك ده صیجاق کورونمشدی . مبجل ایله
 مادام بهزاد پاشانك یاننده معلا ، باشقه زمانلره نسبتله صانكه بردن بره
 باشقالاشمشدی . فاخر ، اك زیاده بوكا دقت ایدیور، قادین قلیرینك نه قادار
 دولاشیق باغلرله دوکومله نمش اولدیغنی دوشونویوردی .

تره نه قیزیل طوپراغه ایندیالر . جواد بك ، مبجلك باباسی ، محی الدین
 شوق بكك انشته سی یرندن قیمیلامیه حق قادار شیشمان ، هر شیئه باغیروب
 چاغیران لطیفه جی برآدامدی . طالله ایچنده هر کس اونى قیزدیرمقدن ذوق
 آلیردی . هله دو قتورله جواد بكك شاقالاشمالرینه، قهقهه لرینه پایان بولونمازدی .
 هر ایکی عالله صیق صیق بربرینه کیدر کایر ، یازین جواد بك ده اونلرك
 کوینده کی كوشكه طاشندیغنی ایچون همان ساده یاتما ساعتلرنده آریایلردی .

فاخر، معلا، مبجل، برده مبجلك آنه سی رفیعہ خانم هپ برابر کزدیلر .
 فنار باغچه دن غروبى سیر ایتدیلر . رفیعہ خانم خاله نك قیزی خسته روحلى ،
 شاعر اوزم نئیلر چوجوقدی . او قودینى رومانلر اونك خیالنده بوتون معقولاتی،

بوتون طبیعاتی زهرله‌ین بر آفت اولمشدی. هر شیئی، هر حقیقتی کندی خسته خیالنده اریتوب، داغیته‌رق اوکا باشقه بر هویت ویرن مؤید بی چاره‌لردن بری ده بوقیز جغزیدی. او کون بر غزته‌جی ایله طانیشمش اولمقدن دویدیغی سه‌وینجی بر تورلو کیزله‌یه‌مه‌دی.

هپ شعر، هپ شاعر، بحث‌ری اطرافنده بیتمز توکنمز سؤال‌ر صورویور؛ برهیچ اوزرنده مناقشه چیقارییور، فقط نهایت فاخر نه‌دیرسه اونی قبول ایده‌رک تحف برتسلیمیتله باشنی آکیوردی.

آقشام اوزری معلا ایله فاخر برابر دوندیار. او، معلای اوتهدن بری پک ممتاز بولویور، فقط اونک ظواهره، آلایشه قارشى دویدیغی ضعفدن، اراده‌سز تمایل‌لردن عادتاً برآز قورقویوردی.

هله کچنلرده دایسی فریدون بکله معلا آراسنده کی بر بحث فاخری چوق قیرمشدی. او کون فریدون بکک نه‌ولمک تصورلردن بحث اولونورکن معلا، نشان مراسمده رسمی بر یوزوک طاقمله اکتفا ایتک، یالکز دوکونده یوز کوروملکی هدیه ایتک ایسته‌ین کنج دایسینی عییلایور:

— آ، دییوردی. ساده قوپ قورو نشان یوزوکی اولورمی هیچ؟ ..
مطلقاً اوافق برهدیه اولسون ایسته‌ر...

فریدون بکده دیمشدی که:

— شمدی سنک اوافق دیدیکک هدیه‌یه برق‌چ یوز لیرا ویرمه‌لی...

— آ، البت؛ اوندن ده آشانی اولاجق دکل یا...

— آی صو‌کرا، دوکونده؟ ..

— طبیعی، اوده باشقه...

— اوح، اونک ایچون ده بیک لیرالق بر «کردانلق» آلمالی، اویله‌می؟.

آیول، بن اوله‌نمکدن واز کچدم!..

فاخر، بوپک صاف، پک ساده کورونن کنج قیزک عائله وازدواج بحثلرنده کی دوشونجه‌لرینی اوکرندکجه اونلرک پک مفرط آلایش هوسلریله قاریش‌دیغی

آ کلامش ، نهایت قیزنده بلکه آنه سندن داها مادی احتراصلر بولوندينى
كشفايتمك كنديسنه پك آجى كمشدى . آراسى بر آز چكدكن صوكره
لاف آراسنده ، فاخرده بر صره سنى بكتيرمش :

— مملكتك اقتصادى وضعيتى ميدانده ، ديمشدى . احتشام دورينك زنكين
عائله لرنده كى ثروت ، يا سفاهتدن يا خودده صوك حرب سنه لرنده كى قيطاندن
نهريدى ، يتيدى . مملكتده قاچ زنكين وار ؟ .. زنكينلرك قاچى كنجدر .
قاچى نهوله نمك آرزوسنده در ، پك آز دكلى ؟ .. بر قاچ پاراسى اولانك ده
شوراده . بوراده ، سلطانلنى بكارلقده بولارق دولاشدينى كوروپورز . ديمك
نهوله نه جكلر آره سنده ار ككلر اولسون ، كنج قيزلر اولسون هر ايكيسى ده
اويله خياله پك جاذب كله جك قادار ثروت صاحبي دكل ... بر طرفدن بكلر
زنكين رفيقه آراز ، بر طرفدن كنج قيزلر سعادت رؤياسنى زنكينلرده كوروپوركن
ايكى طرفده بر برينى بولاميه جق ، ار ككلر بكار ، قيزلرده اوده قالا جق ! ..
معلا ، داييسنه — هر حالده — برازده لطيفه ايله قاريشيق طاقيليركن بيله ،
فاخر بويله عاداتا خشونتله لافه قاريشه جق قادار متأثر اولمشدى . هله اوندن صوكره
معلايى دوشوندكجه ايچنده ، صانكه انكساره اوغرامش كى غريب بر آجى
دوياردى . حال بو كه بعضاده اونك اويله فضيلتلرني كوروپور ، صانكه اوساده لكك
آلتنده كيزله نمش دوران اويله معالى كشف ايديوردى كه بو معمالى كنج قيز
روحنده بر برينه ضد اولارق تبارز ايدن ايكى شخصيتدن هانكيسنك داها
جانلى ، داها صميمى اولدينى كندى كندينه صيق صيق صورمايه مجبور
اولوردى . نهده اولسه معلايى كوزلرندن ، خيالندن بوس بوتون سيلاه ميور ،
اونك هويتنده آراده بر دوغان بو ممتاز ، بومستنا كنج قيزك مؤبداً ياشاماسنى ،
هيچ ده كيشمه مه سنى تمنى ايديوردى .

بوكون قيزيل طوپراق استاسيوننده شوردين بوردن قونوشوركن بر صره سنى
بولدى ، اونك بويله آلايش قارشوسنده كيزله مهيه بيله لزوم كورمه ديكي ضعفى ،
مفتونيتى خاطر لاتهرق خفيفجه سرزاش ايتدى . اوزمان معلا ، صانكه بر جبر

معادله سی حل ایدن ، تاریخی بروقه اوزرنده تنقید و مناقشه یاپان طلبه کی سهرین قانلیقله حیات حقنده کی ملاحظه لرینی ، مؤید بر رابطه ایله بربرینه باغلانه جق ایکی کنجک دوشونمه یه مجبور اولدینی شیئلری صایدی . صانکه طائله اجتماعاتنه طائد مجرد مباحثی مناقشه ایدن آمریقایی ، اختیار بر میس کی جدی ، دنیاده کی احتماللردن ، معیشت یولنده بردن بره یقیلاجق احتیاج اوچوروملرندن بحث ایدیور ؛ ساده اوتوموبیل ، کورک ، کاشانه رؤیاسیله یاشایان بر کنج قیز ناصل کندی کندی آداتمش اولویورسه حیاتده یالکز شعرله ، دومانله بسله نه بیله جکی ظن ایدن بر خیالپرستکده عینی سندله یشله بدبخت اولاجغنی آ کلاتیوردی :

— پاره ایله ، دییوردی . سعادت ، صحت ، دیرلک دوزدنلک اولاماز ، بنده بیلورم ، فاخر بک . فقط بوتون بونلر پاردسز اولورمی ؟ .. اويله ظن ایدرم که ، عائله ایچنده کیمسزک ، ضرورتک ایلک چوجوغیدر ! ..
معلا ، اوقادار مکمل دوشونویور ، دوشوندکلرینی اوقادار ساده ، دوزکون برافاده ایله آ کلاتیوردی که ، فاخر ، تحصیلی هیچده فوق العاده اولمیان ، طائله اوجاغندن باشنی چیقاروب حیاتی یاقیندن کورمه یه فرصت بولمامش اونک کی کنج برقیزک بوبیاکیسنه شاشیوردی . صوکر :

— آنهم ، دییوردی . اعتراف ایدرم که پاره یه بویوک برقیمت ، بویوک براهیت ویریر ؛ بونی بکاده تلقینه چالیشدی . حتی نیچون صاقلاییم ، اوزون مدت بنده عینی تأثیر آلتنده قالدیم . فقط نهایت اونک یانیلدینی نقطه لری فرق ایتمکده پک کوچ اولمادی . اودت ، آنهم چوق مبالنه ایدیور . سعادت پاره دیمک دکلدور . شو قادار که ساده کوزلرک اوکنی دولدوران ، صوکر بر آدیم اوتوده کی حقیقت قارشوسنده هیچ اولوویردن خولیلرله قورولمش رابطه لر ، یالکز دوماندن عبارت هوسلرده هیچ یاشایا بیلورمی ، بوده قابلی ، فاخر بک ؟ ..

استاسیونده تردنی بکلرکن کچن شو یاریم ساعتده او ، صانکه طائنیایان بر

مخلوق اولاشدی . فاخر که انسانلر ، هله قادینلر اوستنده کی نظریه لرینه پک کووه نیردی ؛ معلانک روحنده کی کیزلی کوشه لری ، اونده بردن بره کوزه چارپمایان جوهری شیمدی یه قادار کشف ایدمه دیکنه پک اوتاندی . بو ، یالکز جیوجیولرندن ، کدیلرندن ، شوالیه رومانلرندن باشقه برشی دوشونیمور کبی دوم دوز کورونن کنج قیزک حیات حقنده کی وقوفی ، کوروشلرنده کی اصابت مکر نه قادار ده ریندی .

فضله قونوشامادیلر ؛ ترهن کادی .. فقط بو بر قاچ قیصه دقیقه ایچنده فاخر کندنده بوس بوتون باشقه ، آ کلاتیلمیان بر حس دویمشدی . صانکه قورقورلینک بوشه چیقدیغنی آ کلایان چوجوقلر کبی سوينیوردی . نه آئی ، بو مستثنا قیز نه مکمل دوشونیوردی . بو کونکی کز مه ، انسانه طاتلی بر اویوشوقلر ویردن رؤیالر کبی کچمش ، اوه دوندکاری زمان معلا ، ینه اسکیزی کبی سا کن ، قیدسز اولمشدی .

فاخر ، آناطولیدن کلدکن صو کرا تیزه سیله برابر اوطورویوردی . شیمدیلاک حیاتی غایت بسیطدی . هر کون غزته ده چالیشیور ؛ اورتالق قاراریر کن ، یدی یه سکزه دوغرو مطبعه ده ایشلرینی بیتیرنجه تراموايه ، حتی تونله بنمه دن کزه کزه شیشلی یه چیقیور ؛ کیجه لرینی هان هپ اوده کپیریوردی . مهتاب آقشاملرنده بر آاز ماچقه یه ، طاشلغه ، بعضاً حریت تپه سنه دوغرو دولاشدینی اولوردی . آرقاداشلری هر زمان طوپلانیرلر ، پوکر اوینارلر ؛ بو آقشام ماقسیمده ، یارین آقشام (روزنوار) ده داها ایرتسی آقشام (غاردهن بار) ده اکلنیرلر ؛ کیجه یاریسندن صو کره بارلردن چیقنجه آرتیستلرک طوپلاندینی بر لوقظه ده بعضاً ده بوس بوتون صباحلارلردی . اونلرک آراسنده هیچ کورومنه ین فاخر ، صو ک زمانلرده سینه مایه ، تیاتروییه بیله کیتمز اولمشدی .

روحنده سکوته دوغرو بر صوقولغانلق ، تالنه صیجاقلغنه قارشى سونمز بر اشتیاق واردی .

بر آرزو کرا آناطولییه دونمک نتیاه کلدیکی ایچون تیزه سنده ده مسافر کبی اوطوریوردی . اوزون زماندن بری صاندقده محبوس کتابلری ایله آرالرنده صانکه آجی بر صوئوقلق کچمشدی . آقشاملری بوش لافلرله ، انشته سنک خوار دالاق - حکایه لری دیکه مکه وقت کیری یوردی . شاهین بك ، کنجلیکی ییچینلق طالمرنده کچمش ، حالاده او ماللارک هیچ اولمازسه خاطره سندن آریلامیان شن ، قهقهه لری بول ، متقاعد بر بحریه ضابطی ایدی . فاخرک بو دوشکون حالنی کوردجکه هپ اونکله آلاى ایده ردی :

— نه او ، دیردی . سن ده کول کدیسی کبی مانغال کناری آرامیه باشلادک ؟ .. نروده او سپور دیه داغلره طیرمانمالر ، بندلره ، بلغراد اورمانه قادار یایان کز مه لر ، هانیا ؟ .. هانیا هر آقشام سینه مالرده ، پهلوان کوره شلرنده ، یوق فوت بول ماچی ایمش ، یوق بوقس مسابقه سی ایمش ، دولاشوب دورویوردک . هله داها ، داها بر ایکی سنه کچسون ، قارپانتیه استانبوله کلش دیسه لر ، کیدوب باقمايه اوشه نیرسک ! . بزده سنک یاشده ایکن آله آووجه صیغمازدق ، هی اوغول ! . شمدی بویله نارکوله باشنده اودون کومور پیاسه سنی دوشونویورز ... آما ، سز او قادارده اولامازسکز . شمدیدن بویله چنکانه خروسنه دوندک ؛ بر قاچ سنه صو کرا گوشه مندرینه طوئقالانمش کبی بزکین ، هله قرق یاشنه کلدی کز می قولتوق دکنکنه محتاج اولورسکز ! ..

صو کرا آیاغه قالقار ، کورکنک اتکلرینی طوپلایوب بر دیزینی قیویرارق تکرار اوطورور ، چوق کورمش بر آدام طوریه باشنی ساللاردی :

— آرتیق اوله نمیه باق ! .. بن سنک یاشکده ایکن چولوق چوجوق صاحبی ایدم . بو سرسریلکک صوکنی کیم بولمش که ! .. کنجلیکده بکارلق بلکه خوش کورونور ، انسان فرقنده اولماز آما کونک برنده یالکزلقده چکیلمز

برشی اولور. برقاق سنه صو کرا ایش ایشدن کچر، سنده بزم اختیارلر مجلسنه داخل اولورسک!..

او زمانده آرتیق اوله نه بحثلری آچیلیردی. شاهین بک مرد یوره کالی، دوشوندیکی آچیقجه سویله یین بر آدامدی. فقط فکرلری هیچده بربرینی طوتمازدی. فاخره: «اولهن» دیه نصیحت ویریرکن بردن بره دوز، بو سفرده یکی لسلک قیزلری ایچون آغزینه کلنی سویلردی. صو ک سنه لرده کی اخلاق دوشکونلکنه دائر اونک بک قاهر، بک قورقونج حکملری واردی:

— شورادن مکتبه کیدوب کلن باجاق قادار چوجوقلره باق، دیردی،

داها سکز اون یاشندن باشلیورلر... کتابت درسلی ایچون اک عملی نمونه یی آلی مورلو مکتوب کاغذلرینه یازیورلر. هر آقشام هپسنک یولنی بکله یین بریسی وار. جنسیتی ادراک ایدمه جه ک یاشده اولانلر بیله تقلیده ایشه باشلایور. هله او سینه مالر یوقی؟.. برده باقیورسکز افندم، فرانچسقا بریتنک، یوق بیلم هانکی قجه نك هپ میخانه قیزلرینه، سوقاق سورتوکلرینه مخصوص یاماجقلرینی بزم کوچوک خانملر، اک ممتاز برشی کی عیناً تقلید ایتشلر!.. سینه ما وقعهلری، اونلره بویله مناسبتلرک قولایقلرینی، چاره لرینی او کره تیور؛ آراباجی رومانلری او کورپه قافالره حیات مخیل کی عکس ایدیور.. بونلر داها اون ایکی یاشنده بویله اولونجه اوله نه چاغنه قادار کچن سکز اون سنه ایچنده قاق دانه عاشق معشوق ده کیشدیریورلر، وار حساب ایت...

شاهین بکک کنج قیزلر حقنده کی اتهاملری بیتمز توکنمزدی. هم «اولهن» دیه فاخره چیقیشیر، همده صو کره یینه کندیسی:

— زمانه قیزلرندن خیر یوق، دیردی. نه که لازم، بکارلق سلطانلقدرا!.. تموز آیلری ایدی. شاهین بکک اقرباسندن برقالابالق بروسه دن مهاجرته مجبور اولمش، اونلره مسافر کلشلردی. آلتی یدی چوجوق، اوچ درت یابانچی ذاتاً داراجق اوک ایچنی آلتاوست ایتشدی. فاخره یینه محی الدین

شوقى بىكى زيارته كىتىدىكى كۈنلەردىن بىرىدى . تېزەسنىڭ بروسەدن كان اقباسنى
آ كلاتيوردى .
فخامت خانم :

— بىم عقلمە برشى كلىور ، دىدى ، جواد بك بو ياز قزل طوپراقدهكى
كوشكى كىرايه وىرمەدى ؛ بورايە طاشىنمايه جقلان . كوشك موبىلياسى فلان
هرشى تمام ، كىدوب كلك كوچ اولمازسە بورايە كلسە كىز ، فاخر بك ، هم اىكى
اوچ آى هوا تبديلى دە اولوردى .

شهر ك كورولتوسىندىن اوزاق ، بويلە مستىنا برصيفه دە صوك بهارى كچىرمك
تكلىفى فاخرە بك جاذب كوروندى . جواد بككە دە كوروشولدى ؛ محى الدين
شوقى بك ، او كىنە كلن هر يردە فاخرى اوقادار مستىنا بر كىچ ديه آ كلاتيوردى كە
جواد بك بيلە آز زماندە كىندى چوققۇلرىنىڭ دە تحصيل وتربىە اعتباريلە
فاخرە بكزە مەسنى تىنى ايدە جك قادار اونی سومە يە باشلامشدى .

برقاچ كۈن صو كرا فاخر ، اىكى كوچوك چاٹا ايلە اورايە كلىدى . معلا ،
هر زمانكى جدى ، لا قىد حالى محافظە ايدىيور ؛ فقط هر حالده اونك بورايە
كىدوب كلسىلە آز چوق علاقه دار كورونىوردى . فاخر ، كويه كلكدن
صو كرا بوش وقتلىرىنى ھې قىرلردە ، دىكز كىنارلارندە كچىرمكە باشلادى .
هر كۈن غىز تە يە كىدوب كلىور ، آقشامارى بر آراق محى الدين بككە اوغرا دىچە
اونلر ىمكە صالىور مىورلر ، صباھ قەھوۋە آلىلرىنە كەلدىكى اىچون دارىلا جق قادار
اكرام ، التفات كوستىيورلردى .

ھىوز بر ھفتە كچمشدى . بر آقشام فخامت خانم اومولماق بر خبر وىردى .
جواد بىكار قزىل طوپراقدهكى كوشكى قاسمە قادار كرايه وىرمىشلىر ، كلوب
بورادە اوطورا جقار مىش . فاخر بو عكسىلەكە پك ياندى . او ايسە برقاچ آى
بو پك سەودىكى كويدە غرىب دە اولسە كىندىسە خوش كلن ، يالگىز بر حيات
كچىرە جكنە سەوینیوردى . صو كرا ... صو كرا كىندى كىندىنە پك اعتراف
اىتمك ايستمەسە دە معلا يە ياقىن اولق ، آرە صرە اونی كورمك ، بونك دە
حياتى اوزرندە بر تائىرى ، قونى واردى .

فخامت خانم ، بازار ايرتسی به جواد بك طاشنيور! . دید کدن صو کرا :
 — سزه ده باغچه اوزونده کی اودایی حاضر لایتم . دیه علاوه ایتدی .
 فاخر بوکا اعتراض ایتدی . اونلرك کوستردکلری التفاته ذاتا يك متشکوردی ؛
 کندیسینی بو قادار دوشونمه لری ایسه نه عظیم بر لطفدی . فقط فضله کلفته ده
 معنا یوقدی . او زمان فخامت خانم :

— نه کلفتی او غلم ، دییوردی . اودا ذاتاً حاضر ، بزم ایچون ده فضله ..
 — ایسته دیکك قادار قالیرسك ...

فاخر ك بو قادار بویوك بر اییلکی قبول ایتمه سـنه امکان یوقدی . باباسی
 اولد کدن صو کرا آنه سیله برابر بویوك باباسنك اوینه کیتمشلردی . اوراده
 ایکن بیله خفیف بر طاتسزلنه قیریلش ، کیدوب آلتی سنه لیلی مکتبده قایانمشدی .
 فخامت خانمك اصرارلرینه معلا ده اشتراك ایتدی . بو هر زمان کندیسنه
 يك لا قید دوران کنج قیز ، طاشنمه ایشلرنده نه دن ایسه معتادندن باشقه
 اولویوردی . فاخر ، اونلردن چیتقدقن صو کرا آرتیق صوك کیجه لر دیه یالکز
 باشه بر ایکی ساعت قادار دکز کنارینه اینن قوروده دولاشدی . ایرته سی
 صباح غزته یه کیده رکن اسکی نشه سزلکی تکرار چوکمش ایدی . فخامت
 خانمك تکلیفی رده قرار ویردیکی ایچون آنجاق بر ایکی کون داها کویده
 قالابله جکدی . فقط اولمادی . صوك بر ایکی کیجه داها کویه کلدجه ، بر معتاد
 محی الدین بکلره اوغرایور ، صانکه اورتاده هیچ برشی یوقش کبی هرشی
 طبیعی کییوردی . بر کون جواد بکککیار کوشکی تمیزله مه یه کلشله ، خدمتچیلر ده
 اونك چانطالری اوتیه کوتورمشلردی . فاخر آقشامه کلوب بو وضعیت کورونجه :
 — یکی ، دیدی . مهتاب کیجه لری کچنجه یه قادار بر ایکی کون داها ،
 فقط شوراده ، شه زلونفك اوستنده قالیرم ... ذاتاً یاز کیجه لری ، هم قیسه ،
 هم صیجاق

فخامت خانم :

— شهزولونك اوزرنده مى ، والله ، سيورى سينكلردن چيچك چيقارمسه
دوئرسك !. دييور ، فاخرڪ بو ذاتاً ضعيف مدافعه سنى قاپاتيوردى .

*
**

فاخرڪ دفترندن :

۲۴ آگستوس ۳۳۷ — ايشته تام بر هفته در محى الدين بکلردهيم . مسافر-
پرورلڪك بو درجه سى ، بو قادار بويوك بر لطف ، نه يالان سويليهيم ، بنى پك
نه زييور . انسانلردن ايلك كورمك نرده ؛ بنى يتشديرمكه مكلف ابوينم ،
اقرابام بيله ، حتى وظيفه لرى درجه سنده بر علاقه يى بندن اسيركه دكلرى ايچون
شمدى بن بو اكرام طوفانه غيراخياري برسبب آرييوردم .
دوشونويورم كه انسانلرك مناسبتي كلوب كلوب نهايت منفعت دايانير . فقط
اونلرك بندن بگه يه جك هيچ بر استفاده لرى يوق ايكن بو صيحاقلنه صرف
ايلكدن باشقه نه معنا ويريلاير ..؟

كون كچدكجه اونلره قارشى پك صميمى بر حرمت دويويورم ؛ دوغروندن
دوغرويه ايچمدن كلن بر حس ... اولجه فخامت خانم ايچون ويرديكم حكملرك
آراسنده بلكه بر آاز منفى اولانلر واردى . شمدى ولو بر آن ايچون اولسون
بويله دوشونديكمه پك محجوبم . مكر اونك عصبي نوبتلرى ، خويسنزلنى هپ ،
هپ خسته لقدمش ... يوقسه قلبجه او قادار ائى بر قادين كه .. دوكتورك حتى
وار : كوش ، هوا اونك قلبه ، بوتون فضيلتارينه حيات ويردى ؛ قيشين كورديكم
فخامت خانم ، بو كونكى مستثنا يوره كلى قاديندن او قادار فرقلى .

معلا ، انسانى چوق شاشيرتيور . او ، صاف ، بر داملا صو قادار براق ،
بوش قيز بنم ايچون آ كلاشيلماز بر روح اولدى . كندى آره لرنده ياشامام
ايچون آنه سنك حسياتنه اونك ده اشتراك ايتديكى ميدانده . حتى بونلرده
بعضاً كنديسنك دوغروندن دوغرويه مؤثر اولديغنى ده حس ايتيور دكم ؛ فقط
بيايمم كه ... او قادار آ كلاشيلماز بر حال .

قزل طوپراقدن دونديكمز آقشام اوزون اوزون يوروتديكى محاکمه لرنه مکمل، نه
 ميتندي. حال بو که ظواهره، مادی هوسلره قارشى بر تورلو کیزله نه مه ين ضعفى بن حالا
 هر وسیله ده سز یورم. شمدي دائماً برابرز. سوزلرينك، باقىشلرينك اك کيزلى، اك
 کوزه چارپمايان معناسى اونى بکا بر آرز داها ياقيندن طانييور. ديمك که، چکن
 سفر سويله ديکى شيلر کندنده حس ايتديکى شيلر دکل، ساده جه فکرلری
 ايمش. حقیقه، انسانلر کندیلرندن بحث ایدر کن اولدقلرينى دکل ده اولمق
 ایسته دکلرينى سويليورلر.

ينه بر آقشام تیزه سیاه برابر بويوك آطيه مسافرلکه کیتمشلردى.
 اسپلانديد پالاسده «تهدانسان» وارمش. اوراده چکن بر قاچ ساعتى معلا
 ايرتسى کون، صوفراده بزه آ کلاتير کن، دقت ایتدم؛ شو بزم معهود کبار،
 خاير، زنکين عالمك واو عالمده کوردیکى يا ايچى، يا طيشى بويالى سيمالرك
 کنديسنده دهرين بر تأثیر بر اقدینى ميدانده ایدی. بيليرم که او، کيرلى فقط
 مشعشع حیات اولا هر کسه جاذب کورونور؛ اوده بوضعفندن دولايى معذوردر.
 يالکز کوکل داها باشقه تورلو ایستيور.

آقشام اوستى واپورده بر آرقاداشك ألنده [مانون لسقو] واردى. اوکا
 کوز کزديردم. کندى کندمه کولويورم؛ أوت، همان هر کس سهودیکى
 قادينله مانون لسقو آراسنده مشاهتلر بولور. فقط جداً معلا، بعض دقيقه لرده
 مانونه چوق بکزه يور. پک صاف، پک چوجوق، پک صيجاق، صو کرا
 بردن جي جيلي جيلى شيلره قارشى احتراص دهنه جك قادار قوتلى برانجذابله مفتون....
 بو آقشام هيچ يوقدن برشى بنى چوق صارصدي. أوه کلديکم زمان جواد
 بك، قاریسى، قیزی، چوجوقلری هپ اوراده ایدی. ذاتاً هر زمان بويله؛
 ايکى حائله اويانيق قالدقلری بوتون ساعتلری بر آراده کچيرييور. فقط داها
 گوشکه أیجه يرله شه مه دکلری ايچون رفيه خانمى هر کون بيک دعوت، بيک
 نازله أودن چيقارا بيليورلر. بو کون ده فخامت خانم، اونى چاغيرتمق ايچون
 بر حيله دوشونمش:

— فوآد پاشالردن معلايه كوردوجى كله جكمش ، بن خسته يم ، قوزوم
سن ده بولون ! . . ديه خبر يوللامش . فوآد پاشالر ساده كويده دكل بوتون
استانبولده احتشاملرى ، اسرافلرى ايله شهرت قازانمش يك زنكين برعائله .
رفيعه خانى بويله دوزدله كتير مشلر ؛ بر آلاى ، بر كوردولتو . . . بن ده تام بونك
اوستته ككدم . رفيعه خانم قيزيور ، هر كس قهقهه دن قيرياموردى . بيلم
نه دن ، بويله هيچ اصلى اساسى اوليان بر لطيفه دن بيله آكلاشيلماز بر آجى دويدم .
اونلرى بيلمور ، دوشونجه لرني آكلاميور دكلم . معلايى بويله بر يره كالين
ايتك ، ايشته كوردكارى رؤيا . .

بو كوردولتونك اورتاسنده معلاده كولويور ؛ صانكه پاموغك بورنه قولونيا
سهرپمشلرده اونكه اكله نيورلر ، اوقادار قيدسز ! . . .
اورتاده هيچ برشى يوق ، كيمسه يه قباحه بولمق قابل دكل . فقط اونده
آلدانديغمى حس ايدييورم ، اچريدن كلن برشى . . . صو كرا صو كرا . . . يا ،
يارين ، بو كونكى شاقا جديله شيويرنجه كه مطلقا كونك برنده بويلاه
اولاجق ، يا اوزمان ؟

محي الدين پكلرك كوشكى بردوكون اوى كبي ايدى ؛ نشئه لى ، كوردولتولو ،
پر حيات . . . صباحلرى ، اكثر يا فاخر چيقاركن ، جواد بك كاير ؛ قپودن
كوردولتولرله ، دوكتوره سسله نير ؛ اويويورسه يوزينه صو سهرپر ؛ معلانك
قاپيسنده ترامپت چالاردى . بو كوردولتولره اشتراك ايتمينلر فاخرله ميجلدى .
جواد بك بويوك قيزى ، هله اوصانكه بوس بوتون دنيايه كوسكوندى . اك
زياده آنه سنك ، باباسنك كنديسنه قارشى كوستردكلرى اهماله مايوس
اولويوردى . تحصيلنه ، صحتنه هيچ بر شيئه اعتنا ايديله مسى ، اوته كي قارده-
شارينك ياننده كنديسنك اووه ئى ارلاد كبي طوقولماسى بو ، ذاتا ايجلى قيزى

پك بدبخت ايتمىدى . اونلارە ابزال ايدىلن نوازشلردن نە ايچون كندىسى كوچوك ياشدن برى محرومىدى ؛ بوندەكى معنایى دە كشف ايتيور دكلدى . چونكە اوتە كىلر داها كوزەداش .. ھېسى بويلە سويليوردى . اوك ايچندە ھر حركىتى جرم عد ايدىليور ؛ بش ياشندەكى كوچوك قاردهشەنە وارنجەيە قادار ھر كسندن كندى چيركىنلىكنى باشە قاقان حقارتلارە اوغرييوردى .

فاخرە راست كلدىكى ايلك دقيقەدن برى دەرین برصوقولنانلق كوستردى . اونك جديتى ، بوصاچلى صاقاللى بىكلرك شاقالرينە لاقيد قالماسى ، دوشونوشى ، طورلرى ، سوزلرى ، قوتى ، كينشى آرى آرى ھر شىئى اونك نظرندە بويوك برقيمت قازانمىشدى . حتى دنيلەبيلر كە ھپ اونى تقليد ايدىيور ، ھر سويلەدىكنى برنص قاطع كې قبول ايدىيوردى . فقط پك چابوق آرقاداش اولاجقىلرينى ظن ايدەر كن اونك كندىسنە قارشى دە اوزاق دورماسى زواللى يى شاشيرتمىشدى .

معلا ، آرتىق بوس بوتون حوپپا برچوجوق اولمىشدى . جواد بىكلە شاقالرينە ، اويونلرينە پايان يوقدى . بربرلرينى بردقيقەراحت براقيورلر ؛ محى الدين بك ، جواد بك ، برده معلا اوك آلتنى اوستتە كتيرييورلردى . فخامت خانم افندى دە اطرافندەكى بوجوشغونلقتدن نشئەلەنيور كې ايدى .

فاخرلە معلانك آراسندە باشلايان بوغريب قيرغينلغە عجباً سبب نە ايدى ؟ .. فاخر برمعتاد ، جدى داورانيور ؛ فقط اوتەكى صوك كونلردە بوس بوتون محترز ، بوس بوتون اوزاق دوروييوردى ؛ صانكە ، آرتق ھر كون برابر بولونمىقدن بيقيامش ، طييعلەشمش برآرقاداش كې ، ياخود آرالرنده برابطەنك دوغماسنە كندىسى دە امكان كورەمەش كې برحالى واردى . پك آزالاف سويليور ، كوزلرى اونككىلرە پك آزال تصادف ايدىيور ، جواد بىكلر كيدنجە آلە بررومان ، برغزتە آلارق ساعتلر جە اوستتدن آيرىلييوردى . ايلك زمانلردەكى صيجاقانەمقابل شمدىكى توحشك ، اھلاك معناسى آراشديرمامق ايچون كندى كندىنە جبر ايدن فاخر دە كورونوشدە پك سا كندى .

فقط بوده کیشکاکچی دوشونمه مک فابل دکلدی . اوزمان خاطرینه یالکیز برشی کلیوردی ؛ احتمالکه بوتون بونلرک سبی ساده اوایدی :
قاچدر دقت ایتشدی ؛ معلا : « آمان شیشمانلامیهیم » دیه یمک یه مزردی .
فاخر ، بومعناسر اندیشه لر یوزندن اونک رنکی ، حتی صحتی بوزولدیغنی کوردکجه ، عادتا بر تربیه بدنیه خوجاسی کبی ، داها صحتی چاره لردن بحث ایتک ایسته مش ، منتظم ییوب ایچمکه برابر وجودی دائما فعالیتده بولوندیرمق شرطیله ده عینی مقصدک تأمین ایدیه بیله جکنی سویله مشدی .

برده او ، یورورکن باشنی چوق ایکردی . بویله باشی یرده اولق ، اسکی معنا سیله کویا عصمتک ده بر افاده سی عد اولونا بیلیردی . فقط کندیسی باش اوکه ایکلدکجه حصوله کلن تدورک شمدی مودا اولدیغنی اعتراف ، حتی ادعا ایده جک قادار صفوت کوستریوردی ! . فاخر برکنج قیزی نصیحتله اقناع ایتمه نک امکانسزلغنی ، البت ، بیلمیور دکلدی . فقط اونک برآزده کندیسنه ایناندیغنی کورمش اولسه یدی ، بوندن نه قادار مسعود اولاجقدی .

حال بوکه ایشته مبجل ، مزینات ونجوهراته قارشنی فاخرک لاقیدیسنی اوکرندیکی کوندن بری کوپه لرینی بیله طاقماز اولمشدی . اونک نظرنده ده آزیحق قیمتی اولسه یدی بویله می اولوردی ؟ . ذاتاً کیمسه نک آرزولرینه قاریشماق ایسته مه دیکی حالد بونون بونلری ینه کندیسنک صحتی ، اییاکی ایچون سویله مشدی . اوندن صوکر ، طبیعی برداها آغزینی بیله آچادی . ایشته هنر کسک یاننده اوقادار شن کورونن معلانک کندیسنه قارشنی بالعکس محترزداورانماسنی — غیر اختیاری — دوشوندیکی زمان بوندن باشقه برسبب بولامیوردی . ذاتاً نه اولابیلیردی ؟ آرالرند جدی هیچ بر بحث کچمزدی که . . بربرینه خطاب ایدیشلری بیله پک نادر اولور ، بونلرده هر زمان پک بوش شیلردن عبارت قالیردی . هر جمعه ، آراد بردد آقشام اوستلری رفیعه خانم ، معلا ، مبجل ، فاخر هپ برابر کز مه یه چیقارلردی . مبجل بویله کزینتیار ایچون چیلدیریر ، معلا ده قیرلر آچیلدکجه فاخره قارشنی اوده کی دورغونلغندن برآن ایچون صیریلش

کورونوردی . فقط یه بوصی جاقلقده بردن بره سونر ، اوه دوند کدن
صو کرا بوس بوتون سیلنیردی .

کون یکدیگه بوکنج قیز قابنی - حالا کیزلی ، حالا معمالی قالان بر چوق
کوشه لرینه رغماً - بر آاز داهایاقیندن طانیق قابل اولویوردی . داهادوغروسی
هان هر وسیله ده تجلی ایدن یالکیز بر حقیقت واردی ؛ همده فاخر کبی مال دییه
ساده براوجاق ، ساده بر کتبخانه تمیل ایدن قیلر ایچون اوقادار آجی بر حقیقت که...
آرتق تأویله هیچ امکان یوقدی : معلانک شمدیلک ساده جه سوس ، ساده جه آلاش
ترنم ایدن هوسلرنده اویله براستعداد کیزله نمشدی که یارین ، بوچوجو قجه
هوسلرک کوزلری قارارته جق قادار شدتلی احتراصات حالنده انکشاف اتمه سی
یک طبیعی بر حادثه اولاجقدی . احتمال که فاخره قارشى بردن بره ده کیشمه سی ده
هپ بوندندی . اویله یا کندیسی ، اوزرندن شدتلی بر روزکار کچمه دجه حیات
کوروله مهین را کد صولر کیدی . برکنج قیزک کوزلرینی قاماشدیرا بیله جک
حیات ، ساده جه رنک وضیا طوفانندن عبارتکن فاخر ، هان هرقله خویلاوی
رعشه لر ویردن شیلر قارشوسنده بیله ، صانکه عنادینه کبی ، هیجانسز دوردجه
معلا ایچون یک بوش ، یک معناسز کورونویوردی ؛ بو شبهه یوقدی . حال بو که
ایلمک زمانلرده هیچ ده بویله دکلدی . حتی آراده بر (ده لفین) ی قصقاندیغنی
بیله ایماء ایده جک حاللری اولماشمیدی ؛ هله فاخر صره سی کلوب ده بر آاز
کندی سمترلرندن ، براز سینه مالردن ، تیاترولردن بحث ایده جک اولسه معلانک
کوزلرندن بر بولوط کچر :

— اویله یا ، دیردی . انسان اویله نشئه لی حیا ته آلیشدقن صو کرا بوراده
البت صیقیلیر ، بزم ابتدائی اکلنجه لر مزدن ، طیبی ، ذوق آلاماز . کیم بیلیر
فاخر یک ، بزی اوشن محیطلرده کی دوستلره نسبتله نه قادار معناسز بولویورسکز ؟ .
بوسوزلرده بر آاز ستم ، بر آاز لطیفه ، حتی بر آازده تعریضه بکزهین فقط
هر حالده یک طاتلی برادا واردی . شمدی ایسه مبجلمک یک بارز تمایلاتنه
هیچ ده آلدیر میوردی ؛ بو ، عجب ساده جه اونی رقابته لایق کورم دیکندمی ایدی ؛

براقشام ايکيسنك بالقونده اوطوردقلىنى كورمش ، آشاغى اوتە كيلرک
يانه اينجه ، سورانلره ، سانکه کيزلى برشى خبر ويريور کي آلنى آغزىنك
کنارينه کوتوره رک :

— شاعر بکه شاعر خانم بالقوندن ده کيزى دیکليورلر ! . . ديد کدن
صوکرأ معالى معالى کولمشدى .

فاخر ، کويه دونديكى زمان اکثريا رفيعه خانمله ميجلى ، معالايى استا-
سيونده بولوردى . اولر هم آقشام کز مه سندن دونمش اولورلر ، هم ده تره ندن
اينه نلرى سير ايدەرلررى . کويک ذاتا بوندن باشقه برا کلنجه سى يوقدى .

هان هر آقشام رنکا رنک ، بديعى برقالا بالق تره ندن چيقانلرى قارشىلامق
ايچون استاسيون جوارينه سرپايلردى . استانبولدن طوغرو سياه بردومان
يولک کوشه سنى دونونجه يه قادار پک کزیده ، پک مستنا کينمش قادينلر
يوللرده ، طوتوليان فقط قوقلانان طاتلى ازلر براقه رق دولاشيرلر ؛ صوکرأ
تره نک سسى تا اوزاقلردن دويولونجه استاسيونک اطرافه ديزيليرلردى . هر کس
باباسنى ، قارده شنى ، قوجاسنى بکلردى . واغونلر داها دورمادن ، بربرينه
دايانه رق نجيردارکن کوزلر پنجره لردن آشنا سيالرى آرار ، بولونجه اوزاقدن
تبسملر ، اشارتلر اوچوشور . . . مردیودنلردن اينه نلرک هر برينه دوغرو
يا برکنج قادين صوقولور ، ياخودده پرخنده برچوجوق آتيلير . . . کلنلرک
آلنده کي پاکتلردن ، چانطه لردن برآزى ده بکه ينلره داغیلدقن صوکره ، بش
اون دقيقه ايچون بوقالاق دکانلرک اوکنده ده دالئالانير ، ده ا صوکرأياواش
ياواش يان سوقاقلره سوزولور ؛ نهايت اطرافده يالکز کز مه يه چيقمش اولانلره
بوندن صوکره کي تره نى بکه ينلر قاليردى .

کويک ايچنده کي حيات هان هان ساده بوندن عبارتدى . هر کس بوساعتلره
درغرو سوقاغه چيقمق ايچون سانکه قورولتس کي ايچنده براحتياج دوياردى .
قومشو اوليانلر ، بربرلرني طانمايانلر ياواش ياواش بواقشام کز مه لرنده کوز

آشنالغی یاپارلر ، حتی .. حتی .. باشقه فرصتلردن محروم اولان بعض قلملرک آراسنده کی کیزلی یوللرده بوراده آچیلیدی .

جوارده پک زنگین ، پک کزیده عائله لراو طوروردی . کوزلاکده ، کینیشده کی ظرافتده کویلرینه برنجیلکی قازاندیراجق قادینلر واردی . بوتون بوبدایمی طویلايان استاسیون کزمه لری ایسه استانبولک باشقه هیچ برکوشه سنده کورولیه جک برلوحه ایدی .

فاخره بویله استاسیونده تصادف ایتدکلری زمان رفیعه خانمله قیزی ده براز صوکر ا کندی کوشکلرینه آریلیرلر ، معلا اونکله یالکز دوندی . صوک کونلرده بویله یالکز دقیقه لری اوه قادار ا کثریا ایکیمی ده صوصارق کچیر . ییوردی . اوده هر نفس آلیشندن نشئه طاشان معلا ، یالکز قالنجه صانکه بوس بوتون باشقه لاشیوردی . بر آقشام ینه بویله دوندکن کوندوز جوادبکک باشنه کلنری ، باغچه ده ناصل حوضه دوشوردکلرینی آکلاتیورلردی . خاله سندن آریلقدن صوکر ا معلا ده برایکی کله ایله حکایه یی اکمال ایتدی ؛ صوکر ا :

— ای ، دیدی . باقالم سز بو کونی ناصل کچیردیکز ؟ . صوکر اده بونی صوردیغنه پشیمان لولمش کی صوصدی . دیمک که قاچ کوندرا اونک حالنده کی بوباشقه لق ، بوسکون داها زیاده جبری ، داها زیاده التزامی ایدی . فقط عجباً بونلره سبب نه اولاییلیدی ؟ .

فاخرک هر آقشام کتیردیکی غزته لری مبیجل قاپار ؛ اراده بر : « بونی سزمی یازدیکز ؟ » دیه فاخره صوراردی . معلا ایسه غزته ده یالکز رومان تفرقه لرینی اوقوردی . مبیجل ینه برکون :

— فاخرک بزم کوی ایچون بر مقاله یازمش ! .. دیه کندی طوتامیه رق باغیردی ؛ صوکره معلا یه ده اوزاتدی :

— آبالا ، باق ...

بو ، تردن وواپور یولجیلغی ایچون قارالانمش بر موسم مصاحبه سی ایدی . اوتیه کی ، مبیجلک کوستردیکی مقاله یه شویله برباقدی ؛ اوقومادن ینه کندی

رومانه ايکيدى . الى قلم طوتان برآدام ايچون يازديغى يازينك قيدسزلقله قارشيلانماسى نه آجيدر ؛ هله بو، کنديسى ايچون برشيلار دويولان کنج قيز طرفندن ده اولورسه ...

کونلر بويله کچيور ، محى الدين شوقى بك ايله رفيقهسى ، فاخره هائله ارکانندن برى کبي معامله ايدیورلردى . فيخامت خانم صباحلى ايرکندن قالقوب فاخرک قهوه آلتيسنى حاضرلاتيور ، اونک اک اوافق احتياجه قادار هر شيئى دوشونويوردى . کوندوز نادر برىمک ينسه ، فاخر ايچون ده مطلقا آريليور ؛ فريدون بک کلدیکی بازار کونى تریت ايديلن مثلا بريلديرجين ضيافتى ، او دوندورماسى ، جمعه کونى ده فاخر ايچون تکرارلانيوردى ؛ اونى اوقادار سهوييورلردى .

فاخرده آزچوق بونلرک آلتنده قالممايه چالشيوردى . مثلا کوى زنکين هائله لرياه مسکون اولديغى ايچون پک بهاليلقدى . هائله رئيسلى برر چانطا ايدنمش ، اولرى ايچون اوته برى استانبولدن کتيريرلردى . فاخر، بوراده کى قصابلرک استانبولدن يکرمى اوتوز غروش داها بهالى صاندقلىنى ايلرى سوردهر ؛ بر کون طوسيه پرنچينک اک اعلاسنى پک اوجوز بولديغندن ، ايرتسى کون حلب ياغنىک حيله سزىنى کله پير دوشوردیکندن بحت ايدهرک هر آقشام بويوک برآل چانطاسنى دولدورور، همان هيچ الى بوش دونمزدى . نه وده کيلرک جيچيلى جيچلى شيلره قارشى ضعفى بيلديکى ايچون آرادهرشکرمله ، بيسکوى، چيقولاته، لاوانطا نوعندن اوافق تفک ايله خاطر آلماسنى ده اونو تميوردى .

هر کون استانبوله کيدوب کلدیکی ايچون کنديسنه ايصارلانا بعض شيئک برقچ دفعه پاراسنى ويردکلى ده اولمش ، فقط صوگرا حسابى هرايکى طرفده اونو تمشدى . او ، بر زمانلر قيافته چوق اعتنا ايدر ، پاکت طاشمايى بيله ايسته مديکى اولورکن شيمدى هراقشام النده قوجامان چانطه ، اصما آلتى ، بالى بازارى دکانلرنده دولاشمقدن غريب برذوق آليور ؛ بونکله صانکه برهائله قورومى ايچون کندينى آليشدير ييوردى .

اوتقسیطی ایچون خانمك كوپه‌لری ترهین ایدیلشدی . شمدی بانه‌یه یوز
الای لیرا ویریلزسه بونلرده صاتیله جقدی . فاخر ك ایسه اوكونلرده حاضر برآز
پارەسی واردی . كوپه‌لرك عاقبتته هپسەنك آز چوق صیقیلدیغنی حس ایدنجه
کتیروب کندیلرینه اودونج دییه یوز الای لیرا ویردی . بونی تکلیف ایدرکن
بیله صانکه اونلری اینجیتمش اولمقدن قورقور، چکینوردی . صوگرا آراسی
برمدت چکدی . اونلرك ینه بيلمم نره یه ویریلسی ایجاب ایدن بورجلری واردی ؛
حتی بعض شیلر صاتماي بیله دوشونو یورلردی . فاخر برکون بانه‌ده کی پاراسندن
قالان ایکی یوز اوتوز لیرای ده کری چکدی . کندیسنه قیشلق برازاوته‌بری
آلمق ایچون «بهیگر» ده دولاشیرکن دیوارده کی ساعته کوزی ایلشدی ؛ واپوره
سکز دقیقه قالمشدی . کندی ساعتك دورماسی یوزندن کچ قالدیغنی آکلاینجه
یوکسك قالدیرمدن قوشه قوشه کوپری یه ایندی . واپورده پاکتترینی قویوب
مندیلانی چیقاریرکن پارالرینی قویدینی ظرفی یرنده بولامدی . بانه‌دن آلدق‌لری
ایله کندی جبنده کی پارادن ایکی یوز اوتوز سکز لیراسی قالش اولاجقدی .
حال بوکه ساده پانطالونك جبنده اوراق پارا اوله‌رق براییکی یوزغروش واردی .
ایشی آکلادی . کندیسی کبی اون پارای یرنده قوللانہ‌جق قادار حسابی
دوزکون ، مقتصد بر آدام ایچون بو ، هر حالده پك آجی بر زیاندی . هله
محی‌الدین بکه یکیدن ایکی یوز لیرا اقراض ایتہی دوشونورکن بو آرزوسنه‌ده
امکان قالمادیغنی ایچون بوس بوتون اوزولدی . اوه کلنجه کیمسه‌یه برشی
سویله‌مدیکی حالده معلا اونده کی پریشانی سزمش اولاجقدی که مستنا اولارق
برقاچ دفعه صورتی . فاخر ، باشقه زمان اولسه همان هرکس کبی کندیسنی ده
آزچوق متأثر ایده‌جك بو حادئەنك آجیسنی پك اوزون مدت دویمادی . بوراده کی
حیات اوکا اوپله برمستی ویرمشدی . اطرافنده کی نشئه ، خنده آراسنده هرثانیه
او قادار طاتلی کچیوردی . صانکه بر تورلو قاووشولامیان حیات مخیل بوندن
باشقه برشیئمیدی ؟ . شوراده هرشی تمیز ، هرشی ساکن ، هرشی نشئه‌لی
ایدی . آرایه نه برحزن ، نه بریالان ، نه برریا ، نه بر دیدی قودی صیزمیوردی .

انسانلر آراسنده هر ثانيه منفعت، هر ثانيه يالان فيصيلدايان صوئوق روزكارك صوقولاماديغي بويووا او قادار ايليقي، او قادار راكد ایدی که ... صوگرا، بوتون سهودکاری ده ياننده ایدی. ايشته فيخامت خانم، ايشته محي الدين بك، ايشته اونلرک سهودکاری، دوستلری، نهايت ايشته معلا ... فاخرک شمدي يه قادارکی حياتی اوکا غایت بدبين بر فلسفه اوکرتمشدی. اولا کندی آنه سیله باباسندن باشلا يارق هر کون راست کلدیکی عائله لرده کی چکمسزلک اونى پک قورقوتمشدی. دارالفنون سنه لری، غزته جيلک، خوجالق، حتی بر آز تجربه ايتدیکی تجارت اوکا پک چوق کیمسه لرله طائيشمق فرصتی ویرمشدی. شیشلینک، بك اوغلنک اک يوکسک ديه آدی چيقان محیطلرینه، اوراده کی انسانلرک آراسنه کیرمش چيقمش، اوزاقدن پک جاذب کورونن قادینلری یاقیندن طائیش، برقسمنک محرمیتته قادار صوقولمش، شهرک اک زنکین، اک کبار عائله چوجوقلرینه مخصوص برقیز مکتبنده خوجالق ایتمشدی.

هله اوقیز مکتبی کنديسنه نه لر اوکره تمشدی؟.. اون ايكيشر، اون دردر ياشنده کی مینی مینی قیزلرک حياتی اينانيلاجق شی دکلدی. اونلرک «تنفس» دقیقه لرنده، باغچه ده آغاچ کولکه لرنده فيصيلداشدقاری اسرار، همان هیچ برنده اکسیک اولمايان مینی مینی خاطره دفترلرینک يابانچی کوزلردن کیزلی گوشه لرنده کی تاریخلر، ياپیشدیرلش قورو چيچکلر، معناسی يالکز برقاق کیشی يه مکشوف کله لر، مراتلی برانسان ایچون اوزون تدقیقلرله بیتیمه جک قادار جاذب وزنکیندی. بو حاصیه لرک او صحیفه لرده کیزلی عجبانه لری واردی؛ او دفترلری دولدوراجق نه لر بولویورلردی؟.. اویله برایکی دفتر فاخرکده آلنه چکمشدی.

هله معلم خانملردن بعضاری آراسنده کی دیدی قودی؟.. اونلردن برایکی سیله طلبه دن برقاقی آراسنده کی رابطه لر؟..

فاخر، بوبعضیسی اون آلتی اون یدی ياشنده چارشافلی خانملرک محیطنه تاریخ خواجه سی صفتیه کیردیکی زمان کوستریلن اعتماد حرم تسزلک ایتیه یی، وظیفه سی برثانیه ایچون اونو تمای خاطرینه بیله کتیرمه مشدی. اکیاشلی باشلی

خوجاى بيله قيصقانديره جق بر جديته درسه كيريور ، تنفسده ، يمك سالوننده هب عيني آغيرلغى محافظه ايدىيوردى . فقط بونلر ، نه شيطان شيلردى ياربى ! . درسك اورتاسنده اولماق برشيدن مناقشه زمينى آچارلر ؛ كوزلرينك اك اينجه اك اوفاق حر كترليله كندى آرالرنده قونوشورلر ؛ اينجه دن اينجه يه اك كنه جك موضوعلر بولورلر ؛ صوكرا بردن دوروب دوروركن آغلارلردى . انسان اونلرك آراسنه - فقط معلم اولارق دكل - كيرسه بوبديعى صحنه لرك قارشوسنده پايانسز بر ذوق دوياردى .

هله ايجلرنده بريسى واردى ؛ ياراديلشده كى مستثنا ذكاسى ، هنوز كندىنى بولمايه باشلايان قادينلغى ايله برلشنجه بر خارقه ، بر داهيه اولمشدى . درس آراسنده ايجندن چيقلميه جق اويله شيلر صورار ؛ ظاهرى بر صفوتله اينجه دن اينجه يه اويله اكله نيردى كه ...

فاخر ، بونلرك آراسنده بولونديغى مدتجه عادتاً اوزون اوزون تبعلر ياممشدى . صوكره مكتب مديرينك تور كچيلاك علمينده كى متمادى پروپاگاندا سى متاركه سنه لرند بوس بوتون تكاثف ايدنجه فاخر ، طبعى ، مكتبدن آيرلشدى . بر كون آرقداشلرندن جلال ايله برابر او معلم خانملردن برينه تصادف ايتملردى . بواون سكز ياشنده كى كنج قيز كنديلريله برابر (مولاتيه) ده چاي ايجمه يى بلاترد قبول ايتمش ؛ اورادن چيقوب سينه ما مائنه سنه ، صوكرا ده او آرقداشنك اوينه كيتملردى . معلم خانم جلال ايله قارشيلغى بر قاق [آپه رتيف] آلوب ده كوزلرى دومانلا نجه مكتبده كنج قيزلرك آراسنده دالغالانان ديدى قوديلرى اونلره افشا ايدم جك قادار آچامشدى . فاخر ، كوزلرينه بر آزدقته باقمايه بيله جسارت ايدم مديكى اومينى مينى لردن بعضريله معلم خانملردن برايكيسنك نه شيطانلقلر دوشونديكنى ، ار ككلر حقنده نه لرفيصيلداش دقلرينى بويله ينه اونلردن برينك « كندى جنس نه اهاتى » ايله او كره ندكجه شاشيريور ؛ انسانه ايلك باقىشده صفوت و معصوميت افاده ايدن كوزلرك ، او كسيك صاحلى و بعضيسى هنوز قيصا چورابلى صاحبلىرى برر برر خاطر لايه رق :

« سن دده می ، سن دده می ؟ » ديه خيالاً او مینی مینی شیطانلری استنطاق

ایدیوردی .

تصادفلر اوکا بر چوق یرلرده ، پك چوق کیمسه لرله طانیشمق فرصتی ویردجه عکسی کبی هپ انسانی بدینلکه سوق ایده جك شیر او کره نمشدی . اوزماندن بری انشته سی شاهین بکله قارشیلقلی اوطورورلر ؛ قادینلره آتارلر ، طوتارلردی : بوئلکته اخلاق مجرد ومستقل برشکاده دکل ، دین واسطه سیله تلقین ایدیلیوردی . حالبوکه سنه دن بری خلک بر قسمنده دینه قارشی آجی برکده وشکلک واردی . دین بویله امله اوغرایجه اوکا استناد ایدن اخلاق ده بوس بوتون ییقلمشدی . بعض یا کلش تلقینلر ، هضم ایدیه مه مش مدنیت تقلیدلری اجتماعی بنیه یی باشقلاشدیرمش ، هله حرب سنه لرنده کی ضرورت ، عفت وعصمت تلقیارینی بوس بوتون طانیمه جق قادار دیکشدرمشدی . فاخرکه اون بش سنه لك تحصیلدن صوکراده کتابلرینه صادق قالمش بر کنجدی ؛ هله دارالفنون « قوریدورلرنده » قاینانشان همانک آتشی ایله طوتوشدینی زمانلرده بوتون او دائماً ایلری آتیلحق ایسته یین هیجانی کنیدیسی ده دویمش ، تجدد نامی آئنده هر شیئک ، تکمیل آرقداشلی کی ، اک مفرط طرفداری اولمشدی . حتی او ایچنده ، شویله اورتالغک حالندن لاف آچیلوب ده انشته بك :

— اخلاق قالمادی ! . دین اونوتولدی ! ..

دیه معتاد نطقلرینی ایراده قالدینی زمان آد مجنز ، ارکان حرب مکتبنده کی بویوک اوغلی فؤادله فاخری ، هپ او تجدد سوداسیله جوشان برر مخالف اولارق قارشوسنده بولوردی .

فقط هر کونکی انکسارلر ، هر کون مظلم بر رنکله بر برینک آرقاسندن اوزانان حادثات اونی ده شاهین بكك قافله سنه — بوس بوتون دکل ، فقط ایکنجی بر حزب حالنده — الحاق ایتدی . آرتق بوتون بد بینلر کی اونلرده اییلکک ماضیده اولدیغنی قبول ایتشلر : — کوندن کونه هرشی فنالاشیور ، هرشی بوزولویور ! .. حکمنی ویرمشلردی .

اون آلتی اون یدی یاشنده یوزینه باقیله بیه جک برقیز، دییورلردی، مکتبه کیتسون، کیدوب کلیرکن تراموایله بئیسون، جاده لرك قالابالغندن کچسونده، یولنی بکلهین، پیشنه طاقیلان بریسی بولونماسون هیچ، قابلمیدی؟ بویله متعرضلره قارشى مقاومت ایده بیلنلر ایسه نه قادار آزدی.

هله سودا رومانلری او پک تازه قلیبلره طاتلی بر چارپینتی ویرییور، عینی وقعهلرك کندی حیاتلارنده دوغماسنی تخیل ایدن رۇیالار کوسترییور، صوکره صوکره پک ساده تصادفلرله، یاخودده غایت طبیعی تجسس حسلریله سمترلنده کی قیزلرك، کنج قادینلرك اسرارینه اورتاق اولویورلر؛ بعضأده هیچ اوزاغه کیتمه دن کندی آبلالریله قومشو کنجلر آره سنده کی مکتوبلری کتیره کوتوره نهایت اونلره بکزییورلردی.

طانیدقلرندن بری، اکثریا خفیف مشربلی برقادین شیق بر مانتو یاپدیرسه بوتون او جوارك کنج قیزلرنده حمالی برهوس، بر اوزه نه طوتوشور، حائه رئیسلی کندی قیزلرینه ده اویله برمانتو یاپدیرنجه یه قادار اولک ایچنده نشئەدن، سعادتدن محروم قالیرلردی. فقط نهایت قیروب صاروب اونک بر آشنی کندی آرقاسنده کچیرنلر اوتە کیلر کبی یورومه یه، اونلر کبی قونوشمایه، صوکره هر شئده اونلری تقلیده باشلامیورلرمیدی؟ آرقاسندن ده اونلرك کیتدیکی یرلره، صره کلیوردی.

یاتاغنی دوزەلتمەدن سوقاغه فیزلایان او قادینلری، اوکله دن صوکره اذن آلق ایچون بیک برهانه ایجاد ایدن مکتبلی قیزلر، صانکه بوتون اذواقک منبعی اوراده ایمش کبی، فرصت بولونجه همان سینە مالره قوشیورلر، کندیلرینک بلکه بوتون عمرلرنده بر حقیقت اولارق ایچریسنه کیره میه جکلری مکلف سالونلرك، پارلاق طوپلانیشلرك رۇیاسنی بر موسیقی دالغاسی ایچنده سیر ایدیورلر، او حیاتک انجذابى ایله پک طبیعى اولارق بو یوله نیورلردی.

شهرک اک صولوق رنگلی گوشه لرنده او کونکی اکمکنه بر از قاتیق بولا بیامک قاینوسیله قیورانانلردن طوتوکیز، شرقدە کی اقتصادیاته، ثروته

کوره زنکین ده نیلن عائله قیزلرینه وارنجه یه قادار هپسندده او مشعشع تووالترله
صحنه یه چیقان آرتیستلر کی کینمک ، هرشیده ، یازیق که هرشیده اونلر بکزه مک
آرزوسی هپ بویله لکه او یانمورمیدی ؟

قاباره حالرنده بر ژینغوله تک یاپدینی آپاش دانسندده کی فسون ، پک چوقلرینی ،
بویننده فیونغاسی یاندن باغلی بر قورده لا ، آلر قالچه ده ، کوزلر سوز کون ،
آینه قارشوسنده بعضاً ساعتلرجه کندنن کچیریوردی . او سینه ما وقعهلرینی
حیاتده تطبیقه قالدوبده نه وه کلیر کلز همان دایی زاده سنک قوللرینه عینی ادالره
دوشن قاچ دانه کنج قیز ، بیلمم هانکی آرتیست کی قوجاسیله قاوغا ایدرکن
باییلان نه قادار چوق عائله قادینی واردی ! ..

فاخرله انیشته سی شاهین بک قارشیلقلی اوطوروب بوتون بونلری صایارلر ،
دو کرلر ، نهایت بعضاً استقبالدن بیله امید کسرلردی . هپسی ده شبهه سز انقلاب
سنه لرینک تجلیاتی ایدی ؛ بلکه بر از او کنه کچمک ده قابل اولوردی ؛ فقط
هیچ اولمازسه آنا بابا تربیه سی صاغلام اولسهیدی ... معیشت دردیی ، هپسی
جانندن بزدرمشکن ، سفالت اونلرکده چوغنی باشند چیقارمشکن ، کندیلرندده
قالیمان فضیلتی چوجوقلرندن بکله مک قابلیدی ؟ .

فاخرده انیشته سی کی ، یواش یواش بویله دوشونمه یه باشلامشدی . اوقادار که
مستثنای خیالرنده بیله یاشاتاماز اولملریدی . فقط ایشته طالع صانکه بونک
برده مستثناسی اولابیله جکینی کوسترمک ایچون کی اونی محی الدین بکلرک
آراسنه قاریشدرمشدی . قاری قوجه آراسنده کی بعض خویسزلقلره ، اوافق
تفک مناقشه لره بر آز کوز یومونجه فحامت خانم ، امثالسز بر فضیلت هیکلی
کی یوکسه لیوردی ؛ اوقادار عفیف ، اوقادار لکه سز برقادیندی . خسته لنک
تولیدایتدیکی غیرطبیعیات ایچنده چیلینیلقلری اولسه بیله یه نهایی قابی واردی ! .
معلا ایسه برملکدی . اونی کوردکجه فاخر ، قادینلره داتراسکی دوشونجه لرینی
خاطرلیور : « بو قادار فضیلتی بر مستثنا خاطره کلیرمیدی ؟ .. » دیه باشی
صالیوردی . جواد بکه شاقالاشیرکن کنج قیزک بردنبره عادتاً چوجوق

اولو ویریشنه اوزولدیکی یوق دکلدی . اوك ايچنده چوجوقلردن خدمتجیلره قادار هر کسی قهقهه لرله بوغان جواد بکک لطیفه لری بر آز آچیق صاحیق اولسه بيله اونلرده اتهامه سبب اولاجق بر شی آرامق فاخرک عقلندن کچمزدی . ساده معلا ایچون : « بن اونی داهای باشقه تورلو کورمک ایستردم » دیه بر آراق ایچنک صیزلادیغی اولمشدی . فقط بر آزده انصاف ایتک لازم دکلیدی ؟ . او یاشده کی قیزلر هر تورلو اکلنجهیه اشتراکی بر حق دیه ادعا ایدهرک اورتیه آتیلیرکن آرتق همان همان بوتون عمری تنها بر صیفیه ده اکلنجه ، ده کیشکلک نامنه هرشیدن محروم کچن معلانک بوقادارجق چوجوقلقلرینی ده خوش کورمه لیدی . ذاتاً یاز بیتیوردی ؛ خالاسی ، بر قاچ هفته صو کره قزیل طوپراقده کی اولرینه کیده جک ، کویک سنسز لکنده بونلرینه یالکز قالاجقلردی .

معلانی بورادن ده معذور کورونجه اونک برأشنی قوجا شهرده بولمانک قابل اولامیه جغنی اکلایوردی . یارادیایش اوکا بدیعی بر چوق شیلر احسان ایتمشدی . رنگی ، صاچلری ، آغزینک هر ثانیه صفوت فیصلدار کبی بر آز آراق دوران باشقه لنی ، هله کوزلری پک مستثنا ایدی . واقعا تحصیل ، بیلکیسی پک فوق العاده دکلدی ؛ فقط او ساکن روحک آلتنده نه حساس بر استعداد کیزلیدی ! . کوزلکجه اوندن چوق پارلاق قادینلری ، لسانه ، موسیقییه وقوف اعتباریه بلکه بوتون استانبولک الممتاز برقاچ سیما سنی یاقیندن طانیان فاخر ، بوتون فضیلتلری ، بوتون محاسنی بو قادار زنکین برنسبتده کنیدیسنده طوپلایان مخلوق اوله رقینه اونی بولویوردی . اوکا بوقناعتی ویردن اک قوتلی وصف ایسه معلاده کی عصمت وصفوتدی .

آرتق دوشونجه لرینک پک چوغنی ده کیشدیرمه یه مجبور دی . دیمک که ، دییوردی ، یر یوزنده صفوت ، فضیلت کوشه لری ده وارمش ؛ وجودی یالکز خولیاده دوغان ، خیالده یاشایان ملکره انسانر آراسنده ده تصادف ایتک قابلمش ! . ایشته اوصاف ، ایلیق کوشه یه صوقولمق ؟ .. سعادت ، ساده بو دکلیدی ؟ . فاخرک بعضاینه بدینلکه قاپیلدیغی ده اولویور ؛ چوق انکساره اوغرامقدن

متولد بر اعتمادسزلقه آراده بر ایچنه بعض شبهه لر دوغویوردی .
 بو پک صاف کورون کنج قیزده اومولماق شیر کورمش ، شاشیلاجق
 ملاحظه لره راست کلدیکی اولمشدی . دیمک بو، اویله بسیط بر روح ده دکلدی .
 عجبا ، دییوردی ، اونک کدیلدن ، قوشلردن ، سوسندن ، قوماشدن باشقه
 برشی ایچون هوس دویمیور کبی ساکن کورون قلبی ، هیچ می چارپاماشدی ،
 یوقسه چارپاماسنی ده بیلمیورمیدی ؟ ..

معلا ، بر کون جواد بکله شاقالاشیرکن قولنی چارپمش چوروتمشدی .
 او آراق صره سی کلدی ، عادل بک ده چوجقلقده کنديسنی صالنجاقدن
 دوشوردیکنی بر قاچ دفعه تکرار ایتدی . فاخر ، بو عادل بک آدینی صیق
 صیق ایشدیور، معلا هر وسیله ده اوندن بحث ایدیوردی . مطلقا یاقین اقربادن ،
 یاخودده چوجوقلق آرقداشلردن بری اولمالیدی . شمدی اسویچرده تحصیلده
 اولدیغنی ، اوراده تحصیل یرینه کنديسنی سفاهته قایدیردیننی ، عائله سنک ده ذاتاً
 خسته لقلی اولان چوجوقلرینی اوزمه مک ایچون براز مساحه کار داوران دیننی ، فقط
 صوک زمانلرده کوچکله پارا کوندره بیلدکلرینی ینه اونلردن دویمشدی . معلا
 عادل بکک اسی کچدکجه لاقید کورونمکله برابر بعضاًده سوز آراسنده اونک
 یاشایشنی مؤاخذه ایدوردی .. کنج چوجوقلرک انسیاقی تمایللرینه نظراً معلا
 ایله عادلک آراسنده بر شیر کچمش اولماسنی قاعده شکننده خاطرلاماق فاخر
 ایچون قابل دکلدی . لکن ، اونک داها زیاده بر قاردهش قارشیسنده کی اغبراره
 بکزه ین انفعاللرینی اوزون اوزادی یه تحلیلله قالمق ، بونک اوزرنده فضله
 دوشونمک ده ایسته میوردی .

فاخرک دفترندن :

۹ ایلول ۳۳۷ — کونلر شمذیلک بویله کچیور . بلای باشلی هیچ بر وقعه
 یوق . ایکی عائله ، محی الدین بکلرله ، جواد بکککیلر هر کون طوپلانیور .

اکثریا یتکی ده برابر ییورز . او ایچنده چو جوجه لطیفه لره کچن وقتک اوفاق
تفتک ده کیشکلکی ، ساده کویک د کوزه دوغرو اینه ن مستثنا قوروسنده یاپدینمز
کزینتیلردن عبارت . قارشیلقلی محبت ، قارشیلقلی حرمتله هرشی بینا کن ، هرشی
ایلیق . یالکزمبجل ، تجربه سز قابیری بوس بوتون پریشان ایدن امیدسز برحسه
دوشمش کبی بیتکین . بوتون دوشونجه لری ، هر سوزی هپ خسته بر روحدن
قوپان ایکیلتیلر کبی . اکلنجه لرك هیچ بریننه ، حساب حالارک هیچ بر حرقه اشتراک
ایتمور ؛ متالم ، مفتور کوشه لرده دولاشان بر کولکه ...

اوته کی ، معلا هیچ اورالرده دکل ؛ مبعلا ده کی بیتکینلکی حس ایدیورده
صانکی اهمیت بیله ویرمیور . دائما پر نشئه ، دائما بر خنده ، بوتون کوزدل
وکوزدلاکنه مغرور قیزلر کبی . دقت ایدیورده حیاته مفراط بر حساسیت
طاشیان قلبلر اکثریا مرضی ، حتی معلول اولویور . چیرکین ، ضعیف ، خسته ،
جسماً معلول ، داها نه دیهیم فلاکتی ، بدبختانی دویش اولق ، بر شاعر روحنه
مالکیت ایچون هان هان شرط .. ثروت ایچنده ، احتشام ایچنده یوقلغی طاماش ،
چوق کوزدل ، حتی مکمل قیزلر آراسنده اوپله مستثنا بر درینلکه ، ایچیلیکه
تصادف اتمک قابل دکل . دنيله بیلیر که آجی چکمه نیجه کاله ایریلیور ! .. شمدی یه
قادر کوردیکم ، طانیدیغم انسانلر هپ بویله . پارلاق یارادیلشده کیلر ، اوپارلاقلنک
سطحندن آریلامیه رق ، هیچ ده رینله شمه دن یاشیورلر ؛ لاقید ، مغرور ، حتی
براز هیمی ... ایشته مثالی : معلا ... هرشیدن آمین ، اوپله مغرور برحالی وار که
صانکه دنیا نه در ، ایچنده نه لر اولویور ، نه کورولتولر دونویور ، بیلمیور ؛
بیلمه یه تنزل ایتمور ! ..

صوکراده دوشونویورم ، کندی کنده : « بویله سی داها آئی ! » دیورم .
بدبختانی حس اتمه مک برازده مسعود اولق دکلیدر ؟ .. اوته کی مرضی تیپلر
شاعرمش ، ده رینمش ؛ او ده رینلکده عالملر یاشارمش ؛ نه بوش شی ! .. هله
بر طرفدن معلای بوتون او کنج ، کوزدل ، مرفه ، زنده قادینلرله مقایسه
ایدنجه اونده اوپله ممتاز ، مستثنا بر صفوت ، بر معصومیت وار که بونک یاننده

هر تورلو اوصاف ، هر تورلو محاسن سونو ويريور ...

تحفدر ؛ آراده بر اينانيلميه جق ، خاطره كتيوله سي بيله معناسز احتماللرك
بر دومان كبي كوزمك او كندن او چوشديني اولويور ... اوله نمك بوضرده
هيچ عقلمدن كچمه ين برشيئدي ديرسه م پك يالان اولماز. اون سكر ياشنده ايكن
او مڭيل ، مستقبل رفيقه يي پايانسز شعرلرله سوسلهر ، اك خرده تفرعاني اوستنده
مشكلپسند بر رسام عصبيلكيله تصويرلر ياپاردم. شمدى دوشونديكجه كولويورم ؛
حتي اوتانيورم . او خياللر قويومجي چارشيسي كبي كوز قاماشديرييجي ايدى ؛
شمدى بر بونجوق ييغني قادار قيمتسز ، او قادار معناسز اولدى ... سعادت ، حالوكه ،
نه قادار باشته ... بويله دوشونونجه ده ، معلايى خاطره كتيوله م ك قابل دكل .
اونك اك كوچوك ، اك اهميتسز طورلرينه ، دوشونجهلرينه ، سوزلرينه قادار هر ذره
اوزرنده اينجه دن اينجه يه تدقيقلر ياپيورم ؛ بو پك بوش ، معناسز زحمته نه لزوم
وار ، بيلمم كه ... فقط ائمه دكل ، هيچ برشي كوزمندن قاهيمور .

صوكر آراده بر او مڭيل رفيقه يي تختندن اينديرمك ، بوكيديشله مؤبداً
بوش قالا جق مقامى معلايه تديم ايتمك ... بونى ده دوشونديكم اولويور . بيليورم كه
بورؤياني حقيقت صانوب كوزلرمي آچق اوني بوس بوتون غائب ايتمك ديمك ..
زيرا فخامت خانمك ، حتي قوجاسنك ده ، دامادلرندن آرايا جقلى اك بويوك مزيتك
ساده جه ثروتدن عبارت اولديني ميدانده . كچن كون دوكتور محي الدين ، قاين
برادرينك اوله نمك تصورلريني بيله عييلايور :

— بو ياشده اوله نمك بدلالق اولور .. دييوردي . فريدون بك ايسه
بندن ايكي اوچ ياش بويوك ...

ينه بر كون استانبولدن برابر دونيورديق ؛ محي الدين بك معيشتك كوچا كندن
بجمله بو زمانده اوله نلره شاشيور :

— بن اولسه م ، اوله نمك مي الله اسير كه سون ! . ديه ايكي آلنى بردن
قالديرييوردي . بوتون بونلر ، عجباً معلا ايچون قضارا بر اميده دوشه رسه م
قارشيمه چيقا جق امكانسزلى بكا شمديدن ضمناً آكلا تمق ايچون ميدى ؟

ثروت ، دبدبه خصوصنده معالاده اونلر کبی دوشونویور ، بوکا همان همان
 آمینم. حال بوکه اونلرک تخیل ایتدکلری کبی احتشامله دولو برسلطنت قورمق بنم
 ایچون احتمال خارچنده. شمدی یه قادار پک آئی، پک صاف کورونن معالا یارین
 حقیقتک، اومدینی رؤیالره هیچ بکزمه دیکنی او کره نجه عجباده کیشمه یه جگمی؟
 بن اوکا حیاتده اشتراکی تکلیف ایده بیلمک ، کندی آرادقلمی اوند بولا
 بیلمک ایچون خولیلرینی آز چوق اوقشایاجق بر حیات تقدیم ایده بیلمه لییم.
 بو انقلاب سنه لرنده ایسه هیچ بر حساب دوغرو چیقمیور ؛ هر کون
 محاربه ، قیطلق ، مهاجرت کبی بیک تورلو حادثه آراسنده پر احتشام بر حیاته
 قاووشمق نرده ، بالعکس داما بویوک محرومیتلره اوغراسه ق ، یا اوزمان نه
 اولاجق ؟.. ذاتاً اوند آنسزین انکشاف استعدادیلر ایچین ایچین قاینایان بعض
 کیزلی هوسلر کورو یورم که ، بنی اک زیاده قورقوتان ده بو . بیلمم آما ، او
 ساکن روح یارین صانکه بر احتراصله پارلائی ویره جک کبی کلپور . او زمان
 شو سر آزادیشایدن قورتولایم دیرکن اوله براوچورومه قایش اولق احتمالی
 وار که.. صوکره بعضاده ضعیف دقیقه لرم اولویور؛ شو معلانک کوزمده بردن
 بره یو کسلدیکی دقیقه لر... یارین، بش اون سه صوکره اوندن اوزاق، آرتق
 قره دوغرو قایان سنه لرك اورته سنده بیتکین، بو کونلری خاطر لادجه پشیمان
 اولاجقمییم دیه ایچم تیتیریور ؛ بیلمم که...

۱۰ ایلول ۳۳۷ — بو کیجه مهتابده هپ برابر کزومه یه چیقمشدق .
 معلانک چو جو جه شاقا لردن خوشالاندینی کورو یورم؛ فقط اونک خوشه کیتمک
 ایچون دکل ، بلکه بوس بوتون ده دورغون کورونمه مک ایچون اونی بر از
 قیزدیردم . هیچ اوممادیغم حالده بردن بره پک منبر کوروندی . حال بوکه
 سویله دیکم شیلر غایت آشکار بر لطیفه ایدی ، هم او قادار بسیط که ... جواد
 بک فلان اوندن یوز دفعه فضله سنی پایورلرده ممنون بیله اولویور. نه تحف....
 ۱۲ ایلول — دون معالا قاکلیجه یه، عمجه سنه کیتمشدی. بو آقشام تردندن
 چیقارکن رفیعہ خانم مبجل فلان اوکا تصادف ایتدک. اوتہ کیلر یولده ایرلدیلر.

معلا ، اولكى كونكى دارغىنلىنى اونوتىش كېيىدى . لاف آراسىندە سىردى
كەلدى :

— آي ، دىدى . بۇ دارغىنمى ايدىك ؟ . .

۱۶ اپرىل — كويىك ھواسى بىكا خېلى يازادى ؛ بىر قاچ كىلو آرتىم .
فخامت خانىمە قارشى پايانسىز مىتدارلىقلار دويويورم . ايىكى كوندراۇدە اقربادىن
مىسافىرلار وار . آنەسى اونلارە كىزمەيە چىقدىقچە معلا ايلە بىر آرادە بىر يالگىز
قالىوردىق . بويالگىز دىققەلردە او بىردىن بىرە باشقالاشويورم . پىك بوش ،
مىوضوعىز شىلار قونوشدىق ؛ فقط جىناپىك دىدىكى كېيى او بوشلىقلارە دولدىغىمى
حىس ايدىيوردم . بىر آزالىق مىسمدىن ، يىواش يىواش اورتالانە بىر قىش رىنكى
چو كىدىكىدىن بىر ايدىيوردم . بىر دە آرتىق شىرە اىنمىدىن سوز آچاق اولدىم . معلا :
— كېن كون ، دىدى . آنەمە « فاخر بىك قىشىن كىدوب كىلر كىن ترەن
ساعتلىرى ايلە ايشىنى ناصىل اويدورە جىق عىجا » دىدىم . اودە « ايلىك ترەنلە كىدوب
كىلر » دىمىدى . اوو . . . سىزى اوقادار چوق سەوييورمە بىر بىلە قاچىدىر
« آنە ، فاخر بىكى ھىمىزە ترجىيح ايدىيورسكىز » دىمەكە مىجبور اولدىم .

قونوشور كى باشمى بىلە قالدىرمىيوردم . فقط كوزلر مىزىك بىرلشدىكى بىر ئانىدە
اوطالى ماويلىك ، انسانە بىك بىر مىژدە فىسىلدايە جىق قادار دىرىندى . معلا ،
پىك دوز كون بىر افادە ايلە ، باشى يوقايدە قونوشور كىن اويلە مىستىنا بىر وقارلە
يوكسەليورمە . . . كەلەلرى چەويرەرك ، بوزەرك ، چىكنەمەيە سانكە تىزل اىتمىيور
كېيى . حال بوىكە شىمدىكى خاتىملردە بويلە ياپما جىقلار پىك مودا . . . ھان ھىر نىقەدە
بىن شاشىر تاجىق قادار دوشونويورم ، او نىستىدە دوشونولقە سويليور .
سوزلرندە نە اويلە ساختە ، عصمت فروش ياپما جىقلار ، نە عادى بىر سىر بىستلىك ،
نە دە صومور تىقان بىر حال وار . پىك مىستىنا ، پىك معلا بىرشى . . . سانكە ايىكى آرقاداش
بىر طاق مىجرە ، علمى بىختار اوزىرىندە مىناقشە ايدىيورم كېيىز . . . اونىك شىمدىيە
قادار پىك بىسىط كېيى كورونىن روخىندە بويلە ھىر كون يىكى بىر خىزىنە كىشف ايدەركىن
كىندەمدەدە بىر باشقەلىق دويدىغىمى اعترافە مىجبورم ، كېن يىكرمى بىش يىكرمى آلتى

سنة ايجنده دويمادىم ، طامادىم برشى ... قونوشديغمز شيلريك بوشدى ، ديدم . فقط بر طرفدن ده صانكه ناصل ديهيم ، بوتون بونلر آراسنده تلفظ ايديلهين براعتراف اولدى ؛ ياخودده اعتراف ايديلهيه بيله لزوم كورولميهين ، ديل ويريلهين فقط موجود وموجوديتي پك طبيعي برشى وارمش كبي بر حال ... اونك بعضاً كبار برادا ايله بردن دوروب سكوت ايديشنده كي سحر بوتون ادبياتلرك قدرتندن چوق يوكسك ... مثلاً ، قومشولر آراسنده دولاشديغنى بيمده سزديكم خفيف ديدى قوديلري خاطر لادىغمز ثانيه لر اولدى . اوزمان معلانك :

— فاخر بك ، بونلر بحثه بيله ده كمز .. ديه كوزلرني يره اينديريشي واردى كه ايكي روحى بربرينه ياقلاشدير مق ، آكلاشدير مق اچون طلسملر ، بويولر بيله بونك ياننده نه قادار سونوك قالير ! ..

بيلم ، بن بوديدى قودى مسئله سندن بحث ايتمه مشى ايدم ؟ .. هالمك ايشى كوجى يوق ؛ سينه ما پارا ايله ، رومان كوزلري يورويور ؛ اوزمان كلسون ديدى كه ديدمدى كه ... اويله حس ايدىورم كه بنم بوراده كي مسافرتم حقنده ده قومشولر آراسنده بر ديدى قودى روزكاري كچمش ، بعض موجهلري بورايه قادار صوقولش اولاجق ... بوكا پك متأثر اولدم ؛ ياپاجق شى همان بورادن چكلوب كيتمك ... اك اول خاطر مه كلن ده بو اولدى . فقط بيلم كه ...

ينه او كوره — اوكله دن صوكره جواد بكلرده كلدى . هپ برابر چاملره دوغرو كز مه يه كيتدك . بعضاً چو جوقلر كبي قوشديغمز اولويور . تپه دن آشاغى يه اينر كن قورومش چاملرده قايب دوشمه مك اچون هر كسه يارديم ايتديكم كبي اونك ده آلنى طوتويوردم . ايلك ثانيه لرده تيترهين پارماقلىنك كيت كيده آووچلر مده اويله برتسليميتي واردى كه ..

كيجه ده ينه هپ برابر دكر كنارينه كيتدك . آيك اون بشى ... موسمك صوكى ، بوسنه نك اك كوزل ، اك پارلاق كيجه سى ... قاچ كيجه در بزديشارى حيقدجه كوك يوزنده مهتابى صانكى بزى بكلر بولوردق . خائن ، آرتيق بزده كي بو ابتلايى آكلادى ده مى ندر ، هر آقشام بر آاز داها كچ قالير ؛ بو كيجه ده

شوراده کی بیاض کوشکک صاچاقرینی طوتوشدورور کبی نازلی نازلی یو کسه لیر کن
بن ده معلائک یاننده صانکه یکی بر عالمه دوغویوردم . هپ صوصویوردق ...
سعاده بوقادار یاقینکن بيله حیاته او ، برتورلو اکیلمه یین محرومیتلری ،
هر کون بر پارچه سی دها قوپان کنجلاک خولایلرینی خاطرلاماق قابل دکل .
یانده کیلرده بویایلق کیجه نك شعرینی اینجتمکدن قورقار کبی سس چیقارمیورلر .
فقط کیم بیلیر دوشوندکلری نه دره قارشیده آطه لر قویوماوی بردومانه صارینش ،
اوزانیور . کوشه ده خسته کبی تیتړه برفاروار . اوفناردن دکزه آقان برنور
داملاسی بزه قادار سوزولویور؛ طبقی کوز یاشی کبی .. بو دقیقه ده اکیمزدن ،
اوخسته فنارله بندن باشقه آغلایان وارمی عجباً ...

بردن ، برخيچقریق سسی دویدق ؛ مېجل معناسز بر طورله کومله یه چالیشیوردی .
صانکه کندینی طوتامامش ، بوغازنده دو کومله ن برشی بردن بره قورتولمش ده
اونی کیزله مک ایچون کولویور کبی ایدی . دیمک او زوالای ده آغلیوردی .
نه اولوردی یاربی ، معلا اونک کبی اوله ایدی ؛ اوزمان کیم بیایر نه چیلنن
أملاره دوشردم . فقط اوته کی ده ، معلا ده بو آقشام بوس بوتون باشقه ایدی .
هر ثانیه براز دها صیجاق ، براز دها صوقولغان ...

بو کیجه یی پک نشئه لی ، پک طاتلی کچیردک . دیرلرکه انسان سعادتک ایچنده
اونی ادراک ایده مز ، آنجاق اوندن محروم قالنجه آرارمش . بن ایسه صانکه
کوزلری قاپالی ، یاری اویقوده کچیردیکم شو حیات ایچنده ، کندی کندمه ،
آراده بر صورویورم : سعادت عجبایومی ؟ . ساده بر کون کلوب بورادن آریلا جغمی ،
هپسندن محروم قالا جغمی دوشونمکدن ده قورتولامیورم که ایشته اوطاتلی رو یادن
ایکیده بر بنی صاصینتیلرله اویانديران ساده بو اولویور ...

فاخر ، حقیقهٔ برازده کوزلری قاپالی یاشیور کیدی ؛ مېجلک هر کون
براز دها دالغین ، براز دها بیتکین حالی کیسه نك کوزندن قاچایه جق

قادر بارزدی . قاچ دفعه اونك قارشوسنده بيله بو ضعفنى احساس ايدى .
قادر پريشان دقيقه لرى اولمشدى . بر آقشام هپسى دارالاحان قونسهرينه كىتمشلىرى ؛
يالكز جوادىك ، فاخر ، مېجل اوده قالمشدى . او كيجه بالقونده اوطورور كن
مېجل هر زمانكى كې ينه خسته لقلې بر ياراديليشك اراده سز افشا آتى آنديران
ادا ايله اوزون اوزون كندى محروميتلرني حكايه ايتدى . صوكر ا بر آرقده
بحى فاخر ك حياتنه كىترمه چاليشدى :

— حس ايدىورم ، ديدى . سز معلا آبلامه قارشى هپچده لاقيددكلسكن ..
بن آبلامى چوق سه وهرم ؛ سزى ده اويله فاخرىك . سه وديكم ايكي قلى اينجتمك
دكل ، استردم كه آرالرينه بندن بر آز كولكه ، بر آز بولوط بيله دوشمه سون ...
كندى محروميتلرمك اورته سنده بو ، پك طاتلى بر تسلى اولوردى . فقط بىامم كه
آبلام سزى نه درجه يه قادر مسعود ايدى بيله جك ...

بويله كيدر سه مېجل آغزندن بعض شيلر داها قاچيره بيله جكدى . فاخر ،
بحى قاپاتمايه چاليشدى . او ، دوام ايتك ، شيمدى يه قادر هر كسك بر آز
استخفافلى ، بر آز استهزالى نظرلرى ايله ناصل ازيلديكنى صايق اىستىوردى .
محقق كه بوبى چاره قيزده مرضى ده اولسه مستشا بر حساسيت واردى . اراده
بر بويله كوزى دومانلى چو چوق ققلىرينه باقيلماز سه طاشيدىنى يورك نه تمىز ،
نه يوموشاقدى ! . . .

ايشيلدامايه فرصت بولاماش فقط فياض بر ذكا ، معالى يه قارشى هر فرصتمه
طوتوشان بر مفتونيت ، پايانسز بر فداكارلىق آرزوسى هپ هپ ينه او مرضى
حساسيتك تجلياتنددى . آريلير كن فاخر كندى سنى سه ودهن بر قاردهش اولمايى
وعد ايتدى . مېجلك خنجق ققلى ده آرتيق كىزله نه مز اولاشدى .

معلانك خاله سى ، جوادىك ، هپسى قىزلرنده كى بو غير طبيعىلىكى شېبه سز
حس ايدىورلردى . عائله ايچنده بو قدر محرميتله قبول كوردهن كنج حقنده
محي الدين بكه ، فخامت خانمه اوافق تفك ملاحظه لرله حتى بعض شيلر سويله دكلرى ده
اولدى . ذاتاً محي الدين شوقى بكك عائله سى آراسنده بردن بره كورولن بو

فاخر بکک کیم اولدیغنی صورانلر چوقدی . دوقتور ، اوندن بحث ایدرکن هریرده معنوی برابا طورینی طاقینیر ، اونک عرفان و اخلاق جهتیله نهقادار یوکسک برکنج اولدیغنی حرارتله آکلاتیردی .

ایشته برکنج که تحصیلی بیكدرلو مشکلاته رغماً اکال ایتش ؛ کتابلردن ، سپوردن باشقه برشیدن ذوق دویمیور ؛ چاپقین دکل ، بوتون ذوق دوشکونلری ایچون اک جاذب منابع عد ارلوانان یرلرده هیج برکره اولسون کورلمه مش ؛ آغزینه بر داملا ایچکی قویماش . استانبولده اونک کبی قاچ کیشییه تصادف ایدیله بیایردی ؛ عائله آره سنده کنديسنه بوقادار محرم برموقع ویریلسیده اونک آنجاق بوقادار تقدیرکار برنظرله ممتاز ، اوقادار مستشاکورلدیکنه دلالت ایترمیدی ؛ جواد بکلرک کندی قیزلری ایچون دکل ، فقط معلای ایماء ایدرک ، ایکی کنجک بربرینه بوقادار یاقین یاشاماسندن بحثله اورتایه سوردکلری ملاحظه لری اوته کیلر غایت سکونتله تلقی ایتشلردی . ایکی کنجک برابر یاشاماسی ؟ . فقط بونده قورقولا جق نه واردی ؟ . . . فاخرک ناصل خلوق کبار برکنج اولدیغنی میدانده ایدی . معلا ، اوو ، قیزلرینک عفته ، اخلاقنده کی صلابته اوقادار امنیتلری واردی که . . . فاخری داماد ایتک کبی برتصورلری اولامازدی . کنديسیده بونی حس ایتدیکی مدتجه او عائله نك آرزولرینه حرمت ایده جک قادار یوکسک برکنجیدی . ذاتاً اونده برضعف اولسه بیله آنه سنک دوشونجه لرینی بیلن ، اونلردن هیج آیریلمايان معلانک متاتی بوتون قورقولری معاسر براقاق قادار مستشاکور ایدی . اونلر بویله دوشونویورلر ؛ بویاشاییشده اندیشه یه هیج بر سبب کورمیورلردی .

برکون معلا ، مبجل ، برده بیتیشیک قومشونک هر زمان اونلردن آیریلمايان قیزی بهیجه خانم فاخرله برابر چاملره ، کزمه یه چیقمشلردی . جواد بک نه دنسه یاواش یاواش بو کزمله ره قارشى برآز خویشز لانیور کیدی . فاخر ، هر شیدن آینه جق قادار حساسیت طاشیرکن بوکون بوکا پک اهمیت ویرمه دی . جواد بکک تأثرلری ، انفعالی ، اوفکەسی هپ اوقادار شعورسز ، معاسر شیلردی که . . .

فقط یولده مېجل ایله بهیجه بوندن بیک بر معنا چیقاریر کی کوروندیلر . بهیجه ده داها زیاده معلانک دوشونجه لرینه محرم اولیه یلته نن بر حال واردی . معلایله فاخرک آراسنده برشی اولسون ده کنیدیسی بیلمه سون ، بو حکایه ده یابانجی قالسون ، بونی بر تورلو چکه میوردی . بر آراق فاخرله برابر کری قالدی . معلایی نه قدار سه و دیکنی ، بر بندن کیزی هیچ برشیئلری اولمדיغنی ، اونک سعادتتی کورمکدن نه درین بر ذوق دویاجغنی اوزون اوزون آکلاتیوردی . نهایت کندی ذکاسنه ، آکلایشنده کی کسکینلکه اعتمادینی کوسته ریر بر طورله : — فاخر بک ، دیدی . بندن صاقلایماز سکز ؛ بیلورم که سزده برشیئلر وار .

بر چوق قیدلری کوز اوکنه کتیریور سکز ؛ بر چوق امکانسزلقلری حسابلیور . سکز . دوشونجه لریکزی اورتکم ، هیچ اولماز سه هر کسدن کیزله مک ایچون جبر ایدیور سکز . محیطکز یک طبعی اولارق سزی بویله بر امیدسزلکه سوق ایدیور . حال بو که ای بر آرقداش نه قدر مشکل بروضعیتده اولور سه اولسون انسانه چوق بویوک یاردیم ایده بیلیر . مثلاً بن ... بوتون بو کیزله مه یه چالیشدیغکز شیئلری یک اعلا حس ایتدیکم ایچون سزه درد اورتاغی اولمای ده چوق ایستردم . فاخر اونک بوسوز لرینه قارشی لاقید ، حتی آکلاماش کی کورونویوردی : — اوو ، یک لطفکار سکز ، بهیجه خانم دیدی . بنمله درد اورتاغی اولمق نه کوزل مژده ... والله فنا اولماز ، آوروپا غزته لرندن آلنه جق پارچه لر واردی ، بن کنارلرینی چیزه ایم ، سز ترجمه ایدیکز ...

بونکه صانکه ایشی لطیفه یه چه ویرمک ، بهیجه یه ایلک سویلدکلرینی اونوتد . یرارق ، لاقردی بی ده کیشدیرمک ایستیوردی . اوته کی :

— بونه قدار تجاهل فاخر بک ؟ .. دیدی فقط بونده ده او یله عجمیسکز که ... انکار ایدرکن ، اعتراف ایتش اولویور سکز ...

— رجا ایدرم ، سز بکا یاردیم وعد ایدیور سکز ؛ خاطر مه یک طبعی اولارق بوکلدی .

— بونلر هپ او یله دیدیکم کی ، بجریکسزجه انکارلر ... حال بو که

بن سزی ایلک کوندن بری آچیق یورکلی ، آچیق سوزلو برکنج دیه طانیدم .
شمدی ایسه ...

— آچیق سوزلی برکنج می ؟ .. بیلیم آما هر حالده بوش بوغاز بر آدم
دیه دکل صانیرم ...

— او .. بوش بوغازلی بکا اسناد ایدیورسه کز ... التفاته دیه جک یوق ..
— رجا ایدرم

— نه ایسه زیانی یوق .. فقط بیلیم که نه دن چکینیورسکز ؟ طبق اوده
سزک کبی ... سز انکار ایتک ایچون چابالیورسکز . معلا ایسه بوس بوتون
باشقه ... لاقید ، صانکه هیچ اورالرده دکل ... ایشه اونک ایچون بن دده سزی
دوشونیورم یا ... چونکه او ، آرا کزده بر رابطه احتمالی کندی عالیه سنک عقللرندن
بیله کچیرمدکلرینی بیلور . نه یاپسون ، بویله بر امکان کوره مه نیجه

فاخر بردن بره بهیجه نک سوزینی کسدی . شمدی یه قدر بهیجه اولسون ،
مبجل اولسون اونک معلا یه قارشى ضعفنه دائر برشی ایما ایتدکلری زمان بویله
برظنک حقیقتدن پک اوزاق اولدیغنی آکلا تمق ایچون بوکا دائر اک اوافق لطیفه نک
بیله خوشه کیتیمیه جکنی سویلر ، بونلرک انکاره بیله ده که یه جکنی علاوه ایدردی .
فقط شمدی بهیجه نک صوک سوزلرینه قارشى کندی نی طوتامادی :

— ناصل دیدی . بونلری معلا خانمه دده می سویله دیکز ؟

— معلا بندن برشی صاقلاماز که ...

فاخر بوجوابه قانع اولماش کبی تکرار ایتدی :

— خاییر ، خاییر ، اونى صورمیورم . کنديسـنه ده آچدی کز می ، بونی

او کر نمک ایستیورم .

بهیجه بر آز شاشیرر کبی اولدی . عینی سؤالی ایکی سنده صورمش اولمق ،

بویله جه آرالرنده برشی حاضر لامق اونک بر آزده ایستدیکی یا خود ایستر کبی
کوروندیکی شیئدی :

— اوهت .. نه لر دوشوندیکنی او کر نمک ایچون سزدن اول اوکاده صوردم ؟

اونكه ده قونوشدق . ديه جك كې يوتقوندى . فاخر بردن بره پك دكيشمش
كورونويوردى . اوتەكى سوزلرني دكيشديروب دكيشديرمه مكدە متردد :

— فقط ، ديدى نچون بو قدر تلاش ايدييورسكز . بن معلايى چوق
سه وه رم . كورويورسكز كه همان هر كون بر آرا ده ياشيورز . اونك حياتى ،
بنمكى قادار ياقيندن طانيورم . بو قادار ياقينلق ، بو قادار سه ويشمه آرامزده كى
بوتون تكليفلى قالدير مشدر . هر شيدن بحث ايتديكمز كې طيعى ، بوكا دائر
سوز آچيلديغى ده اولدى .

هر شيدن اول بوياكلشدى . معلايله آرالرنده چوق بويوك فرق واردى .
ايكى طائله آراسنده كى دوستلق احتمالكه تكليفسز بر رابطه صورتنده تجلى ايدە جك
قادار فوتليدى . فقط معلايله بهيجه باشقه باشقه ياراديليشاردى . بهيجه ساده جه
هر كسك ايشنه قاريشمقن ذوق آلان محله قيزلى كې اورته يه هيچ يوقدن
بويله برشى آتيوردى . فقط نه ده اولسه فاخر بوكا پك اوزولدى . آرتيق
ظواهرى محافظه اچون جبرى برسكونت كوسترمه يه ده امكان قالما مشدى . مستنا
براهميت ويرەرك دوشونديكى ، علاقەدار اولديغى برشى اولورسه اونلرى عادتاً
قيصقانير كې هر كس دن كيزله مك چيلغنججه مراقيدى . شمدى ، معلايه قارشى
بلكه براز مبهم ، براز شكلسز فقط هر حالده كوندن كونه بويويه ن تمايللرى
كشف اولونديغى زمان ده اونى بوس بوتون انكار ايدە جك ، بوانكاره هر كس له
برابر كندينى بيله ايناندير مق اچون بوس بوتون يوق ايدە جك قدر قيزيوردى .
هله معلانك او كنده كنديسندن بحث ايديلمەسى اونى چيلديرتيوردى :

— داريلمايكنز آما ، بهيجه خانم كنديكزه عائداولميان ايشلره قاريشيورسكز .
اساساً بونلر هيچ يوقدن ايجاد ايدلمش بر ديدى قودى ... ديه باشلادى ؛ بويله
اسنادلرك چير كيندىكى اوستنده پك آغير شيلر سويلەدى . حال بوكه اوتەكى حسن
نيتنى اثبات اچون چيرينيور ؛ بيك درلو ستايشله معلايى بر طرفدن كوكلره
چيقارير كن بر طرفدن ده فاخره خوش كورونمك اچون بويك اقبالپرست قيزك
هر شيدن چابوق بيقمق ، بوكون چيلديراسى يه هوسلنديكى شيشى ايرتسى كوني

کندی ایله قیرمق کبی خیرچین ، معمالی کوشه لرندن بخته باشلايور ، بونکله صانکه مغلايی اوکا لایق کورمدیکنی ایما ایدیوردی .

چاملقده بر آز اوطورمق ایچون دوردی بر آرایه کلدیکی زمان فاخر ، بهیجه ایله مېجلك بویله معناسزدیدی قودیلری معلايه قادار دویورمالرندن چوق متأثر اولدیغنی آرتیق کیزله یه مدی . اوته کیلر بونکله بلکهده فاخره خوش کورو نه جکلرینی ، اوندن بعض شیلر او کرده نه جکلرینی اومارکن بو عصیت قارشوسنده شاشیردیله . فاخری همان همان ایلك دفعه اولارق قیزمش کورویورلر ، اوندن هیچ آلیشما دقلری سرت ، عصبی سوزلردویویورلردی . بو کونک بوتون نشئه سی قاچدی . هپسی صوصویورلردی . دونوشده مېجلله بهیجه استاسیونه دوغرو کتدیله . معلا ، فاخری تسکین ایچون معتادندن فضله متهاک کورونویور :

— بوچوجوقچه سوزلره ناصل اولوبده قیزیورسکز .. دییوردی بونلر دیکله مه یه بيله ده کمزدی .

— سکون ایچنده ، صاف ، قایغوسز ، نه طاتلی یاشیوردق ، معلا خانم .. انسان بردن بره بونلری دویونجه قیریلماسون ، قابلی ؟ .. هپسندن فضله اولارق ناصل اوزولیه بم که بو آسوده کونلر آرتق بنم ایچون بر رؤیا اولدی ؛ پک مستثنا ، پک طاتلی ، فقط پک عمرسز بر رؤیا ...

— آکلامیورم ، نیچون بویله سویلیورسکز؟ .

— اویله یا ، بوقادار دیدی قودیدن صو کرا بونک دوامی ممکنمی ؟ . آرتق سزی نیچون راحتسز ایتمه لی ، بویله سوزلره نه دن میدان ویرمه لی ؟ . هله مادام که بونلری آرتق سزده دویدیکز ، سزه قاداردویوردیلر .. هله بو ، چوق فنا اولدی . معلا خانم ، چوق فنا

— نه چیقار ؟ . باقکز ، بن داها اول دویمشدم . حتی آنهم بيله دویدیغنی زمان هیچ اهمیت ویرمه مشدی . سزک ایچونده اویله ... بوقادار اوزولمه کزه سبب نه ؟ . ذاتاً اورته ده اهمیت ویره جک نه وار که ؟ .

— معلا خانم ، حقیقه اورتده اهمیت ویريله جک برشی یوق ، فقط

— او حالده مېچلك چو جوځه سوزلرینه ، بهیجه نك معناسز دیدی .
 قودیلرینه قارشى هیچ سس چیقارماز ، باشكزی چه ویریرسكز . . .
 فاخر صوصدی . پك متأذی ، پك مضطرب کورونویوردی . معلا ،
 تکرار ایتدی :

— اویله دگلی ، فاخر بك ؟ . هم آرتیق اونلر بو کونکی حادثه دن
 صوکره بر داها هیچ برشی سویله مزلر !..

— شمیدین صوکره یوز یوزه کلدیکمز زمان برشی سویله میه جکلرینی
 بنده ظن ایدرم . فقط بوبخثك ساده بوراده دکل ، هیچ بریرده ، هیچ
 بر زمان آچلمامسی لازمدر . بونك ایچونده ...

— پکی ، بونك ایچونده ؟ .

— یاپیلاجق شی پك بسیط دگلی ، معلا خانم ؟ ...

معلا بردن باشنی قالدیردی :

— کیده جکسكز دگلی ؟..

— باشقه چاره وارمی ؟ . سزدن آرتق صاقلامق ایسته مم ؛ بواسکیدن ده
 اراده بر ذهنه دولاشان برشیئدی . یالکز آ کلاشیلمایان ، آ کلاتیلامیان
 برقرارسزلق ایچنده ایدم . فقط شمدی کورویورم که ، تردد ایتك ، وقت
 کچیرمك بر کنه اولاجق ...

— خایر ، کیتیمیه جکسكز !..

معلانك صوك سوزی صانکه بر آزده عصیانه بکزییوردی . اونك بوقدر
 قطعیتله سوز سویله دیکنی فاخر هیچ دویمامشدی .

صوصدیلر ؛ اوقادارله قالدی .

کیجه یمکدن صوکره جواد بکلرینه اوراده ایدی . بهیجه ده کلشدی .
 فاخره کوندوزکی وقعینی اونوتدورمق ایچون چوق صوقولغان ، چوق نشئه لی
 کورونویورلردی .

فاخر ، هر کسدن کیزله بهیلمك ایچون عادتاً کندی کندینه بیله انکاره .

چالیشدیغی حسلرک بویله جه سه زیلوب اورتایه چیقما سندن چوق متأثر اولمشدی .
اودقیقه ده هر شیئی فدا ایدرک ، حتی سعادتیی چیکنه یه رک ، ایره سی کوندن
تری یوق ، بوس بوتون استانبوله کیتمه یه قرار ویره جک کبی اولمشدی .
فقط معلانک :

— خایر ، کیتمه یه جکسکر !.. دیشنده اویله برطاسم ، اویله سحرکار
برقوت واردی که ...

بر طرفندن ده دوشونویوردی : بو اوافق تفک دیدی قودیلر بو هیچلر
وقعیه بر شمشک سرعتی ویرمشدی . معلا ایله یالکیز قالسه لر ، طبیعی جریانیه
داها آغیر ، داها ایچین ایچین ثوروله جک بورابطه بویله تلقینلر ، قیصقانجلق
صحنه لری ایله صانکه زمانندن اول دوغویور ، فاخرده هیچ حسابلامادینگی بر
دقیقه ده قطی بر قرار ویرمک مجبوریتنی حس ایدیوردی ؛ هم مادام که
کیده مه یه جکدی ؟ ...

فاخرده مه یه

۲۹ ایلول ۳۳۷

کچن کون چاملرده کی کز مه یی ، بهیجه خانمله مبیجک سوزلرینی ، طبیعی ،
نه سز نه ده بن اونوتامادق . بونلرک بلکه ده هیچ بر قیمتی اولمامقله برابر ،
او آقشام ده سویله مشدم ، بنم ایچون یاپیلاجق تک برشی واردی : آرتیق
قیشک یاقلاشدیغنی ، واپور ساعتلرینک اویغونسزلغنی ایلری سوردرک همان
ایرتسی کونی مساعده کزی رجا ایتک ، هیچ برشی بلای ایتهدن تصدیعلمه
نهایت ویرمک . ذاتاً کونک برنده ناصل اولسه یاپمایه مجبور اولاجغم برشیئی
کندیلکمدن یاپوب صیریللق ؛ بودها دوغرو دکلیدی ؟ ..

او آقشام قاچ دفعه قالقوب چانطامی حاضر لامق ایستهدم . بوتون کیجه
دوشوندم : بویله برعاقبت ناصل اولسه کونک برنده کلوب چاتیمه جقمی ؟ ..
دیرلرکه انسان مسعود ایکن سعادتیی ادراک ایده مز ، آنجاق اوئی غائب

ایتدکن صو کرا خاطره سنده سعادت آرارمش . بن بالعکس هر کون کندی
 کنديمه : « بوتون عمر مده بوقادار مسعود اولمادم ، دييورم . يارين ينه يالکز لغه
 عودت ايتديکم زمان بو کونلری کیم بيلير ناصیل خسرانله ياد ايده جکم . »
 انسانلر تحفدر ؛ بو ، شمدی متدارلقلرله بنی أسیر ایدن مسافر پرورلکی
 اوزمان خاطر لادجه بلکه ده ديه جکم که : « آه ، بوايیلکی بکا نه دن ايتديلر ؟
 جنت ، سما ، افق لرك آردی بنم ایچون ناصل مجهولسه ، سعادته اوقادار
 موهومدی . شمدی بونی طاندم ؛ ديمک وارمش ... کوزلرمی قاپايوب ينه
 آچنجه تکرار اونی کوره بيلديکم کونلره آليشدقن صو کرا يکيدن کيمسه -
 سزلکه عودت نه فجييع !... » خط استوادن بر آدمی قطبره کوتوريکنز ؛
 او زوالی هیچ آليشما دینی بودياردنه ثولمه سه بيله تکرار اسکی مملکتنه دونونجه
 آرتق ياشاماز دکلې ؟ بن ده اويله بونلری دوشوندکجه بو کونکی بختيار لغمی
 بر تورلو بنمسه يه ميورم ؛ کنديمی سعادته يابانچی کورو يورم . بو جياتی شو
 مسافر لکده بولديغمه کوره صانکه سعادت بنم ایچون مسافر لکدر ؛ بن سعادته
 مسافر اولمش کبی يم .

صو کرا بعضاده او آليشقينقله کنديمی اوقادار اونوتويورم ، آرا کزده
 آرييوب او درجه غائب اولويورم که ... هانيا جيو جيو لری کزی آلکزه آليورسکزده
 بعضا او مینی مینی لر آنه لری بيله اونوتويورلر ؛ آوو جکزک صيجا قلنی ایچنده
 کوزلری قاپيورلر ، اويويوريورلر ... بن ده بعضاً بويله کندمدن کچيورم ؛ يارين
 بنی بکله ين حقيقتی اونوتمش کبی اولويورم .

هايدی بو کونکی مسافر پرورلکی آنه کز ، بک بابا کز اوزون بر زمان
 ایچون داها اسیر که مدهی ، ديه لم . فقط او زمان ده طبعی ، سز کیده جکسکز ؛
 اويله دکلې ؟

معلا خانم ، سعادت بکا مجهول اولدينی قادار ايلک ده ايشيديله مش
 کورو لمه مش بر شيئدی . سعادت کبی ايلکه ده آنجا ق سزک آرا کزده راستلادم .
 بک بابا کز دنيانک اک تمیز ، اک کبار يوره کلي بر آدميدر . آنه کزی بر کون

اولوبده بو قادار سهو و بيله جكمى خاطر مه كتير مزددم . كچن سنه يه قادار بريسي
قالقوبده بكا « سن بوتون انسانلرى فنا صانيورسك ؛ فقط فلان كويك
كوشه سنده بر طائله وار كه ... » ديه سزدن بحث ايتسه ييدي ؛ هيچ اينانمازدم .
لكن ايشته ، نه تخيل ايتدمسه ، شمدى يه قادار بولاماديغم نه وارسه هپسنى
سزك آرا كزده بولدم ، هپسنى بوراده او كردم .

ديكر طرفدن سزه بونلرى يازمق صورتيله كوسترديكيم جسارته باقوبده
مرحمتدن مرض حاصل اولور ، ديه نلرده اولور . احتمال كه ايكي كنجك
اوزون مدت بر آرادده ياشاماسى بر چوقلرينك خاطرينه بعض شيلر كتيره بياير .
فقط أمين اولكز ، باشقه بر طائله ، باشقه بر دوست بكا سزك كوسترديككز
لطفكارلقله قاپسنى آچسه ييدي ؛ اونلرك ياننده بويله اوزون مدت ياشاسه ييدم ؛
داها آچيق سويله يه يم ، اونلرك برده كنج قيزى اولايدي ، حاصلى هرشى ،
هرشى اولايدي ده يالكز سز اولماسه يديكز ، سزك يريكزده باشقه سى اولسه ييدي
بنده كي بوضعفك حصولنه امكان يوقدى . بنى آراسنه آلان بر طائله يه قارشى
حرمت بورجندن باشقه حياتى يالكز كچيرمك اچون كندجه ويراش برقرارده
واردى كه بوتون بونلر ، باشقه انسانلر اچون پك طبيعى بر تهلكه ديه يادايديله جك
احتماللكه هيچ بريسنه ميدان ويرمزدى . واقعا بنمده حياتك كدرلرينى سهو و بيلرينى
پايلاشاجق بر قلب آرامق ايسته ديكيم اولدى . فقط اطرفده كيلره باقوبده
بونى بولاميه جغمى عقلم كسجه بوتون اويوموشاق بر آل ، طاتلى بر باقىش
تخيل ايدن رؤيالردن پك چابوق اوياندم ؛ غناي محروميتده ، سلطنتى يالكزلقده
كيمسه سزلكده آرامق لازم اولديغنى او كردم . بوندن صوكراده تصادفك
بكا طانيشمق فرصتنى ويرديكى مسلمان ، خرستيان بر چوق قادينئر آراسنده
كيمسه يي سهو و مه دم . آنه كزك ، بك بابا كزك وجوديله اورولن ايلك ، شفقت
يوواسنده سز ، معلا خانم ، او آرالرينه كيريان بر طائله يه قارشى حرمت وظيفه سنى
بيله بكا اونوتدورديكز ؛ سزده او قادار مستثنا بر سحر وار . نهايت اوتخيل
ايديلوبده بولوناميان شى سزديكز . نه آرادم ، نه دوشوندمسه سزده بولدم .

سزده برچوق بدایعی جمع ایدن خلقتدن صرف. نظر عفتکز، وقارکز، بوانقلاب
عصرنده فضیلتلرک ال یوکسکیدر. بوکا مقابل کندی عجزمی، اکسیکلرمی ده
بیلیمور دکلم. ثروت، موقع، شهرت، حسن، داهان، بیلیم انسانلر
آراسنده آرانان اوصافک هپسندن محروم؛ سزده کی خزائنه مقابل بنم تقدیم
ایده بیلیم جکم شی صداقتدن عبارت اولابیایر. بوتون ایسته دیکم ده دیزیکرک
دینده، کتابلرکم آراسنده سونمک اولاجقدر.

معلا خانم، شمديک سزدن هیچ برشی بکله یورم، یالکز ایلریده آکلاشه
بیلیمک ایچون برآز امید.. برتک کله بنم ایچون الهی برقوت اولاجق. فقط
بوکله ایستر اودت اولسون، ایستر خایر اولسون بوکون هیچ برشی ده کیشمه
یه جک؛ سزه دائماً حرمتکار برمسافر کی قالاجم. ردیکزدن صوکراده
برشی بلای اتمه مهیه چالیشه رق صوصمق ایچون اراده مده کافی درجه ده قوت
بولورم. سزدن آیریلق، سعادت رؤیاسندن اویانوب بلکه کوزلرمده بوتون
نوری مؤبداً سونمش بولق، بوبویوک قیامت اوقادار سسز اولاجق که...

بعضاً ایچمده برقورقو دویدیغ اولویور؛ دیشاریده، مثلاً یالکز کن صانکه
سزی برداها کوره میه جک کی تیره یور، اوزمان قوشه قوشه اوه کلیورم.
کوزلریکزی برثانیه کوره بیلیمک بوتون اندیشه لرمی سیلیور... اراده برسزدن
آیری قیرلر چیقیورم، برابر دولاشدیغمز یرلرک هر آدیمندن سزی خاطر لایه رق
کچورم. پک قورقویورم که برکون کله جک بنینه بورالردن یالکز،
ایچمده یارا، کوزلرمده یاش دولو تکرار کچه جکم. کیم بیایر بلکه ده سزی
برداها کوره بیلیمک، هان یانکزده قوشوب قورقورمی کوزلریکزده اونو تمق
تسلیسندن ده محروم اولارق... فقط بوفرطنه پی نه سزدویا جسکز، نه باشقه سی...
مستریح اولکز...

بومکتوبی یازمازدن اول دوغروندن دوغری یه فحامت خانم افدینک ألی
اویه رک بزه مشترک برآنه اولماسی ایچون یالوارمق لازمدی دکلی؟... فقط
أمینم که بنی سزده حق سز بولمازسکز: کیم بیایر بلکه اوبوکا قارشی پک فضله

عصيله شه بيایردی . حال بوکه اونى متأثر ایدە جک اک کوچوک حادثیه بيله میدان ویرمه مک همزک وظیفه سی . بوکا بنده راضی اولامادم . فقط البت کونک برنده اونلرکده آلنى اوپوپ دعالرینی ایسته مک ایچون کندمده قوت بولابيله جکم . ذاتاً شو یازدیغ شیلرله سزدن برشی ایسته مه دیکمی یوقاریده ده تکرار ایتشدم . بوکون بکا هرشیئی اونوتدوران کوزلریکز ایلریده بوس بوتون یکی برحیاته منبع اولمای ده وعد ایدیورمی ، بونی اوکرده نیم کافی ... بودرجه حرمت ایتدیکم برعائله ایچنده نه قادارتیمز آرزولره استناد ایدرسه ایتسون کیزلیجه یازدیغ شو سطرلرده کی کناهی ، اوکناهک آغیرلغنی حس ایتیمور دکلم . قاچ کوندرده اوآغیرلغک آلتنده صانکه هیچ یاشامیورم . فقط برشی وار ، اویله برشی وارکه نهایت اراده می ییقه رق بوکناهی ده ایشله تدی ؛ اوقادار قورقدیغ ، اوقادار دوشوندیکم حالدده ... سزده چوق دوشونکیز .

بن ، ایلریده استراحتکیز ایچون ایجاب ایدرسه کندی سعادت می بيله فدا ایدوب چکیلمه می وعد ایدرک هیچ اولمازسه عفوکره لایق اولمای کوزه آلدیم . سزده استقباله طائد دوشونجه لریکزی اطرافلیجه تحلیل ایدره ، مقایسه لر یاپار ، قرارکزی اوکا کوره ویریرسکیز . تمنیاتمده کی صفوتله مؤبد برصداقتدن باشقه تقدیمه لایق برشی بولامادیغمی تکرایدرم ، معلاً خانم .

آرادن برایکی کون کچدی . شمدیلک هیچ برده کیشیکلک یوقدی . معلاً ، فاخرک مکتوبنی یک ساکن ، طبیعی برطورله آلمش ، شو کچن ایکی اوچ کون ایچنده ده هیچ برهیجان کوسترمه مشدی . صوکره برآقشامینه استاسیوندن اوده کلنجه یه قادار برآراق یالکیز قالمشردی . مکتوب اطرافنده قیصه برقچ سوز کچدی ؛ معلاً :

— قاچ کوندر اولک قالابالغی ، کورولتوسی آراسنده اوقومایه امکان یوقدی ؛ دیدی . بودرجه آغیرلق آلتنده قالدیغ اولما مشدی . هنوز بوکون

اوقويا بيلدم . سزده بيليرسكز كه بويله بر دقيقه ده قطعی قرار ویرمزدن اول چوق دوشونمك لازم . . . يالكز پك رجا ایدەرم ؛ نه آنەم ، نه بابام ، هیچ کیمسه بومکتوبی دویماسون .

بونلری سویلرکن چوق ساکن ، حتی براز بارددی . فاخر بونی اونك آغیر باشلیغنه ویردی . برطرفدن معلانك ده کندی دوشونجه لرینه اشتراکنی تمنی ایدرکن برطرفدن ده همان بردن بره تسلیمیت کوسترمه سنی ایسته میور ؛ اونی بویله متین ، وقور کورمکدن ذاها زیاده ذوق آلیوردی .

ینه او آقشام اورتالق قاراریرکن فاخر ، رفیعه خانمی کوشکلرینه قادار کوتورمشدی . دونوشده معلایی سوقاق قاپیسنده کی مردیون باشنده بولدی . باشنك آغیریدیغنی ، برآز هوا آلمق ایسته دیکنی سویلیوردی :

— بوتون کون باشم چاتلایه جق کیدی اویله بر قیریتلق که نه یاپدیغمی بیلمیورم . . .

برآز دوردقن صوکره :

— دمین ، بو غیر طبعیلک اثناسنده ، بیلیم ، سزی ده قیراجق برشی سویله دمی ؟ . . قوزوم ، عفو ایدرسکز . . .

آغلار کبی ، سسی تیریوردی . بو ، معلا ده کورولمه یین برهیجانندی . برابر ایچری کیردیله . صانکه بونی سویله مک ایچون دیشاری چیتشمش ، اونی بکله مش کیدی . آنه سی ده معلانك کوندوز رومان اوقورکن بردن بره خسته لاندیغنی ، باشی آغیریدیغنی سویلیوردی . اوثانیه ده اونك فاخره چه وریلن کوزلری خفیفجه بولوطلو ، یاری قاپانقیدی .

او کوندن صوکره یینه هرشی اسکیزی کبی دوام ایتدی . يالكز فاخر بردن بره چوق چالیشمق احتیاجنی دویمش کبی صباحلری ایلك تره نله استانبوله اینیور ، آقشاملری چیتان « نجات » غزته سنده ده اوکله یه قادار چالیشیوردی . غزته جیلک ذاتاً یوروجی برایش ، ایکی غزته یه یازی یتشدیرمك بوس بوتون آغیر اولویور ، هله کونده او چ ساعت قادار تره ن وواپور یولجیلغندن صوکره

فاخر، آقشاملری کویه پک یتکین دونویوردی. محی الدین بکلراوکا جاندن بر اهتام کوستریپورلر، اک کوچوک اکسیکنه وارنجیه قادار دوشونویور- لردی. اوده اؤک ایچنده کی آهنگله کندى اوی ایش کی علاقه دار اولویور؛ نه لازم اولاجنى آراشدیریور، اک اوافق فرصتده اونلرک ایشنه یارامق ایچون تهالک کوستریپوردی. فاخرده صانکه اطرفنده کیلری ایجتیمکدن قورقان برجال واردی. خدمتجیلره بیله کندى آرقاسندن کوچوک برایش برامق ایسته میور، آراده برفخامت خانمه:

— خانم افندی، دییوردی. پک محجوبم، سزی نه قادار راحتسزایدیورم؛ سزه نه قادار یوک اولویورم!..
اوزمان معلانک آنه سی:

— نه سویلیورسک اوغلم، دیردی. بزه یوک اولقمی؟.. بالعکس اؤک ایچنه نه قادار بویوک یاردیمک دوقوندینی میداند...

معلا، همان هرزمان صیجاق، هرزمان صوقولغاندی؛ فقط او یله که لاقیدی یه ده پک بکزه ر. بعضاً بوکه وشکنک اوقادار چوغالیوردی که اوزاقدن باقان هیچ برکوز، قابل دکل، معلا ده ده فاخر ایچون برشیلر اولابیلمه سنه احتمال ویره مزدی. بوتجیلی پک کوچ، پک معمالی قیز حسیاتی موفقیته صاقلایا بیلیوردی؛ محقق اولان شی ازاده نك اونده کی بوقدرتی ایدی. ذاتاً مبجل ده، بهیجه ده اونک چوق کتوم، چوق اراده لی اولدینغی سویله مشلر:

— نه سینسی، نه قاپالی قوطودر او!.. دیمه مشلر میدی؟.

فاخر، بویله جه بوتون عائله ارکانی حقنده ایلك دوشونجه لرندن بعضیلرینی تعدیله مجبور اولویوردی. هله معلا ایچون هر کون یکی بر حکم ویره جک قادار باشقه لقلر ظهور ایتدیکی واقعدی. ده کیشمه یین برشی وارسه اوده هپسندمه مادیاته، پارایه، مزیناته قارشى موجود اولان ضعفدی.

حتی غریب دکلی، دنیانک اک لاقید آدمی کی کورونن محی الدین شوق بکده بیله اک جانلی هیجان، یالکز بوپاره مسئله لرند کورولوردی. سعادته

بویوک برطامل اولان رفاهك معناسی اسراف، احتشام ديمك دكلدر، ديه معلائك آزاده بر اورتايه آتديغي معقول دوشونجه لره رغباً فاخر اوئنده ايچين ايچين طوتوشان احتراصلری آرتق برواقعه شكلنده قبوله مجبور اولويور؛ فقط بونی قاضي قيزنده کی قصور لر صره سنده کورمه يه چالیشیوردی.

فاخر ك مکتوبندن، معلائك او آقشام قاپیده کنديسني قارشيلاييشندن صوكر ا آرتق سوقاغه چيتماز اولمشلردی. قالابالق آراسنده كچن ساعتلرایسه ايکيسني بربرندن دائماً اوزاقلاشديريردی.

بركون مطبعه ده فاخره هيچ اومولماق برشی تکليف ايتديلر. حرب وقايعك بردن بره قازانديغي اهميت، آناطولي يه قادار اوفاق برسياحت ياپماي ايجاب ايدييوردي. سياحت ماجرالری ايچون چيلديران كنيج غزته جي بوكاپك سه ويندی. صوكر ا بر آراق معلايی، معلادن آريلماي ده دوشوندی. اوزاقدن سه وومك فاخر ك ياراديليشی ايچون داها اينجه، داها فسونكار ایدی. او، اوزاقلاشمه يي بر آز اولومه بکزه تهلردن دکلدی.

بالعكس معلايی اوزاقدن، خيالاً تعزير ايتمكه ليلى و مجنون عشقنى بولمش اولاجقدي. شو كچن يكرمى بش يكرمى آلتى سنه ايچنده سه وكى يه بکزر هيچ برشی طاتمامشدى؛ فقط اون سكر ياشنده بر كنجك بوتون چيلغينليقلری، بوتون صارصينتيلريه سه وومك ده بر احتياج دكلى ایدی؛ اصل شمدی بو احتياجی دويويوردی. يالكز، دونديكى زمان، يا اونی بوس بوتون غائب اولمش بولورسه، ساده بو احتمال اونی تيره تيوردی.

مطبعه ده تفرعاتی قرارلاشديرديلر. معين اولميان يالكز حرکت زمانى ایدی. فقط يارين دكل اوبركون صباحين يوله چيتمق بيله محتملدى. برده باش محررك بر ايكي كون قدر قادار ايزميه كيمه سی او دوند كدن صوكر اده فاخر ك يوله چيتماسی احتمالی واردی.

أوه کلدی. جواد بکزر، بتيشيك قومشونك قیزی بهيجه خانم، قان برادر غريدونك، معتاد قالابالق اولك ايچنده نشئه وخنده قاصرغه سی قوپارييورلردی.

فاخر معتاد سکوتی ایچندہ کیمسہ یہ برشی سویلہ مدی . فقط آل چانطہ سنی
حاضر لارکن مہجل کورمش ، کیدوب آشانیہ یتشدیرمشدی . ہپسی اونده
بر فوق العادہ لک اولدیغنی سویلہ دیلر . او زمان فاخرده سیاحت احتمالی
آکلاتہ یہ مجبور اولدی . محی الدین بک بونی مساک یولندہ مفید فرصت لر ویرہ جک
برشی دیہ تلقی ایدیور :

— سن بیلیرسک آما ، دیوردی بن کیمہ دیم .

صو کرا موسمدن ، سیاحت کوچلکلرندن آچیلدی . فاخر آنا طولیدہ
یادینگی سیاحتک خاطرہ لرینی صایور ؛ مثلاً اینہ بولی ایلہ آنقرہ آراسندہ تکرار
یاماسی محتمل اولان یولجیلقدن بحث ایدرکن :

— اویلہ یرلر وارکہ ، دیوردی . اورالری برداھا نوردہ جکم دیہ ایچم
تیریور . . بلکہ دنیانک الک کوزل یرلری .. یوللر ، داغلرہ حلزونلرلہ طیرمانیر ،
صو کرا اینہ اویلہ اینہر . چاملرلہ اورتولوداغلرہ چیقارکن بعضاً بولوطلر آلتکزده
قالیر... ہلہ بردفعہ یاغمورلو برکوندی ، ینہ یوکسک تپہ لردن برینہ طیرمانیوردق .
برنقطہ دہ بز کونشہ قاووشدق ؛ فقط آلتمزده کی بولوطدن داغک آتکنہ حالا
یاغمور یاغموردی .. یوقاریدہ کونش ، آشاغیدہ یاغمورلو برہوا . . .

قسطنطنینیدہ شوسہ نک بویلہ جہ ۱۸۵۰ مترو ارتفاعہ قادار چیقدینگی اولور .
بزتموزده کچیوردق ؛ داغلرہ حالا قار واردی . ہلہ صولر ، یاربی ... بوتون
یولجیلقدہ انسان وقتنی ییوب ایچمکلہ کچیریر ؛ بر بارداق صو انسانہ اویلہ براشتہا
ویریورکہ ... صو کرا ، چام ، چام ، چام ... ہرطرف خزینہ لر قادار قیمتلی
چاملرلہ دولو ... انسان اونلری کورد کدن صو کرا بورادہ سزک کویدہ کی ،
یاخود مثلاً قارشیدہ آطہ لردہ کی معروف چاملری اویلہ جیانز ، اویلہ سفیل بولیورکہ .
صو کرا ایشی لطیفہ یہ دو کو یورلردی ؛ فیخامت خانم قوجاسنہ :

— ہایدی سندہ کیت ، فنامی ، پاراقازانیرسک . دیرکن فاخر :

— فقط ، لطیفہ دکل آما ، دیوردی . اورایہ کیتمک ، اورادہ یاشامق

احتمالی اولسهیدی چام اورمانلری ، صولر، او هوا ، هر حالده اسویچوردی سزهده
پك آراتمازدی .

اوزمان اورتایه :

— هپ برابر کیتسهك ... دیه برلاف چیقور ؛ دوقتور محی الدینك :

— اوچ کونده بیقار، ینه استانبولی آراسکز . . دیشنه قارشى معلا :

— هیچ ده دکل، کاشکی کیتسهك، نه ای اولوردی ! .. دیه کوزلرینی قاپیوردی .

او ، بر ایکی کوندر اورتده سبب اولمدیغی حالده فاخره قارشى براز دارغین
کیدى ؛ آقشامدن بری ده باشنك اغریدیغنی سویلیوردی . آرالرنده هیچ
برلاف کچمه مش، فاخرده بوتون بوسوزلر آره سنده کوزینی چه ویروب اونککیلری
آرامامشدی . یمکده معلانك برشى یه مه دیکنه دقت ایتدی . فاخرکده اشتهاسی
یوقدی . شعر تاینخنده حقیقی سهوکی دیه یاد ایدیلن چارپنتی یی کندنده ده دویدجه
شاشیور :

— اولور شى دکل ، دییوردی . دیمك ؟ . . .

بو آقشام فریدون بك، جواد بك هپسی یمکدن اول بر آز فضله قاپیرمشلردی .
چالیورلر ، چاغیریورلر، هر دقیقه آرتان ، هر وسیله ده دالغالانان برنشئه ایله
جوشه یورلردی . فاخر چانطاسنی یرلشدير رکن معلا ده یوقاری چیقدی .
اونك هر زمانکی سکونته بکزمه یی ، بر از فضله جه دورغون کورونوشنده
صانکه صوصدورولمایه چالیشلمش برهیجان وار کیدى :

— لطیفه می سویایورسك، فاخر؟ . دیدی . یوقسه حقیقه کیدیورمیسك؟ .

— ایسترسهك معلا . . .

فاخر ، کیتیه یم دیه علاوه ایدجکدی . معلا :

— خاییر ، فقط بو برهانه دکل یا ، اونی آکلامق ایستیورم . بورادن

کیتمك ، بزدن قاجق ایچون ، یوقسه؟ . . .

— خاییر معلا . آرتق بوکا امکان کورده یلیومیسك ؟ . اسکیدن بلكه ،

— سزى اوزون مدت راحتسىز ائتمەك ايچون ديدىكك كې بويە دوشوندىكم
اولويوردى . فقط شمدى آرتىق قابلى ؟ . سىنسز . .

— كىم بىلىر ، بىلكە برقاق كوندىر بكا دارىلشسكدر ؟

— عنادىكە مى سويليورسك معلا ؟ اصل سن بى نه قادار اوزدك !

او ، براز تىلاشلى ، همده سوزى دكىشديرمش اولق ايچون :

— آمان ، ديدى شمدى مېجل يوقارى چىقار . ذاتا آقشامدىن برى دهلى

كې . هر دقيقه مردىودن آردلرنده ، صانكه برشى دويمق ايچون ، كولكه كې
دولاشيور . .

— پكى . بىم كىتمەم ايچون برشى سويليوردك ؟

— خاير ، خاير . . بىلكە بويە داها آي . هم بابامده سويليوردى ، سنك

ايچونده يكى بر زمين آچىلمش اولاجق .

معلا بونلرى سويلر كن اوكنه باقيور ، صوكره :

— كىت آما بى اونو تىمازسك دكلى ؟ .. دير كن آلتون رىنكلى باشى فاخر ك

كو كىسنه دايا نيوردى . قاق كىجهدر آرالرنده هيچ سببىسز بر اوزاقاق وار كن بو
آقشام كوزلرى ، آللىرى ، نهايت ايلك دفعه اولارقده دوداقلرى بر برى بولدى .

*

**

معلانك قورقدىنى قادار واردى . او آشاغى ايند كدىن براز صوكرامېجل

فاخر ك قايسىنى طقىرداتدى . اولدىنى يرده چوكن ، آئىهن برىتكىنللك ايچنده :

— بىندى قاقچيورسكنز ، فاخر بك ديه ككهلهدى . والله ، سزى راحتسىز

ائتمەك ايچون اىسترسه كز بن كىدهيم ؛ اىسترسه كز بوراده هيچ سىمى

چىقارمىه جىم ، يوز كىزه بىلە باقامق ايچون كوزلرمك بوس بوتون سونمەسنه راضى

اولا جىم . كىتمەيىكنز ...

فاخر ايچون بويە دقيقه لرده ويرىلەجك جوابى بولمق پك كوچ اولويوردى .

اونى قىرمەدن صوصدىرمق ايچون كىندى سعادىتىن بىلە بر پارچه سنى فدایه

راضى اولاجنى كليوردى .

مېچك اندیشه لرینه هیچ بر سبب اولمديغنى آ كلاتمق ايچون قيوراني ركن
آشاغیده يكانه نك سسى كنديسنى قورتاردى :
— فاخر بك .. خانم افندى بو كوني كى غزته لرى ايستيور .

فاخر ك دفترندن :

۲۵ تشرين اول ۳۳۷

بزم باش محرر حالا دونمهدى . كويا برقاج كونه قادار او كله جك ،
رينه بن كیده جكدم . دونده دفترمه اوزون اوزون يازديغم كى ، بنم بوياقينده
يوله چيتمام آرتيق شېه لى . ذاتاً بو حادته يه قارشى غريب برلاقيدى حس
ايدىيورم ؛ كيتسه مده اولور ، كيتمه سه مده ... كيتمه نك باشقه برشعري وار ،
قالمانك باشقه بر ذوقى ... كيدر سه م معلانك بنى سه ووب سه ومه ديكنى آكلایه
بيله جكدم ؛ كيتد كدن ، دوند كدن سو كرا ده كيشه جكمى ، اونى مراق ايدىيوردم
حال بوكه او ، كچن آقشام بوتون رؤيالر مه حيات ويرمش اولدى .
آرتيق جواد بكلرده قيزيل طوپراغه طاشينيورلر . ذاتاً اون بش كوندر
كوچلر باشلادى . كويك حياتنده كوندن كونه ا كسيلن برشى وار . توزلويوللرده دون
ساده نشئه ، ساده نغمه اوچوشور كن شمدي روزكارك او كندن قاحق ايچون
چارپينان ، ديوارلر ده ووران يپراقلر ك ناله سى وار ؛ ساحلده ، دون چاقيللرله قويون
قويونه مست ، مونس ياشار كن شمدي اونلرى ايتهن ، خيرپالايان دكزك
خومورتوسى دويولويور . كوشكلرك قايسى آرتيق صيق صيق آچيلميور .
يانجورلر ، روزكارك خشوتى آلتنده ايكله مكدن بي تاب ، پنجره لرك قوجاغنه
صوقولش ، ديشاریده اولان بيتهن هر شيئه كوزلرني قاپامش . سو كود دالرينك
بوينى بوكوشنده اويله بر حال وار كه سزه يتيملككزى خاطر لاتيور . هوالر
حالا ايليق . فقط بوسارى بكزلى لوحه يي كوردجكه ، داها قيش كله دن ايچكزدن
دوغرو برأوشومه ، براور پر مه دويويور سكر .

فيخامت خانمك بكا قارشى كوستردىكى شفتت والتفات اوقادار فوق العاده كه
 اوچ بش كونك مسافرلك ، قاسمه قادار هوا تبديلى ، شويله بويله ديركن ،
 هيچ فرقده اولمادن ، قيشى ده بوراده كچيرمه هم همان همان بر امر واقع اولدى .
 بوقادار اوزايان مسافرتى اونلرده صانكه پك طييعى برشى تلقى ايدييورلر .
 قيش حاضرلقلرى آراسنده عائله اركانندن برى ، حتى برنجيسى ايشم كې الك
 اهميتسز اوافق تفكه قادار بنم اودامه ، بنم حياتمه معطوف اولان اعتنالى
 كوردكه منتهدارلغى افاده ايچون سوز بولاميورم . فيخامت خانمك اوغلى
 اولسهم ساده بوقادارى اونى الك مشفق آنه لرك آراسنده بيله يوكسه لير ؛
 قارده شى اولسهم بودرجه اهتامه كيمسه اينانمازدى .

بوكون برآز وقت بولدم ؛ غزته يه ده بر ايكي پارچه يازى چيقايرم ديه
 تقسيمه بوقس مسابته لرينه كيتدم . آرقداش لار اوزون زماندن برى بنى كور .
 مدكلرينه شاشيورلر :

— بز سنى يا اولدى ؛ يا اوله ندى ظن ايتدك ... ديه آلاي ايدييورلر ؛
 صوكر :

— ايكي سى ده بريوله چيقار يا .. ديه كولوشويورلردى . بوكون برقاچ
 ساعت ايچون كندى ينه اواسكى سرآزاد حياتك ايچنده حس ايتمكه توحا
 فلاشدم . دوشونويورم ده بنم ده بويله مشين طوپك ، قوم طورباسنك قارشوسنده
 ساعت لرجه يومروق صاللادينم زمانلر واردى !.. صانكه بن دكلم انسان
 اوقادار ده كيشيوركه

۲۷ تشرین اول

جواد بکلر يارين كيدييورلر مش ... جمعه ديه بن ده اوده ايدم ؛ هپ
 كز مهيه چيقدق . حتى فيخامت خانم بيايه برابر كلدى ؛ ايكي مزا اوته كى قافله دن
 آبرى دكز كنارينه دوغرو دولاشدق . كيجه ده بردن بره جواد بکلرى
 باصديرالم ، ديندى . اورايه كيتدك . لطيفه لر ، خنده لر ، اويونلر ... بو آقشام
 اولدجه غريب برشى اولدى . جواد بكك اون بش ياشنده براوغلى وار :

فوزى . قزل طوپراقده قومشولرندن بر روم قیزی می وارمش ، نه ایش ،
 فوزی ده اوکا مکتوبی کوندرمش ، پخیره دن اشارت می ایش ، برشی اولمش ..
 معلا ، مېجل ، بهیجه ، اوچی بو آقشام بونی طوتدورمشلر ، بی چاره چوجوقله
 اکلە نیورلر ، اونى تیزدیر ییورلردی . فوزی ایکیلدی ؛ معلانك قولاغنه برشی
 فیصلدادی . سانکه : « بنده سنکیکلی سویله رم !.. » دیور کیدی .
 آرادە « وفا بك » ديه براسمده دويدم . اولك ايچنده آرا صره بو وفا بككده
 آدی کچر . کویده بکار یاشیورمش ؛ قومار قلوبلرندە طانمش ، سفیه برسیا
 ديه اونلر سويلرلردی . یاقیشقلى ، زنکینجه برکنج ... آنه سی محى الدين
 بکلره آرا صره کیدوب کلدیکی ایچون معلايه طالب اولدینغی ده یتە سوزلرک
 کلیشندن حس ایتشدم . مېجلده کچن آقشام معلانك طالبلرندن بحث ایدرکن
 بونلردن اکثریسنك اويله اتلی آرابالی زنکینلردن اولمقلری ایچون رد ایدلدیکنی
 سويلیوردی ؛ آرادە بو وفا بك حقندەده بر ایکی کله علاوه ایتشدی . برکنج
 قیزه پك چوق طالب چیقابیلیر ؛ بونك قادار بسیط برشی اوناز . فقط سانکه
 یوزه وورولا جق برلکه ایش کی بونك برچوجوق آغزندن چیقماسی نه دن؟ ..
 صو کرا بویله شیلرک چولوق چوجوق آراسنه قادار یایلماسی نه فنا ...
 کوزلرمز غیراختیاری معلانک کیلرله بولوشدی . او ، قیپ قرمزى ایدی .
 اولك ايچنده شاقالاشما کورولتولری ، حاضرلق تلاشلی آراسنده بو بر ایکی
 دقیقه دن فضله سورمه ین صحنه طبعی ، هیچ کیمسه نك کوزینه چارپمادی . بن
 بیله بوا کلنجه لره اشتراك ایدیور ، کولیوردم . کیجه یاریسنده دوندک .

۲۸ تشرین اول

یازیلر می حاضر لایامادم ؛ جانم صیقیلیور . ترەندن چیقارکن مېجله راست
 کلدیم . صاری یارده بویوک آنه سنه کیدیورمش . اونك واپورینه ، بنمده غزته یه
 کیمه مه وقت واردی . بوغاز ایچی اسکە سنده اوطوروب براز تونوشدق .
 سوزدوندی دولاشدی ، طبعی اومزمن حکایه اوزرینه کلدی . اعتراف ایدەرم که
 بنده آرادە بر بشری برنجسسه طوتوشویور ، سوزی اوصورتده اداره ایدیور .

دم که مېجل صاقلامایه چالیشدیغی شیلری بیله آغزندن قاچیردی . زوالینک هیچ قباحتی یوق ؛ بیک تورلو حیلله ایلله آغزینی بن آرام . ذاتاً اونک قادار ضعیف روحلی ، تجربه سز ، بجه ریکسز برقیزی ، هله سینیرلرینه چوکن پریشانی ایچنده سویله تمک پک قولای اولدی . معلایه قارشى دویدیغی سهوکی یی ، حتی آبلالق حرمتی هر دقیقه آغزندن دوشورمدیکی حالدده نهایت هیجانه قاپیلیور ، هر شئی افشا ایدیوردی . ظن ایدیور که بن اونده کی فرطنه لری دویمورم ، آکلامیورم . کندیلرینی آکلاشلماش وضعیتده کوردنلر بعضاً پک ایلری کیدرلر ، چیلغنجه شیلر سویلرلر ، اوده اوپله ...

— معلا یی اوقادار سهوهرم که ، دییور ، سزی مسعود ایده جکنی بیلسم سکونتله اولوب آرادن سیلنمک بیلله بنم حصه مه دوشن بر سعادت اولوردی !.. بویله باشلانجه طبیعی اونک هوسلرندن ، سوس مراقندن ، احتشام خولیا لرندن بجه کیریور ، نهایت بر دقیقه کلیوردی که آبلاسی ایچون :

— عائله اشتراکنده منفعتدن ، پارادن باشقه بر روح ، باشقه بر معنا طانیماز ! دیمه یه قادار واریوردی . اونک ماضیسنی ، عفتنی استانبولده اشی بولونماز بر خلقت دیه تصویر ایدرکن سوز طالبلره دوکولویور ؛ اوزمانده بوعائله نک زنکین — فقط زیانی یوق — کچکین بر داماددن باشقه بر شی دوشونمدیکنی تکرار ایدیوردی .

کورولویور که مېجل ، وفا بک رسمی طلبندن باشقه بر شی بیلور . فقط عجباً بونک چولوق چوجوق آراسنه دوشمه سنه باشقه سبیلر یوقیدی ؟ بوراسی بلای دکل ... اسویچرده کی عادل بکک لافیده آچیلنجه معلانک بوکنجه قارشى محقق برضعفی اولدیغی سویله دی . اولجه ده یازمشدم ؛ بو ، اونک چوجقلق آرقداشی ... معلا حالا هروسيله ده عادل بکک اسمنی آغزندن دوشورمیور ، بوکا بنده دقت ایتشدم . داهاسی وارمش ؛ اسویچرده دن مکتوبلری کلدجه معلا آغلار ، کونلرجه یمک یه مز ، عادتاً چو کرشم ... مېجل بونلری آکلا- تیرکن بن سکونتله ، حتی بر آز مستغنی ، بر آزمسته زی دیکلیوردم . سوزلرینک

بنده هیچ بر تأثیر حاصل اتمه دیکنی کوردجکه او بوس بوتون حدتله نیور، بوس بوتون ایلری کیدیوردی . بر آرز علاقه دار اولدیغمی حس ایتسه آبلاسنه توز قوندورمق ایسته مین بو زواللی هیچ برشی سویله میه جکدی .

واقعا آکلاتدقلری بلای باشلی ، دهرین رابطه لر دکل ده ، بلکه مبهم ، چوجو قجه شیلر ... ذاتاً معلانک یارادیلیشی پک ده او یله قوتلی بر حساسیته مساعد اولدیغی محقق . فقط ، انسانک عقلنه شیطان اولور اولماز شیلر کتیریور ... مثلاً بو کون معلا ایله آرامزده یواش یواش اورولن برشی وار ؛ بونی مبجل دکل ، هیچ کیمسه بیلمیور . دیمک که اونک حسیاتی صاقلامقده بوقادار موفقیتی وار ؛ انسان ، چاره سز ، عجباً دیور ، مبجلک ، مبجل ایله برابر داها باشقه لرینک بیلمه دیکنی شیلرده اولامازمی ؟ .

قونوشدیغمز شیلرک اصل بوندن صوکراسی بنی پریشان ایتدی . فخامت خانمک کوستردیکنی شفقته ، صیجاقلنه بن بر تورلو اسم بولامیوردم مهایت بوکا مجرد ومطلق بر «ایملک» دیمش ، کندیسنه قارشیک مطیع ، اک حرمتکار بر قاردهش کبی باغلامشدم . مکر بونده ده غایت مادی ، غایت خسیس سبیلر وارمش . بن اونلره اودونج دیه یوزاللی لیرا ویرمشدم ؛ برقچ آیدر اؤک ایچنده اوته بری فلان ایچونده آریجه یوز الی ، یوز آلتش لیرا قادار پاره صرف ایتشدم . بونلر اوقادار کوچوک شیلردی که دفترمه یازمایه بیله لزوم کورمه دم .

هله اؤک ایچنده صرف ایدیلن پارایی اونلرک حسابنه بر بورج دییه قید ایتیهی خاطرمدن بیله کچیرمه دم . ناصل اولور که اوسفرده بن ده اوطورویورم ؛ اومصرفدن بر قسمی پک طبعی اولارق بنمده حصه مه دوشویور . دکل بو اوافق تفک مصرفلری ، حتی دوغروندن دوغروییه بورج نامی آلتنده ویردیکم یوزاللی لیرایی بیله اهاده ایتمک ایسته سه لر بن آلمیه جغم .

واقعا ، آیلر دن بری اراده می آلت اوست ایدن ، هرتورلو اصول وقواعدی اونوتدیران قوتک منبعی ساده جه معلانک کوزلرنده ... بویله اولماسنه رغماً

أو مصرفندن اوفاق بر قسمنه اشتراك ايتمك امكانى، هيچ اولمازسه بوتسلى ي بولماسه بىم بوراده بر كون بيله اوطورمام قابل اولورميدى ؟ مسافر نامى آلتده اوزون مدت باشقه لرينه يوك اولارق ناصل ياشانير ؟

أودت ، بن بو برقاق يوز ليراي هيچ دوشونموردىم، ديمشدم . حتى بك طيعى ، بك ضرورى تلقى ايتديكم ايچون اونوتمش كيتمشدم . حالبوكه مبجلك ادعاسنه كوره اونلرك نظرنده هيچده بويله دكلش . هله بوكونلرده او ايچنه چوكن دارلق يوزندن اونلرك-هايدى اويله ديه لم - بوبورجى اوده يه جك حاللرى يوقش .

حال بوكه بن بورادن كيدرسه م اونلرك عقلنجه بوپارهنك اوده نمه سى لازم كله جك ايمش ؛ اونك ايچونده بنى قويوورميورلر ، بوقادار اكرامى ، بوالتفاى هپ بوانديشه ايله ابزال ايدييورلرمش !
مبجل كوزلرينى ، قارشوده بر نقطه ده اونوته رق ، دالغين دالغين آكلاتيور ، دييوردي كه :

— سز راحتسز اولاجقسكز ، كيده جكسكز ديه فخامت خانم تيزه مك اودى قويويور . هانيا ، صوك كزديكمز كون بزه قيزمشديكزيا ، اويله بر وضعيت قارشيسنده سزك درحال كويدن كيده جككزى هپ حس ايتمشك . معلا آبالام ، بزه كلدى : « آمان ، ديدى ، فاخر بكه سزده سويله ييكز ، بنده چاليشه جىم ، يازين كيتمه يه قالقماسون .. » اوزمان بزه : « فاخر بكه نه دن بوقادار اهميت ويريورسك ؟ » ديه صوردق . ديدى كه : « بيلميورميسكز ، بزه آلاجنى وار . شمدى كيده جك اولورسه بابام پارا بولوب ويره ميه جك ؛ آنهم قيزاجق ، ينه خسته اولاجق ، قاوغا ايده جكلر .. »

براز دوردى ؛ صوكرا خاطرينه برشى كلش كې بردن بزه :

— معلايه قارشى ضعفكز اولديغنى سزانكار ايدييورسكز اما ، ديدى بونى تيزه م اولسون ، بك دايم اولسون آكلاميورلرمى صانييورسكز ؟ .. فقط مادام كه سزى بربريكزه ويرمك متصور دكل ، عائله آراسنده ياشاما كزده هيچ برمحذور

کورمیورلر . ذاتاً اونلرک آلامه قارشى فوق العاده اعتمادلری وار . معلانك مستقبل قوجاسنده آرایه جنی الك برنجی شرطك ثروت اولدیغنی هپسی اوقادار آئی اوکره نمش که کندیلری راضی اولسه بيله سزى معلانك ایسته میه جگنه شبهه ایتمیورلر .

آرتیق کندمی طوتامادم :

— هیچ اینانلیمه جق شیلر سویلیورسکز ، مبیجل خانم ، دیدم . فقط نه دیرسه کز دیکز ، چوق یا ککش دوشونجه لرله بو حکملری ویردیکزه آمیم . بکا عطف ایتدیکز ضعف اولسون ، معلا ایچون ، آنه سی ایچون سویلدیکز شیلر اولسون هپ واهمه ، هپ اسناد ...!

حقیقه بن بونلره برتورلو اینانامیوردم . معلانك ماضیسنی دوشونمك ، اوزون اوزون آراشدیرمق ایسته م . کورویوروزکه هر کنج قیزك حیاتنده کوچوک کوچوک حکایه لر مودا... بومودا بنم ذهنیتمه هیچ اویماز آما، هایدی عصری تسامحه اویارق بندن اولکی حیاتی حقنده برشی صورمایه حقم یوقدر ، دیه م . فقط فخامت خانم ایچون دویدیغم انکسار هپسندن فجیع اولدی . بن ایسه اونى نه قادار سهویوردم !! اسکیدن اطرافه باقارده اییلکی اییلک ديه یاپاجق انسانلرده بولونابيله جگنه ایناناماز؛ فضیلت، معالی سوزلرینی بوش، معناسز بولوردم . فقط شو برقاچ آیدر هر شیئك برده مستثناسی اولابيله جکنی قبول ایتش الك ریاسز ، الك تمیز حرمتلرله اونلره اسیر اولمشدم . دینیه بیلیرکه بو محیط بنم قفامده ده ، قلمده ده انقلاب یاپیوردی . اونلرک یاننده بوتون فکرلرمی ده کیشد- یرمشدم . دونه قدر صانکه وحشی ایکن بوعائله ایلقلغنی آراسنده مونس برکدی کبی اویوشلق حس ایدیوردم . دوردجه کندمدن ، کندى نوعمدن ایکره نیورم . کاشکی انسان یوزی کورمه یین داغلرده ، طبیعتدن پیوب ایچن وحشی برقوش بر بوجك ... برشی ، باشقه برشی اولسه دیدم !! قافام هیچ ایشله میور ، هیچ دوشونه میورم . دوشونمه یه چالیشدیغم شیلرده قافامه صیغمیور . ناصل اولور یاربى ، ناصل اولور ؟ ..

پك يانديغم برشی ده ، شمدي يه قادار كور كورينه ، قافامي حقيقته وورا
 وورا اوغراديغم صارصينتي آلويرمه مش كې بو كون يكي دن قيريلق ، بر داهه
 آلدانق ...! كديلرله جيوجيولردن باشقه برشی دوشونميور كې كورون شو
 دوم دوز قيزه بايكنز ، بني نه قولاي آلدادي . بو قومهدياجی روحی بن
 برتورلو كشف ايدمه مشدم . بو كون بيله آرامزده كي مناسبتی هر كس دن
 كيزله يه بيليور؛ بونده موفق اولق ايچون ، مېجلك سوزلرندن ده آكلاشيليور،
 آنه سنك ، باباسنك يانده بندن كيم بيلير ناصل بر لسانله بحث ايدنيور ؟
 دوغروسی اونك حائله سنه قارشی دويديغي فداكارلق حساريني پك بكندم !! .
 بكا اوزانان اللری ، دوداقلری ده هپ بويله اولك ايچنده برطاسزلق چيتماسون ،
 فيخامت خانم اوزولمه سون ديه می تتره يوردي ؟ .. فقط اونی كيم زورلادی كه ...
 معلاي بن معصوم ظن ايدنيوردم ، مكر بو صفوت ساده جه عرفاننده كي
 نقصاندمش . اونك وقوفنده كي اكسيكلكي كوردكه هر شيئه قارشی عيني درجه ده
 بيكانه دردييوردم؛ مكر ذكاسنده بعضاً نه قدر شيطانجه انكشافه استعداد وارمش .
 بودرجه قولاي آلدانمقده بر آز بنده قباحتم وار . كنديمی قاچ زماندر اويله
 كدوشهك بولويوردم ، ايچمده بر آزاويا لائق ايچون اويله بر احتياج دويويوردم كه
 عادتاً كوزلرم قاپاندي ؛ بصيرتم باغلاندي . بيليورم هپ او ، هپ او سهو كينك
 نه اولديغني طانق هوسی .. يوقسه كوزدن قاچاماسی لازم كلن نه لر واردی .
 مثلاً بو وفابك حكايه سی . آراده بر كزر كن او كنجه ده راست كايردك ؛ بهيجه ،
 مېجل ، معلا هپسی آرالرنده برر كله ايله فيصيلداشيرلردی . بر آقشام استاسيونده
 تره ندن چيقانلری سير ايدنيوردق ؛ معلا او قادار قالابالغك آراسندن وفای
 بهيجه يه كوستردي .

حال بو كه سوقا قده معلانك باشنی او كنه ايكه رك ، اطرافنه باقادن اويله بر
 يورويشی واردركه هيچ برشی كورميور ظن ايدهرسكنز ... يالكنز كزر كن
 او كا بر قاچ دفعه راست ككشدمده هيچ برنده بني كورمه دي ایدی . انسان بونلری
 شمدي خاطر لادجه نه لر دوشونويور ، ينه بر آقشام ، بنم آناطولی په كيمه م

احتمال لرندن اول ، برابر دونو يوردق ؛ اوکا ديمشدم که : «بو آقشام هوا چوق کوزل ... کز مه يه چيقاميورز ؛ باری بالقونده بر آزاو طور سهق .» او ، کولمش : « اولماز ، ديمشدى . يارامازلُق ايدرسک ..» چونکه بر کيجه اول آي ايشيغنده او طور وزکن ايلک دفعه ألنى اوپمشدم .

يارامازلُق ديدیکی بو اولاجقدى . بونده نه وار ، دکلی ؟ .. بيلم که
 بيم بر مکتب چوجوغى صيقلغانغيله قورقه قورقه اونک ألنى اوپمه مه ويريله جک بر اسم واردر : ساده جه يارامازلُق ... بو ، تام يرنده بر تعبيردى . معلا کي پک تجربه سز ، صاف بر قيزک آغزنده يارامازلُق کله سنک بويله تام يرنده قوللا نیلماسى باشقه شيلرده افاده ايتزمى ديه غير اختياری دوشوندم . عجب او ، بو کله يي ، بويله بر يرده ايلک دفعه اولارقى قوللانیور ؟ ..

نه ديه يم ، بيم کي موسوس بر قابله صاحب اولوب ده مسعود ، راحت ياشامق قبل دکل .
 ميجاک بو کونکي افشا آتی ذاتاً اوتدن برى دارما داخير اولان ذهنده بوس بوتون اوچوروم آچدى . شمدى يه قادار قوردیغم ، تا صارلادیغم شيلرده صانکه بو اوچورومه يو وارلانیورمش کي سرسم اولدم . دوردوغى يرده طوتان صانچيلر کي چوق دفعه آنى شهبه لرله قيورانیوردم . او زمن کوزمک اوکنه اونک طبعته ، يارادیليشنه هاند بيک بر حکايه کليور . مثلاً ، معلانک سوس ، کوسته ريش مراقى کي برده بوتون بو هوس ايتديکی شيلردن بردن بره بيقماسى وار . بويله کلوب کچيجى هوسلرينک اطرافنده قاچ دفعه آنه سنک مؤاخذه لرينى ، خاله سنک سرزنش لرينى دويدم . کچنلرده بهيجه ده بونى سويله - ميورميدى ؟ ..

شيق بر چانطا کورو يور ، ديه لم يا خود کوز کدن بر مانشون يايدير مق ايستيور دکلی ؛
 او چانطه آلنجيه قدار ، او مانشون ياپيلنجيه قدار ، عادتاً مرضى نوبتلر کچيرير . آلمانسه ، ياپيلماسه خسته اولاجق ، ظن ايدرسکز ؛ اويله خيرچين بر مراق ... صو کرا چانطا آلنجيه ، مانشون ياپيانجه او هوس بردن سونو يور ؛
 حتى چوق دفعه او سهو کينک نفرته چه وريلديکنى کورددم . او قدار هوسله ،

أوزونتولرله آلنان شیلر قاچ دفعه دولابك بر كوشه سنده اونوتولدی ؛ كوزه كوزو كه سون ديه بعضاده ساتيلمایه محكوم اولدی . معلانك بكا قارشى بوكونكى صوقولغانلغنى ، صیجاقلغنى كوردكجه بویله چانطا ، مانشون حكایه لرینی برتورلوعقلمدن چیقارامیورم . آرامزده کی رابطه نك ده بر كون كلوب بو روحه قربان ایديلمه سی اك قورقدیغم شی ...

مبجل ، نهایت بر شی داها سویلیدی كه ، بنی چیلدیرتدی . تا ، یازین محی الدین بكاره یا بایرامده ، یاخود فخامت خانمك خسته لغنى اثناسنده كیدوب كلیركن مبجلی ایلك طانیدیغم كون ، صانكه بنی اوته دن بری بیلورمش كبی اونده تحف بر حال سزمش ، حتی دفترمه بیله یازمشدم . بونك ده سببی آكلاشیلدی : او زمانلر ، كه معلا ایچون هنوز معین ، مثبت هیچ بر فكرم یوقدی ؛ داها استانبولده قالاچم بیله بالی دكلدی . فقط او بندن مبجله ده ، بهیجه یه ده بحث ایتش ، همده نه قیزیورم ، كندیسنه قارشى ضعفی ، تمایلی اولان بر كنج ديه ... بوكاپك قیریلدم . نه چیرکین كه وه زه لك ، نه بایاغی !.. قیمت ویردیكم بر دوشبونجه نی بن کیمسه یه سه زدیرمه مك ایچون اولورم ؛ بوش بوغازلق ، مقدساتی بردن بره اك عادی رنكه بویار ؛ اونده قیمتمی قالیر؟ . یا معلا ، داها ایلك كونلرده اوته كنه بریكنه بویله دیدی قودی یا بمقدن ، نه ديهیم ، صانكه او كونمكدن عجباً ناصل بر ذوق دویمش !..

بونلری یازاركن ساعت اون بر بوچوغه كلدی . پك یورغونم . بوكون ایشلرمده ذاتاً چوقدی ؛ صباحکی كورولتو بنی بوس بوتون پریشان ایتدی . یاریمه دوغرو یا تابیلیرسه م آنجاق بش ساعت قادار اویقویه زمان قالیور . شمدی معلانك یوقاریدن شن ، چیلغین قهقهه لرینی دویویورم . کیم بیلیر ، نه یه کولو- یور !. نه قادار آلدانشم یاربی ... کچن آقشام بالقونده اوظوزوركن یانمه کلیشی : « هایدی فاخر ، یاتسهك آ... هوا سه رینه دی . قاچ كوندر او کسورویورسك ده... » دیشی واردی ؛ اوقادار صیجاق ، اوقادار طاتلی بر سویله یش ...

مبجلك افشا آتی هپ یالان ، هپ افترا در ديه بیلمك ایچون ایچم تیره یور.

هله فخامت خانمك ، دلی كې سه و ديكم بو قادينك كو چوله بيا سه سنه هيچ
دايانامپورم . ايستردم كه مېجل بكا قارشى دويدىغى انكسارله بويله يالانلر ،
صاچالار صاوورمش اولسون ، آه نه آي اولوردى ؛ فقط يا صحيح ايسه ...

۳۰ تشرین اول

باشقه زمان اولسه ، بنم ايچون ياپيله جق يالكر بر شى واردى ، سكونتله ،
هيچ بر شى بلای ايمه دن ، بورادن بوس بوتون چكياوب كيتمك ... كندى
بيلم بيله لی بن بويله ايدم . بو قادار كو چوكله قارشى ناصل كوز يرمولا بيلير؟ ..
فقط نه دن ايسه بوسفر صانكه چله دولدورانلر كې صبرلى ، او قادار سا كنم ...
صوئوق قانليقله دوشونمك ، قطعى بر حكم و يرمه دن اول بكامك ، بردفقه ناصلسه
ايچمه دوغدى . ذاتاً مسئله نك اهميتى ده بردن بره كوزمدن دوشدى . اسكيدن
اولسه بنى پك چوق اوزمه سى ايجاب ايدن بو ديدى قودينك آغيرلغى آلتنده ،
يا خودده ، او قادار ازيلشم كه آرتيق بر شى دويمپورم . ايچمه بر قيرغينلق
چو كدى . دوندن برى حتى بر آزده معتاددن فضله نشئه لى يم . حال بو كه ايلك
دقيقه لرده نه قادار آلت اوست اولشدم ! .. بن كه يا واش يا واش او كا قارشى
مؤبد بر رابطه ايله باغلانمايه حاضر لانيوردم ؛ ذوق ، اكلنجه ديه هيچ بر
احتياج حس ايتيوردم ؛ اونك ياننده بولونمق ، اونى دويمق آتيله كيجه لرى
اويقودن ، كوندوزلرى ايشلردن وقت چاليوردم . آرقاداشلر غزته ده آقشام
ساعت سكره ، حتى بعضاً دو قوزه قادار قاليورلر ؛ بن ايسه بوتون كون
ايشلرمى ايركن بيترمك ايچون ديديند كن صو كرا كندىمى آلتى واپورينه ،
بعضاً حتى بش بو چوغه قان تر ايچنده آتيورم . كوندوزلرى ده ، مثلاً بر ايش
ايچون كوپريدن كچه جك اولسه م اوراده دوران واپوره آتلايوب كويه دونمك
حرصيله ايچمده صانكه اختلال قوپويور ! .. مطبعه دن بويله ايركن صاووشديم ايچون
بر ديدى قودى اولاجق ديه چكديكم اوزون تو هپسندن آجى . اسكيدن هيچ
اولمازسه براز چاليشقان ، يورولماز بر چوجوقدم . شمى استانبوله بر ايكي
ساعت اوزاقده بر شى وار كه بكا هر شيشى اونوتديروب كندينه چكيور .

آراده بر باشقه سنك ده ياباييله چكى ايشلرى ، يازيلرى آرقاداشلردن بنى سهوون
بر ايكي كيشى يه تقسيم ايدىيورم . بعضاً ايشلرك پك متكائف اولديغى كونلرده
آقشامه كچ قانماق اچون اوكله يمكى بيله يه ميسورم . يوللرده يوروميورم ،
سانكه قوشويورم . بر ثانيه بيله بوش كچيرمه دن حمالى بر فعاليتله اك آغير
ايشلرى ، اك قيصه زمانلره صيغديرارق يازيلرمى كونده ريسورم . احتمالكه
آرقاداشلرك برچوغلندن فضله بن ايش كورويورم ؛ بونك دليل ده اك مهم
ايشلرك بكا توديغى . فقط مطبعه ده اك آز يوزى كورولن ينه بنم !.. بنم
چوجوقلر يازيلارنى يازاركن جينارهلرني املهرك ، چاپلارنى اچهرك ذوقلارنى
اهمال ايتملر ؛ صوكر ايشلارنى بيتيرنجه سكره دوقوزه قادار ديدى قودينك
برندن اوتته كنه آتلارلر .

كوندوزلرى ده [آقاده مى !] ديدكارى طاوانلرى باصيق ، پنجره لرى
توزلو بر چاپچيده طوپلانوب طاش تخته ايله پوكر اوينايمه وقت بولويورلر ،
آنجاك درده دوغرو چاپشمايه باشلايورلر . فقط انسانلر ظواهره باقوب حكم
ايتدكارى اچون بنم بويله مطبعه دن ايركن صاووشديغى كوردجه كيم بيلير ،
هيچ چاپشيسورم ، صانيرلر ...

تره ن ، واپور يولچياقلرى ده برعالم !.. مكتبه ، ايشه كيدوب كان قادين
اركل كنجلر آراسنده اولاك طبيعى كوز آشنالقلرى ، صوكره صوكره
خفيف سلاملاره باشلايان دوستلقلر حادتا كندى كندينه دوغويوريور .
اطرافكزده هر كسى چفت كورويورسكز ... اوزاقدن اوزاغه باقيشلارندن ،
بربرينك يانندن كچركن كيزله نه مه ين هيچانلارندن بعضاً انسان اوتته كينك بريكينك
اسرارينى ايسته ميهرك اوكرنيويوريور . برچوق رابطه لر واركه بويله تره ن
باصاماكلارنده ، واپور قامارهلرنده ، اسكله اوزرلرنده اورولوب باغلانيور . هله
بعض ماجرا پرستلر هر كون يكي برسر كذشت ايجاد ايدم بيلمك اچون اك
مبذول فرصتلرى بويولچيلقده بولويورلر ؛ سعادتى ده تنوعده تخیل ايتدكلرينه
كورده اك طاتلى زمانلرك بوراده كچديكى سويليورلر !..

بن ایسه بونی یا غزته یه یازی یتشدیرمکه یاخودده قانایه دایانوب اویقوسر ساعتلی تلافی ایله کچیریورم .

شمذیلک ظاهری برسکونت ، ایچمده کی فیرطنه لری اورتویور ؛ برکت ویرسون که اورتوبیلیور... او، هرزمان نشئه لی، هر دقیقه پر حیات ... بویاقینده هیچ برشی قونوشدیغمز ، هیچ یالکیز قالدیغمز یوق .

۲ نثریمه نالی ۳۳۷ — عائله ایچنده هرزمانکی ایلیقلق ؛ هر زمانکی حیات . فحامت خانمک بکا قارشی شفقتنده هیچ بر دکشکلک یوق صانکه اؤک ایچنده اوزاولاد ، اوز قاردهش یاخودده ... سه ویلن برداماد کبییم ... آه مبجل بوزهری قاتماسهیدی مست ومسعود یاشایوب کیدیوردم . نه اولوردی یاربی ، اونلر یالان اولایدی ؛ بکا اوپله کلیور که یالاندرده . بوکا اینانمایه نه قادار محتاجم . یامعلا ، کوندن کونه اوقادار صیجاق ، اوقادار صوقولغان که .. بنده ساکن ، صانکه بر آاز مشغول کورونمه یه چالیشیورم .

۴ نثریمه نالی — بوکونینه اوده مسافر وار . اکرم بک ، قاریسی ، قیزی ؛ یعنی معهود عادل بکک عائله سی . بر طرفندن ده صوبالر قورولویور ؛ خالیلر یاییلیور ، قیش حاضرلنی اورته سنده هرشیئک یری ده کیشوب داغیلیور ، هرشی یکیدن طوپلانیور . ایکی کوندر معلا بکا اک مشفق ، اک صوقولغان اولدینی زمانلردن داها فضله یاقین . اسکیدن هرکسک یاننده یوزمه بیله باقمازکن ؛ آرامزده کی رابطه ایچون کیمسه ده برشبه ده وغماسون دیه تیره ر ، بوقورقوسنه سبب اولارقده :

— آکلارلر سه بزی بربرمزدن آیریرلر .. دیرکن شمدی نه دیهیم ، حتی برآزده جرأتکار اولدی . هله اکرم بکلر بنی یکی طانیورلر ؛ کیم اولدیغمی یالکیز قولاقدن ایشیتیورلر ؛ معلانک — طورلارنده کی طبعیلکی هیچ بوزمادن — کندی یانلارنده بکا سنلی بنلی معامله ایدیشه کیم بیلیر نه دیورلر ؛ بوکا بن بیله نه معنا ویره جکمی شاشیریورم . صوکره بر طرفندن ده بوسیجاقلقده ،

بو یاقینلقدە اوقادار فسون وارکه آراده بر خاطر مه مېجلك اتهاملری کلسه بيله « یالان ! .. » ديه باغیرمق ، کیدوب اونی بولارق :

— باق ، کوروپورمیسک ، بنی نه قادارسه وییور ! .. فریادیله — چوجوق کبی — سهوینجیمی اوکاده دویورمق ایستیورم ! .. یاربی ، انسان سهوینجه ، اویله یا سهوینجه نه قولای آلدانه بیلور . ، نه کوچوک شیلرله آوونویور ! .

۵ نثریه ثانی — غزته ده تیاترو مصاحبه لری یایمامی ، شهری دولاشه رق هر کونکی حیات اوزرنده اوافق تفک دیدی قودی موضوعلری بولمامی سویله دیلر . اسکیدن چالیشدیغ غزته لرده ده ذاتاً بن ، اک زیاده بویله شیلرده موفق اولوردم ؛ یالکز کویده اطورمقدرکه بوکا مانع اولویور . آرا صره استانبولده قالمق قابل ؛ هله بو بهانه ایله بوس بوتون چکلوب کیتمک بيله خاطر مه کلیور . لاف آراسنده غزته نك بو تکلیفندن بحث ایدجک اولدم ؛ بن داها بر شی سویله مه دن معلا آرا صیره استانبولده قالمماه بيله راضی اولامیه جفی آکلاتدی . آرتق ارادمده کی ضعفی بن ده حس ایتیه باشلیورم . اویوشوق بر قرار سزلنی ایچنده کبی یم ، اوده بر قاچ کوندر او قادارجاندن ، اوقادار صیجاق کوروونویور که کوزلرینک ده رینلککنده کی ماوی نوردن باشقه آرتق هیچ بر شیئی دوشونمز ، هیچ بر شیئه اینانماز اولدم .

۸ نثریه ثانی — بو آقشام اوه کلدیکم زمان اونی یالکز بولدم . آنه سی یوقدی . بر ایکی کوندرینه اؤک هوا سنده بر کرکینلک ، بر عصیت وار ؛ طبقی ایلك کلدیکم مارت آیلرنده کی کبی . شیمدی اک زیاده محی الدین بك سینیرلی ، خوینسر کوروونویور . بو آقشام آنه سی کلنجه یه قدر معلا ایله اوزون اوزادی یه قونوشدق . پاره سزلقدن چکدکلری صیقینتی یه فحامت خانه پک اوزولویورمش . قیش کلیور ، اؤک ایچنده طبعی بر چوق اکیسکار وار : — بن ، دیور معلا ، هر شیدن محروم اولما یه راضی یم . فقط آنهم خسته ، ساده اونی اوزونتوده کورمک بنی اولدورویور . صوکره بر آره لق

باباسندن ده شکایت ایتدی ، اونک کندیلرینه قارشى قیدسزلغنى ، عائله ایچنده کی اهلانى آکلاتدی :

— بابام ، دیدی ، اویله سنک بیادیکنک کبی دکلدر ، فاخر . اولک ایچنده کی بوتون بو آهنکسزلك ، آنه مک اوزونتوسی ، بنم بوینمک بو کوکلکی هپ اونک یوزندن ... بابامک خویلرینی اوتهدن بری بیلیوردیم ؛ فقط بو کون بکا آنهیم اویله آجی شیلر آکلاتدی که بو درجه سنی بن بیله اوممازدم . کیم اولورسه اولسون زنکین بر آدمی داماد ایتک ... دوشون که بابام ، چکدیکمز صیقینتینک اوکنه کچمک ایچون بوندن باشقه چاره بولاماش ...

داها بویله کنديسنک فدا ایدیله سنه قدر واران تصورلر اطرافده برچوق آجی شیلر صایدی . بن ایسه شو محی الدین بکی نه قادار سهوهردم . او لاقید ، یاری اویقوده یاشایشک آلتده اییلکدن باشقه برشی دویمایان تمیز بر یوردک وار دییوردیم . ینه ده بوتون بونلرک هیچ بریسنه اینانمادم . بنجه معلانک هپ آنه سندن دویدیغی شیلره ، هپ اونک تلقینلرینه قاپیلارق باباسی ایچون بویله دوشوندیکی محققدر . مطلقا فحامت خانم کندی تصورلرینک تأثیرینی آزالتمق ایچون صانکله بوکا قوجه سی طرفندن مجبور ایدلديکنی سویله مش ، یاخودده اوته کی ینه قاریسنک تضیقارینه مقاومت ایدمه مش اولمالیدر . یوقسه او مرد یوره کای ، نورانی آدمدن بو درجه ظالمانه شیلر بکله مک پک بویوک برحقسزلق اولمازمی ؟

فقط نه ده اولسه بو طاتسزلقلری دویوب قیریلماق آلدی دکل . نه اولاجق یاربی ، بونک صوکی ناصل اولاجق ؟

آنه سی کلدکن سوکره معلا بر آردلق یانمه صوقولدی :

— آمان بلای ایدیورسک ، اویله دورما ...

کیجه ده دوقتور خسته یه کیتدی . فحامت خانم ایرکن یاتدی . بز اون ایکی یه قدر بالتونده اوطوردق . بولوطلی ، یاریم بر مهتاب واردی . اوزون اوزون قونوشدق . آرتق صره سی کلشدی . اوکا قطعی صورتده تکرار ایتدم :

— آنهك استراحتی ، عائلهك سعادتى اچون ، دیدم ، بن هر فدا كارلغه قاتلانیرم . ذاتاً آراده بر ، اچمده اویله بر شی دویویورم که صانکه بر کون کله جك ، بردن بره هر شی قوپوویره جك ... ایسیمی شمیدن ، اوزاق ، سکا بیله شو بر قاچ کونلك رؤیایى اونوتدیراجق قادار اوزاقلره کیدهیم ... او زمان معلا « بونی ناصل سویلیورسك ؟ » ديه بویوك بر هیجان کوستردی :

— سکا سوز ویردم ، دیدی ، بونده دورمیه جقمی یم ظن ایدیورسك ؟ . بن چنلرده بر آقشام آناطولیده کزدیکم یرلرده طبیعتك کوزللكلرینی صایار ، فخامت خانمله :

— هپ برابر اورایه کیدهلم ، ديه لطیفه ایدرکن معلا ، کوزلری خولیالی دیکلیور :

— آه نهایی اولوردی ... دیوزدی . بویکجهده بکا اونلری خاطر لاتدی :

— اویله بر یرده تمیز ، مینیجك بر یووامز اولایدی ...

صوکراینه دوشونجهلی ، بوینی بوکیور :

— آنهم اولماسه یدنی ، دیور ، سنکه ایسته دیکك یره ، اك ساده بر کویه کیدردم . فقط او ، خسته ...

بو آقشام معلانك سوزلرنده کی طلسم ، مبیجك سعادتیه قاتدینی زهری بر آنده سیلیدی . آرتق ایجه آکلاشیلیورکه معلايه ، معلانك قلبه دائر شورادن بورادن ایشیتدکلم تکمیل یالان ! .. هله شیمدی او ، کوزلری تا اوزاقلده آلتون باشی بالقونك بر گوشه سینه دایانمش ، آراده بر دوروب بوس بوتون دالارق آغیر آغیر قونوشورکن بوتون کندیسینی طانیانلرك هپسینی شاشیرتاجق قادار فسونکاردی . نهایت هر زمانکی کی آنه سندن لاف آچیلدینی وقتده اولك بنی هر کسدن زیاده سهودیکنی ینه تکرار ایتدی . فقط آرامزده کی رابطه یه اك زیاده اونك اعتراض ایده جکنی ده صاقلامادی .

بونك سببی ایسه زنکین بر داماد خولیاسی ، سعادتى هپ پارادن بکله مك

دوشونجه سی ایتمس. بوسوك آجی حقیقی ده سویلر کن معلابوس بوتون باشقالاشدی؛
 طالله حیاتنده یالکز سکونت، یالکز صمیمیت آرادینغی، بنمله برابر یاشامق ایچون هر
 محرومیت قاتلانجه غنی، کوزلرنده بویوک بر اراده نك آلهوی طوتوشه رق،
 تکرار ایتدی. یاتمق ایچون آرتق اودالرمزه چکیلیوردق؛ هیچ بر قوتك
 بزى بر بریمزدن آیرامیه غنی سویلر کن اوقادار جانلی، او قادار صیجاقدی که...
 اودامه کیروب دولابك آیناسنده کی عکس ایله یالکز قالدقن صو کرا ایچمده
 حمالی بر طوتوشمه دویدم. کیچه قاندیلنك لوشلغنده آینادن بکا باقان خیال،
 بو آقشام ده دوشونجه لی کورونویوردی. یورغانی آچمادن یاتاغك اوسته
 اوطوروب قارشیلقلی اوزون اوزون دردلشك. اونی، آینادن بکا باقان خیالی
 هیچ بو قادار ایچلی، بو قادار جدی کورمه مشدم. باشنی قالدیروب بکا
 صورتی :

— هیچ خاطر که کلیرمیدی، فاخر؟ دیدی، بو معجزه نی هیچ
 بکرمیدك؟.. ایکی آی اولکی معالایی کوز او کنه کتیر: سعادت یالکز ایپکدن،
 کور کدن، مجوهردن عبارت ظن ایدن، آنه سندن میراث اولارقده بواعتقادی
 بولان بر چوجوق دکلیدی او؟.. ناصل اولدی ده اونك روحنده بویاه بر
 انقلاب اولدی؟ بوکا اسکیدن اولسه هیچ اینانیرمیدك؟.
 آیناده کی صولغون بکزی عکس باشنی ایکی اللرینك آراسنده صیقیور،
 هپ او سؤالی تکرار ایدیوردی :

— آکلیورمیسك، اونك کبی هر نفس آلیشی، آلاش قارشیسنده
 عادتاً ایچ حکمه یی آندیران بر کنج قیز شیمدی سنك ایچون هر درلو
 محرومیت قاتلانمده ذوق بولاجغنی سویلیور؛ پکی، یاسن نه یاپاجقسك؟.
 یاتاغه کیرد کدن صو کرده او خطابا کیلمه دی. کوزلرم اویقویه بر تورلو
 آلامیوردی.

الله اسیر که سون، اونك بو فداکارلغنی تجربه ایچون، انشاءالله هیچ بر
 احتیاج قارشیسنده قالمیز؛ او قادار سودیکم کوزلری بنم یوزمدن — تمنی

ایده لم که۔ بر آن ایچون بیه کولکه لئمز ؛ فقط مادام که معلا آرتق بویه دوشو۔ نه بیلور ، مادام که شو بر ایکی آی ایچنده بو قادر باشقلاشان بر هویتله بکا دوغرو صوقولویور ، یارینکی سعادتمز ایچون بوندن بویوک مژده می اولور ؟ بو کیجه کوزلرمدن اویقوی سیلهن شی آکلاشیلان بو مستنا سهوینج اولاجق ... او سهوینجک یانته بعضاً باشقه بر اندیشه ده صوقولمق ایستیور :
— یارین ، دیور ، یارینی دوشونویورمیسک ؟ . آرتق قارشیکده تجلی ایدن وظیفه یی ادراک ایدیورمیسک ؟ .

فقط بن ، معلا ده هر کون بویه باشقه باشقه فضیلت دینه لری بولدقن صوکره ، اوکا لایق اولمق ایچون ایملک اولسون ، فالتق اولسون ائمدن کلیه جک بر شی اولمديغنی حس ایدیورم ؛ ایچنده آرتیق او یله امکا۔ نسرلقلری ده ویره جک بر جدال قدرتی بولویورم که ...

۲۳ نبره ثانی — قاچ زماندر دفتر می پیه اهل ایدر اولدم ؛ او قادر داغنیق بر حیات ... کیجه لری پک آز ، آنجاق اوچ بش ساعت اویقو ، صباح آقشام ساعتلرجه تردن صارصتیمی ، لودوسلر ائدجکه بوس بوتون چکیلمز بر حاله کلن واپور یولجیانی ، ایکی غزته یه یازی یتشدیرمک ، بوتون کون امان کیچ قالمایه یم دیه چارنمق ، صوکراده هپسندن فضله اولارق او یله بریورده ک اوزونتوسی که . . دائماً نه اولاجنمز اندیشه سی ، دائماً بو کونکی سعادت غائب ایدیورمک قورقوسی . بو او یله برشی که انسانی هم اولدورویور ، هم یاشامق ، دیدیشمک ایچون قوتی ینه او ویریور . . .

اؤک ایچنده پک آجی بر وضعیت حادث اولدی . انسان یازین بوراده جوشان ، طاشان نشه یی خاطر لادجه مکر بونار ساده جواد بکک ماسقارالقلرندن دوغویورمش دیمه یه قادر واریور ! . . قیش چوکدی . محی الدین بکک طشره ده کی آنه سی ده بورایه کلدی . بو ، شمدی سویله دیکنی براز صوکره اونوتان زالای ، صاف بر اختیار . فخامت خانم بکا قارشی هییچ ده کیشمه دی . فقط قوجاسیله متمادی بر جدال ایچنده ؛ حتی قونوشمایاجق قادر بر برلرینه دارغین .

بوتون آهنگی بوزان شی هپ اوپاره مناقشه لری ... یازین محی الدین بک اولدجه منتظم قازانیور ، خانمک اوفاق تفک بر ایکی ایرادندن کلن تقسیطلرده او موسمده آلینیور ؛ فقط بونلری اولدینی کبی ، حتی براز اسرافله صرف ایدیورلر . هم بو ، هر سنه بویله ایتمش . قیشینده بوتون بو آلت اوست اولان حسابلرک اک طبعی نتیجه سی دارلق ، کچمسزلک اولویور . ساده بوقادار دکل ؛ عینی زمانده باقمسزلق ، اداره سزلکده وار . مو طباق مصرفلرینه بنده آلمدن کلدیکی قادار یار دیمه چالیشدیم ایچون دقت ایدیورم ، اولک ایچنده آیده ایکی یوز الی ، اوچیوز لیرا قادار پاره دونویور . حال بوکه کچر دیکمز حیات بومصرفک یاریسی ایله تأمین ایدیله بیلیر . فخامت خانم بر کون سوز آراسنده بونک سرینی ده افشا ایتدی :

— اسکیدن بنده اومک خانمی ایدم . دیدی بزم بک بویله دنیایی دوشونمز برحاله کلدکن صو کرا آرتق هر شئی یوز اوستی بر اقدم . حتی غریبدر ، قوجاسنه نسبت بویله یاپدیننی بیله صاقلامادی .

ایکی خدمتچی وار ؛ بردادی ، برده اولادلق یکانه .. اونلر یشیر برلر ، اوکمه نه کتیر برلر سه اونی ییوب قالقیورز . خانم افندی هم او ایشلرینه آلیر میور ، همده مثلا صوفرا ده یمک بکنمیور . بوکون بوتون بونلری خسته لک ویردیکی خیرچینانه عطف ایدوب کچیورم آما یارین حائله آراسنده رسمی بر موقع اولونجه فخامت خانمک کوزنده سه زیله جک اک خفیف معنا بیله بنی کیم بیایر نه قادار خراب ایده جکدر . آرتق یاواش یاواش طبعی تلقی ایتیه آشدینمز بوقاری قوجه کچمسزلکی اوزمان هر طوطوشدجه اک معناسز کله دن بن آله جنم ؛ هر شیده بکاده بر حصه اولوب اولمادیغنی دوشونهرک اوزوله جکم . شمدی اوده دونوبده قاپیدن کیررکن معلانک آلی آلمده بولاق ، بوتون کونک یورغونلقلرینی اونوتدیر یور ؛ بر نظری اوده کی تکمیل اوزونتولری دویمیه جق قادار بنی طلسمایور ، اونی او قادار سه وییورم ؛ یکر می آلی سنه درسه وکی به صوصامش ، فقط هیچ سه ومه مش بر قلبک بوتون قابیلیت ایله .. فقط یارین قورقدقارم باشمه کلیر سه هپسی ، حتی بوسه و کینک شعری بیله زهر اولاجق !

۲۴ نېمە نالی — انىشتم خسته ديه دويمشدم . بر اقشام شيشليده اونلرده
قالدم ، بو كيجهي ناصل كچيرديكمى بن بيايرم . اير كندن ياتدم . ذاتا كيمسه ده
اوطوراجق ، لاف ايده جك حال يوقدى . تيزدم ، قوجاسنه :

— بر اخلامور پيشيردم ، ايسته رميسك ؟ . .

دييور ، انيشتم ده :

— اخلامور دكل يا ، كوچوك چفتلكى تكميل يوتسهم نافله . . ديه
يورغانى باشنه چكيوردى . مراد ، تيزه مك كوچوك اوغلى ، كيجه بك اوغلنه
اينمك ، برابر (بار) ه كيتمك ايچون اصرار ايتدى :

— چوق كوزدل نومرولر وار ، هله يكي برفرانسز تروپى كلدى ! . .
ديه بنى اقناع ايتمك ايچون بوشنه اوغراشدى . جانم هيچ برشى ايسته ميور ؛
اقشام اوزرى دوزر كن دقت ايتدم ده الكتريقلر ايچنده يوزدن جاده بكا بك
سونوك كلدى ؛ قالالقدن انسان يورومه سنى شاشيرير كن بن بالعكس تنهالق
دويدم . . . بر ثانيه كچمه دي كه اونى دوشونميه يم ، اونك ياننده كچن ساعتلى
آراميه يم ؟ يارين بر فلاكت اولورده اوندن بوس بوتون آرياييرسهم يا اوزمان
نه ياپاجنم ؟

۲۵ نېمە نالی — هانيا انسان رؤياده كنديسنى اوچورومدن دوشمش ،
پارچالاش كورورده تلاشله ، قورقو ايله اويانير ، ينه ياتاغنده بولونديغنى آكلايجه
هيچانلى برسه وينج دوياريا ، ايشته بن ده دون كيجهي شيشليده اويقوسز ، متاذى
كچيرد كدن صو كرا بو كون تكرار كويه كلديكم زمان طبقى اويله تيترييوردم .
هله بو بر كيجه نه قادار اوزون كلدى . صانكه بوس بوتون آرياش كى قورقدم .
قاپودن كيروب ده اوده هر شيئى اسكى حالنده كورونجه ، قوللرمده اونك
يوموشاق وجودىنى ، دوداقلرمده صاخچلرينك ايك تماسنى دويونجه ، يكي دن
هوا ، تكرار حيات بولمش كى نفس آليشم بيله باشقالاشمشدى . معلاده باشنى
كو كسمه دايامش :

— قاقا چوجوق، دييوردى، يمين ايت، يمين ايت بنى بويله بردها براقوب
كىتمه يه جككه ..

۶ نۆمۈرە اول — بۈكۈن بىر ايش ايچون اوده استانبوله اينه جكدى .
كوپرى باشنده بكه دم . اون برده كلدى . تراموايله شيشلى يه چيقدق . صوئوق،
روزكارلى برهوا واردى . استقبالمز ايچون اوزون اوزون قونوشدق . معلا
آنه سنى هم سوديكنى ، هم ده اوندن قورقدينى صاقلامادى :
— بيليورم ، دييوردى . يارين بىم سعادتى اوقادار سه وديكم آنهم ، ينه
كنديسى محو ايدى جك ..

صوكره بر قاچ كۈن اول اوده كچن اوفاق بر وقعهي آكلاتدى . اك زياده
بو، فخامت خانمك بىر برمره ويرمه مك ايچوق چوق عناد ايدى جكنى كوسترييور .
بيلمم بندن نه مناسبتله بحث ايدىلير كن معلانك خامنه سى :
— يا ، ديمش ، نه ائى چوجوق ... معلايى اوكا ويرسهك ..

فخامت خانم ذاتاً قانن آناسنك هر سوزينه قيزييور ؛ قوجاسيله قونوشمادىغى
كى اونكه ده لاف ايتيور . بو سفر بوس بوتون قيامت قوپارمش . صوكره
تيزينه نصيحت ويرمش :

— بو بوناغك سويله دكلرى ظن ايمه كه سكا دوستلقدرد . فاخره واردىغى
فرض ايتسهك بو كونكندن داهازياده صقتى چك جككه امين اول ، قيزم ، ديمش .
معلا ، صانكه آنه سى ايله بىم آرامده قرار ويرمه يور كى دالنين ، ديدى كه :
— اولك ايچنده كى جالى كورويورسك ؛ بو اوزونتوبنى اولدورويور . بعضا هر
شى ترك ايدوب برابر بورادن چيقالم ؛ ساده ، سسز ، باشقه ديارلره كيدىلم ديه
دوشونويوم . صوكره ده آنه مك نه قادار اوزوله جكى ، بوس بو توخسته لانه جنى
بلكه ده اوله جكى ، كوزمك او كنه كليور ... بيلمم كه ...

آرتىق تماميله آكلايورم ، ميجلك صافيتله اغزندن قاچيردينى بر چوق شيلر
دوغرو ؛ هله اك زياده فخامت خانمه هاند اولانلر ... فقط معلا ايچون تخمين
ايتدكلرينك ده نه قادار بوش اولدىغى كيدكه ميدانه چيقييور . يالكز ميجل دكل ،

بن بيله هييجانلى ، حمالى برسەوکی ایچون اونده استعداد اولدیغنی ظن
ایدردم ؛ سهومز دکل، سهوه مزدیوردق . مکر، بوپک را کد کورون روحده کی
متانت ، حسیاته حاکمیت هیمزی یا کلتمش . هله بویه کیمسه یه برشی بلای
ایتمزکن بردن بره بکا بو قادار باغلانماسی ؛ آنه سندن باباسندن بر آز امیده
دوشمک دکل ، اونلرک کندیسنی بکا ویرمک ایسته مه دکلرینی بيله بيله قوللر مه
آتیلماسی اونده کی حسیاتک هر کون ، هر کسده کورولن بسیط تمایللر نه نسبتله
پک باشقه، پک ممتاز برشی اولدیغنی اثبات ایتمزی ؟ . . حتی دوشوندکجه اونک
کوزه آلدینی تهلهکلر انسانک نظرنده نظرنده بوس بوتون بویویور ، عادتا
برفداکارلق درجه سنه قادار یوکسه لیور .

برده اسکیدن بکا قارشی بعضاً پک که وشه ک طورلری واردی .
اوطورورکن اوزون مدت یورمه بيله باقمادینی ، سوقاقدن تصادف ایتسه م
کورمه مزله که کلدیکی اولوردی . بونلری خاطر لاته رق بو کون براز سرزنش
ایتدم ده کولدی ؛ هپسینی مخصوص یاپدیغنی ، هر حالده بنمده بر آزه م کوزوکن
حسیاتمی آکلامق ، بر آن اول سویله تمک ایستدیکنی اعتراف ایتدی . حریت
ابدیه تپه سنه دوغرو یاواش یاواش یورویه رک استقبالنز ایچون قرارلر ویریرکن
آرتیق آرا مزده آکلا شیلما مش هیچ برشی قالمامشدی . اولک ایچنده بعضاً بوتون
آهنکی بوزان خویشزلقلری کوره کوره دویدیم بز کینک ، آرا ده بر مبیجک
اعترافاتی کی شیلری ایشیتدکجه کوزلرمی قارارتان شهه لر ، آجی آجی
دوشونجه لر ، تکمیل بو کون داغیلدی ؛ هپسی سیلیندی . بیلیم که سعادت ده
بوندن باشقه برشی می ؟ . .

۸ نوره اول — او اولماسه، اونک کوزلرنده کی صیجاقلقن قوت بولماسه م
اولک ایچنده کی کچمسزله که دایمق قابل دکل . بو کونکی قادار آ کلاشما سه یدق،
تأسکیدن اونلری ایلک کوردیکم زمان آرالرنده کی کر کینلکه ایکی کیجه لک
بر مسافرت اثناسنده بيله تحمل ایده مه دیکم کی ینه چانطامی قاپار، تره نه آتلاردم .
شمدی اونک یوموشاق آلنی آرا ده بر باشمده دولاشیرکن دویمق، سسینی ایشیتمک

بکا بر قوت اولویور . یازیق که معلا ، کندسی کوندن کونه سوزولویور . یازین اوی نشهیه ، قهقههیه بوغان چو چو قلقدن صیریلدی . هر آقشام زواللی یی یا بر آل ایشک ، یاده بر کتابک اوسته اکیلیمش بولویورم ؛ یمکدن صو کرا ، اوده آنجا ق بش اون دقیقه ، سهودیکی برایکی پارچه یی پیانوده چالیور . محی الدین بک ایسه کوزلکنی بورنه اوطورتوب غزته لرله قولتوغه سه ریلور . فحامت خانم آقشام غزته لرینه شویله بر کوز کزدیرد کدن صو کرا خیر چینلق چیقارمق ایچون بهانه آرار ، بنی قارشیدنه آلوب هر آقشام براوجندن طوتدوردینی شکایتلری قوجاسنده ایشیدیره بیلیمک آرزوسیه تکرار تکرار نازه لرکن ، اوته کینک باشنی بیه چه ویرمه دکنی کوردکجه بوس بوتون سینیرله نیور ؛ بعضاً جیناره تابلاسنی یا قالا یه رق :

— یارادانه صیغینوب شونی بر یسنک قافاسنه فیرلاتسه م ! . دیمه یه قادار واریور .

قیش کلنجه اونک خسته لخی ، عصیلکی بوس بوتون آرتدی ؛ چوق او کسور . رویور ؛ هله بو خویسزلق اوئی کیتدکجه خراب ایدیور . هر شیئه رغماً بی چاره قادینی بن چوق سه ویورم ؛ حتی هر کسدن زیاده اوکا آجیان بنم . بوتون بونلردن اول اک چوق اوزولدیکم شیء معلاده کی بیتکینلکدر . خاطر لیورم که چو چو قلننده او ، پک ضعیف ، پک چلیمسزدی ، بر چوق خسته لقلر چکدی . صوک سته لرده سه رپلش ، پر حیات بر کنج قیز اولمشدی . شمدی ینه یاواش یاواش رنکی قاچیور ؛ چو کویور . یا محی الدین بک ؟ . دینه بلیر که او ، بو قدار آیی بر آدام اولماسه اؤک ایچنده بر آن ایچون بیه نفس آلمق قبل اولماز . زواللی ، احتمال که کندی حضورندن فدا کارلق یاپیور ، هر شیئه صبر ایدیور .

بو آقشام ینه فحامت خانمله آرارلنده آجی برشی کچمش کی صومورتقانلق واردی . فرویدون بک ده اوده ایدی . یمکدن قالقنجه دورغون دورغون هپ بر گوشه یه چکیلیمشک . معلا باشنی اکش ، سسز اوطورویوردی . بردن دیشاری یه

چىقدى . يىك اوداسىندىن دوغرو برخىچىق تىرىق دويدىم . قوشوشىدق . بىن پىك
قورقىدىم . اونىك بايىلىدىغىنى ايلك دفعە كورويورم ، صرعەلى كېي كىندىنى يردىن
يىرە وورويور ، نىسى كىيلىور ، كو كى طىقانىورمىش كېي خىچىق تىرىور . يوزىنە
صو فلان سەردىلر . صوردىغى زماى دايىسى دىدى كە :
— قورقاجق بىرىشى يوق ؟ بوياشدەكى قىزلردە اولور !...

اوطەجى قاپىيى آچدى .. قارماقارىشىق كاغدىلرلە دولو، اوزون بىرماصەنىك
اطرافىنە طويلاشمىش بىر قاقچ كىنجىك آراسىندە بىرىنى آرايورمىش كېي كوز كىزدىردى ؟
صو كرا :

— فاخر بك ، دىدى تىلفوندى سىزى اىستىورلر .

قاپىدىن چىقاركن آكلا تىوردى :

— كچىن كون دەسىزى تىلفوندى بىر قادىن آرادى ؟ كىمىسكىز ، تىلفون نومرو كىز
قاچىدردى صوردق ؟ جواب وىرمەدىن قاپادى .

فاخر ، عجبىا كىم دىە دودا قىلرىنى بو كر كن تىلفونى آلە آلدى :

— آفندىم ، بىم ، فاخر .. اوزمان بىرسىزىش طوفانىلە قارشىلاشدى . دارغىنىمى
ايدى ، بونەقادار چوق ايشىدى ؟ .. غىزىتە جىلك ، پولتىقە جىياق ، قابلىرى بوس
بوتون دور دورمىشىدى ؟ هىچ شىشىلىيە اوغرامىوردى . بىر آراق هر كون
كورولن ، صىق صىق زىارت ايدىان اسكى دوستلر اولمىشى ، قالمىشى دىيە بىر كره
مراق ايتىك يوقىدى ، اونلرى اونوتدوران عجبىا يىكى يىكى نەلر واردى ؟

فاخر ، سىك صاحبنى ، اويقودن اويانىورمىش كېي كوچلىكلە طانىدى . مادام
سەرتىن مەما آلود ، تەلىكلى قادىنلردىن بىردى . اونى طانىلەلى اوچ دىرت سەنە قادار
اولمىشى : پايانسىز ، آنى هوسلر اچچون خلق اولونمىش ، ذكى ، شىطان ، مستىنا
بىر روخى واردى . بك اوغلىك ، شىشلىنىك اك كبار ، اك مۇتاردىن طائە طويلايشلرندە
اونىكە طانىشمىق ، اونى بىر قاقچ سەعت دىكلە يە بىلىمىك پىك چوقارىنى بىك تورلو

فداکارلغه سوروكلهين شيلردندی . قونوشمهسی ، مناقشه‌لری ، کان چالیشی ،
پوکه‌ر اوینایشی اوقادار طاتلی ، اوقادار جانلی ایدی که ... قوماربار اولسه اونک
ایچون میلیونلر قازانمق پک قولای اولوردی ؛ اک جامد آداملرک کاغدینی
سانکه ترسندن اوقور ، اويله شیطانجه حسابلرله اویناردی . صوکره ، چوق
اینجه ، چوق قیوراق بر شاعردی ؛ تک مصرعک ایچنده ، تک بر کله ایله عالمئر
یاراتان برشاعر .

فاخر ، اونک کبی پر حیات ، اوقادار شیطانی قادینه قارشى اوتهدن بری اوزاقدن
اوزاغه بویوک بر تقدیر ، برانجذاب دویاردی ؛ مادام سه‌رژین ده ایلك نظرلره
برشی افاده ایتمهین ، قوجامان کوزلکینک آلتنده بوتون چهره‌سی غائب اولان
بو بر از دونوق تورک چوجوغنی ناصلسه تدقیقه لایق بر تیپ بولمش ؛ قارشیلقلی
بلکه بر سنده دن فضله بالالتزام لاقید قلدقدن صوکره دوستقلری بردن بره پک درین
بر محرمیت رنکی آلمشدی . فاخر ، اونی نادراً کندى اوندۀ زیارت ایدەر ؛
فقط همان هر کون تلفونده ساعتلرجه قونوشورلردی .

اک زیاده چارپشدقلری نقطه پولتیقه مناقشه‌لری اولور ، صوکره صنعت
حسبحاللری اطرافنده صالح یاپالردی . سه‌وکی نظریه‌لری اوزرندۀ ایسه سه‌رژین
قارا کلق براوچوروم کبی بوس بوتون ده‌رین ، بوس بوتون تهلهکلی ایدی . بر کون
سینه‌ماده ایدیلر ؛ اويله بر یر گلشدی که فاخر کندینی طوتامه‌مش :

— Maintenant, c'est le cœur qui parle!

دیمشدی . اوزمان اوته‌کی ، اوزون اوزون آلاى ایتمش ، صوکره قولاغنه

ایکیله‌رک دیمشدی که :

— Après dix-huit ans, ce n'est pas le cœur, mon ami, mais c'est le Corps qui parle!

بو قادارده مادی کونوردی . فقط بو بر ارککی چیلدر تاجق قادار محتمم ،
مشمع کنج دولک ظاهر آپک شوخ ظن ایدیلان حیاتنده اوفاجق بر سر گذشتنی
بیله سه‌زمش کیمسه یوقدی . بوتون چیلغینلقلرینه رغماً سه‌رژینک قوجاسی
اولدکدن ، هاله‌سی ایچنده سورده‌کلی بر فلاکت فیرطنه‌سی قوپدقدن صوکره

کچن حیاتی اینانماز درجه ده دوز کوندی. فاخرله درت سنه یه یاقین بر آرقاداشلق بوکتوم و صمیمی تورکی اوکا چوق سهودیرمشدی .

اڤ صوڤک دفعه کچن یاز بر برلرینه بویوڤک آطه ده « یورغولی » دکز بانیولرنده تصادف ایتشاردی . کوئشده ، چاقیلار ، سه ریئلش ، قونوشویورلردی . سه رژین ، بر آراق صاییتلار کبی فاخره :

— بر چیلغینلق دوشونویورم ، دیدی . اوریرینال برشی ... او کمزده کی قیش ، ایلک قار یاغدیغی کون .. سوقاقلر ، داملر هر طرف بم بیاض .. صیجاق بر اودا ، صوبانک ایشیغندن باشقه بر آیدینلق یوق ...

صوکر ا یاری قپالی کوزلرینی اوکا چهویردی ؛ هرشیئی وعد ایدهن بر باقیشله کولدی . دونوشده تونلک باشنده اوندن آریلیرکن :

— اونوتما ، دیه تکرار ایتدی . ایلک قار یاغدیغی کون ... فقط ایلک و صوڤک دفعه اولارق ..

حال بوکه اوزماندن صوکر ا فاخر ، اونی بر داها کورمه مش ، کویه ، محی الدین شوق بکه مسافر کیتمشدی . اسکیدن مطلقا صیق صیق تلفونده خاطرینی صوراد ، اوندی رسماً زیارت ایدر ، آراسره سه رژینک اوتی قارده شلرینی سینهمایه ، بوغاز ایچنه ، آدالرد کورتورورکن شمیدیکی بو دورغونلغه معانه ایدی ، ایشته کنج قادینک آ کلامادینی بوایدی . پک مستنا برشی اولارق کنسینی تلفونله مطبعه ده آراماسندن ، بولاینجی عینی حرکتی تکرار ایتمه سندن فاخر اونک پک قیزغین اولدیغی حس ایتدی . فقط بونی اوزون اوزادی یه دوشونمکدن اوزاق ، ساده جه شمیدیکی سرزنشاری هان او دقیقه ده اویدورلمش بهانه لرله صاووشدورمایه چالیشیرکن ایچنی یاقان شی آشاعیده بکله یین بر سورو یازی یی یتشیره مزسه واپوری قاجیرمق قورقوسندن باشقه برشی دکلدی . ایشلرینک چوقاغنی ، کویده اوطوردینی ایچون وقتارینک دارالدیغنی سویله دی :

— چوق مجبوم، مادام. بر کون زیارت ایدر، قباحترمی عفو ایتدیرمه یه چالیشیرم . دیه تلفونی قاپادی .

معلاک کوزلرنده کندینی غائب ایتدیکی کوندنیری صانکه یکی برماله ، باشقه برحیاته دوغمش کبی ، صانکه حافظه یی آلت اوست ایدن خسته لئوردن یکی قالمش کبی چلمش کونلرله آراسنده ایریشلمز بر اوزاقلق ، ده لینمز برسیس واردی . ایلمک قار یاغدیغی کون . . هرطرف بم بیاض . . صیجاق ، لوش بر اودا . . بوتابلوی خاطرلادجه قارشوسنده معلاک خیالی بویویور ، او خیالک کوزلرنده دوغان ماوی کوش بوتون قارلری آریتیور ، لوش رنگلری سیلیور ، اونک نورندن باشقه هیچ ، هیچ برشی یاشامیوردی .

اطرافنی بوقادار اونوتمشدی . فقط بوکه وشکک ، اویوشوقلق آراسنده وقت وقت قورقدیغی برشی داهارواردی که نهایت اوده باشنه کلدی . ینه بویله بر کون « نجات » غزته سنده کی اوطه جی اونی اوکله دن صوکره « بارقه » مطبعه سنه کلوب آرادى . رفعت بکک چوق سلامی وار ، دیه اوزاتدیغی مکتوب هله باشقه زمانده اولسه فاخری بوسبتون پریشان ایده جک قدر آجی ایدی :

محترم بکم اقدام .

هرشیدن اول ذات عالیلرینی تأمین ایده یم که مسلکی قیمتکزک ، عرفانکزک اک صمیمی تقدیرکاری بنم . فقط تخطر بویوریرسکز که تشریک مساعی یی قونوشدینمز زمان غزته ایله ایکنجی درجه ده علاقه دار بر محرر کبی چالیشمتدن زیاده دوغروندن دوغرویه بوتون مساعیکزی [نجات] ه حصر ایته کزی رجا ایتش ، فقط [بارقه] ده کی مشغولیتکز دولایسیله شیمدیلمک بالجبوریه اوکله یه قادار بزه رفاقت ایته کزی قرارلاشدیرمندق . حالبوکه (نجات) اقسام غزته سی اولدینه نظراً صاحبین پک ایرکندن احضارینه باشلانماسی طبعیدر . کزک بوکا ، کزک کیجه لری بیله ظهوری طبیعی اولان غزته جیلک ایشلرینی تأمین ذات عالیلرینک کویده اوطورماکز و واپور ساعتلریکزک اویماسی مانع اولدیغی جهتله بونی عرضه مجبوریته و باشقه برطرز حل بولامادینمز ایچونده عظیم بر محرومیت

حس ایدیورم . بو کونکی سیاسی و اقتصادی دورغونلق آراسنده غزته مزك اداره سنده آز چوق موجب اندیشه بر وضعیت تحدث ایتدیکنی ده سزدن صاقلامق ایسته نم . ایلریده مساعد بر زمینك حلولیه تکرار تشریک مساعی شرفه نائل اولاییله جکمری عرض و تأیید حرمت و اخوت ایلرم بکم افندیم .

« نجات » غزته سی صاحبی

رفعت ذکی

نهایت باشنه بوده کلدی ؛ آچیقجه سی اونی قوودیلر . غیر اختیاری دوشوندی : مادام که آناتولییه کیمه مش ، یکیدن غزته جیلکه باشلامشدی ؛ اونك پارلامسی ، کندینی طانماسی ایچون مطبوعاتك بو کونکی حیاتنده غایت زنکین بر ساحه واردی . مکتبدن چیقوبده مطبوعاته ایلک کیردیکی زمان بویوک محاربه نك صوکلری ایدی . اوصردد بر کنج ایچون مساکده ترقی امکانی یوقدی . متارکدن صوکر ا بر مدت یاشاتمایه چالیشدقلری غزته لر ایسه سانسور آلنده بوغولمشدی . ایشته شیمدی مسلك یولنده آرادقلرینی قازانمق ایچون بر کنجه هر شیئی وعد ایدن فرصت لر واردی . اک استعداد سز سیالرك بیله بعضاً مشاهیر صیره سینه کچدیکی بو کونلرده منور بر کنج آزیحق چالیشجنه نه لر قازانمازدی . حال بوکه کندیسى برقاج آیدن بری چالیشمق دکل ، مکتبده مبصرلری ، اوده باباسنی آلداتان حایلار چوجوقلر کبی بر ایکی پارچه یازی ایله هیئت تحریریه مدیرینك کوزینی بویایوب واپوره قوشیوردی . اوکا بر آرالق [نجات] ك هیئت تحریریه مدیرلکی بیله تکلیف ایدیش ، فقط یینه کویده اوطور مامسی درکه بوکا مانع اولمشدی . هایدی بونلر نهایت کندیسى ایچون ساده جبه بر مدتلك محرومبته سبب اولابیلردی ؛ فقط ها ، آنادولویه کیده مدیکنی دوشوندکجه بعضاً — هر تورلو مستییه رغماً — زهرلی بر عذابك یوره کنه صیزدینی دویویوردی . بر ایکی سنه اول استقلال آتشی داها ایلک طوتوشدینی زمانلرده ، ایشك صوکی نه اوله جنی پك

چوقلرنجه بلای دکل ایکن کنديسی بيک تورلو مشکلات ایچنده بيک هرتورلو تهلكه ايله بوغوشه رق يوللره دوکولنلرک آراسنده ایدی ، صوکرانه ملعون بر تصادف اونى تکرار بورایه دوشورمشدی ! .. قوتولوش کونلرینی حاضرلامق ایچون داها دون ، حتی دعوتله کیدنلر بيله شیمدی ملی غایه ایچون فائده لی برر عنصر اولشاردی . هپسنگ وظیفه باشنده کی شرفلرینی دویدقچه ، حتی داها بوکون یوله چیقانلری کورد کجه دویدینی آجی ، ایشه یالکنز بو ایدی که سعادت دیدیکی رؤیای آراده برکابوسه بوغوبوردی . بوانقلاب آتشنده کنديسنگ برقیولجیم بيله طوتوشدیرامامسی آز محرومیتیدی ؟ ..

او شرفه اشتراک نرده ، ایشه بویه متواضع ، بسیط ایشنگ باشنده بيله ناصل عاقبت اوغرامشدی . دنیالر ییقلمش کی باشنده بر آغیرلق واردی ؛ زورله یازیلرینی بیتیردی . نه اولاجق یاربی ، بوایشک صوکی نه اولاجقدی ؟ ایلاک کورونشده پکده بویوتمه یه محل اولیان شو حادثه نك الك عادى تفرطانده بيله دوشونمه یه لائق باشقه نقطه لر ، استقبال ایچون آلنه جق درسارده واردی . مثلاً شمدی فاخرک بودجه سنی یاری یاری یه ایندیره ن اکیسکلک هیچده مهم برشی دکلدی ؛ فقط یامعلا ايله مشترک بریووا قوردقدن صوکره بویه بر صارصنتی یه اوغراسه ، اونک کوزلرنده کوچوک بر محرومیت اندیشه سی کورمک فاخری اولدورمز میدی ؟ .

أوه کلديكى وقت اويله هر زمانكى کي چابوجاق خيفله یه مدی . اوراده ده کرکینلک صوکر درجه یه وارمشدی . اويله بوغوجی ، صومورتغان بر هوا اسیوردی که . . قاری قوجه ، بویوک خانم دوروب دیکله نمه دن مناقشه ایدیورلر ؛ فخامت خانم هرکون قائن آناسنی قووویور ؛ محی الدین بکه قارشى الك خاطره کلز برشیدن تعریض ایچون بهانه آریوردی . زواللی معلا او ، بوسبوتون بدبختدی . أولک ایچنده کی کچمسزلک ، بوکچمسزلک یوزندن بر تورلو اوکنه کچیه مهین اداره سزلک ، آنه سنک بویه کوز اوکنده آریوب بیتمه سی ، بونلرک هپسیده اولورمیورمش کی کندي استقبالنده کی ظلمت اونى کوندن کونه صولدورویور ؛

كوزلرينك كنارنده كي كولكه كيتدجه قويولاشه رق باقيشي هرآن براز دها دونوق ، براز دها بولوطلي بر رنك آليوردى :

— ياربي ، بردقيقه ، بردقيقه اولسون يوزم كوليه جكمي ؟ ديه دوشونوردى .
خاطرلاردى كه چوجوقلغندن برى ، ناصل كچديكي بللى اولميان صانكه او بوم بوش سنه لر ايچنده راحت ، اوزونتوسز بر كوني اولما مشدى .

اسكيدن كوز قاماشديريچي ، مڭيله يي سرخوش ايديجي او سوس ، احتشام رۇيالري واردى ؛ آنه سي او كا كوچوك ياشدن برى هپ ثروت ومجوه نيسي سويله مشدى . بعض مسعود محيطلرده تپنه ن بودبدبه ، بوتون بو كوزلره ، اوكللره بويو ياپان اوتوموبيللار ، كوشكلر ، كوركلكر ، هپ بوساطنت پارا ايله دكليدى ؟ . . باباسى او كا بويله بر حيات بخش ايدمه نجه اورۇياني عمرينك يكرمى ياشندن صوكره باشلاياجق ايكنجي دورندن بكه مك لازمدى . كنديني بيلديكي ياشدن برى هپ بوني ايشيديردى :

— زنكين بر بكه وارنجه ..

اوه ت ، زنكين بر بكه وارنجه ديمك بورۇيالر هپ حقيقت اولاجقدى . زنكين بر بكه ؟ فقط عجباً بوناصل شيئدى ؟ . . آغزلرده كزه ن حكايه لر — هله بو حرب سنه لرنده — هپ سفالت ، هپ آچلق فريادى ايدى . زنكينك دنيلديكي زمان آرقاسندن سفاهت ، سياحت ماصاللري كليوردى . سياحتلرده ياقومار ، ياقادين ايچوندى ؛ ياده بوحيانك صو كنده نه دن ايسه او كنه كچيله ميه ن خسته لقلرك تداويسى ايچون . بوزنكين بكلرك عددى ده نه قادار آزالمشدى . قوجه شهرده قاچ تانه واردى ؟ كنديني ايسته يه جك عجباً كيمدى ؟ . . يا ، اونده عجباً نه لر آراياجقدى ! . .

كوزلدى ؛ بوكا شبهه يوق .. فقط اوبكلرك ياننده بعض قادينلرده كورو - يور ؛ حتى اونلره بكه مك ايسته ديكي ثانيه لر بيله اوليور ؛ بعضاً اونلرده تيكسينه جك شيلرده كوندن قاچيوردى . بو قادينلرك هپسى اوحيات ايچون حاضر لائمشلردى : برقاق لسان بيلورلر ؛ موسيقى ، رسم كبي شيلرله كنديلرينه بر خصوصيت

آریورلر ؛ دانس ایدیورلر ، پوکر ماصه سنه پک یاقیشیورلر ؛ ارکک قالا بالغک اورتاسنده قونوشاجق بیک تورلوشی بولویورلردی . یا کندیسى ؟ . . بر آقشام بویوک آطه ده مسافر لکده قالدینی زمان تیزه لریله برابر یاطینغ قلوبده کی بالویه کیتمشلردی . او کون اونى کورنلر مطلق دیاسز ظن ایدردی ! بو کیرلی می ، کبار می نه دیه جکنى شاشیردینی حیاته قارشى روحنده کی یابانجیلغى بویله قاچ دفعه حس ایتمشدی .

صوکر ا بوقادارلده قالمیوردی . بوزنکین بکلرک ارادقلری قیزده اک اول صورتقلری شی داها غریبیدی :

— کوچوک خانمک نه سی وار ؟ .

اونلرده کندیلرندن داها زنکین بولمایه باقیورلردی . زنکین قوجایه وارمش قیزلر ، هر حالده زنکین قیزلرله اوله نمش ارککلردن همان همان داها آزدی . ایشیدردی که بوزنکین بکلرک چوعی اوله نمیور ؛ بکار یاشامقده ، ایسته دیکی کبی اکلنمکده باشقه بر ذوق بولویورمش . اوله نلرده ذاتاً آیری بر آپارتمان طوتارلر ، هر کون ده کیشن قادینلرله یاشایوب عائله لرینک سمتنه اوغرامازلرمش . . . او ماللرده کی قادینلرله یاقیشان شیلری اونده آرامیه جق زنکین ، مطلقاً اختیار ، کویلو ، چیرکین بر آدام اولمالیدی . او زمانده آنه سی :

— داها ائی یا ، هر شی سنک آلکده اولور . . دیور ، قیزی داها زیاده بوکا اقناع ایدیوردی . فقط ایشه سنه لر کچمش ، یکر می بر یاشنه کلشدی . هانی ، او بکلنن زنکین چیفتلک صاحبی حالا قاپیلرینی چالمیوردی . هم ائی که چالمامشدی . چونکه — هله اُسکیدن — آنه سنک هر سوزینی اولیه کوزی قاپالی بر اطاعتله دیکلهردی که مطلقاً بو سفرده هیچ سس چیقارمادن « پکی » دیه جکدی . ذاتاً اوده کی خیرچینلق چکلمز اولمشدی . بوتون او موعود ، کورولتولو رؤیالری ده استخفاف ایدیور :

— آرتیق بر از سکون ... بر کوچوک « اوخ .. » یاربی ! ..

دیوردی . نهایت کچن شو بش آلتی آی ایچنده اوتەکی ارککلرله
فاخرک آراسنده مقایسه لر یایدقجه ساکن ، تمیز برحیاته آنجاق اونک قوللرنده
قاووشه بیلەجکنی آکلامشدی . شمدی کندیسنه بر از سعادت وعد ایدن بو
صوک آمیده دوغرو اوزانیرکن ده نه قادار تیریوردی . آرالرنده کی بو رابطه
البت برکون دویولاجقدی . بونی خاطرلادقجه :

— یا او زمان نه اولاجق ، یاربی ، نه اولاجق دیه کوزلرینی قاپیوردی .
بو عمومی پریشانلق ایچنده فاخرک هپسندن آیری آیری حصه نی واردی .
او ، هپسی ایله برابر اوزولویوردی . فخرمت خانم یالکز اوکا قارشی معامله سنی
دکیشدیرمه مشدی . حتی نفسی یتیشمه یه جک قادار دورمادن ، دیکله نمەدن
ساعتلرجه دوکوب صاحدینی شکایتارک هر آقشامکی مخاطبی یالکز اواولوردی .
کندیسنی ساده فاخر دیکلردی . معلا اوزولمه سون ، بو طاتسزلق یوزندن
تعمیری کوچ داها باشقه شیار اولماسون دیه صانکه اولک ایچنده کی موازنه نک
تأسیسنه مأموردی . هپسنی آز چوق تسکین ایچون ، ایشی لطیفه یه وورمق
ایچون آلندن کله یین شیلری بیلە یاپمایه چالشیردی . آه ، شمدی آرالرنده جواد
بک کی زوزک بر آدام اولسه یدی ، نه ایی اولاجقدی . فاخر ، فخرمت خانمک
جاندن آرقاداشی ایمش کی اوده کچن ساعتلرده اونک یانندن هیچ آیریلمازدی .
بونی ساده مستقبل قان والدە سنک توجهنه نائل اولمق ، ایلریده اونک جبهه سندن
بر ضربه یه اوغرامامق ایچون یامیوردی ؛ بو قادینی جداً سه وییوردی . مبعجک
افشا آتی نه اولورسه اولسون اوکا قارشی حرمتلرینی قیرامامشدی . هر قصورینی
خسته لغه ، خسته لغک ویردیکی سینیرلیلکه باغیشلا یور :

— یوقسه دیوردی . پک تمیز بر قلبی ، رحیم ، مشفق بر روحی وار . .
اوکا بالعکس اوقادار آجیوردی که . . آلندن کلسه اولک ایچنه یکیدن ذوق
ونشته سه ریمه یی نه قادار ایستردی ؛ بوده نه قادار قولاییدی : بر از پارا ، بر از . .
هله اونی تکرار اسویچریمه یوللایه بیلیمک وسائطنه مالک اولسه یدی هر شی
شبهه سز ، هر شی دوزله جکدی .

هپ اوسه وکی ایله ، هپ او حرمتله هر آقشام اونی ساعتلرجه دیکلیور ،
یاتاق اوداسنه قادار چیقارییور ، یا تنجه یه قادار او کایاردیم ایدیوردی . بو کامقابل فخامت
خانمده اک کوچوک شیرینه ، اکعادی سو کو کلرینه وارنجه یه قادار فاخری
دوشونوردی .

ینه اونک چوق اوزولدیکی ، چوق او کسوردیکی بر آقشامدی ؛ فاخرله برابر
اوداسنه چیقارکن :

— والله ، دیدی . اولمکدن هیچ قورقماورم ؛ حتی قورتولا جغم دیه سهو .
بنیورم بیله . فقط بن اولور سهم بو قیز نه اولاجق ؟.. معلایی کیمه براقاجغم ؛
ساده اونی دوشونویورم .

فاخر ، اک دهرین کوشه لرینه قادار فخامت خانمی طانیماش اولسهیدی .
بو سوزلری عادتاً کندیسی ایچون بر مرده ، بر وعد کبی تلقی ایده نیلیردی .
حال بو که اونک بویله بر مقصدی اولامیه جغه آمیندی . او یله ایکن ینه سونوک
بر آمیده دوشمکدن کندینی آلاماشدی . ینه بر آقشام معلاییمشدی که :

— آنهم ، غالبا یاواش یاواش یوله کلیور ... بو کون بر لاف اولدی .
بابامه ، حتی دایمه ، دهها بر چوق ایشیتدیکمز ار ککلره باقنجه سنده بولدقلری
اییلکلی صایورلردی . آنهم بکا دیدی که : « آه ، فاخرک سنی راحت ایتدیره
بیله جکنی بیلسم آرا کزده بر رابطه تأسیسنی اک اول بن ایستردم »

هر تورلو امیدسنزلکلر ، کوزه باتارجه سنه میدانده ایکن ینه آراده بر بویله ،
بلکه ، دیمکدن کندیلرینی آلامیورلردی .

شیمدی آرتیق پک حرارتلی ، پک حمالی بر سه وکی ایله بر برلرینه باغلانمشلردی .
معلانی صانکه هر شیئی کوزینه آلمش کبی بر حالی واردی . هله بو ، کنج قیزی او قادار
یو کسه لتیور ، او قادار باشقه لاشدیریوردی که ..

اونک پک بویوک بر اهتمام کوسترله ین تحصیلی قسماً خصوصی ایدی .
صوکراده بویوک محاربه ائناسنده کی مودایه تابع اولارق آلمان مکتبته کونده .
رہشلردی . فرانسزجه سی بر از ضعیفدی ؛ فاخر آقشاملری اونی بر قاچ

ساعت چالشدیریدی . بو پک بسیط ، پک دورغون کورونن روحده جدا
مستنا بر ذکا واردی ؛ آز زمانده فوق العاده بر ترقی اثری کوسترمشدی .
بر طرفدن بو، قونوشوب آکلاشمق ایچون غریب بر زمینده تولید ایتدی .
یازی یازار کبی کورونه رک اوافق تفک جهله ره حادتا مکتوبلا شیرلردی . ذاتاً
باشقه مساعد زمانلری ده یوقدی . صو کرا صو کرا آرتیق هر شیئه قرار ویر .
مشر ، بر برلرینک اولمادن یاشایه میه جقلرینی آکلامشرلردی . ایر کیچ حقیقت
میدانه چیقاجق ده اولدقدن صو کرا احتیاطه ، احترازه صانکه لزوم کورمیور
کیدیلر . هر کس یاتدقدن صو کرا معلا ، ساعت بره ، ایکی یه دوغرو فاخرک
اوداسنه کلیور ، خولیالی بر کیجه قاندیلنک لوشلغنده بر قاچ ساعت برابر
اوطوروب قونوشویورلردی . شمذیلک ویردکلری قراره کوره هر شیئی
طبیعی حالنه براقه جقلر ، بو حیات بر مدت ایچون ، مثلاً بر سنه بویله دوام
ابده جکدی . فاخر بر طرفدن استقباللری ایچون حاضرلق یاپاجق ، هر حالده
بورادن چیقوب کیده جکلردی .

چونکه معلا :

— بر دقیقه ، دییوردی ، اونلره هر شیئی سویله دکن صو کرا بر دقیقه
بیله بوراده دورامام . بوراده کچیره جکمز هر ثانیه انسانه جهنم ساعتلی کبی اوزون
کلیر . بیلیرم که او زمان سن بر کله یه ، بر باقیشه تحمل ایده میه جکسک .
یا بن ، اونلرک اک کوچوک مؤاخذه لرینه میدان ویریلسه ، بنده اولورم .
مطلق ، مطلق چقوب کیتمه لی یز ، فاخر ...

صو کره او یله کونلر کلدی که معلا آرتق هر آن :

— بر یر اوطه سنه ، بر قورو لوقا اکمه راضی یم ، دییوردی . سنکله
برابر هر شیئه قاتلانیرم . داهاصو کرا بو : « بر قورو لوقا اکمک ، بر یر اوطه سی بول
کیدلم . » جمله سنی آغزندن دوشورمز اولمشدی . دونه قادار کوزلرنده
احتشام ، دبدبه رؤیاسندن باشقه بر حقیقت دوغمایان بو جام کبی معناسز
قیزده نه عظیم بر انقلاب باشلیوردی . فاخر الکزیاده خیاله قاپیلدیغی زمانلرده ،

مثلا مېجله باقارق ، « آه اوده بونك كې اولسه يدى .. » ديه ايچنى چكر كن بيله معلانك بركون كلوب كندىسنى شمدىكى قادار سه وه بيله جكنى خاطرىنه كتيرمه مشدى . اونك بويه ماضيده كې بىلكىدن بوس بوتون صيريلارق يكي بر روحله دوغماسنه معجزه دن باشقه نه دنيله بيليردى .

مأیوس، منكسر بر صنعتكار كندى اثرىنى بر جنت انكسارله ناصل پارچالارسه فاخرده كنج ايكن ، شاعر كن بىك تورلو خوليا ايله سوسله يوب سودا تخته حيقاردىغى معبوده يى بركون گلش كندى ائيله خلع ايتش ، بوغمشدى :

— يوق ، يوق دىردى ؛ انسانلر آراسنده بويه بر مستثنا اولاماز ، ياشاياماز ... فقط ايشته واردى ؛ همده ياننده ، او مخيل معبوده دن بيله اوقادار يوكسك ، اوقادار ممتازكه ... هر آقشام اونى سوقاق قاپىسندن قارشىلايور ، يالكز قالدقلى ايلك ثانيه ده كوزلرينك بوتون سحريله ، دوداقلرينك بوتون آتشيلا قوجا بر كونك يورغونلغنى سيليوردى . بربرلرني دهلى كې سه وييورلردى . يازيق كه بوسه و كىنك باش دوندورهن بويوسى اونلره هر شىئى اونوتدور مشدى ؛ حتى بر آن اول كندىلرى ايچون متواضع بر يوقاقورمق اضطرارنى بيله ... فاخر اونك بو [بر قوروا كمك ، برىراوطه سى بول ! ..] ديشنى دوشوندكه كذاب ايچمش بردهلى كې آتش ، اويله بر چيلغىنلق دويويوردى . بو قادار ديدى قوديدن ، اونلرى بر برينه ويرمه مك ايچون كندىسك فقرى مانع اولديغنه دائر اورته ده دونن لافلردن صوكرامطلقا اوته كىلرى صوصدिर احق ، معلانك فداكارلغنه لايق اولاجق ، مكمل بر يوقا تقديم ايدم بيلمهلى دكلىدى ؛ يوقسه قابلىدى كه اونى متواضع ، دوشكون بر حياته آتسون ؟ .. او زمان هر كس : « باق ، ديه جكدى ، بر ديمه دكمى ؟ » صوكرام بكار كن انسان بوللق كونلرنده اك مكلف صوفره لرده يمك ير ؛ فقط احباب ايدرسه زيتون اكمله ده قناعت ايدم بيليردى . چولوق جوجوق كې رابطه لرى اوليان بر آدام نرديه اولسه كيدم ؛ نروده اولسه چاليشوب كندينه برلوقا اكك بولور ، نهايت بوس بوتون اميدسز

بر ظلمته دوشسه بيله اك صوك ايشيني رووه لوهر ناسوسندن بکله يه بيليردي. فقط اوبارق صاحبي بر آدم بويله مي؟ .. بيك تورلو طائله قيودي آراسنده هر حرکتك آري آري اولچوسي اولور كن فردي حقلر قاليله جقدی كه صوتوق قانله كندی كوزلريني سوندورمكه بيله اُنی وارسون؟ بو کون بر قورو او طه يه راضي اولديغني سويله ن بر كنيج قيز سنه لر كچد كچه هپ او وعدي خاطر لايه بيليرمیدی ؟ قادين قلبي كه ارقادار كلوب كيجي هوسلرله چارپار ، نه درجه وفالي اولورسه اولسون بر کون كلير اوفاجق برانفعال نتیجه سي هر شئي اونو تابيليردي ؛ هله باباسنك اُونده آزچوق رفاه كورمشسه . هايدی معلا هر شیده ممتاز ، هر شیده مستنا اولديغني كي حروميتلر قارشوسنده ده پايانسر بر ممانتله سسني چيقارماسون ؛ فقط اونك كي فداكار بر كنيج قادينك او كنده كندی ضعفني حس ايدوب كوچوك دوشمكده كي حجاب ، حصه نه دوشن وظيفه يي ياپاماش اولمقده كي عذاب ، اصل بواحتماللر اونی شيمديدن چيلديرتيوردی . هله يارين دوغاجق ميني ميني لر ... اونلردن ده فداكارلق بکله نه مزدی يا... بر بابا ايچون اونلرك شعور سر ، كناه سر آرزولريني يرينه كتيرده مه مك قادار اليم بر محروميت اولابيليرمي ؟ .. او زمان سفيل بريووا ايچنده ديرلك دوزنلك آرامق يك معاسر بر خيال اولاجق ، او كچمش كونلرده كي رويالردن اويانيس كيم بيلير ايكيسني ده نه قادار صار صاجقدی .

*

**

فاخر بر کون پوسته خانه دن بر مکتوب آلدی ؛ پوللر اسويچره نك ، يازی طانيماديني بر قلمكدي . آچوب ده او قوينجه خاطر لادی كه مبجلك افشا آتی اونی چيلديوتوب آلت اوست ايتديكي زمانلرده بر آراق شيطاني بر فکرة قايلمشدی . عادل بکك اسويچره ده كي آدره سنه بر مکتوب يازمش ، اونده قادين يازيسنه بکزه ر بريازی ايله : « ايشيديورم كه اسويچره نك بدايعي چامليجه ده ياپديغمن ياراما ز- لقلري اونوتديرمش . فقط اسكي دوستلر آراسنده خيالي سيلنمه مش بر سيما قلدي ايسه شو آدره سه مکتوب يازما كزی رجا ايدهرم .. » كي برلسان

قوللاشمىدى. عقلنجە چاملىجە كې، يارامازلىق كې كەلرك تىلفى مادلە بعض اسكى
خاطره لر اويانديرابيليردى. معلا ايله آرارلنده برشى وارسه بو، امضا يرينه
تك بر حرف قوشمىش مكتوبه كەجك قارشىلىقدن خىلى معنا چىقارمىق قابل اولاجق
دييوردى. حال بو كە جواب هېچ دە اومدىنى كې اولمادى :

لوزان ۹ كانون اول ۹۲۱

مكتوبىز يكرمى كون سياحتدن صو كرا كلى. بويوردىغىز وجهه
اسويچره نك بدايى نه ايچون چاملىجە دە ياپىلان « يارامازلىقلىرى » اونوتدورسون
شبهه سز، كنجلك اقتضاسى بو كې يارامازلىقلار ا كثرىتله تاريخ شىبايك ايلك
صحيفه لر ده تصادف ايدىلن خاطره لرى تشكيل ايدىر. شو آدرسه مكتوب يازمامى
رجا ايدىيورسكز. امرىكزه امثالاً مكتوبمىله برابر حرمتلرمى تقديم ايدىرم.
عادل اكرم

بوندن هېچ بر معنا چىقارمىق قابل دكلى. عادل آلدىنى مكتوبك كىمدن
اولديغى آكلاماشمىدى عجباً؟.. يارامازلىق كەسنىك كىنارلى چىزىلەرك عىناً
نقل ايدىلەسنه باقىلىرسه بو چوجو غىك چاملىجە دە خىلى چاقىنلىقلرى اولديغى
حكم ايتىك ايجاب ايدىجكلى. هله بوتون بونلر ايچون « تاريخ شىبايك ايلك
صحيفه سنده كنجلك اقتضاسى تصادف ايدىلن خاطره لر .. » ديوب كچمەسى بك
افدينك بو نوعدن ائى سر كذشتى اولديغى، بوكون اونلرە لا قيد قالمىي ده
كندى فلسفه سنه اويدوردىغى اثبات ايدىيوردى. زواللى، اسويچره يه فلان
كىتمش اما برقادينە قارشى بويله «.. مكتوب يازمامى رجا ايدىيورسكز» دىمكە
تربىه سى، تحصيلى حقنە دە انسا نەك ائى بر فكريو يره ميوردى. ذاتاً فلان آلمانىادن
ككس، فلان يارسدن دوشمى كې حكايله لر، بويله باشقه بر صفتدن محروم اولوب دە
يالىكز بوفلان وفلان يرلرە كىدوب كەنك شهادتە مفتقر اولانلر فاخرە يوكسك
قالدىرمە كى مزاد ماللر نى خاطر لاتىردى. اورادە دە اك اوجوز، اك عادى
شيلر « آمرىقادن كلن قانيون ماللر ! » ديه ساتىلمازمىدى؟ بوتون بونلردن

معلايې اتهام ايچون هيچ برشي چيقارمق قابل دكلدى . بوكا پك ممنون اولدى .
ينه بر آراق ميجلك سوزلردن بحت ايديليركن معلا : « عادل بكه بر قاردهش
كبي بويودك . اوكا ، نرم بيكلرمزى صاقلايان ، اويونجاقلرمزى قيران خايلاز
براغا بكدن باشقه نظرله باقمق خاطرمدن كچمهدى . » ديمشدى .

فاخرده نه قادار ايستيوردى كه شيمدى يه قادار هپ قيصقانچ حسرله اورتايه
آتيلان ديدى قوديلردن ، هپ بو مستنا كنج قيزه بر قصور بولا ميوبده
نه اولورسه اولسون اسناد ايديلن شيلردن هيچ برينك اصلي چيقيماسون ؛ معلانك
قاي ايلك دفعه يالكر كنديسى ايچون چارپمش اولسون . اسكيدن اولسه كچمش
كونلره عائد اوافق تفك بعض كناهلر بلكه عفو ايديله بيلردى . انسانلر بوكون
بوني بويله قبول ايتك ضرورتنه قارشى توكلدن باشقه چاره بولاميورلر . فقط
شيمدى اونى اميدندن چوق يوكسك ، چوق تميز طانيدقن صوكراللدانديغنى
كورمك ، بوچوق فجيح برشي اولمازميدى ؟

ايچنده بوكا بگزدرشبهلر چاقدقجه فاخر ياغاچق فلاكت طوفانى دوشونمهك
ايچون دوداقلرينى قاناتيردى . معلا بو كونه قادار بوتون حياتنك بوم بوش
كچدبكنى ، سهو كى ياوندن او كرنديكنى قاچ دفعه تكرار ايتمشدى . يالان سويله مه يده
البت مجبوريتى يوقدى ؛ ذاتاً نه ده اولسه فاخر اونى كوزلري قابالى ، سهو ميور-
ميدى ؛ نه ده اولسه سهو ده جك دكليدى ؛ حال بوكه ايشته برى صاف ، تميز ، اك
فضيلتلى بر قيز ، اوته كى ده بر آز سر آزاد كچن سنه دن صوكرال ايلك دفعه
سهو كى ياونده طادان بر كنج ، اك خيالپرست انسانلري بيله تطمين ايدجك
سعادته بر برلرينى بولملشردى .

آرتق اونك عصمتى ، جديتى حقنده اك اوافق برشبهيه دوشمك ، برايكى
كشينك غرضكارلقرينه ولو بر آن ايچون اولسون قاپيلوبده عجباً ديمك پك
بويوك بر كناه اولوردى . ذاتاً كونلر كچدكجه ، داها ياقيندن طانيدقجه بوتون
قوتلريله ، بوتون آتشلريله بر برلرينه صوقولو يورلر ؛ سعادتى ، استقبالى ، هر
شيئى هپ بر برندن بكه يهرك — بركون اولوبده الله اسيركه سون — آيريلسهلر

ياشايمه جقلرينى بيله بيله سه ويشيورلردى . فاخر اوه دوندىكى زمان معلا بر آز قومشوده ، حتى بش ون دقيقه ايچون كندى اوطه سنده بولونسه اونى كورونجه يه قادار صانكه نفس آلاماز ؛ كوزلرى كورميور ، اطرافنى دويميور كى كسندن كچردى .

بر آقشام بويوك خانممه خدمتچيلردن ماعدا هپسى استانبولده بر دوكونه كيتمشلردى . كنج غزته جى هركون مطبعه ده اك يوروجى ايشلرله ديديشيركن آقشامه اونى كورمك ، اوكا قاووشمق ، اونك قوللارنده ديكاه نمك خولياسيله قوت بولور ؛ ساعتلرجه باشنى قالديرمادن يازى يازار ، سوراقلردن قوشار كى كچردى . بو كون عكسى كى اورادده ايش يوقدى . جان صيقينتيسى اونى بوس بوتون خراب ايتمشدى .

كيجه كويه دوندىكى زمان صانكه اودن جنازه چيقمش كى هر شيشى رنكسز ، هر كسى نشئه سز ، ديلسز بولدى . بر ايكي لوقه بر شى يه ديلر ؛ بويوك خانم كلينك كيتدجه كريلن خويسز لغمن آرتق پك قورقش ، اونك ياننده فاخره هيچ التفات ايدمهز اولمشدى . چوجوغك يوزينه باقه رق كولمك ايچون بيله يالكز قالمايه دقت ايدردى .

بو آقشام صفوتله بر آز كندى دردندن ، بر آز شورادن بورادن بحث ايتدكن صوكره ياتسويي قيلول ياتدى . خدمتچيلرده چكىلديار . فاخر ، سالونده يالكز ، هر زمان اوطوردى ماصه يه يارين ايچون حاضر لانه جق يازيلرينى يامش ، بر سطر بيله قارالايامدن دوشونويوردى . سكوت ايچنده اراده براونك سنى دويار كى اولويور ، يالكز لقمه هپ اونك خيالى آرييوردي . بردن بيانونك قاباغى طيقيردادى ، هر زمانكى كى معلا صاندى . يوره كى چارپه رق دوندى ؛ پاموق ، پرده لرك آراسنده يووارلانوب اويناركن قوردونك اوجنى بيانويه چارپمشدى .

هر كيجه معلا بو ساعتده اونكه برابر اولوردى . يا شوراجقمده آنه . سنك اوموزينه باشنى دايا يارق قاچماق نظرلرله فاخر ك كوزلرينى آزار ، قيصيلان

کیرپیکلری کوزلرینی لاجورده بویاردی ؛ یاخودده یاننده ، صاحبلرندن دوشن برقاچ آلتون تل فاخرک یوزینی اوقشایه رق برابر درسه چالیشیرلردی . صو کرا محی الدین بک اوداسنه ایرکنبه چیقار ، فخامت خانمده :

— یاتاغه یاتنجه اویویامیورم ، شیمدی اویقوم ککشکن . . . دیه قانایه اوزانیردی . اونلر کتابی اوکلرینه سپر ایدرلر ، وظیفه تصحیح ایدر کی قیسه جهلر فارالایه رق قونوشورلردن . هله معلانک حقیقه درس یاپدینی صرده مثلا اونوتوش بر کله ایچون صقیلوب سانکه آغلایه جق کی باشنی اوکنه ایکیشی واردی که . . .

فاخر ، اولومی پک یاقین حس ایتدیکی دقیقه لرده بیله قورقو دویمامش کنج ، شیمدی کیجه نک بو سسزلکنده توایلرینک اورپردیکی حس ایدیور ، آکلاشلماز بر قورقو ایله تیریوردی . کوزلرند بیریکن یاشلر ، اوراده کی رنکلره خولایلی بر مهیت ویریر ، اطرافنده هر شی بلوری دوما نلره بورونورکن دوشونویوردی که یکریمی دوت ساعت صو کرا اونی تکرار کوره بیله جک ایکن بو قادار پریشانندی ، بر کیجه لک افتراقه بیله دایانامیوردی ؛ یا بو ایریلق بوس بوتون اوزاسه نه اولاجقدی ؟

کاغدلرینی طویلادی ؛ سالونده کی لامبایی سوندوردی . صوبانک قیرمزی ایشیغله قالمق خولیلره باشقه بر بویو یاپیوردی . بر آزارکن یاتمه یه ، اویقونک قوجاغنده کندندن کچمه یه پک احتیاجی واردی . صویوندی ؛ بیتکین یاتاغه کیردی . بو کیجه اویقو بیله او قادار وحشی ، او قادار قاچاقدی که . . . اوطه سی قارانلقدی . صوفاده صباحه قادار بر لامبا یاناردی . اونک ایشینی قاپینک آرالقلرندن صیزیوردی . بر آزدالمق ، آزیجق کندینی اونوتمق ایچون کوزلرینی صیقارکن سانکه او قاپینک آرالرندن صیزان صاری سونوک ایشیق یاواش یاواش کنیشله یور ، صو کرا قلی ناریه یاقین آچیلور ؛ بیاض بر خیال تخته لری اینجیتمکدن قورقه قورقه کندی اوداسنه سوزولور کی اولویوردی . فقط فاخر ، اوخیالک چیرپنیر کی تیره یین ، صوئوقدن می ، هیجانندن می

بوز كىلىش آللىنى طوتمق ايچون اوزانجه اوطه يى دولدوران بوش قارائلىك
ايچنه دوشويوردى .

هفته لرحه اويقوسز قالسه بو كيجه كويا اير كندن قاووشولان ياتاقده كي
عذابك يتكىنلىكنى دويميه جقدى . ايرتنى صباح تراش اولور كن اينادن اوکا
باقان چو كوك، فرسز كوزلر بو يكرمى آلتى ياشنده كي كنجكميدى ؟ .. ديشارى
چيقدى ؛ اونك اوطه سنه دوغرو يورودى . معلا ، خامنه سيله برابر ياتاردى .
بويوك خانم صباح نمازينه قالقمش ، اشاغى اينمشدى . اوده كيمسه اولديغى
حاله ينه اياقلىرىنك اوجنه باصهرق اونلرك اوطه سنه كيردى .

اوزون اوزون اطرافنه باقندى . صوكر ا بر آراق البسه دولابنى آچدى ؛
كوزلىنى قاپايوب دولابك هواينى ايچنه چكدكجه اونك قوقوسنى دويويور ،
صانكه شمدى قوللرينه دوشه جكمش كي بكليوردى . ترهك اوزاقدن دودوكنى
ايشيدنجه يه قادار اوراده اويله كوزلى قاپالى كندىنى اونوتدى .

بر بو، برده كچنلرده بر كيجه ايله او كرنكلرى آيريلقدن صوكر ا آرتق
فاخرله معلائك بر برينه قارشى دوشكونلكى چيلغينلغه بكره مشدى . برى غزته ده
ايشارنى بوس بوتون كهوشه تمش ، بر دقيقه اول نه وه دونمك ايچون هر كون
يك تورلو بهانه چيقاريوردى ؛ اوته كي ده اوك ايچنده موازنه يى تايمين ايدن
يكانه اراده صاحبي اولمقدن چيقمش ، خسته كي سسسز كوشه لرى
آرييوردى .

ينه بر آقشام قورقونج بر فرطنه واردى ؛ تقسيمده كي بويوك آغاجك
ييقيلديغى كيجه ... صوك واپورك ايشله مه مسى اوزرينه فاخر كويه دونه مدي .
ايرتسى كون كلديكى زمان معلايى بك پریشان بولدى . كنج قيز بوتون كيجه
اويوما مشدى . قاچ زماندر اوك ايچنده كي آهنكسزلكدن ، حتى باباسنده بيله
كيتدكجه آرتان عصبيتدن فاخر كندينه ده بر حصه چيقاراجق ، داريلوب كيده جك
ديه قورقويور كيدي . دون كيجه كله نجه شيطان كوزلىرىنك او كندن نه قورقونج
شيلر كچيرمى . شمدى فاخر قايدن كيره ر كن هر تورلو احتياطى اونوتوب

کندندن کچر کبی اونک قوللرینه آتیلدی . ذاتاً هر زمان تکرارلادیغی بر شی واردی :

— آمان بر شی بلای ایتمه ، دیردی بر آرز صبر .. آرامزده برشی اولدیغی حس ایدرلرسه درحال آیریرلر . مادام که ألمزده باشفه چاره یوق ، باری شمذیلک بوندن ده محروم اولیهلم .

...

بویوک خانم بر کیجه یاریسی اویانمش ، معلایه سسله نمش ، اونی یاتاغنده بولامانجه هر شیئی آکلامشدی . اوتهدن بری ذاتاً اونلری بربری ایچون پک لائق کوروردی . بو آقشام او کړندیکی شکلی پک موافق بولماقله برابر قباحتی اوغلی ایله کلینه بولش : « اونلر بر آن اول بو ایشه بر شکل ویرسه یدیلر ، دیمشدی . هیچ بریسی اولمازدی... » یکر میشر یاشنی کچن ایکی کنجک مؤبدأ بربرینی ایسته مه لرینه — بوتون ساده دلکی ایله برابر — اک صمیمی ، اک طبعی بر نکاح دیه جک قادار صوئوق قانلیلق کوستردن بو قادین : « بربری کزی حقیقه سه ویورسکزی .. » دیه طور ونه صورمش ، صوکر اینه کلینه قارشی عداوتی خاطر لایه رق : « اوج اولسون ، آنهک بویوک سویله دی ده نهایت باشنه بویله سی کلدی . یوقسه بن هر شیئی اولندن سویله مشدم . اوزمان عناد ایتمه یوبده هیچ اولمازسه شمذیلک بر نکاح قیدیرسه یدی نه اولوردی ؟. » دیمکدن کندیغی آلامامشدی . هله معلانک آیلردن بری همان هر کیجه هر کس یاتدقدن صوکر افاخرک اوداسنه کتدیکنی ، فقط آنجاق قلاباً ، روحاً بربرلرینک اولدقلرینی او کړه ندیکی زمان ینه اوسادهل طور ی ایله بوکا پک شاشمشدی .

اونلر بربرینی بو قادار آئی آکلارلر ، اوقادار یوره کدن سه وه درلر کن آنه سی ایله باباسنک بر تورلو یوموشامیه جقلرینی ، بوکا راضی اولامیه جقلرینی کیت کیده داها زیاده قطعیتله آکلیورلردی . محلاً ، کوندن کونه پریشان ، بوتون بو قورقورلردن ناصل قورتولایله جکلرینی دوشونویوردی . آرا صبره

ایچنی چکیور : « بن که بابامی ، هله آنه می نه قادار سه وییورم ، دییوردی .
اونلرک یوزندن سعادتمی غائب ایده جکم . بلکه بیلمه یه بیلمه یه فلا کته اونلر
سبب اولاجق . . . » اولک ایچنده اک زیاده کندی حالی دایانیلما یه جق قادار
مشکدی . قلبنده آنه سنه هاند کوشه ایله فاخر ککی اوزون مدت بربرینه
استیلا ایچون جدال ایتش ، طوتوشمش ؛ صو کرا فاخر ، یالکز باشنه او قلبه
صاحب اولمشدی . آنه سنی جدا چوق سه ووردی ؛ اونک اوزولمه سی ، براز
رنکنک صولماسی ایچون هر فدا کارلنه راضی اولاجقدی ؛ فقط بویاشه قادار قلبنده
دویمادینی باشقه بر هیجان ، آکلا شلماز بر چارپیتی آرتق هر شیشی اونوتدیرمشدی .
صو کره کوندن کونه آکلایوردی که فاخر اونی آنه سندن ده ، باباسندن ده فضله
سه وییوردی . معلای کوردکجه باغینلق کچیریور ، کورمه سه بوس بوتون
اوله جک کبی اولویوردی . کندیس ده بوتون مستقبل سعادتی فاخرک قوللرنده
بولاجفه ایمان ایتمشدی . آرتق بویله کیده رسه دون بویوک خانمه ، بو کون
دادی ایله یکانه یه قادار دویولان بو رابطه نهایت تمامیه میدانه چیقاجق ، او
زمان اوته کیلر ، فخامت خانمله قوجه سی اونلری بربرندن آیرمق ایچون کیم
بیلر نه لر یاپاجقلردی . بو امیدسز کونلرک ، اویقوسز کیجه لرک خرابیسی هر
ایکسنگ ده اعصابنده اختلالر طوتوشدورورکن اونلردن منطق ، سکونت
کبی شیر بکله مک بر از حقسز اولمازمیدی ؛ دوز کون اوچ ساعت بیله
اویویامادن ، افقه قارش دوشونجه سز ، یاشسز کوزلرینی چه ویره مدن کچن
بو حیاتک کیجه سی کوندوزی بربرینه قارشمش ، آلت اوست ولمشدی .
اویورکن ، اویانیق کچمش عصرلرک یورغونلغی ایله آرییورلر ؛ اویانیقکن حال
بر اویقوا یله کوزلری آچیق ، صایقلار کبی اطرافی کورمیورلردی . کندیلرندن
او قادار کچمشلر ، اویله معمالی بر مستی ایله مورفینله نمشلردی . بردن دوغان
صبرسز بر آرزویه أسیر اولارق دکل ، چونکه ناصل اولسه آریلما مه یه یمنلی
ایدیلر ، فقط کندیلرینی قورتارمق ایچون بر امر واقع احداثدن باشقه چاره
بولامادیلر . ایشته بو سه وکینک بریمجک کناهی ساده بو اولدی .

ياغمورلو بر کون ، اوکله وقتى هيچ بريسي يمک يمه يه مطبعه دن طيشاري يه
چيقماش بقالدين پينير ايمک ، حاجى بابادن چاي کتيرتمش ، آرالرنده پک
نادر کورولن برکوشکلکه شورادن بورادن بحث ايد يورلردى .
آرقاداشلردن برى :

— چوجوقلر ، چايلرک شکرينه باقک! .. برردانه سى هپ ياريم .. حاجى بابا
ده آرتق شکر بهاليلاندى ديه نه خلط ايتديکنى بيلمور! .. ديرکن برباشقه سى
چوق کورمش ، چوق بيلمش کچين باب عالي مخبرى خيرى ، لافى دونديرمش
دولاشديرمش شمدىكى عائله حياتنه کتيرمشدى . ايشلرينى برازايرکنجه بيتيروب
کنديسنى برآن اول حيدرپاشا واپورينه آتمقدن باشقه برشى دوشونمه ين فاخر
ماصه نك بر گوشه سنده يازيلرينى حاضرلارکن خيرينک ماصالاريني هيچ ديكله
ميوردى . فقط اوته کيلر بوياغمورلو ساعتلى کچيرمک ايچون اک بوش سوزلر
اوزرنده قهقهه لرله کولويورلردى ؛ بعضاده ساده جه خيرى ني قيزديرمق ايچون
عنادلرينه اعتراض ايدرکى کورونويورلردى .

بومناقشه آراده براويله کورولتولرله يوکسه ليوردى که فاخريله زورله باشنى
چه ويريور ، ايسته ميه ايسته ميه اونلرک ديدى قوديسنى ديكليوردى . خيرى هراختيار
کي کندى زمانيله شمدىكى آراسنده مقايسه لر ياپيور ، ينه هراختيار کي کندى
دورينه حق قازاندير يوردى . کنج قيزلردن مکتبلى خانملردن بحث ايدرکن :
— او ، سوکوک دیکمه سنى بيله او کرئمن مکتبلرده کيميا ، رياضيات ،
نباتات تحصيل ايتمک ايچون کيدوب کلن خانملر يوقى ، دييوردى اونلردن يالکز
رسم شعبه سنده دوام ايدنلرا هليت کوستره بيليور ؛ اوده کندى يوزلرينى بويامقده! ..
صوکره « هر کون آللرنده چانطه لر کمان قوطولريله جاده لرده سورتن » او
زمانه قيزلرينک هپ بر رماجراسى اولديغنى ادعا يديور ، اسکيدن بويله سرگذشتلر
يا فرصت يوقلغى ايچنده هيچ دوغاماز ، يا خودده بر از قورقو ، براز ريا پرده سى

آرقه سنده کیزله نیرکن شمدی سینه مالری، تیاترولری، باغچه لری، دانس سالونلری ایله تکمیل استانبولک « کوکل پیاسه سی ایچون بر بورسہ خانى ! » اولدیغنى سویله یوردی .

هله طائله آراسنده چوجوقچه اویونلرله باشلايان صحنه لرك بيله بويله رابطه لری یاواش یاواش اؤرمه یه خدمت ایتدیکنی ؛ انسیاقی تمايلارک ، مسافرلک اوینايه اوینايه ، کلین کوه ئی تقلیدی یاپه یاپه بوس بوتون شعورلو برحاله کچدیکنی سویلرکن اونک نظرندہ عمجه زاده لر، اوزاق یاقین اقربا چوجوقلری ، قومشولر ، مکتب آرقاداشلری هپسی هپسی مینی مینی قیزلر ایچون بررتهلکه ایدی .

کنج بر رفیقہ نك ماضیسنی اہمال ایتک ، کچمش کونلری آراشدیرمامقده دوزخو دکلدیر ، دییوردی . چونکه هر قادین ایلک رابطه سنی برتورلو اونوتاماز دائما اونی خیالندہ طاشیر ؛ حتی اونوتمش کورونسہ ، اوله نوب آرادن سنه لر بيله کچمش اولسه اک اوافق فرستده اوماضی ینه بردن برہ جانلانیر ، کنج قادینک بوتون اراده سنده کی طلسمی چوزہ بیلیردی .

بونی عقلنجه بر دستور دیه اورتیه آتقدن صو کرا باب عالی مخبری ادهالرینی اثبات ایچوندہ اوزون اوزون حکایه لر آکلاتیوردی .

فاخر ، بو کورولتونک اورتہ سنده چالیشه میه جغنی کوردی . یاغمورده خفیله مشدی . کاغدلرینی طوپلایوب قاپیدن چیقارکن اوتہ کی حالا :

— شمدیکیلر قوجه دکل ، برر قورقولق ، برر قاپی ماندالی . . . دیه

سویله نیوردی .

اوکون ایشلرک یورغونلنی ، واپوره یتشمک تلاشی ، ترندہ مخقلردن طاشان قالابالق ، بوتون بونلر براز قیملدانان هر دوشونجه یی اژه جک قادار آغیردی . فقط آرادہ بر خیرینک صاووردیغی « حکمتلرده » خاطریته کلیور ، بونلر انشته سنک معهود نصیحتلریله برله شنجہ قارشیسنه دیکیان مادل بکک خیالی ، معلانک بوچوجوقلق آرقاداشنی بر تورلو کوزلرندن سیله میوردی .

حالبوکه کندبسی معلايه اوقادار آمیندی ؛ اونک فضیلتلرینه اویله بر قوتله

اینانمشدی که یوره کنی قجه جه چیمدیکله یین بوشبهلره کولمک ایستیور : « هایدی خیرینک بعض سوزلری دوغرو اولسون ، استانبولده بویله قیزلرده بولونسون فقط او ، بونلرک هیچ بریسنه بکزمی؟ » دیه کوزلرینی قاپیوردی . هر شی ، هر کچن ثانیه اونک ملککنی ، اونک ممتاز یارادیایشنی اثبات ایتیورمیدی ؟ هم نه ممتاز بریارادیلش . . . چونکه معلا بوس بوتون قاپالی بویودیکی ایچون تصادفاً پاك و صاف قالمش برچوجوق ده کلدی . اوده آراده برا کلنجهلرده ، دو کونلرده قالابالق آراسنه کیریور : هر طبقه دن انسانلره طانیشیوردی ؛ ایسته سه نه لریا پا بیلردی . تجربه سز قلبر ایچون بویله قالابالقلر ، اختلاطلر قادار جاذب ، دلفریب برشی اولامازکن ، هله معلانک طانیدقلری آراسنده ده برچوق خفیف مشربلی کنج دوللر ، یتشمش قیزلر وارکن کندیسی اونلردن هیچ برینه بکزه یورمیدی؟ . . . فاخر صولک زمانلرده پک غریب برشی داها او کرمشدی : وفابک اوکا طالب اولوبده اورته ده بویله لافلر دوندیکی زمان معلانک قومشولردن برقاچی وفایی اوکاچکشدیرمشلر؛ قومار بازدر ، چاپقیندر ، وفاسزدر دیمشلردی . چاپقیندر ، هله وفاسزدر دیمکده حقلری ناصل اولماسون که مکر وفابک اونلرک هر برینه برر زمان ایچون صاحب اولمش ، اونلر کندی آره لرند بربرینی قیصقاندقلری کبی شمدی ده معلانک وفایه وارمسنی چکه میورلرمش . اونک ایچون بو کنجلاه معلا نک آره سند برشی کچمش اولماسی خاطره بیله کلزدی . حتی ایکی عائله آره سند صهریت تأسیسی یالکز وفانک آنه سی طرفدن اورتایه آتیلان بر فکر اولدینی ایچون اوغلنک بیله بویله برشیدن خبری اولمادینی آکلاشیلیوردی . ذاتاً او ، کنج قیزلردن زیاده کنج قادینلرک پیشنده دولاشان بر چاپقیندی . فاخر بونلری دها شمدی ، یاواش یاواش ، فقط پک قطعی ، پک قوتلی اولارق او کره نیوردی ایشته یارین بوتون عمرلرینی بولوشه جکلری سوکیلی ، بو آراده بر کورولتولووقالا . بالقی صفحانی ده اکسیک اولیان بر حیات ایچنده ، مثلاً عادل بک کبی اقرباچوجو . قلری آراسنده بویومشکن ینه صاف ، لکه سز قالمشدی ؛ اک مستثنا فضیلت ده ذاتاً بو دکلیدی ؟

معلا اونك ايچون اوقادار يوكسكىدى كە خىرىنك بوكونكى ھىيانلارندن
 صكرا خاطرینه اوشوشن شېھەرلر بردقیقە بیلە یاشامادی ؛ کیجه یمکدن صو کرا
 ھپ برابر اوطورور کن آرتیق ھېسنی اونوتمشدى . وقت ھرزمانكى كېي چكدى
 اون برە دوغرو ياتمايه چككديلر . بر ساعت صو کرا فخامت خانمك اوداسندن
 عكس ايدن او كسوروكلر صوصمش ، محى الدين بكك اوداسندە خورولتولر باشلا
 مشدى ؛ ايكىسى دە اويويوردى . معلا ھرزمانكى كېي فاخرنك اوداسنە كلكدى
 ھروقتكى كېي اوزون اوزون قونوشديلر . كوني ناصل كچيردكلرينى آكلاتديلر
 آرتق عادت ايتمشلردى . ھر آقشام يالكنر قالدقلىرى زمان او كون برينك استانبولده
 اوتە كينك كويدە ناصل وقت كچيرديكنى قارشىلقلى حكايه ايتمك ايلك ايشلرى
 اولور ؛ بونكه صانكه او بر قاچ ساعتك مجبورى آريلقلىرك آجيسنى اوتوتور
 لردى . بو كىجه دە فاخر ، بوتون كون ياغمورده ناصل چاليدشديغنى ، واپورده
 تراموايلرده نەلر چكديكنى سويلىوردى ؛ صرە خىرىنك ھىيانلارینه كلكدى . فقط
 اونى اولديغى كېي آكلاتە حق برده بردن چوجو قچە آرزولرە قاپيلدى . ياشامق
 قدرتنى ھپ بويلە كىجهلرى اونكه باش باشا كچن برقاچ ساعتە بولور ؛ ھر
 شيئە بونك ايچون قاتلانيردى . بومست ومسعود دقيقه لرك صو كندە بيليرميدى كە
 كنديلرينى بكهين بر شامت اولسون ؟ . . اوملعون ، او شيطانى شى زرددن
 عقلنە كلكدى دە بر آراق لطيفە ايتمك ، معلايى آزيحق قيزديرمق ايچون :

— بيلسەك كوزم ، ديدى بنم نە بويوك قباحتم وار ؟ . .

معلا ، ھرشئە قاتلانماي ، ھر شيئى عفو ايتمەي وعدايدن بر شفقتلە اونك
 يوزينە باقدى . فاخر دوام ايتدى :

— شمدي يە قادار سندن برچوق شيلر صاقلایوردم معلا . . فقط شمدي
 اونلرى برر برر سكاده آكلاتمە نك زمانى كلكدى .

— قاقا چوجوق ، وعدمن بويلەميدى ؟ . . بربرمزدن كىزلى برشيئمنز
 اولاجقميدى ؟ اويلە ايسە بن دە داريلدم ! . .

— عفو ايت كوزم ، شمدي ھېسنى سويلەجكم .

— خایر ، ایسته میورم ؛ مادام که اولجه صاقلامشک .

— نه یاپایم ، هیچ خاطر مه کله یین شیلردی . برده سنی قیز مامق ، سنی اوزمه
مک ایچون سویله مدم .

— بنی اوزمه مک ایچون می ؟

— والله هپ اونک ایچون . . . چونکه ایلک دفعه او کرندیکم زمان بنده
چوق اوزولدم .

— چوق شی . . . نه ایش ، سویله باقالم ؟

— آما ، سوز ویر ، داریلیمه جفکه . . .

— داریلیم ، سویله . . .

— باق سوز ویردک ، داریلیمه جشک . اوچ درت کون اولویور ،
سزک عادل بکدن بر مکتوب آلدیم . . .

معلا آ کلایمیش کبی اونک یوزینه باقدی . فاخر :

— جانم ، دیه ایضاح ایتدی . هانی شو سزک اسویچرده ده کی عادل بککر
یوقی ، ایشته اوندن . . .

— آ کلایمورم ، نه مکتوبی ؟ ..

فاخر بالالزام صوصدی : صانکه اونی تجربه ایتک ، بویله هیچ اصلی
اساسی اولمدیغنه کنديسنک ده امین اولدیغی بر اتهام قارشوسنده نه یاپاجغنی
تدقیق ایتک ایستتوردی . معلاده دنيله بیلیرکه مشئوم بر قوت طرفندن
بویوله نمش کیدی . چوجوقلغی ، تجربه سزلکی یوزندن هیچ یوقدن بر چوق
شبهه لرك دوغماسنه ، شمدی یه قادار لکه سز کچن بو سودایه نهایت برده فاجعه
قاریشماسنه همان همان برازده اوسیب اولدی . ایکسی ده بر آن ایچون
صوصویورلردی . شمدی یه قادار هیچ کناهی اولیان ، اک کوچوک شیلری
بیله عیب صایه جق ، کناه صانه جق قادار تمیز قالان کنج قیز شمدی ده او
صفوته صانکه بر قباحتی خاطر لامش ، یاخود هیچ صوچی اولیان بر شیدن

دولایى بلكه ده مؤاحذه اولونمقدن قورقش كې او سكوت اچنده بردن بره
سيلكنهرك دیدى كه :

— بن ذاتاً بيلوردم . ديمك ، عادل نهايت بو عاديلكى ده يپدى ! .
آنسزین طوتوشان بو تلاش فاخره چوق غریب كوروندى . اورته ده
بو قدر صارصیلاجق نه وار ، ديه اوده شاشیردى . حال بوكه بر آز لطیفه
اچون ، بر آزده شیطانی بر تجسسله اورته يه بو سوزلری آتدیغی زمان معلانك
معتاد سكونتى ، هر زمانكى مستريح لاقيديسنى بكليوردى . عجباً اونك ده
بيلورم دیدى كه نه ایدی ، عادلک ناصل بر عاديلك يپدیغی تخمین ایدیوردى ؟
صوكر ايكیدن يکيه بر شيلر داها اوكرنمك اچون ، صانكه بورايه قادار
كچن سوزلره هيچ اهميت ویرمیورمش كې لاقيدى ايله باشقه بر نقطه يه
آتلادى :

— اولجه ذاتاً اوکا بن بر مكتوب يازمشدم . ايسته شمدى ده او جواب
ويردى .

معلا بر قاچ دقیقه دن برى دالغین كورونوركن يکیدن اچنده برشى
طوتوشمش كې صوردى :

— أولا سن مى يازدك ، نه ديه ؟ ..

— سنك آغز كدن ...

— بنم آغز مدن مى ، چوقوقيسك فاخر ، هيچ بويله شى ياپيليرمى ؟

— پكى آما كوزم ، نيه تلاش ایدیورسك ، نه اولور ؟ ..

معلا براز كندینی طوپلادی :

— هيچ ، دیدى ، نيه تلاش ایدیم ؟ ..

— خاير هم چوق تلاش ايتدك . دمین ده عادل نهايت بو عاديلكى يپدى ،

بن ذاتاً بيلوردم ، دیدك . نه ایدی او بيلديكك ، سويله ...

— هيچ والله ، شمدى عادلک عقلنه کیم بيلير نه کله جك ديه دوشوندم ده ...

— نه کله بيليردى عادلک عقلنه ؟ ..

— اویله یا ، بلکه ده امیده دوشه جک ...

— نه امیدینه دوشه جک ؟ مادام که اورتاده برشی یوق ، مکتوبک سندن اولدیغنی بيله آکلامامسی لازم کلزمی ؟ ..
معلا براز ککهله دی :

— اهمیتسز برشی ديه بن سکا سویله مه یه اونوتمشدم ؛ یاخود لزوم کورمه مشدم ، نه دیرسه کدی .. داها عادل بورادن کیتمزدن اول ، حتی تا چوجوقلغندن بری آنه سی اونک قیز قارده شی دایمه ، بنی ده اوکا ویرمک صورتيله ایکی هائله آراسنده بر رابطه تأسیسنی غالباً آنه مه سویله مش . بن بونی عادل اسویچره یه کیتدکن صو کرا دويدم . یوقسه او زمانه قادار دیدیکم کبی کندیسنه ساده جه آغابک نظریله باقیوردیم . فقط بکا اظهار ایتمه مش اولقله برابر احتمالکه کندیسى باشقه تورلو دوشونویوردی . شمدی ، اوکا تلاش ایتدم که ، بنم آغزمدن بر مکتوب آلنجه کیم بیلیر

فاخر ، آیلردن بری یاری اویانیق ، یاری رؤیاده ، کوزلری دومانلی یاشیور ، بعضاً اطرافنده کچن سوزلری بيله دویمیوردی . شمدی ده بالعکس مغلانک بو پک ساده سوزلرینه بر تورلو قانع اولماش کبی کوروندی .

شیطانی برشی اونی اک ضعیف یرندن دورتویور ، کیزلیدن کیزلی یه مطلق برشی ، مطلق برشی اولاجق ! . ديه قیوراندیریوردی . معلا ایسه فاخرک :

— پکی هپسی بوقادارمی ؟ . دیدیکنی کوردکجه ایچندن طاشان بر فورانی صوصدورمایه چالشیور کبی معتاد غرورله باشی قالدیریور ؛ صانکه کندینی مدافعه یه بيله لزوم کورمه دیکنی آکله تیوردی . صو کرا دیدی که :

— سنک بونی مراق ایديشکه شاشیورم . حال بوکه یارین او بر کون کندی کوزکله ده کوروب آکلایه جق دکلیسک ؟ . عادل ، طیبی ، استانبوله ککه جک ؛ او زمان طانیشه جقسکز ... بکا قارشی معامله سندن آکلایه جقسک که آرامزده قارده شلک حدودینی کچن هیچ برشی اولمادی .

فاخر ، کندیسنه پک غریب کورونن بو مدافعه قارشوسنده بردن بره

طوتوشدى . شمدى يە قادار اونك هر سوزينه ، كوزى قاپلى ، اينانيردى ؛
 معلا ده اويله بر قوت واردى . ذاتا قادينلرده انساني قولايجه آلداتان شى يك
 بسيط دكلىدر ؟ هپ ار ككلرك اينانمايه محتاج اولديغى شيلرى سويلرلر .
 انسان بوتون تخیل ايتدىكى ، تمنى ايتدىكى شىئلك بر قادين آغزندن چيقدىغى
 دويونجه كور كورينه اينانمقده بر ذوق بولور . اونلر كناهلرينى يك قولاي
 كيزله يه بيلرلر ، چكدكلرى عذايك يك چوغندن قورتولا بيلرلردى ؛ اكر
 هپسە قيصه جه خايرديمك ، انكار ايتك خاطرلرينه كلسه يدى . سه و دكلرندن
 شهبه ايدنلر ، ينه ده : « آه انكار ايتسه .. » ديه طوتوشه رق بكله رلر . سه ويلن
 اك احمق قادين ، سه وەن اك ذكى بر ار ككى آلداتير ؛ بوده قادينده كى اغفال
 قدرتندن زياده ار ككك آلدانمايه محتاج اولوشندن در . معلا ذاتا لكه سز ،
 مستثنا بر كنچ قيز ، البت كنديسندن ده شهبه سى يوقدى ؛ بو اتهاملرى
 سكونته رد ايتمش اولسه يدى ، حتى هيچ سس چيقارمىوب لاقيدى كوسترسە .
 يدى ، بو اوزونتويى ايكىسى ده چكميه جكلردى . حال بو كه فاخر بوتون بو اويقوده
 روحيله ، هپ اوقشايجى ، اينانديرىجى شيلر بكلر كن اونك صوك سوزلرينى
 يك دوشوك بولدى . بومدافعه ده صانكه ديله دولاشان برأدا واردى . هله عادل
 بكك بورايه كلىشندن بحت ايدىلنجه كوندوز مطبعه ده خيرينك ياقين اقربا
 چوجوقلرى حقنده صايدقلرينى خاطرلايان فاخر ، ايچنده صوصدورولا مایان بر
 شهبه نك تپنديكنى حس ايتدى . اوزمان شيطان اوكا ، معلايى سويله تمك ايچون
 دولامباچ يوللر كوسته رەرك اوكنه دوشدى :

— اوت آما ، ديديردى . عادل بك يازديغى مکتوبده هيچ ده بويله سويله ميور ...
 — مادام كه سن بنم آغز مدن يازديغك مکتوبله اوكا بوجسارتى ويرمشك ؟
 آرتق بورالره قادار دو كولد كدن صو كرا فاخر يالان سويله مه يده باشلادى :
 — هيچ ده دكل . . بنم يازديغم مکتوب هر هانكى بر قادين آغز نندى ؛ نه امضا ،
 نه ده بونى يازانك معلا اولديغى ايما ايدە جك باشقه بر اشارت واردى . اويله

ايكن بونى سنك يازديغكى ظن ايدىرك مقابله ايمهسى آكلا تيوركه آراكزده كچن
شى اويله قولاي قولاي اونوتولماش

حال بوكه حقيقت بوكا تماميله عكوسدى. عادل زواللى معلايى اتهام حتى
ايما ايتمك دكل، مكتوبك كيمدن كلديكنى بيله آكلاماشدى. فقط اونى بوس
بوتون شاشيرمش كورن فاخر:

— سن بكا يالان سويله مى ميدك، معلا؟ ديه ايكلهدى. بربرمزدن
برشى كيزله مە مە يە يمين ايمه مشى ايدك!.. خاطر لارسك يا، داها ايلك كونلرده
ايدى، بن سكا يارى لطيفه، يارى جدى صورو يوردىم؛ خانم افندىز باشقه
قيلبره سعادت وعد ايتمشلر ايسه كنديلرني راحتسز ايمه يم، ديووردىم
اوزمان سن، سهو كى يى يالكر بندن او كرنديكىكى، ايلك دفعه بنى سهو ديككى
سويله مە دكى؟

— والله ينه اويله . .

— اونخالده بونلر نه؟ . . بيلميورميسك كه آرامزده كى رابطه يى قيراييله
جك سندن باشقه قوت يوقدر. نه ده اولسه بربرمى سە وميورميسك، نه ده
اولسه بربرمىك اولاجق دكلىدك؟ حال بوكه شمدى سندن صيزاجق اك كوچوك
بريالان هرشيئى آلت اوست ايدر، بنى اولدوره بيلير. بونى دوشونمە دكى؟ .
بربرمىك اولق ايچون بو قدار فدا كارلغه راضى اولويورز، بيك مشكلاته ديديشيورز.
اوك ايچنده آسەن بو هوايه سنك كوزلك اولماسه، آقشاملرى آلمده سنك
الريكى بولماسەم داينا بيليرمى يم ديسك . . . برطرفدن سنده بيك تورلو
اوزونتو ايچنده تە ريبورسك. بونلرك آراسنده آرتق بريالان ذره سى بيله
ياقيشيرمى ايدى، معلا؟. نيچون بندن كيزله ديكك شيلر قالسون؟. اونلرى يارين
مشئوم برتصادفله او كره نوب چيلدير مقدرسه بوكون سندن دويمق، هرشيئى
اونوتوب ساده جه كندى سعادت مىزى دوشونمك داها آي اولمازمى؟ .

معلا، آرتق كوزلري ياشلى:

— برشى دكل، ديووردى، والله برشى يوق. . سنك چوق قيصقانچ

اولديغى بيليورم ، بوقادارنى دە سنى سەۋدىكم ايچون ، بلكە بىدن قاچارىك ديه قورقۇمدىن ساقلام . آكلا تايىم دە باق . . . والله ، دادىك چوقۇقلىق كۈنلەردە بىكارىنى پىك كوچۇك بىر زىغىي اولديغى بىلە چىش ايتەمىشەم . آرامزەدە نە بىر سوز ، نە براىما ، نە بىر كوچۇك حىركىت ، هېچ هېچ بىر شى كېمەدى . يالغىز ارتىق اسويچىرەيە كىدرىكن بىرەدە وداع ايتىك ايچون اوغرايمىشەم ، سادە او كۈن اوندە براز باشقەلىق اولديغى چىش ايتەم ؛ فقط او كۈن بىلە هېچ بىر شى قونۇشمادىق حىتى بىن استانبولە ايتەمىشەم . دۈندىكم زىمان اۈنى دە كىتمەك اوزىرە بولدىم . ارادىن زىمان كېدى . او ارتىق اسويچىرەيە كىتمىشەم . يازدىغى مەكتۇبلەردە بىم ايچون بىغىز تىۋورلەردىن بىخ ايدىيورمىش . تىزەمەك ايكى عائلە آراسىندە مەستەقىل بىر رابطة تاسىس ايتىك آرزۇلەرنى دە ايشە اۈسەرەدە آنەمدىن ايشەم . ايشە بۈ

هېسى ، هېسى بۈ . . .

حالبۇكە فاخرە بىر شى اولمىشەم ؛ آيلەردىن بىر كىدى سوقۇلغانلىغىلە كۈزلىرى قاپالى كېن حىياتىدىن بىردىن بىرە سىيرىش ، آرتىق وحشى خىرچىن بىر رىنگە قىزارمىشەم :

— پىكى ، دىدى . بۈنى شەمىدىيە قادار نىچون ساقلام . بۈندە ساقلام نە چىق نە واردى ؟ . . . اۈيلە ايسە دادىلە بىنى نىچون قارشىلاشدىرىمىق اىستىيوردىك ؟ بوقادارلە قالان بىر شى ايچون تىلاش ايتىك ، قورقۇق هېچەدە طىبى دىكل مەلا ، بىنى چوقۇقلىق ظىن ايدىيورمىك ؟ . . .

آرتىق بۈس بۈتۈن فەنا اولمىشەم . ھەرشىدىن شەبە ايدىيور ، ھەرسۈزى يالان سانيور ، ھەرشىك آلتىدىن كىزەلمىش بىر شى بۈلۈپ چىقارمىق اىستىيوردى . براز سۈسەدى ؛ سۈكرە تىكرار عىبى ، دۈشۈنمەلى :

— ايچىدىن چىقىلماز بىر اۈچۈرۈمە كىردىك مەلا ، دىدى سىنگە بۈيلە شىلەر قونۇشدىغىمىز ايچون اۈتانيورم ، كەندىدىن ايكىرەنىورم . فقط يالان سۈيلە مەسىدىك ، هېچ بىر اۈيلە چىقىدى . بىش آلتى آيدىر برابر ياشيور ، سىندە اۈكرەندىك كە بىن يالاندىن ، يالانچىلەردىن ناسىل قورقۇيورم ، كوچى حاللە بىر بىرەمىزى

يالكز بولايىد يكمىر شو برقاچ ساعت ايچىندە قونوشمق ايچون بو جەنم استىنطا .
 قلرندىن باشقە برشى قالمامشىدى ؟ . اونك ايچون ايستەنم كە باشقە بر كون ،
 باشقە بر ثانيە بوكيرلى حكاىيە عودت ايدەلم ؛ شمدى سويلە ، كس آت . هپسى
 بوقادارمى ؟ باق سكا آند ويريورم ، الكمقدس شيلر اوزدېنە دين ، سعادت
 آنەك ، باباك ، بوتون سەودكلرك ايچون دوغروسنى سويلە يارين دوغاجق
 چوجو غمز اركلك اولورسە دار آغاچىندە ، قىز اولورسە لوٹ وفحش ايچىندە كوردەلم
 يالان سويلەرسەك

معلا خىچقەرە خىچقەرە :

— هپسى بوقادار ، فاخر ديدى هپسى بو

— پكى معلا ، اينامق ايستيورم ، بوكا محتاجم ، مجبورم دقت ايت كە
 يمينمز نە بويوك اونك دهشتنى كوز اوكنە كتيرييورم دە آرتىق سوزلر كەدە
 بريالان ذرەسى صيقىشمش اولماسنە احتمال ويرەميورم . فقط الله كوسترمەسون ،
 يرباشە يالان دها كشف ايدەرسەم ، بيلمم آما ، چيلديريوم سنك يانكەدە
 ايكن كندمدن كچيورم . كوزلرك بنى اويوشدورويور ، بندەكى ركودتك معناسى
 آنجق بو ، معلا . يوقسە هيچدن برشى ايچون عصيله شديكم ، سعادتى بيله
 كندى المله بوغاجق قادار خيرچينلاشديغم ديقه لر اولاييلير . تمنى ايدەلم اونلر
 سنك ايچون مؤبدا مجهول قالسون ايتديكمز يمينك قورقونجلىغنى دوشون ،
 يو آقشام نە ايسترسەك سويلە خاطرە كلەدك بيك تورلو كناهك بيله اولسە
 هر شىئى عفو ايتەيە ، هر شىئى اونوتمايە حاضرم سنى اودرجە سەوييورم
 معلا ، اطرافدن دويولماسون ديه خىچقريقلرينى كوكسنە كومەرك آغليور :

— باشقە هيچ برشى يوق فاخر ، ديوردى . فقط مادام كە يالان سويلەدم
 سندنە بونى طوتدك ، آرتق بن سكا لايق دكلم سنك نظر كەدە بن هر
 زمان ايچون يالانجى قالاجم بونى بيلمم كە اولومدن باشقە نە تميزلەيە بيلير .
 فاخر ، اودورغون روحك آلتندە صانكە مجهول برعالم كيزلەنديكنى ، بعضاً

قیامت لره ییقیلایق قادار هیجانه استعداد اولدیغی او کرشمیدی . شمدی اولوم
لافی دویونجه تیترده دی ؛ یوموشاق ، مشفق برسسله :

— نیچون اوزولویورسک ، کوزوم ؛ دیدی . مادام که آکلاتدیغک بوتون
بوشیلرده سنک کناهک یوقدر ؛ مادام که سنکه مؤبدآ بربرمزک اولمایه یمین
ایتدک . آرتق اوزوله جک نه وار ؟ . الویریرکه بوندن صو کرا قلبکده کیزلی بر
کوشه قالمش اولماسون . . .

— خاییر فاخر . . سنک کوزکده بو قادار دوشدکدن ، کوچولدکدن
صو کرا یاشانیرمی ؟ . . بردقیقه بیله . .

— جانم بونی ده نردن چیقارییورسک ، نه دن بنم کوزمدن دوشدیککه
حکم ایدیورسک ؟ .

— بن بلیورم ، سنک نه قادار چابوق قیرلیدیغکی ، حکملریکی نه چابوق
ده کیشدیردیکی بلیورم . اونک ایچویاشامام بن آرتق . . .

فاخر اونده کی قوتلی اراده نک تظاهراتنی ، عزت نفس فورانلرینی چوق
دفعه یاقیندن کورمش ، او کرشمیدی . معالایمیه جغی بر شیئی سویله مزیدی ؛
یاپاجغنی ده شمیدین سویله مسی ایچون قرارینک پک قوتلی اولماسی لازمدی .
حال بو که ایچنده کنندینه عائد هیچ برکناه اولمایان اوفاجق برحکایه بی یاد
ایدرکن اونک بویله چیلغین برحسه قاپیلوب ده فاجعه لره دوغرو یورومسی بوتون
سعادت امیدلرینی ، هرشیئی ، هرشیئی بتیره جکدی . اونی غائب ایتدکدن
صو کره کنندیس ایچون ده یاشامق احتمالی یوقدی . بوتون بونلری بر آن
ایچنده دوشوندی ؛ نتیجه نک وخامتندن چوق قورقدی . معلانک کوز یاشلرینی
بوسه لره سیلمه یه چالیشه رق :

— بو اولوم لافلرینه نه لزوم وار ؟ . . دیدی . صو کرا برآزده لطیفه

رنکی قاریشدیرمق ایچون :

— هانیا بعض قاقاچو جوقلر واردر ، ایکیده برده بکابیک آمازسه ک کندمی

قويويه آتارم ، شويله اولورسه نچرهدن آتلارم ديه ياپماجق ياپارلر . هيچ سكا ده اونلر كي اولومدن بحث ايتك ياقيشيرمي ، كوزم ؟ . . .
معلا آجي آجي كولدي :

— سن بني اونلردن مي صانيورسك ؟ . . ذاتا بيليورم ، بني سن هيچ آكلامادك .

بو بحث آرتيق تهلكه لي بررنكه كيرمشدي . اوزادقچه هرايكيسنه ده چيلغينلق حسلري ويريور ، هر سوزدن صوكر آرالرنده يكي برياره آچيليوردي . فاخر :
— سن اولورسك بن نه يپارم ؟ . ديه تكرار يالواردي .

— اوح ، بني اونوتورسك فاخر ، هم ده پك قولاي بوكا هيچ شبهه يوق . بن ذاتا سني اوزونتودن قورتارمق اچون اولك ايستيورم
اوزمان معلانك رقيق نقطه لرينه دو قونمق ، بو محوم تصورلردن بلكه بويله واز كچيره بيلمك اچون :

— اويله ظن ايدييورسك آما ، ديدى سن اولدك ، بني ده كويا قورتاردك ديه لم فقط بوا تحارك سبيني صورمازلرمي ؟ . اوزمان دوشون بن نه اولورم ؛ سني غائب ايدنجه اوغرايه جغم فلا كته اينانميورسك ، باري كنديكه قصد ايتمكه بگاده ايدجك فالني دوشون

— مراق ايمه ، آرقامدن سكا برشي كله مه سي اچون لازم كلن شيئي ده يپارم ! . . .

معلانك بوسوزي بوس بوتون آجيدى . فاخر اونك كنديسني ايلريده كل بر وضعيته دوشوره بيلمسي قابل اولان اكاوفاق حر كتن بيله اجتناب ايدجك قادار قوتله سه وديكني بيلديكي اچون بويله سويله مش ايدى . حال بوكه معلا عجبا اوني بر قورقاقى صانيوردي . آرتيق نه سويله جكني شاشيرمش ، بو سفرده اوني قورقوتمقلا بر فلا كتك اوكنه كچه بيله جكني دوشوندي :

— شمدى قالقار تكميل اوى اويانديريرم ديدى . سن ده بوراده سك ، ايسته رميسك كيجه ياريسي خدمتچيلره قارشى كوچوك دوشه لم ؟ اك معقول

طرزده سنی آنه کدن ایسته مک ایچون بیله قورقارکن شمدی آنسزین یاپاجمنز
اعترافات نه فجیع نتیجه لر ویره بیلیر ! . . . یوقسه سوز ویرکه خاطرکه بویله
چو جوقلقلر کتیرمیه جکسک، هرشیئی اونوتاجقسک؛ صانکه بو مشئوم کیجه یی
یاشامادق . آرتیق هیچ برشی چمه مس کی ساکن اولاجقسک . .

— قابلی فاخر، هرشیئی اونوتیق . . . بن اونوتمایه چالیم یاسن،
بلکه بوتون حیاتمده بونی یوزمه چارپاجقسک؟ آرتیق بزم ایچون حضور،
سعادت غائب اولدی، . . هم کیم بیلیر، بلکه ده بنی براقوب کیدیرسک . .
سس چیقارما مقلغمی ده بونک ایچون ایستیورسک دگلی؟ . اوزمان ذاتاً بن سکا
لائق دگم، یوزم یوق که بنی براقدکده نره یه کیدیورسک، دیه بیله ییم ! . .
ایسیمی بن اوله لی ییم ! .

فاخر بواتهاملره قارشى قودوردی. معلا اونى بو قادار آچاقى صانیوردی:
— یازیق . . دیدی سنی براقوب کیتمک او یله می؟ . خایریا وروم، صبرایت،
صبح اولسون؛ چونکه شمدی مناسبت آماز، آنهک خسته، بابا که حرمت
وار، فقط صبح اولسون سنی آنه کدن رسماً ایسته یه جکم . . شمدی یه قادار
یه قاتلاندمسه، حتی ایچلرینه بنی اولاد دیه آلان عائله یه قارشى ال بویوک کناهی
بیله کوزه آلدسه بونلر، سن ده بیلیرسک که، هپ سکا مالک اولمق، هرشیئه
رغماً بربرمزدن آیریلماق ایچوندى . ویردیکم سوزی اونوتورمی ییم، صاندک؟ .
عفو ایدرسک معلا، مکر سن ده بنی هیچ طانیامامشسک ! . .

معلا، ایچندن فیرطنه لرله قوپوب بوغازینه قادار یوکسه لن حنیق قریقلری
هپ اوراده دوکومله مه یه چالیشیوردی . برآراق ککه له دی :

— یارین آنه مه می سویایه جکسک، آرتق بیلمیورم، بونک وقتى کلدیمی
کله دی می؟ سن نه ایسترسهک او یله یاپ . . . بوندن صو کرا یاشاسه م بیله
حیات بندن قاچاجق . . .

— آدم سن ده، ناصل اولسه هرشی آکلاشیله جق . . ذاتاً خامنهک،
دادک؛ یکانه هپسی بیلور . اولکی صبح سکا وداع ایچون اودا که کلدیکم

زمان باباك مردیون باشند ایتش ؛ هر حالده اوده شبهه یه دوشدی . ذاتا کونك
برنده میدان چقاجق ؛ ایسمی

* * *

جمعه ایدی ؛ فاخر مطبعه یه کیتمزسه اوزون اوزون او یوردی . دون کیجه کی
یورادن صو کرا معلا یی اولدجه تسکین ایتش ؛ فقط اویقو صباحه قادار
کوزلرینه دشمن اولمشدی . ایرکندن اوطه سندن چیقدی . بویوک خانم
نماز قیلیور ، دادی صوبایی یاقیوردی . محی الدین بکی بر خسته یه چاغیر مشلر ،
فخامت خانم داها قالمامشدی . معلا ده کلدی . بر ساعت قادار یالکز
قالدیلر . فاخر صانکه دون کیجه یی اونو تمش کبی نشئه لی ، ساکندی .
معلا ده بر آز کندینه کلشدی . فقط اودایه بر یابانچی کیرسه بو ایکی رنکسر
سیماده انسانه اولومی خاطر لاته جق بر معنا اوقور ؛ بو چوکمش ، سونوک
کوزلرک بوتون کیجه اویقو یرینه یاشله دولدیغنی پک قولای آ کلاردی .
صو کرا فخامت خانم ده قالقدی . سالونه ایندی . بر طرفدن :

— بو اودونلرده هیچ طوتوشمیور .. هپ یاش .. بزم بکک آلدیغنی شی
ذاتاً بو قادار اولور ! .. دیه صوبایی قاریش دیریر کن بر طرفندن ده فاخرده کی
ده کیشکلکی همان حس ایتش کبی :

— خسته میسکز ، نه کز وار ؟ . دیه صوزو یوردی . فقط کندیسی
بو کون مستتا اولارق بر آز دها نشئه لی کورونویور ، کولر یوزله هوائی
شیلردن بحث ایدیوردی . فاخر عادتاً بوندن قوت آلیر کبی اولدی . صانکه
اوده او یله آفاقی شیلردن بحث ایدر کن صو کره صو کره سوزی اونلره قارش
بسله دیکی حرمته ، دویدیغنی منتدارلقلره کتیردی . معلا ایسه بوتون بوسوزلرک
نرمه یه وارده جغنی حساب ایتش ، آرتیق دیشاری یه چیقمشدی . اوته کی ، هیچ
آلشهادیغنی حالده اوزون اوزون مقدمه لریا پارق سوزی دولاشدیریور ، ساده جه
او مربوطیتک قوتنی آکلاتمق ایستر کبی هپ او نقطه یه کلیوردی . نهایت دون

کېجه کی حما ائناسنده ویردکلی قراری نه اولورسه اولسون یرینه کتیرمش اولق ایچون کوزلرینی قاپادی :

— ایشته بویله دیزیکزک دینده مست و مربوط یاشارکن ، دیدی ، سزدن هیچ برشی ایسته مه یه یوزم یوق خانم افندی . ساده سزی اینجتمش اولمقدن ، بو اییلکله لایق اولامقدن پک قورقویورم . ذاتاً بوندن باشقه ، بکا ابدال ایتدیککز بو شفقتدن باشقه داها نه ایستیه بیلیرم ؟ فقط بو شفقتک مسافری ، بو نوازشک آراده بر هدفی اولمقدن ایسه اوکا ، بوس بوتون صاحب اولق امللرینی ده عقلمدن کچیردیکم اولدی . بوکا شمار یقلق دیککز ، نه دیرسه کز دیککز بن بو لایق اولمدیغم شفقتی ، نوازشی مؤبداً بنمسه مک آرزولرینه ده دوشدم . نهایت شمدی اورته ده برشی ، یاشایان ، بویون برشی وارکه اونی صاقلامقله یکی برکنه ایشله دیکمی آکلیورم .

فیخامت خانم اندیشه لی بر باقیشله دیکلیور ، آراده بر بحثی قایتمق ایسترکی کورونسه فاخر تکرار رجا ایدهرک صوکنه قدار آکلاتمق ایستیوردی . بردقیقه کلدی که بوتون او شمدی یه قدار صاقلانان حقیقتدن محی الدین شوقی بکک بيله یاواش یاواش شبهه ایتمه باشلادیغنی سویله دی .

اوته کی براز تلاشلی ، فقط صانکله هیچ اهمیت ویرمک ایسته میور کی : — پکی آما فاخر بک ، دیدی اورته ده نه وارکه . . محی الدینک شبهه یه دوشمه سنه نه باقیورسکز ، اوزاتاً نه یاپدیغنی بیلمز . . هم آکلامیورم ، نه دیمک ایسته یورسکز ؟ . . کیزله نه جک ، کیزله نیمه جک نه اولابیلیر ؟

— والله خانم افندی . . بیلیم که ناصل سویله یه یم . توجهکزک بوقاداری بيله پک فضلله ایکن داها باشقه برشی ایسته مه یه یوزم یوق ، دیدم . هله اوزون زماندن بری بنی بسله ین رؤیانک حقیقت اولماسنه احتمال که هیچ لایق دیکم . اونک ایچون ایستردم که اولابن هرشیئی حاضر لامش اولایم ، اوکاسعادت ، رفاه تأمین ایدهرک بریووا یاپایم . صوکر اکلوب سزک آللریکزی اوپهرک بو حقیقتلری سویله یم ؛ بزه آرتق مشترک برآنه اولماکزی رجا ایدیم . .

— شمدی آکلایورم فاخر بک ، فقط بونلر هپ چوجوقلق . . هپسی کچر ، هپسی اونوتولور .

فاخر بو حقیقتک اویله چوجوقلق اولدیغنی ، هیچده اونوتولوب کچه میه جکنی سویله دی ؛ معلایله بر برندن آریلیرلر سه ایکی سنک ده یاشایه میه جکنی آکلاتمق ایسته دی . صو کرا اوزون اوزون یالواردی . فخامت خانم ، هر سوزک اورتا- سنده اونی دور دوریور ، اعتراض ایتک ایستیور ؛ فقط اوته کی یکیدن باشلیور : — نه اولور ، دیوردی . بوتیز حائله حیاتی ایچنده بزه مشترک بر آنه اولسه کز

اوزمان مستقبل قاین آنا ، آرتیق تحمل ایده مه مش کی برندن فیرلادی . هیچ دیکله مک ایسته میوردی . کچن شو آلتی آیدن فضله زمان ظرفنده کوزلرینک بوقادار غضبله ، بوقادار وحشته فاخره چه وریلدیکی اولماشدی . عصبی ، خیر چین ، قیصیق برسسله :

— پکی آما ، دیدی دوشونمه دیکزمی که ، بوکاهیچ امکان یوقدر ؛ دوشونمه- دیکزمی که معلانک سزه وارماسی قابل دکدر ؟ صو کرا هیجانله قاپییه دوغرو یوردی :

— معلای ! معلای ! .. دیه سسله ندی . حالا قیزینک ناصل اولسه اونی ایسته- میه جکنی ظن ایدیور ؛ بوتون بوسوزلری ساده جه فاخرک کندی آرزولرندن عبارت کی اهمیتسنز کورمه یه چالیشیوردی . پارا ایچون ، سلطنت ایچون معلایه ویردیکی درسارک بوقادار چابوق اونوتولابیله جکنی برتورلو عقلی آلیوردی صو کرا فاخره دونه رک :

— بزی براز یالکیز براقکز ، دیدی . معلانک بایسلاجق کی ساللانان خیالی اوکندن کچرکن فاخر صوفایه چیقدی . کوزلری بر برینی بولدیغنی زمان قیز جغز سانکه : — آمان بنی یالکیز براقما ، بورادن آریلما . . . دیمک ایستیور ؛ اورایه دوشوب بوس بوتون کندنن کچه مک ایچون طوتوناجق یر آریوردی . قاپی

بوتیرهین ، ئهریهن خیالی یوتدقن صوکر شتله قاپاندی .
 فخامت خانمك بویه بر رابطهیه ناصل اولسه معارض اولاجنی محققدی .
 ساده آراده بوش بر امیده قاپیلقلری اولویور ، اکیسی ایچونده بوقادار ائی
 بوقادار نازك کورون بوقادیندن هرتورلو مناقشه ومقاومت دقیقه لرند بیه پك
 خشونت بکه میورلردی . حال بوکه دمیکی صحنه آرتیق هیچ برامیدی یاشاتمه .
 جق قادار همالی اولمشدی . فاخر ، پرهیجان صوفاده دولاشیرکن ایچریدن
 عکس ایدن سسلر اولا آکلاشیلیمیه جق قادار مهمدی . فقط کیت کیده معلانك
 خنچقیریلری ، آنه سنك چیغلقلری دیشاریدن بیه دویولمهیه باشلادی .
 فخامت خانم :

— بوزمانه قادار دوردك دوردكده بونی می بولدك ؟ دیه سسنك بوتون
 قوتیه باغیریوردی . اطرافده بو قادار زنکین انسان وار ؛ یاپاجقدك ، باری
 اولردن بریه یاپایدك ! . . . فاخر ، هرشیئی دوشونمش ، هپسنه مقاومت
 اتمهیی کوزه آلمشدی ؛ لکن بر آنانك قیزینه قارشى بونی سویلهیه بیه جکی کیمك
 خاطرینه کلیردی ؟ . مبعجلك فخامت خانم ایچون سویلدکلرینه برتورلو اینانماز ، بوایی
 یورکلی قادینك اوقادار کوچوله بیه جکنی عقلی آمازکن شمدی کندی قولاغیلانه لر
 دویویوردی ؛ بوغولور کبی باغچه قاپیسنی آچدی ؛ تام اوصردهه اوک کوشه
 سندن محی الدین شوقی بكدده دونویوردی . تکرار قاپی یی قاپادی ؛ فخامت
 خانمله قیزینك اولدینی اودایه کیردی . قوزی برسسه :

— دوقتوربك کلیور ، دیدی . مسئله یی کندیسنه طبعی آکلاته جغز . فقط
 کلیر کیز سویله یوبده کورولتو چیقارمقده معنا یوقدر صانیرم . بویوک خانم
 دادی ، یکانه ، هپسی متأثر ، هپسی ، متأذی ، براودایه طویلانمشار نه اوله جغنی
 بکلیورلردی محی الدین بك قاپیدن کیررکن صانکه چوق برایش کورمش ده یورولش
 کبی هرزمان پك سینیرلی اولور ، آنجق بر آز آهلادقن ، اوفلادقن صوکرالاف
 اتمهیه باشلاردی . فخامت خانم همان قوشدی ، اونی معاینه اوداسنه چکه رک قاپی یی
 قاپادی . بویوک خانم ، دادی ، یکانه هپسی :

— آ، والله، دىيورلردى خانم عنادىنە ياپيور، مخصوص بىكە بردن بىرە
سويلەيۈب دە يۈرە كىنە ايندىرمىك ايجون . . . اوك ايجندە ھەرسە دوشمان، آيول!
ايجرىدن يالكنز فىخامت خانمىك قىيىلىمش سى دويولويوردى . صوكر
صوكر قارشىلىقلى فىيىلىتىلر ايشىدىلدى . نھايت مىھى الدىن شوقى بىكك :

— آمان فىخامت، نەسويليورسك؟ . . . دىيە باغىردىغىنى صوفادىن دويىدىلر.
آياق سىلرى، تىختەلرك غىيجىردىسى زواللى اخىتارك ھىجانلە دولاشدىغىنى افشا
ايدىيوردى . صوكر معلايى دە چاغىردىلر؛ ھەپ برابر يوقارى يە چىقىدىلر . فاخر
بونىك بويلە اوزاماسنە، ھەلە معلايە بوقادار فضىلە شىلر صورولماسنە پىك طوتولويور:
— آرتق نە اولاجقسە برآن اول اولسون . . . دىيە دوداقلرىنى قاناتيوردى

اوقادارلە دە قالمادى؛ فىخامت خانم، بونى تعمىر ايتەنك، قاپاتمانىك چاردىسى
يوقى دىيە مەئادىا چىرپىنمايە باشلامىشدى . مادە بوقابل اولسەيدى ھەمان فاخرى
اودن اوزقلاشدىرمىق اونىك عىقنچە ھەرشى دوزەلتەيە كافى كەلەجىكى . نھايت معلا
خالىنىك اوستىندە بايغىن، خىچقىرىقلر، كوزياشلىرى آراسىندە ھەرقىتقى اعتراف
ايتدىكى خالە بىلە اوتە كىلرك برتورلو بوكا اينامىق ايسىتەمىھەرك دھا مادى وثىقە
آراملىرى ھېسندىن چىركىن برىخنە اولدى! . . . بويلە، اك صوئوق قانلى، اك
كەوشك روىلى انسانى بىلە چىلدىر تەماسى پىك قابىل اولان خاللىرى كوردىكە فاخر
بوتون سعادىتى چىكەنەيەجىك، كوزلرىنى قاپايوب خاطرە كىز چىلغىنلقلر ياپاجق كى
كىندىن كىيوردى . معلايە ماللىك اولمىق ايجون ھەرشىئى كوزە آلمىش؛ كورەجىكى
خىشونتە، دوياجىنى حقارتلرە ھەپ حاضەر لانىمىشدى . يالكنز اك خىشىن حقارتلر بىلە
قىزلىرىنى سەۋەن شەرفلى بر آنا بابايە لائق اولاجق قادار كىبارجە اولمالى دىگىدى؟
كاشكى مىھى الدىن بىك اونىك بوغازىنە سارىلسەيدى، فىخامت خانم دىدىكى كى
قالدىروب صراحىي قىفاسنە وورسەيدى؛ ھەپ بر آرايە طوپلانوب اونى اولدور-
سەلردى! حال بو كە اونلر خىدمەتچىلرك او كىندە، بىشىك قومشولرە دويوراجق
قادار يوكسىك سىلرلە نەلر سويلەدىلر، نەلر دوشوندىلر، نەلر آرادىلر . اصل
فجاعت ايشىتە ھەپ بورادە ايدى .

بوتون کون بحران ایچنده کچدی . فخامت خانم کری دونمک ، ظواهری قورتارمق ایچون بر چاره بولامایچه بر قولتوقده صومورتارق کندندن کچمش ساده آراده بر :

— وفا بکک ، چفتلکلرندن آیده درت یوزلیرا کلیری وارکن قیزی اوکابیله ویرمه مشدک ! . . . آه کاشکی بیلسه یدم . . . دیه خوموردانیوردی . معلا صوفاده بایلمش قالمشدی . او کورولتونک اورتاسنده ینه الکچابوق کندینی طوپلایان محی الدین شوقی بک اولدی . بو ، ذاتا چوق وجدانلی ، چوق ناموسلو بر آدامدی . فاخری سهوهر ، پک بکنیر ، هله باباسنی هر وسیله ده خاطرلار ، محبتله ، حرمتله یاد ایدوردی ؛ او یله ایکن قاریسنه قاچ دفعه سویله مشدی که ایکی کنجک بر آراده یاشاماسی هر حالده تهلکه لیدر ؛ نه قادار فضیلتلی اولورسه اولسون ینه کنجدرلر ، هیچانه چابوق قاپیلرلر . و ، سویله دجکه فخامت خانم اصرار ایتمشدی ؛ قوجا-سنه عناد ایتمکن او یله بر ذوق دویویوردی که . . . آرتیق بر دفعه : « هیچ برشی اولماز » دیه ویردیکی حکم آغزندن چیقمش بولوندیغی ایچون قیزینه ده هپ او صورتله تلقینلر یاپیور ؛ مثلاً قائن آناسی صافدرونقله اورتایه بویله بر لاف آتدیغی زمان اک زیاده بونک ایچون کوپورویوردی .

بلکه شمدی بوتون اصرارلرینک سببی ده هپ کندی ادعاسنک یا کلش چیقدیغی کورمک ، بونده کی مسئولیتک ینه کندیسنه توجه ایده جکنی حس ایتمکن عبارتدی . آرتق قوجاسی ، هله قائن آناسی اوکا : « بز سکا دیمه دکمی ؟ . . » دیه جکلردی . اونی دیدیرمه مک ایچون ده حالا قورتولوش یوللری آرییوردی . بر کره :

— بن قیزی زنکین بر آدامه ویرمه جکم . . . دیمشدی . بو ادعاسنی یرینه کتیرمک ایچون هر شیئی ، حتی قیزینک فلا کتنی بیله کوزه آله جقدی . فقط محی الدین شوق بک ، بوتون فباحتی قاریسنی کورکلره ، انجیلره بوغامامقدن عبارت اولان بو تمیز یوره کلی ، ساکن وجدانلی آدام نهایت بو

سفرده فاخرله معلايى چاغيرتدى . اولا اوزون اوزون صوصدى ، صوگرا
ككه ليه رك ديدى كه :

— بوبله بر شى اولمامليدى ؛ اولش ... بن سكا اولاد نظريه باقيوردم ،
فاخر ... سندن داها شرفلى بر حركت بكلردم . آرا كزده بويله بر رابطه نك
دوغديغنى حس ايتديككز دقيقه ده كلوب هر شيدن اول بنمله قونوشمايدك .
بو مقدمه يي ديكلكر كن فاخر ، اچندن آجى آجى كولويوردى . اورته ده
اك بارز بر حقيقت اولديغى حالده كرى دونمك اچون بوقادار چيرنمشلردى ؛
يا اونك سويله ديكي كې بر قاچ آى اول سكونتله هپسك آلنى اوپهرك قيزلرني
ايسته سويدى عجباً راضى اولورلرميدى ؟ ذاتاً صاحلين ايلك سوزه باشلايدىغى
زمان اوده اويله يامامشميدى ؟ بزه بر آنه اولكز ، ديه آزى
يالوارمشدى ؟ اك چيركين سؤالرله قيزجغزى خيرپالايانلر ، اك محرم تفرعاه
قادر تفصيلات آرايانلر هپ كنديلرى دكليدى ؟ . بوتون بونلرى آرار
صوراركن ايسته دكلرى شيك ساده جه بر قاچامق يولى بولوب بوتون مسئله يي
قاچاتمق ، اونلرى مؤبداً بر برندن آيرمق اولديغى ميدانده ايدى . اويله ايكن
شمدي قالمشلر ، اصوللردن ، قاعده لردن بحث ايديورلردى . كنديلرينك ده
شبهه سز يك بويوك بر كناهى واردى . فقط بو كناهى كوزه آلمقده حق سز -
ميديلر ؟ . اونلر بو قدر صوروب آراماسه لر ، اويله ديدكلرى كې هر شيى
سكونتله حل ايتك ايسته سه لر بو كناهده شبهه سز مؤبداً كيزلى قالاچقدى .
يوقسه بونى كيم ميدانه چيقارمشدى ؟ . فخرامت خانم قيزنى اودايه چكرچكمز :
— شمدى فاخرى قوودم ، همان بو كون بورادن كيده جك .. ديمش ،
او زمان معلاده آغلامايه باشلايجه هر حقيقت آكلاشلمشدى . اويله ايسه
داها شرفلى حركت ديدكلرى عجباً ناصل اولمايدى ؟ فقط آرتيق سسنى
چيقارمادى ؛ باشى او كنده ، ديكليوردى . محى الدين شوقى بك :

— مادام كه ، ديدى . بويله بر حادثه نك او كنه كچمك قابل اولاماشدر ؛
سندده ناموسلو بر اركك صفتيله كندينه دوشن وظيفه يي ياپارسك و امينم كه

بونی ادراك ایدیورسك . نه یاپالم قسمت بویله ایمش ؛ واقعا بو یاشده اوله نمك
هنوز موسمسزدر . فقط دها اییسنی بولاجق دکلزیا ، سنی ده ناموسلو بر
چوجوق دیه طانیدق ؛ چاقین دکلسك ، اخلاقسز دکلسك .. بوندن صوکراده
اوستکه دوشن وظیفه یی دوشونور، اوکا کوره چالیشیرسك اوغلوم ...

صباحدن بری قلبی قیران بو قدر شی کچدیکی حالده فاخر ، ینه محی الدین
بکک سوزلرندن متأثر اولدی . محقق که شو آدمک پک محترم ، پک مبارک بر
قلبی واردی . قاریسنه قالسه :

— اولسون کندی المله ییقایوب کومه یم ، دیوردی . فقط قیزی بو
اوغلانه ویرمیه جکم .

یالکز محی الدین بکک فاخری وظیفه یه دعوت ایتسی تحفدی . صانکه بر
قضا اولمشده اوئی تعمیردن بلکه چکینیردی قورقویورلر کی ایدی . حال بوکه
اونلر بوتون بونلره نیچون قاتلانمشلردی ؛ هر شیئی کوزه آدییران ساده جه
بر برندن آیریلق قورقوسی دکلیدی ؛ محی الدین بک نهایت قیزینه دونوب دیدی که :
— سن ده آرتیق فاخری کندیکه حیاته بر آش دیه طانیرسك . بوندن
بویله شرفک ، ناموسك هپ اوکا هئددر . هایدی آرتیق ایکیگزده آنه کزک
آلی اوپوکز . او، سزی عفوایتسون ؛ سزده آلی بر اولاد اولمایه چالیشکز ...
زوواللی بابا ، ناموسلو بر آدمک بولاجنی اک کسیرمه یوللردن مسئله یی
حل ایتک ایستوردی . صوکر بر آراق :

— آرتیق ، دیدی ، بو ازدواج تصویرینی شمیدین اعلان ایدرز ؛ ذاتاً
بکا قالیرسه بو ایشی پک اوزاتمقده دوغرو دکل ، چابوجاق بیترویرملی یز .
او زمان فخامت خانم یکیدن کوپورویور :

— ناصل اولور ، دیوردی . حاله قارشى دوکون یایمق ایچون پارا
ایستهر ، مصرف ایستهر ...
قوجاسی :

— آجانم ، دیدی . شمدی ساده جه نکاحی یاپارز ، بو فلاکت سنه لرنده چالغیلی چنکیلی دو کون موداسی قالدیمی یا ؟ ..

— رذالتمی بو؟. هانی یوز کورو ملکی، هانی اوطه دوشه مه سی، هانی .. بو هانلرک صوکی کلیوردی . قادینجغز ، پارا ایچون تکمیل هویتنی دکیشدیریور ، هاله کوستریش یایمق هوسيله کندندن کچوردی . دوروب دوروب : « هرکس یوز کورو ملکی نه طاقدیلر ، ديه سوراجق ! یا اوزمان نه یاپاجغز ؟ .. » فریاديله قولتوغندن فیرلیور ، آياقلىرىنىڭ اوجنه سورونه رك صوقولان پاموقه بر تكمه وورمقله صانكه خفيظه مه يه چالیشیوردی .

فاخر ، صباحلىن اودن چيقاركن معلانك اوطه قايسى قاپالیدی . آچوب باقمايه جسارت ایدمه دی . فقط بوتون كونی چوق اندیشه لی کچیردی . دون کیجه اونى ياتاغنده بايغین ، خسته بر اقمشدى ؛ کیم بیلیر شمدی ده نه حالدہ ایدی ؟ بر طرفدن ، بو اوزونتو ایچنده سهوینجه ده یر قالیور : « آرتیق قورتولدق ! » ديه دریندن ده رینه بر حظ دویویوردی . اك قورقدقلى شی اولمش بیتمش ، نه ده اولسه اونلرک بوتون ایستدکلرینی اوته کیلرده اساس اعتباريله قبول ایتمشدی . ساده فخامت خانمك خيرچينلقلری ، آراده کچن باياغی صحنه لر ، چیرکین سوزلر اونوتولور کبی دکلدی . قاچ دفعه اوکا :

— عرض دشمنی ! .. ديه باغيرمشدی . معلايه مالک اولمق ایچون ، چاره سز هر شیئه قاتلانہ جقدی ؛ بونلری هیچ ایشیتمیور کبی کورونمك هپسندن آیسیدی . ذاتاً او خسته قادینی یوموشاتمق پك ده کوچ اولمیه جقدی : — بر قاچ قوطوشکرله ، هر آقشام کلیرکن جیجیلی ییجیلی اوافق تفك ..

ينه بندن ایسی یوقدر !.

بو پك بسیط چاره یی دوشوندکجه آجی آجی کوله رك باشنی صاللا یوردی . مطبعه يه کلدیکی زمان مادام « سه رژین » دن بر مکتوب بولدی . ظرفی

آچار کن : « نه تجف ، ديوردی . صانکه عنادينه کبی !... » بو قادینک بر نظرينه نائليت بر چوقلری ایچون صانکه اولاشیلماز ، ایریشیلمز بر سعادت تلقی ایدیلیرکن ، کندیسى بيله زمانده اوکا مثلاً بر قیر کز مه سنی قبول ایتدیرمک ایچون سنه لرجه اوغراشمش ، اوغراشدیغی ایچون بونی ایسته مش ایکن شمدی اوست اوسته مکتوب یاغدی رmq صره سی اوکا گلشدی . بو زمانه قادار آرالرنده هیچ برشی یوقدی . فاخر آرتیق اونک مکتوبلرندن هیچ برینه جواب ده ویرمیوردی . اويله ایکن صانکه بو متعظم ، ایریشیلمز قادین هویتک بوتون ضعفی افشا ایدیوردی .

سه رژیندن فاخره :

لطف و مغفرت سنه سنده یاغمورلو آیک یدنجی کونی
اوغرا دیغمز ادبارک سبینی او کره نه بیلیرمی یز بک افندی ؟ .. ناصل
اولدی ده بردن بره کوزیکزدن دوشدک ؟ ..
سزه پایانسز بر مسافر پرورلکه قوجاغنی آچان مسعود کوی ، شبهه سز ،
حساسیتکزی پک فضله یوموشاتمش اولاجق ؛ سزده نهایت طلسملری بوزان
بر تبسمه اوزون مدت لاقید قالامادیکز دکلی ؟ .
تبریکلر مز ، بک افندی ؛ امید ایدلم که انتخابده آلدانمادیکز و رؤیالریکن
نهایت حقیقت اولدی ؛ همده خولیالردن داهاپارلاق بر حقیقت ... بیلیرسکنز که
بز هر زماق ایچون « صاغلنکزه دعاچی یز » ..
اینانیکنز که قارلی بر کونده ، هر طرف بم بیاض ، لوش و صیجاق بر
اودا وؤیاسنی بر زمانلر پک جاذب بولان بر دوستک بو کوئکی سعادتتی
دویمق بزلی ده سهویندیریر ... نه چاره باشقه باشقه زمانلر ، باشقه باشقه
رؤیالر ، ایشته عصرک فلسفه سی بو .

ساده ، بر انکساره اوغرامامایه دقت ایدیکز ؛ چونکه کوز آلیجی بر
عدمه نک آرقاسنده تماشا ایدیلن بوتون بو شیلرده ، مظفریت و موفقیتدن

مست اولانلری — سر سملک دیمه یمده — ساده دلك یوزندن همان بر آز
صو کرا نومیدی یه اوغراتان کوشه لر کیزلیدر .

« ان شاء الله » بویله سی باشکزه کلز !..

سزی هر زمان مسعود کورمک تمنیسیله ، اوزاقدن بز لر ، موفقیتکزک
طالعسر بر سیرجیسی قالالم ، بک افندی ..

تورکجه یی ده بک طاتلی قونوشان سهرزین « صاغلغکزه دعاجی » « ان شالله »
کبی کله لری لاتین حرفلریله عیناً یازمشدی .

کنج غزته جینک حیاتی آلت اوست ایدن صوک وقعهلردن اونک دکل ،
هیچ کیمسه نک خبری اولماسنه امکان یوقدی . اویله ایسه فاخرک قانایان یرلرینه
بوقادار اصابته دوقونان بونه قوتلی برحس قبل الوقوعدی !

تا اوزاقدن ، هیچ بیلمدیکی کورمه دیکی شیلری بیله کشف ایدن قادین
قلبرینک کرامته بکزه ین انسیاقدن زیاده بو ، ساده جه حیاتک هر کونکی تجلیسی ده
عدا ولنه بیلردی . بوتون خولیا پرست قلبر ایچون انکسار ، بک طبیعی برعاقبت دکلیدی ؟ .
قلب کوزیله کورولن بوتون رؤیالر اک اول طاتلی براویوشقلق ویریر کن انسان ،
هپسنگ صوکنده صارصینتیلرله اویانمازمیدی ؟ . سهرژین ده چوق آجی چکمش ،
چوق کورمش برقادین ، حیاتی هپ کندی تجربه لرینه کوره تحلیل ایدیور ،
هیچ اولمازسه فاخرک عینی آلدانیشده اوغراماماسنی تمنی ایدر کبی کورونویوردی .
ساده ، اونک باشنه کلن ، یاخود شیمدی یه قدر کله مشسه کونک برنده — اوتفلسفه
نظراً — مطلقا کلوب چاتاجق فلاکتلرله ، کندی اوغرا دینی اهللک ده انتقامی
آلنه جقمش کبی خائن بر اداسی واردی . فقط نه اولورسه اولسون
دنیانک اک اومولیان حادثه لری بیله بر آرایه طوپلانسه فاخر ایچون آرتیق هیچ
برینی دوشونمک قابل دکلیدی . مکتوبک اسلوبی ، اونکله اینجه دن اینجه یه کله نن
ایمالری بک خوشنه کیتمکه برابر نه کوزنده نه کوکلنده معلانک ، شو دقیقه ده
کیم بیلیر یالکز باشنه نه قادار عذاب چکن سه وکیلینک خیالندن باشقه برشیئه
یر یوقدی .

بوتون كون كندنده ايش كوره جك قوت بولامادی . آقشام اوزرى
دوركن اونك دوندبرى هيچ برشى يه مەمش اولاجغنى دوشونەرك پك سەودىكى
« پى فور » لردن برقوطلۇ آلدى ؛ پاردە سوسنك آلتندە كىم سەيە كوسترە مەيە
چالیشەرق اۋە كلدی .

دون هرشى قرارلاشدیریش ايكن فخامت خانم ، بوكون خدمتچیلردن
بويوك خانمە قادار هېسنى تکرار تکرار استنطاق ايدرك اۋ اېچندەكى
ماتمی تازه له مشدی . معلا اوداسندن چىقمق ايستە مەمش ، آنەسى كىتمش
كلش ، اوکا حقارت ایتش ، اك چیرکین کله لرله ، اك مشئوم انكسارلرله
باغیر مشدی . آرتیق اصل اوزولدىكى شىلرى دە هيچ صاقلاميور :

— سنك يوزندن بر آزارحت ایدە جكم ، ديوردی ، دوردك دوردك دە
بونى مى بولدك ؟

فاخر ، معلايى كورمك اېچون دە كوچلك چكدی . كوچوك خانمە ايكيى ،
صاقين يالكز قالب قونوشماسينلر ديه خدمتچیلرە تنيه ايدلش ، اودا قاپیلری
قاپانمشدی .

آلدينى امرى ، دادى كنديسنه سويلەدىكى زمان فاخر ، آرتیق بوهر دقيقه
آرتان معاسزلقلرى كوره كوره بيقمش كې سادە باشنى سيلكوب دوغرو
يوقارى چيقدى . معلانك اوداسنه كېرنجه اونى پك پريشان بولدى . قرق سكر
ساعتدر برشى يه مەمش ، كوزلرني قاپاماش ، ياصدقلىك آراسندە صارصيلمش
قالمشدى . بيسكوى پاكتنى باش اوجندەكى قومودينه قوركن كوچوك برشيشه
تتوردىيود كوردى . اولاپك اهميت ويرمەدى . فقط معلا شيشه يي آلندن
قاپمق ايستەنجه بركيجه اولكى كابوس آراسندە كچن سوزلرى خاطر لادى :

— چوجوقيسك ياوروم ؟ . يە نردن عقلكە بويلە شيلر كلدی ؟ آرتق
بربرمرك اولمادقى ، آرتق هرشى اۋنوتولوب كچمە ديمى ؟ .

معلا ، آنەسندن بوقادار شدت اوممادىغنى ، آرتق داياناميه جغنى سويليوردى .

فاخر اونی براز تسکین ایده بيلمك ايچون اوزون اوزون يالواردی . صو کره سوزلرینه برآزده لطیفه رنکی قاریشديرمق ايچون دیدی که :
— هم بوقادارجق تننوردیودله آدام اولورمی ؟ . قاقا بیکلر کبی آغزک ،
بورنک یاناجق ... صو کرا پشمان اولاجقسک ! .. بو جیجی آغزه یازیق
دکلی ؟ .

معلا جاتی او قادار سهوهردی که ، کندیسنه چیچک آشیدی یاپیلاجنی
زمان بیله :

— آمان ، دایانامیه جغم ! . باری بنی بایلیتیک !! ..
دیه قورقمش ، کندندن کچمشدی . شمدی فاخرده بوعلاجک نه قادار یاقیجی
برشی اولدیغنی اوزون اوزون آکلاتیور ، قاچ کوندر آرتان اندیشه لرك صو کنده
اورتالغه برده فاجعه رنکی چوکه مسمی ايچون هیچ اولمازسه بویله قورقوتمقه
برچاره بولاجغنی امید ایدیوردی .

معلا یاواش یاواش سکوته عودت ایتدی . قونوشدقچه آچیلدی . شمدی ده :
— صحیح دکلی ، آرتق هر شیئه راضی اولدیلر ! .. دیه سهوینیور ،
کولویوردی . نهایت آنه سنک بو کون کندیسنه نه لر یاپدیغنی صایدی ؛ اوزمان ده
آغلادی :

— آه ، دیدی بن هپ آنه مک یوزندن بدبخت اولدم . بنم فلاکتمه
قاچدر اوسبب اولویور ...

صو کرا براز یورغون ، اراده سی که وشک ، حادثا کندی کندینه سویله ندی :
— اسکیدن عادل ایله کچن شیرده هپ اونک یوزندن دکلیدی ؟ ..

اورته ده هیچ بر سبب یوقکن معلانک صولغون دوداقلرنندن ینه ایمالی سوزلر
دو کوله سی ، آره یرده ینه عادل اسمنک کچمه سی فاخرده یکیدن شهه لر طوتو-
شدیردی . حالا ، کندیسندن صاقلانان برشیلر می واردی ، یاربی ؟ .. هیچ بر
شی صورمامق ، آرتق کچمش کونلری بوسبوتون اونوتمق ، قاپاتمق ایسته دیکی
حاله ، بر تورلو بوقابل اولیوردی . چاره سز :

— يەنە نەۋار، اللە عشقنە؟.. دىيە تەكرار تەكرار سوردى؛ پىكى آكلاتسەك آ،
مەلا، نەۋلدى، آنەك اوزمان دە نەپامشىدى؟

بۇنلرى دە او كىرەمك اچون زواللىي اوزون اوزون تضييق ايتدى. آرتق پىك
خىيىن، پىك ھالى بىرنىك آلان ھىجانلرايچندە قونوشۇپورلردى. مەلا شاشىرەش
كېي، قارما قارىشىق عقلىنە كىلىن شىلرەك بىرنىن اوتە كىنە آتلايەرق آكلاتيور،
سوكرا كوز ياشلىرى ايچندە كىندىن كىيوردى: عادل ايله آرالىرنە بىر رابطە
تأسىنى ھىرايىكى عائلە اوتە دىنەرى دوشونورلەرش. ھىرب سىنەلەندە اكىرم بىك،
عادلەك باباسى كومور مەدىنى ايشەلەتيور، چوق پارا قازانيورەش. فخرەت
خانمە دە، يەنە اوزنىكىن داماد خولىياسى ايله:

— بويوسىن. مەلايى او كا وىرە جىكم دىرەش. آرادن زمان كچەش،
مىتار كەدن سوكرا اكىرم بىك افلاس ايتەش، بوتون قازاندقلىرى مىھ اولەش،
عادل دە يەنە اوسىرەلردە تورم ايتەش. آرتىق اوندىن سوكرا اوتە كىلەر مەاملەيى
دە كىشە دىرەش. بوتون تىصورلراونوتولەش، عادل دە اونلەرە كىدوب كىلراولەش.
آرالىرنەكى رابطەيى كىمسەيە بىللى ايتەمك اچون ھىر زمان سوك درجە دە
ساكىن، لاقيد كورون مەلا كچىلردە اكىرم بىكلەر مسافر كلىكى زمان اونلرەك
يانىندە بىردىن بىرە دىكشەش، فاخرە قارشى آ كلاسلىماز بىر سوقولغانلىق كوستەرمىشى.
دوشوندىكە بونى دە [خاطىرليور و آرتق سىبىنى پىك اعلا ھىس ايدىيوردى.
سوكىرە تەكرار باشلادى.

— پىكى، دىدى كچىن اقشام نىچون بونلرى ساقلادىك؟ شەمدىيە قادار نىيە يالان
سويەدىك؟. اوزمان مەلا، كىتەكە آرتان ھىنجىقيرىقلر آراسىندە:

— سىنك سوكىكە لايق اولامامقەن قورقەم دىيوردى. بكا اينانمايە جىقسىك،
كىم بىلەر خاطىرىنە نەلەر كەلەجەك، بىندن سوتۇيە جىقسىك دىيە اولويورەم، فاخرە..
يالان سويەدەمسە، اونلرى دە ھىپ سىنك اچون، ھىپ سىنى غائب ايتەمك اچون
سويەدەم.

— فقط کوزم سکا نه بويوك شيلر اوزرينه آند ویردم . هيچ اونی دوشونمه دکمی ؟

— آه بونی خاطر لاتمه فاخر .. دوشوندکجه تویلرم اورپه ریور ... نه قورقونج ییمیدی او ؟ .. اوهت دیر کن ، سندن کیزلی هيچ برشیئم اولمديغنی سویلر کن بيلسهك نه عذاب چکدم . اوزمان بو کناهی نه ایچون کوزه آلدیغمی دوشونویوردم .. هپ سنك ایچون فاخر ، هپ سنی شهبدن قورتارمق ایچون ... هم اويله شههلر که نه سویله ستم ، بلکه ده اینانیه جقدك . نه یاپهیم ، اثباتی قابل دکلدی که .. قاچ کوندر چکدیکم عذابی کوروپورسك ؛ بوندن بويوك کفارتمی اولور ؟ . بیلورم ، خطا ایتدم ، سنی فضله اوزمه مک ایچون ، سوزی اوزاتماق ایچون بلکه بر کوچوك یالان الویریر صاندم . ناصل اولسه بئم صوچم یوق دییوردم . نیچون انصافسزلق ایدیورسك ؟ .. یالان سویله یوبده سندن بر شی صاقلامادم که ...

آیلردن بری هر کون بر آز دها آرتان اوزونتولر ، صوکره اویقوسز ، پرخلجان کچن بو صوك کیجهلر ، نهایت بربرینه بوقادار باغلانمش ایکی قلبی نه یاپوب یاپوب آیرمق ایچون فخامت خانمک ایکیده برده چیرپناسی فاخرکده موازنه سنی بوزمش ، سینیرلرینه صانکه بر دلیلک آشیلامشدی . آرتق اک کوچوك شیئه بیله چیلغینجه قیزیور ، معلانک بوتون بونلری هپ سوکی ایله هپ شفقتله کندیسندن صاقلامش اولماسی بر تورلو قولاغنه کیرمیوردی . اوندن شهه ایتمک عقلنه بیله کلزدی . اوکا توز قادار لکه نک صیچرامادیغنی بیلوردی . ینده : « کچن آقشامکی ییمندن صوکره حالا بندن کیزلی برشی قالالمیدی ؟ » دیه دوداقلرینی قاناتیوردی .

هله شو فخامت خانم افندی ! .. هپ دبدبه ، هپ سلطنت حرصیله بوتون حقیقتلره کوزینی قاپایان ، صوکره قرینه ده حیاتی فکرلر یرینه ساده جه کندی احتراصنی آشیلايان بوقادین ، ینه اوزنکین داماد خولیا سیله عادل ایچون بوقدر

دیدي قودیه سبب اولمشکن شمدی قالمشده فاخره : « عرض دشمنی !.. »
دیه باغیریوردی .

اوکاده ، فاخرده بودرجه محرم بر موقع ویریله سنی ساده جه منفعت
اندیشه لرینه عطف ایدنلر عجباً حقسنز میدی ؟ . کچن یاز بهزاد پاشاری ، دهلفین
کبی قادینلری ینه اوپله پک کوچوک بر استفاده امیدیه هائله ایچنه صوقان هپ
کندیسی دکلیدی ؟

بوتون کیجه یی پک پریشان کچیردی . قاج کوندر باشندن کچنلری کویک
سسزلکی ، اودانک بوشلغی ایچنده دوشونوب قوردجه قیصیق بر سس
قولاغنک دینده : « عرض دشمنی !.. » دیه باغیرر کبی اولویوردی .

« بن ، بر عرض دشمنی ها ... » دیه کوزلری یاشلی دولاشدی ؛ دهلیلر
کبی کندی کندیینه سویلندی . بعضاً یاصدقلرک آراسنده خنچقره رق ، بعضاً
کندیسنی یاتاقدن قاناپایه آتارق آغلیور ، آراده بر صوفایه ، اورادن بالقونه
چیقوب قودورمش کبی کزینیوردی . صوکره بوتون تنیهلره رغماً معلانک
اوطه سنه کیردی . او آجی حکایه ایچون خاطره کله دک شیلر صورتی . بویوک
خانم یاتاغنک ایچنده دوغرولمش ، بو پر هیجان فیصیلدیلدن هیچ برشی
آ کلامیوردی . نهایت :

— بنم بابامک ده کومور معرنلری اولسه یدی ... دیه بوس بوتون طاشدی .
هپسنی ، یارین هپسنی آنه نك یوزینه چارپاجغم ...

معلا اوزون اوزون یالواردی . هرشیدن اول آنه سنی دوشونویور ،
کندیسه اوقدر فالق ایدن بوشعورسز خسته نك تکرار اوزولوب بوس بوتون
دوشمه سندن قورقویوردی . صوکره اوک ایچنده یکیدن کورولتولرباشلایه جق ،
دیدي قودیلر ده چیرکین بر رنک آلا جقدی :

— نه اولور ، فاخر ، دییوردی بنم خاطریم ایچون واز کچ .. بیلورم که
سنده چوق اوزولدک . هله آنهم سکا قارشی چوق حقسنزلق ایتدی .
اونوت آرتیق بونلری .. بکا اینامیورمیسک ؟

فاخره بر شی اولمشدی . هیچ برشی دیکله مک ایسته میوردی . ساده
کوزلرینی قیصوب باشنی صاللیور :

— کوره جک او فخامت خانم ، دیوردی ، بن عرض دشمنی یم اوپله می؟
هله یارین اولسون . نه لر یاپه جغم ...

— سویله رسه ک صانکه نه اولاجق ؟. دوشون بر کره بنی ده نه قادر
دوشورمش اولاجقسک . اوفکه نک ذوقی هرشیئی چیکنه مه یه دکر می ؟.
بونلرک هیچ بریسی حتی قاچ کوندر صولان ، اریه ن سو کیلینک یالواریشی
بیله فاخری صوصدورامیوردی :

— آ کلایورم ، دیوردی انسانلر ناصل اولوب ده هویتلرینی دکیشدیورلر ،
ناصل اولوب ده آنسزین چیلدیورلر ، قاتل اولویورلر ، بونی شمدی آ کلایورم
بر باشقه سنی بوغاز لایه جق ، کندی سعادتتی بیله چیکنه جک قدر مشئوم بر
بر کوز قرار تیزی نردن کلیور ، کندی اراده مده طوتوشان اختلال بونی بکاده
او کرتدی . داریلما معلا ... براق بنی !.. یوقسه صوصارصه م ، بو آجی پی ساده
ایچیمه کوممک ایسته رسه م بلکه بن ده ده لی اولاجغم .. بلکه اوده لیلکه داها فنا
شیلر یاپاجغم .

بوتون کیجه او چیرپیندی ، اوته کی آغلادی . ایرتسی صباح فاخر ایلک
تره نه ایندی . مطبعه ده کیمسه یوقدی . دورامادی . ینه دیشاری چیقدی .
شیطان اونی اک چیلغین یردن دورتویور ؛ کوزینک او کنه هپ فخامت خانمک
کندینه دوغرو اوزانان ، سینیرلی ، قیوریلش پارمقلری کلیور ؛ هپ اوقیصیق ،
خریلتیلی سس : « عرض دشمنی ! » دییه باغیریوردی .

تکرار کوپری یه ایندی ، حیدر پاشا واپورینه ، اورادن تره نه آتلادی .
اوکله یه دوغرو آوه کلدی . بو سفر کورولتو چیقارمق ، طاشمق ایچون
کندیسی بهانه آرایوردی . صوفاده بویوک خانمی کوردی :

— معلانک دولابنده بر شیشه تنموردییوت بولدم ، دیدی . قیردم آتدم .
فقط قوزوم سزده دقت ایدیکز ؛ برچو جوقلق یاپماسون ... کندمی اولدوره جکم ،

دییوب دورویور ، آشاغیده دوقتورک اوطه سنده اوقادار علاج وار . صاقین اورایه کیرمه سون .

فخامت خانم اونلرک فیصیلدیسنی دویمش ، اوطه قاپوسندن باقیوردی :
— کیمی قاندریورسیکز، دییه اوستلرینه یورودی . بکا کوستریش می یاپورسکز ؟ . بوراسی مانا غک تیاتروسی دکل . او دوزه نلره ساده بویله بوناقلر اینانیر !..

صو کرا بوس بوتون کوپوردی . فاخرک بوأود بر صیغتی کبی کلدیکنی قاچ آیدر اوکا بوقادار باقدقلرینی سویله دی :
— نانکور !.. دیه تکرار تکرار باغیردی . فاخرهراقشام اوه آئنده دولو چانطالرله کلدکجه :

— بوراده ساده بر آقشام یمکلرینی یورسکز، صو کردهه اولک بوتون مصرفنی سز کورمک ایستیورسکز . دییهن بوقادینک اوزمانکی سوزلرنده بر آز مبالغه، بر آزده نازک کورونمک هوسی اولسه بيله صو ک کونلره قادار اوکا بوجلرینی اوده یه مه دکلری ایچون ناصل قیوراندقلری میدانده ایدی . شمدی ده اوقادار اصرار لرله مسافر ایدیلن بوجوجوغک آرالرنده بر صیغتی اولدیغنی سویله یوردی او آرلق قاپی چالندی . محی الدین شوقی بکله فریدون بک ده اوه کلدی . بو فریادلری سوقاقدن، تا کوشه یی دولاشیرکن دویمشلردی . فاخره :
« آرتیق چوق اولویوزسک !.. » دیر کبی :

— ینه نه وار ، الله عشقنه ؟ . دیه صوردقلری زمان اوته کی :
— بن اویکزه کوپک کبی یاناشان بر صیغتی ، صو کردهه بو عائله نیک عرضنه حرمت ایتمه یین بر آچاغم اویله می ؟ . دیه طاشدی . بنی سز بسله دیکز ؛ یا تاجق یرم یوقدی ، سز اوکزه آلدیکز ، سز باقدیکز ها ! . پکی ، یا طادل بک ؟ . یا اونک نه ایشی واردی ؟ . بنم قباحتم بابامدن کومور معدنلری قالمدیغنی ایچون می ؟ ..
محی الدین شوقی بو اتهاملر قارشپسنده شاشیرمش قالمشدی :

— الله عشقنه ، اوزاتمایک آرتیق شوایشی ... نه ایسته دیکز سه اونی یایدق

هېسنه راضى اولدق ، هېكزى عفو ايتدك. سز حالا كورولتو ايچون بهانه آرييورسكز. شمدى برده باشمه عادل بك چيقاردىكز. صانكه نه اولمش ، بش آلتى سنه اول ايكي هائله آره سنده لاف اولسون ديه برشى كچمش ، بودكلى؟ معلا اوزمان دها اون بر اون ايكي ياشنده ايدى . عادلده هايدى برايكى ياش دها بويوك اولسون . اورتهده باشقه هيچ برشى يوق . دها دون (لاسورى) يى اوقوركن بكا سن كوسترميورميدك ؟ . ماقسيم دييوردى كه ، هر كنج قيزك ايلك عشقى اك صوك اوينادينى بىكدر . ايلك بىكلرى كې اونى ده قيرار ، آتار . حالبوكه آنهلرينك تصورندن والله چوجوقلرك خبرى بيله يوق .

فريدون ، كنج قيزلرك ايلك عشقنه دائر بوفلسفه يى دويونجه كندى عقلنه كوره اوده بو حسلرى تحليله قالقيور :

— دوشونورسهك ، ايلك يورهك چارپىنتيلرينى تا باغچهده صالنجاق سالالا نيركن مېنى مېنى قيزلره صاريلديغمز زمانلرده بولورز ، دييوردى .

حال بوكه اونلرك هيچ بريسى فاخرده كي فېرطنه لرى آكلايامامشدى .

او ، ذاتاً معلادن شبهه ايتمه يى خاطرينه بيله كتيرميوردى . بو حادثهده بى چاره قيزك هيچ بر كناهى يوقدى . يىللرله تخيلدن صوكره بولدينى سو كىلى صفوتهده ، عصمتدهده امثالسزدى . فاخر ، ساده فخامت خانمده كي ذهنيته ، اونك پارايه قارشى دويدينى ضعفه دوشماندى ؛ بونى كيمسه يه آكلا تاميوردى .

وقت اوكله ايدى . هادت يرينى بولسون ديه صوفرايه اوطورديلر . هر كسك او كندن يمك طباقلى بوشالمادن قالقدى . هيچ بريسى قونوشميوردى . صباحكى فېرطنهده بويله جه ياواش ياواش ياتيشدى . ينه هېسى بر كوشه يه چكىلدى . يالكرز صوك ضربه فخامت خانمى شاشيرتمش ، مغلوبيتنى بوسبوتون يوزينه چارپمىشدى . آرتيق فاخره قارشى هيچ آغزىنى آچاميور ، ساده قيزىنى يالكرز بولدجه اك آجى سوزلرله اونى خيرپاليوردى .

بوتون كيجه هېسى خراب ، هېسى پریشاندى . فاخر ايرتسى صباحده ،

مطبعه یه کیتمه دی . باشنی قالدیراجق قوت بولامیوردی . برآز دالمشکن اوطه سنه
کیرن آیاق سسلرندن اویاندی . محی الدین شوقی بك چوق عصبی کورونویور :
— آرتق اوتانمیورمسك، دییه باغیریوردی . ینه قیزك اوطه سنه کیتمشسك .
بن سكا کیتمه دیمه دم می ؟ . نه ایشك واردی ؟

برباقیمه بومؤاخذه لرده اونك چوق حتی واردی . دون آقشام، یمکدن صوکره
فاخری چاغیرمش :

— بوايشك آرتیق اوزاماسی قابل دکل، دیمشدی . برآن اول نکاحی یامه لی
هیچ وقت کچیرمیه کلز . بویله لکله بدکه هرشی اونیوتولور، هرشی دوزه لیر . فقط
اوزمانه قادار، قوزوم اوغلوم، سن ده معلایه قارشی جدی داوران . حتی بربریکنزی
قابل اولدیغی قادار آز کوریکز . اوطه لریکزه کیدوب کله ییکز . اوك ایچنده
خدمتجیلره قارشی کوچوک دوشمیه لم . بزبو تصویری شمیدین اعلان ایدرز
ذاتاً اوزون اوزون نکاحلر ، دوکونلر یاپاجق دکلز آ . . بن سكا قیزی ویرمك
ایچون بورایه، کندی آرامزه آلمش اولورم . برآیه وارمازهرشی قاپانیر کیدر .
آرتیق بو ، بویله جه قرارلاشمش ایکن دادی، فاخرک دون کیجه ینه بر
آرالق کوچوک خانمك اوطه سنه کیردیکنی یتشدیرمش ، عینی اوطه ده یاتان
خامنه سی ده :

— اوت، کلدی . بر ساعتدن فضله اوطوردی ! . دیه تماملامشدی . محی الدین
شوقی بك بك حقی اولارق بوکا قیزیوردی . اوته کیلر داها نه چیرکین
اسنادلرده ده بولونمش اولاجقلردی که صباحلین ایرکندن اونك اویانماسنی بیله
بکله مه یهرک اوطه سنه کلش : « بونه رزالت ! » دیه تینیوردی .
فاخر- :

— معلانك آغلادیغی دویدم ، مراق ایتدم ، دیدی کیدوب برآرالق
باقدم ؛ هپسی بوقادار... باشقه نه سویله دیلرسه یالان . .
بوندن فضله مدافعه یه لزوم کورمه دن صوصدی . دوقتورک خاطرینه کلن شبهه لر

ذاتاً پك حقسزدی. ایچنده آرتق هر شیئه قارشى مستغنى بر کر کینلک واردی .
بوتون کون او طه سندن چىقمادی . یمکده اینمهدی .

ساعت ایکیه دوغرو ایدی ؛ قاپی یاواشجه آچیلدی . معلا اندیشه ایله
اطرافه باقینه رق ایچریه کیردی . یورورکن دوشه جک کبی تتریور ،
دورورکن طوتونا جق بر شی آریوردی . اوده یاتا غندن چىقمق ایسته مه مش ،
آنه سی :

— نازک کیمه ؟ دیه زورله آشاغییه ایندیرمشدی . بو صباح هله ، پک
آجی شیلر سویله مش ، اونى ایکیده بر آغلتمشدی . اک فجیع عاقبتلری تمنی
ایتمش :

— انشالله سوقاقلرده سورتن بر آشفته اولورسک ، دیمشدی . دیلندیکى
کوزمله کورورمده اون پارا ویرم . هم باق ، بو دیدکلرم ناصل برر برر
چىقاجق !.

آکلاتدجه آغلیور :

— کورویورمیسک ، دیوردی ، بن آنه می نه قادار سه ویورم ، اوبکا
نه دمالر ایدیور !.. آه ، بن مطلقاً اوله جکم . دایانامیه جغم آرتیق ...
باشنى قاریولانک دمیرینه دایاهرق بر آز دوردی . صوکره :

— ذاتاً دون آقشامده او یله قاریشیق رؤیالر کوردم که ، دیه آکلاتمایه

باشلادی :

اسکیدن ، تا چوجوقکن ، بر رؤیا کورمش آنه سنک دادیسنه بر ألما
ویرمش ، بویوک داییسنک کندیلرنده بویوین اوچ یاشنده کی پک سه ویملی
چوجوغی زینل اولمش . صوکره بر دفعه داها رؤیاسنده آنه سنه ینه بر شی
ویرمش ، اوزمانده بویوک داییسى ازلمش . دون آقشامکی رؤیا طبق بونلره
بکزیورمش . بویوک باباسی بر باغچه ده اوطورویورمش . معلانک ألنده چىچکلر
وارمش . اوته کی یانه چاغیرمش ، چىچک ایسته مش . اوده کیتمش چىچکلردی
ویروب یانه اوطورمش .

كنج قادین بویله شیلره پك اینا نیردی :

— بو سفر مطلقا بن اوله جكم . ديه دالغین دالغین باشنی ايكیوردی .
اسکیدن فخامت خانمك آنهسی ده بویله آنسزین كندی كندی اولدورمشدی .
فاخر بونی ده بیلور، معلا ده بو ضعفك ارثی اولماسی احتمالی دوشونهرك چوق
قورقویوردی . تسلیهیه محتاج اولانلردن بری ده كندیسی ایكن هر شیدن
اول اونك اطرافه صاریلان بو دورغونلغی داغتمق ، سوزی ده كیشدیرمك
ایسته دی . فقط معلانك دردی ساده بو قادار دكلدی . آنه سنك انكسار-
لرندن ، قاچ كونكى عذابدن ، دون كیجه كوردیكى رؤیادن زیاده اونى
خراب ایدن بوس بوتون باشقه بر شیئدی . بوراسنی آكلاتیركن آرتیق كوز-
یاشارینی طوتامیوردی . دونكى كورولتوده عادلک بحثی كچركن كویا خدمتجیلر
قاییدن ديكه مشلر ، ایشدكلرینه بیک بر یالان قاتهرق :

— آمان بو فاخر بك ، كوچوك خانم ایچون ده نه لر سویله دی ، نه لر ...
ديه فیصلداش مشلردی . معلا :

— بونی ناصل سویله دك ، فاخر ؟ .. دییوردی بنم او حكایه ده هیچ
بر كناهم اولمديغنی هر كس دن اول سنك بيلمهك لازم كلزمیدی ؟ ..
آرتیق طوتوشمق صره سی فاخره كلشدی . بونه چیرکین اسناددی ؟
یاربی ! . ديمك ، بو باياغیلغی ده اوندن امید ایدنلر واردی . حالا كندیسنی
معلانك كوزندن دوشورمك ایچون چالیشیورلر ، حالامی اونلری بر برندن
آیرمق ایستیورلردی ؟

بو افترانك سبیلری ساده بو قادارده دكلدی . اونلر، دادی، یكانه بویوك
خانم هپسی ، معلا ایله فاخر ك آراسنده کی رابطه یی نه زماندر بیلورلردی .
شمدی : نیجون صاقلادیكز؟ ديه مؤاخذهیه اوغرامق دن قورقویورلر، بو قورقو
ایله ده آرتیق فخامت خانمه خوش كورونمهیه چالیشیورلردی . ايكیده بر فاخر ك
فناقلرینی اورتیه جیقاردجه ، سانكه شمدییه قادار اولان بیتن شیلرده

کندیلرینک هیچ بر قباحتی اولمادیغنی اثبات ایتمش اولاجقلردی. معلايه قادار
یتیشدیریلن بو چیرکین دیدی قودیلره قارشى ، فاخر :

— اینانما کوزم ، هپسى يالان ، هپسى افترا .. ديه اوزون اوزون
يالواردی . فقط بو ، اطرافنده کی لاجورد خلقه ايله بوس بوتون ایريله شمش
بوس بوتون چوقورلا شمش کوزلرده کی دونوق رنگ بر تورلو سیلینمیوردی .
دوروب دوروب :

— سن دیمشک که ... ديه تکرار باشلیور ، هپ دادیسندن ایشیتدیکی
یکانه دن دويدیغنی شیلری آکلاتیوردی .

— نیچون بکا اینانمیورسک ده معلا ، کیدوب خدمتجیلری دیکلیورسک؟
بزی بر بر مزدن آیرمق ایچون بونلری عنادلرینه ؛ اوی دورویورلر ، سنی بندن
صوئوتمق ایچون مخصوص سویلیورلر . بونی آکلامیه جق نه وار ؟ ..
معلا هیچ ده کیشمیور :

— آرتیق کیمسه نک یوزینه باقامیه جقم ، ديه کندی کندینه سویلینیوردی .
— والله کوزم ، اینان بکا ... هیچ قابلمی ، سنی جانمندن فضله سه وهر کن
ینه کندم لکه لهیم ، بو اولاجق شی می ؟ ..

فاخر تکرار تکرار یمین ایتدی . آللرینی اوپه رک ، صاحیلرینی اوقشایه رق
بوتون مقدسات اوستنه آندویردی . معلانک هپ او شبهه ايله دونوقلاشان
کوزلری ددمیندن بری دالیدی یردن بر تورلو قورتولامیورسی . او زمان :
— اینانمیورمیسک بکا ، دیدی او قادار یمین ایدیورم معلا ، حالا اینانمیورمیسک؟

— خایر ، هیچ کیمسه یه اینانمیورم . شمدی کیدوب بابامه سویلیه جکم .
بز سنکله آرتیق یاشایامیز . نافله اورتایه نکاح لاقردیسی فلان ده چیقماسون .
قاج کوندر بیک بر وسیله ايله آرتان کورولتو فاخری ده پک خراب
ایتمشدی . بو صباح محی الدین بکک حقارتلرینه صوک بر اراده ايله صوصمش ،
فقط اک دهرین یرندن قانایان برشی دویمشدی . شمدی معلانک سوزلری
هپسندن آجی کلدی . آرتیق بوتون مقدساتی اونوتا جق ، دويدیغنی سه وکی کی

انكار ايدەجك ، كندى سعادتى بىلە چىكەنەيەجك قادار چىلغىن حسلرە دوشدىكى اولويوردى. انسانلرە بعضاً بىلە بىلە يالان سويلەتن، بر تانيه صوكرەسنى هيچ دوشوندرمەين شىطانى قوت صانكە اونى دە بويولەمش ، بردن برە دە كىشدېر مشدى :

— سن يالانچىسك يا ، ديدى ، هر كسى دە كندك كې صانيورسك !.. قاچ آيدر بنى آزىمى آلداتك ، يالان يره آزىمى يمين ايتدك؟. هله عادل ايچون اويدوزدينگ ماصاللىرى نه چابوق اونوتدك؟. هم نه يالانلر ؟... سويلر كن دوغرويه اوقادار بىكزە تيوردك كه بن بىلە كوزى قايالى دىكلەدم . شمدى بىكادە اينانمورسك دىكلنى ؟ .

آرتق پك فنا اولمشدى . هر عقلنە كلنى دوشونمەدن سويليوردى . آرادە عادل بىك اسمى دە كىنجە آجى آجى كولدى ؛ معلانك عفى ايچون هيچ شېھەسى يوقكن ، اونك فضيلەلرينە هر كس دن زيادە كنديسى امين ايكن ، عادتا عنادينه : — ناصل بو عادل حكايەسنى صاقلاد كسە ، كيم بيلير بندن داها نەلر صاقلادك ؟. ديدى . كيم بيلير داها نە ماجرالرك واردى ؟. مادام كه بو قادار قولاي يالان سويلە بيليورسك ...

معلانك كوزلرندە انسانە اولومى خاطرلاتان آلەولر طوتوشدى . بوميدى ، بوتون رؤيالرك صوكى ، بو قادار فداركارلنك مكافاتى بو ميدى ؟ فاخرلك دە بو قادار ظالم اولاجغنى كيم اوماردى ؟ . آرتىق بوتون غرورى يىرتيلمىش ، اونك دە هويتى باشقلاشمىشدى . دمىن فاخرلك دامارلرندىن برقايلان خشوتى كچىرن قوت شمدى اوزهرى معلايە آشيلامشدى :

— اى واردم دە ياپدم . ديه باشنى قالديردى . وارمى بر ديه جىك؟.

— صوص آرتىق معلە ، چيلديرتاجقسك بنى ...

— سندن اول بىك تورلو ماجرام واردى ، ايشته !. بوندن صوكرادە

عناديمە هر شىئى ياپاجغم !.

— چىق دىشارىيە ، دفع اول !..

مەللا بىر ئانىە تترەدى ؛ سو كرا قاينىك آراسىدىن بوس بوتون سىلندى .
فاخر آرتىق دوشونە ميوردى : « عجباً چىلدېرىيورمىم ؟ » دىيە يۈمىرۈقلىرىنى
باشىنە وورويور ، بو قورقۇلو رۇيادىن اويانمىق ايچون دوداقلرىنى ايصىرييوردى .
سو كره مەلانىك : « كىدوب بابامەدە سويلەيە جىكم ، آرتىق بىز سىنگە ياشايامىز ! »
دىدىكى خاطرینە كەلدى . ياتاقىدىن فىرلادى . آشاغىيە ايندى . مەللا ، يىك
اوپەسىندە ، آللىرىنى يۈكەن اۈرمە جاكتىك كۈكسە سوقش ، كىزىنيوردى
اونى كۈرمىە جىك قادار دالغىندى . فاخر :

— بو قادار دىدى قودىدىن سو كره نىكاح مطلقا اولاجىق ، دىدى .
بابا كە كىدوب دە ساقىن يىكىدىن كۈرۈلتۈ چىقارمايە قالقما رذىل اولدىغىز
آرتىق الوىرىر ؛ فضلەسە تەحمىل قالمادى . نە قونۇشەقسە كەندى آره مزىدە
قالسون . ذاتا مراق ايتە كوچوك خانم ، سىن ناصل ايسە ميورسەك ، بىندە
آكلايورم ، آرتىق آرامزىدە ھەرشى بىتىدى اما ھەركىس يىنە بىزى قارى قوجە
بىلمەلەيدىر .

مەللا باشى چۈيۈردى ، ھىچ بىرشى سويلەمەدى . فاخر ، يوقارى چىفار كىن
اونىك دە كەندى اوپەسە كىردىكىنى ، سو كرا تەكرار قوشە قوشە مەردىۈە نلردىن
آشاغى ايندىكىنى دويدى . بىر آراقى يىنە يوقارى چىقىدىغى ايشىدىلدى .
بوسفر قاينىك كلىدندە دۈنەن آناختارك غىجىرتىسىنى بوغۇق بوغۇق سىسلار تەقب
ايتىدى . . .

داھا سو كرا بوسىسلار بىر فرىاد كىي يۈكەلدى . مەلانىك آرادە بىر بايلىماسە
اوتە كىلر كىي آرتىق اودە آلىشمىشىدى . يىنە اويلە ظن ايتىدى ؛ قوشوب باققى
ايچون ايچى طوتوشدىغى ھالەدە دىمىنىكى بورادىن سو كرا بو كا جىسارت ايدەمدى .
كۈزلىرىنى قاپادى . . ياشقە شىلر دوشونەمەيە چالدىشىدى . فقط او بوغۇق فرىاد
صوصمايوردى . دايانامادى ؛ صوفايە چىقىدى . مەلانىك اوداسى قاپالى ايدى ؛
آچوب باقمايە غىرورى مەساعەدە ايتىدى . آشاغى ايندى . دادىيە ، كەنەيە

سسله ندى ؛ كيمسه يوقدى . مطبخه ايندى ؛ ينه هيچ بريسي بولامادى .
صوكرامك اوطه سندن چيقان يكانه ايله صوفاده قارشىلاشديلر :

— كوچوك خانم غالبا ينه بايلىدى ، ديدى . يوقارى چيقده باق ...
برابر چيقديلر ؛ اودا قايپىنى كوچلكه آچديلر ؛ معلا ياتاغك اوستنده
سهريلش ، يىرتار كې ايكي ائيله بو غازىنى طوتويور ، بو غولورجه سنه نفس
آليوردى . چكهنك اوستنده بو شالمش ، آغزى آچىق بر تننوردىيود شيشه سى
واردى . فاخر : « آه معلا ، نه ياپدك ؟ » ديه باغيره باغيره ديشارى فيرلادى .
دوقتور محى الدين شوقى بك هنوز اوده ايدى ؛ اونلره سسله ندى :

— يتشك ، معلا تننوردىيود اچمش ، چابوق

زووالى بابا ، دهلى كې قوشاركن :

— قولا ، قولا ... آمان بر آز قولا يتشديرك ، ديه باغيرىيوردى .
اوده هنوز پاكتى آچيلمامش قولا واردى ؛ ازديلر ، معلايه اچرديلر .
ايلك تدابيرك تاثيرى درحال كورولدى . كنج قادين كندندن كچمش ، معدده سنى ،
جكرلرنى قوپاران بر غشيان ايله صارصليور ، كو كسى ، بو غازىنى طيرمالا يهرق
ايكليوردى . دوقتور محى الدين بوش شيشه يى آلوب باقدى :

— تام اللى غرام ، ديدى . قورتولا جغنى هيچ اوممام ؛ كيتدى معلا ..
كويده كى باشقه دوقتورلرده خبر كيتدى ؛ اونلرده كلدى . اييودله تسممك
اوكنه چكمك ايچون آلدن كلن هر شي يايديلر . معلا بايغىن ياتىور ،
ساده آره صره بو غولور كې آلارنى بو غازينه كوتورمىسندن اورانك نه قادار
ياندغى آكلاشيليوردى . آغزىنك ايچنده هيچ برلكه يوقدى . فقط كوچوك
ديلندن آشاغيسى سياه بر چوقور كې كورونوريوردى . اومشئوم قرارى
ويردىكى زمان ، آغزىنه تننوردىيود دوقونورسه آجيسنه دايانامىوب تو كوره جكنى
دوشومتى ، اونك ايچون باشى آرقايه ياتيرمش ، شيشه يى بو غازىدن آشاغى
دوكمشدى . دوقتورلر فك كوستردىكى شيلرى برر بر تطبيق ايتديلر . بوندن
صوكراسى آرتق ايشى مقدراته ترك ايتمكدى .

ساعتلرجه چارپندقدن صو کرا کیمی قاناپهیه، کیمی خالینک اوستنه، هپسی بر طرفه سه ریلشدی . بویله بر فلاکت خاطره کلسه هر کسدن اول فخامت خانمک ، بو خسته دایینک دایانامیه جفی ظن ایدیلیرکن بالعکس او قیامتک اورتہ سنده هر کسدن فضله کندیمی مقاومت کوسترییور ؛ اوکنه کلهنه هایقیرارق ، هر شیئه قیزوب سیکیرلنهرک دولاشیوردی . قیزینک جان چکیشده یکنی کوردهن بر آنهنک کوزنده باشقه هیچ بر شی اولماق لازمکن او ، هیچ ده کیشمه مش ، هپ پارا ، هپ اشیا ، ساده جه ظواهری محافظه اندیشه لریله چیرپینیوردی . مثلاً خسته یی قورتارمق ایچون قوصدورمقدن باشقه چاره یوقدی . او زمان فخامت خانم تلاشله قوشویور :

— باشنی یاتاقدن دیشاری طوتوک ، دیه باغیرییوردی . چارشافلر کیرلنه جک ! —
بر طرفدن ده محی الدین بکه یتیشیوردی :

— شوأتاریکی طوپلاسهک آ ، تکمیل تنوردیود اولدی ... لکەسی ده چیتماز ! ..

صو کرا بر آراق صیجاق صو لازم اولمشدی ؛ او یینه :

— صاقین بنم صراحیمه قویماییک ، چتلا .. چینلقلریله یرندن فیرو لایور ؛
ینه بر صردسی کلوبده محی الدین شوقی بک :

— نهده اولسه بزایی باقامیز ، ان شاء الله بو کیجه بر فلاکتک اوکئی آلیرسهق ، یارین بر خسته باقیچی کتیرتمه لی یز . بو خسته لغک تهلکه لی دوری اک آشانی اون بش کون سورده . دینجه قاریسی اوکاده مانع اولویوردی :
— آمان آمان لزومی یوق ، بز باقارز ، شمدی برده اوکامی پارا یتشدیرده .
جکز ؟ ..

خسته بر آز کندینی بولورسه آنجاق سوت ایچه بیله جکدی .
فخامت خانمه هر کون سوت آلینیرکن بر اوقهده معلایه آملاری ایچون دوقتور محی الدینک تنیه ایتدیکنی دویونجه بوسفرده :

— ای اما بک افندی ، بو قدر سوت پاره ایستهر ! . دیه قاشلرینی

قالدیریوردی . فاخرک بوتون اعصابی ناصیر کبی اولمش ، هیچ بر شی دوشو-
نه میوردی . کیجه لین اویله بر دقیقه کادی و او دقیقه ده معلا کندینی پک فنا
بولمش اولاجقدی که وداع ایچون هپسینی یانه داغیردی . فاخری بو آراق او طه دن
چیقارمشلردی ، اونی ده ایسته دی :

— آرتق اولویورم ، دیدی . سنی نه قدر سهودیکمی آکلادکمی ؟ . یالان
سویله مه دیکمی کوردک ، آرتق سندن هیچ بر شی صاقلامادیغمه ایناندکمی ؟ ..
بن اولدکن صوکره اولسون شبهه ایتمه جکسک یا ؟ .

اونی ایلك دفعه اولارق هر کسک یاننده اوپدی ، یا صوکره یا واش یا واش
کوزلرینی قاپادی . هپسی آغلا یوردی . محی الدین بک :

— قورقاجق بر شی یوق ، دیدی . براقک او یوسون ، مراق ایتمه یک ..
بو دالینلق بر قاچ ساعت سوردی . محی الدین شوقی ، طب کتابیرینی
اوکنه یینمش ، اییودله تسممه دائر بوتون مباحثی تکرار تکرار کوزدن
کچیریور ، هر کله دن امداد اومویوردی . فیخامت بنانمده گوشه یه او طورمش
هیچ دورمادن سویلنیوردی . اولسه بر تورلو ، اولمه سه بر تورلو ایش ! .
قورتولورسه بو ایشک ایچندن ناصل چیقایلماق ایش ؟ . خسته لنتک بر اثری
هر حالده قالاچقمش ؛ او زمانده دائما ایی باقمق ، هر وقت اهتمام ایتک ایجاب
ایدرمش ... ذاتاً اوتهدن بری ثروت و دبدبه خولیا سیله بسله ندیکی ایچون
خسته لقتن صوکره ، اونک یکیدن یکیه تأثرلرینه میدان ویرمه که هیچ کلزمش
بونک ایچونده طبعی پارا لازم اولاجقمش .. ایی باقیمازسه حتی بو اتحار
جنتنی تکرار ایددی ایدرمش ! صوکره معلانک هوسلری ذاتاً کلوب کچی
شیلر ؛ بو کون سهودیکنی یارین اونوتور ، پشیمان اولورمش ، هله بو آله چوق
کوچ کچن بر شی اولورسه بوس بوتون نفرت ایدرمش . فاخر ایچونده
طبقی بویله اولاجق ایش ، بو قادار فداکارلقتن ، تهالکدن صوکره بردن بره
بیقاجق ، قوجاسندنده صوٹویاچقمش ... داها ندرل سویله میوردی ندرل ...
فاخرده بونلرک هیچ برینی دیکلده جک حل یوقدی . معلا شوراده کوزینک

اوکنده یاری اولو یاتارکن ناصل اولمشده کندیسنک یوره کنه اینمهش ،
ناصل اولوبده چیلدیرمامشدی ، اوکا شاشیوردی .

برر ایکیشر یاتاغه چکیلدیلر . فاخر ، قاریولانک آیاق اوجندن آیریلمیوردی
کیجه اوچ بو چوقده محی الدین شوقی بک اویاندی :

— نه دورویورسک ، کیت یاتسهک آ ، خسته اولاجقسک ، برده سکامی
باقهجنز ؟ دیدی . بو کورولتوده معلاده کوزلرینی آچدی :

— هایدی کیت ، یات باری ... دیه اشارت ایتدی . فاخر ایچون بر
دقیقه استراحت قابل دکلدی ؛ ایکیده بر قاپییه قادار کلیور ، آرالقدن اولسون
باقیوردی .

ایرتسی کون آرتق معلا اولویوردی . متمادیاً قان قوصویور ، قانله برابر
حالا اییود کلیوردی . دوقتور بر آرالق پریشان :

— قوشک ، اجزاخانهدن اوقسیژدن بالوننی کتیرک . دیه فریاد ایتدی .
فاخر استاسیوندهکی اجزاخانهیه قادار قوشه قوشه کیدوب بالوننی کتیردکن
صوکر ا مر دیونک آیاغنه دوشمش قالمشدی . معلاده نبض دورمش ، نفس
کسیلمشدی . اوقسیژدنه صنعی تنفسلر یاپیلدی ؛ (ویل قانفره) دن استمداد
ایدیلدی . آقشامه قادار اولک ایچی حما ایله قاینادی . تهلهکه زائل اولمامشدی ؛
احتمالنه قادار مثبت قورولسه اولوم سکز اون کون داها یاتاغک اطرافدن
آیریلیه جقدی ؛ فقط بو کونکی بحران کیجهیه دوغری براز خنیفلهدی .
بوتون کوی وقعهی دویمش ، محی الدین بکک جواردهکی بوتون صنعت
آرقداشلری یازدیمه قوشمشدی .

اون بش کون عینی بحران ایچنده ، حمالی اوزونتولر ، چارپنهلر آراسنده
کچدی . معلا هپ اییودله قاریشیق قان قوصویور ، ادرارده قانله قاریشیق
اییود چیقیوردی . اوجاع کیتدکجه آرتدی . بوغازدن آشاغی معدیه قادار
بوتون کوکسی آتش ایچنده ایدی . او کسوردکجه بوتون اونواحیدن صویولان
دریلر ، قان پختیلری آغزینی دولدورویوردی . فاخر اوندهکی متانته شاشیوردی .

اونك چكديكنه اطرافده كيلر داياناماز كن كنديسى هيچ شكايث ايتيوري .
بالكز بر كره آجي آجي كورك :

— بيله يدم ، ديهه ميريلداندی . مكر رده وولوردها قولايمش ، هيچ
اولمازسه اولور ، بوقادار آجي چكمزدم .

بويه آجيلر ايچنده قيورانير كن بيله فاخره قارشى پايانسز بر دوشكونلك
كوستريور ، هرثانيه اونى ياننده آرييور ؛ آنهسى ، باباسى ديشارى چيقدقچه
هان ياننه چاغيره رق :

— سنى نه قادار سهوييورم فاخر ، دييوردي . اسكيسندن ده چوق ...
بشنجي آلتنجى كونلرده برر ليتره سود اچمه بيله جك قدر ايلك كورولديكى
اولدى . فقط ينه بردن ييرتيجي ، قوپارتيجي او كسوروكلرله تكرار صارصيلدى .
تسمم تهلكهسى آزالاش ايكن بيله ادرارده حالاقان ، حالا اييودا كسيك دكلدى .
شيمديدن صوكراده اك زياده تننورد ييودك توليد ايدم جكي نتايج تهلكه ليدى .
درقتورلر معده ايله بوبره كلرده بوقادار تحريباتدن بر اثر قالمازسه معجزه
اولور ، دييورلردى . قورتولسه بيله بوتون حياتنده معده نك ، مثانه نك وظيفه سنى
ايجه ايضا ايدميه جك قادار خراب اولماسى لازمدى .

معلا ايلكه يوز طوتدقچه آرادم بر عصيله شير كى اولويوردى . ايلك
كونلرده فاخره قارشى او قدر صيچاق ايكن ، صانكه اونى نهايت اينانديره بيلمك
بهاسنه بوتون بو اوجاعه تحمل ايد ييورمش كى كورونور كن ايشته بر ايكي
كره در اوافق تفك سرزنشلا يامه يه باشلامشدى . هله آنهسى كونك برنده
قيزينك تارشوسنه كچمش ، بو ياپدينى ده ليلكك صانكه نه يه يارادينى ايلرى سورهرك
اونك عزت نفسنى دريندن درينه قاناتمشدى . اوزمان اوده فاخردن شكايث
ايتمش ، صوك كوئى كنديسنه اغير سوزلرى روا كورديكنى حتى نه آرامزده هرشى
يتمشدر . بواز دواج يالكز ظواهرى محافظه اچون اولاجقدر . « ديديكنى بيله
سويله مشدى . فاخر ، خدمتجيلردن ، فيخامت خانمدن بوكا بكزهر ديدى قوديلر
ايشدجكه چوق متأثر اولويوردى . هرشيدن اولاك كوچوك هيجان بيله معلانك

صحتی ایچون تهلکلی اولابیلیدی . صو کرا بوخستهلق دورنده یاپیلان تاقینلرک
تأثیری داها قوتلی اولاجق ، حقیته آنه سنک دیدیکی کبی معلا بردن بره
کندیسندن صوئویه بیله جکدی . اوزمان آرتیق استقبال امیدلری بوس بوتون
سونه جک ؛ مؤبد بر آ کلاشامازللق ، کچیمسزلک ایچنده هر آن :

— سن بونی یایمادکی ..؟

— سن ده بویله سویله مه دکمی ؟.

دیه بربرینه قارشى اوزاقلق دویاجقلردی . معلایه بونی سویله دیکی زمان
اوده خطاسنی آکلامش :

— سن مراق ایتمه ، بن هرشیئی دوزه لیرم .. دیمشدی . فقط بو کر کینلک
برتورلو آزالمیور ؛ آراده بر ، اونک ینه آنه سنک باباسنک سوزلرینه اینامش کبی
دارغین دوردیغی اولویور ، برطرفدن ده حالا کندیسندن کیزلی کیزلی شکایت
ایتدیکی فخامت خانمله محی الدین بکک حالندن آکلاشیلوردی . بواطراد سزلق
شبهه سز ، خسته لغک نتیجه لیریدی . اونی مؤاخذه ایتک انسانک خاطرینه کلزدی .
فقط فخامت خانم کیتدکجه چکیلمز برحاله کلیوردی . ایلک کونلرده صانکه بو
فلا کته یاواش یاواش توکل ایدهر کبی کورونور کن بردن رده تکرارده کیشمشدی .
هر راست کلدکجه اونی کوزلریله زهرله یه جک کبی باقییور ، بوغاجق کبی
دیشلرینی صیقیوردی . آنه سنک بوشدنی معلا بیله حس ایتمش ، بر آراق اونک :
— داغلر کبی کیرلی چاماشیر بریکدی ..

دیه باغیردیغنی دویونجه فاخره :

— دیشاری چیقدیغک زمان آمان برقاق اوققه صابون آل الله عشقنه ،

دیه فصیلدامشدی .

نهایت بر آقشام فاخر ینه قاریولانک آیاق اوچنده اوطورور کن فخامت خانم
خشونتله اودادن ایچری کیردی :

— بوراده اوشورسکز ، دیدی آشاغی یه ، صوبالی اودایه کیدیکز .

— تشکر ایدرم ، فقط هیچ اوشومه یورم . اوته کی :

— کیدیگز دییورم سزه... دیه آیاغنی یره ووردی. او کوندن صو کراده نه زمان اودایه کیردی ایسه خدمتجیلردن بری کلیور :

— فاخریک کندی اوداسنه کیتسون دییورلر، دیه اونی دیشاری چیقارییوردی حال بو که معلادن بر تانیه اوزاق دور مق بیه فاخره جهنم عذابلری ویریوردی. اونک باقیشندن ، نفس آلیشندن بر آز اییشمه مژده سی آلا بیلیمک ایچون قابل اولسه بوتون کونلری ، حتی کیجه لری قاریولانک آیاق اوچنده کچیره جک، معلا قور تولونجه یه قادار هیچ یانندن ایریلله جقدی . بر قاچ دقیقه اودادن دیشاری چیقسه : « عجبا نه اولدی ؟ » دیه یوره کی چارپیور ، هله استابوله ایندیکی کونلر بوس بوتون خراب اولویوردی. ترندن چیقنجه طانیدقلرک یوزنده یأسه بکزر برشی کورمکدن قورقویور؛ اودن بورالره قادار عکس ایتش فلاکته تصادف ایتک خاجانیله بوغولویوردی. اوزاقدن اوی کور ووجه یانان لامباردن، پرده لره عکس ایدن کولکه لردن بر معنا چیقارمايه چالیشیور ؛ چنغراغی چالارکن : « عجبا شمدی اونی نصل بولا جیم ؟ » دیه تیتیریوردی . آرتیق بو قادار جانندن مربوط اولدینی سهو کیلیسنک یانه صوقامق ایستدکلری زمان هیچ برشی دیکله مه سی قابل دکلدی .

فقط ینه بر کون فریدون بک کلدی ؛ معلانک فضله هیجان دویماسی ، متأثر اولماسی لازم اولدیننی، بونک ایچون ده بر مدت کندیسیله کوروشمه مه لری فنا ایجاب ایستدیکنی قطعی صورتده سویله دی . فاخر اونی پک کوچوک یاشدن بری ناموسلو برکنج دیه طانیردی . چو جو قلقد بک سویشیرلردی . صو کرا فاخره مائله ایچنده بو قادار محرم بر موقع ویریلدیکی کوندن بری بریسنک آزچوق کز مه ، اکنمه عالمترینه دوشکون اولماسی، اوته کینک ازوایی ترجیح ایدر کی کورونمه سی آرالرنده دائمی براوزاقلغه سبب اولمشدی . بلکه بر آزاکن ، بر آز لاقیدیارا دیلشلی اولان فریدونده حتی فاخره قارشى برودته بکزه یین بر دور غونلق بیلله وارادی . شمدی فنه عطف ایدیان بو مجبوریت برآز تحمافرسا ، برآزده حقیقتک یاننده شبهه لی کورونمکه برابر معلانک صحتی نامه بوکا راضی اولمق لازم کلیوردی .

ایشته او کوندن صو کرا فاخری خسته نك اوداسنه سوقادیلر . صیم صیقی قاپانمس قاپینك آراغندن اونی کورمك امکائی بیه بولا مادیغی زمانلر سینی اولسون دویمایه چالیشیردی . فقط خسته ایچون کندی حضورینك ضررلی اولاجغنی برتورلو قبول ایده میوردی . چونکه معلا ، اتخاردن صو کرا کندینه کلدیکی دقیقه دن اعتباراً کوزلرینی فاخره چه ویردجکه او دونوقلق ایچنده آنسزین آله ولر طوتوشویور ؛ هپ سنك ، هپ سنك ایچون دیهن برباقیشله اوکا سعادتلر ویریوردی . او یله ایکن ناضلی اولوب ده اوته کیلر :

— سنی کوردجکه خسته اوزلویور ، صیقیایور .. دیه بیلورلردی ؟ .

شباطك اونی فاخره دوغدیغی کوندی .

او کونی برابر کچیرمه یی هر زمان قونوشورلردی . معلا بو اولوم حالنده ده

قاچ دفعه :

— اون شباطه قادار اییلشه بیلسم . . . دیه هپ بونی خاطر لاش هپ

بونی دوشونمشدی . ایلت آکلاشدقاری کوندن بری هر دقیقه یکی یکی هیجانلرله

فاخره سوقولان کنج قادین ، شوصوك حمالی کورولتولر آراسنده بیه هیچ

ده کیشمه مش ، کندیسنه بوقادار باغلی قالمشکن عجباً ناصل اولوب ده بردن برده

باشتالاشمادی . آیلردن بری اونده هر کون یکی بر فوق العاده لکله تجلی ایدن

سهوکییه اکر او فاجق بریالان قاریشمش اولسهیدی ، دون کوزلری آرتیق اولوم

اویوشوقانی ایله قیصیلشمشکن بونی ده مطلقاً افشا ایتهمسی لازم کلیردی . ایچنده

جهنملر طوتوشدیران آجیلر آراسنده بیه او ، کندندن زیاده فاخری دوشونمش ،

هرثانیه یاننده اونی آرامشدی .

او حالده معلای آنسزك کندیسندن اوزاقلاشدیران نه اولابیلیردی ؟ مطلقاً

اوته کیلر :

— اونك یوزندن بوقادار آجی چکیورسك ده حالا اونی می دوشونویورسك ،

باق او ، بر کره کلوب سنی صورو یورمی ؟ . هیچ سنی سهو سه بویله می اولوردی ؟

دیورلر ، دوروب دیکله نمهدن ، اونك اك ضعیف طرفه هجوم ایدیورلردی .

برباشقه شی ، بوتخمینک نه قدار دوغرو اولدیغنی ده میدانه چیقاردی . ایرتسی آقشام
فاخر اوه کیش ، اوداسنه چقیوردی . صوفاده بویوک خانمه قارشى قارشى به
کلدیله . قوللرینی صیوامش ، آبدست آلمغه کیدرکن اختیار قادین ، فاخرى کورونجه
ماصهیه طوتونه رق دوردی :

— آیول زرده سک دیدی بر کره مراق ایدوبده باقق یوقی ؟ .
هانی بربریکزی او قدار سویور ، طوتوشویوردیکز ؟ . قیزجغز ،
تره ن زمان کله جک دیه کوزلرینی ساعتدن آیرمادی ؛ هر قاپی چالندجه ایچی
تیتریوردی . قاچ دفعه بگا بش تره نی بورایه قاچده کلیور ، دیه صوردی .
دیمک که اوته کیلرک قرارندن بویوک خانمک خبری یوقدی . عجباً معلا
فاخرک ایچری کله سنه باباسنک مانع اولدیغنی بیلمیورمیدی ؟ . طالبو که فریدونه
قونوشورکن کندیسی :

— فقط معلا بوکا راضی اولاجغمی ؟ . بنم بویله اوزاق دوردیغمی
کورونجه بوس بوتون اوزولمه سون ؟ . برکرده اوکا سورسه کز ... یاخود
هیچ اولمازسه بوکا فن نامه مجبور اولدیغکزی کندیسنه ده آکلاتکز .. دیه
رجا ایتش ، صوکر فریدونده بوکا جواب اولارق :

— سویله دک ، قبول ایتدی ، دیمشدی .

عجباً اوده می یالان سویلیوردی ؟ اکر او یله ایسه ، معلا بونلری بیلمیورسه ،
کیم بیایر کندیسی ایچون نه لر دوشونویور ، نه قدار اوزولویوردی .
اونجی ، اون ایکنجی کونلرده بویله کچدی . معلا یی کورمیه لی بر هفته
اولویوردی . برکیجه دادی معلادن خبر کتیردی :

— کوچوک خانم مطلقاً سزی کورمک ایستیور ، دیدی . کیت سویله
دیه آند ویردی . صوکراده دوداقلرینی بوکدی :

— بیلمم که بک افندی ده اذن ویرمیور ، ناصل اولاجق ؟

فاخر ، هم ویردیکی سوزی طوتمش اولیق ایچون ، همده خسته لق حقیقه
بو اوزاقلنی امر ایدیورسه اونى تهیج ایتهمک ایچون فریدونه دانیشدی :

— معلا چاغیرتمش ، کیده جکم ، دیدی .

فریدون ینه اسکیزی کی هرشیئی اوزواللی طبابته یوکلایه رک بونک قطعاً جائز اولمادیغنی سویله دی . فاخر اصرار ایتک ایسته دی :

— پکی آما ، اوده پک کورمک ایسته یور . کیتمه سهم بوس بوتون اوزوله جک . هم اسکیزی کی تهلهکده قالمادی ، صانیرم .

دایسی عینی اصرارله مقابله ایتدی :

— اونکه قونوشورسه کنز خسته یی اولدورمش اولورسیکنز ! . ویردیکنز سوزی اونو تماییکنز .

معلانک حیاته دائر سوز آچیلنجه فاخر شاشالیور ، هرشیئه : « پکی ! » دییوردی . بوسفرده اضعیف نقطه یه دوقوندیله ، ینه کوروشدیرمه دیلر . بوتون کیجه : « کیم بیلیر ، بکانه قادار قیزیور ، اکر بیلیمورسه ... » دیه اوزولورکن بونی ده ینه اونک سعادت ایچون یایدیغنی دوشونوب تسلی آرایوردی .

دیگر طرفدن فریدونه ده نه زمان اونک صحتی صورسه ، صانکه عنادینه کی همان دایما امیدسز کورونور ، هپ تهلهکلردن بحت ایدردی . فقط کنیدی ، قاپی آرالرندن معلانک سسی دویمایه چالیشیور ، آرتق اؤک ایچنده یاواش یاواش دورولان هوادن ألوم قورقورلینک آزالدیغنی حس ایدیوردی . بو قادار کورولتو فاخری ده خراب ایتش ، بوتون سیکیرلرینی چوروتمشدی . ساده برآن اولامیور ، جکرلرینی سوکن بر او کسور وکلایه قوسوز ، صارصاق ، دولاشیوردی . بر آقشام دادی محی الدین شوقی بکدن کوچوک برکاغد کتردی :

« بر قاچ کون ایچون بزی حضور کزدن عفو ایدیکنز . »

کنجدر ، بر کنجک ناصل دویوب ناصل درشوندیکنی بیلیر دیه بوش بر امیدله فاخر ، همان فریدونه قوشدی . او ، ینه هر زمانکی کی ، دورغون بر دو - قور لسانيله :

— تهلهکه آرتیق آزالمش عد اولونه بیلیر ، دیدی . فقط نگاهت دورنده

خسته نك مطلق بر استراحتہ احتیاجی واردرد. اوافق بر هیجان هرشیئی آلت
اوست ایده بیلیر. اونك ایچون بوس بوتون اییلشنجهیه قادار بونوع تداییر پك
ضروریدر. سزك ایچون ده قورقاجق بر شی قالمادی. آره صیره بنی کورور
خبر آلیرسکز.

بو قادار اصرار قارشیسنده مقاومت ایتك قابل اولامازدی. چاره سز،
کویدن بر مدت ایچون اوزاقلاشه جقدی. ناصل کندیسنی خسته نك یانه
صوقیورلر، مغلايه: «باق، کلوب ده سنی بر کره صورمیور. .» دیورلر سه
شمیدی ده اونی اودن چیقاردقدن صو کره: «کورویورسك یا، سنی بر اقوب ده
ناصل کیتدی. سن اونك ایچون کندیکی اولدورمهیه قالدك آما او، بوراده
برایکی کون بيله اوزونتویه دایانامادی، قاجدی!» دییه جکلردی. اونی ده
بیلوردی.

فاخرک دفتردن: ۱۶ شباط ۳۳۸

آلمك قارا یازیسى ایله کونی کونه بوصحیفه لری ده قاراتمزدن اول، بوندن
اولکی دفترک غائب اولدیغنی یازایم. ناصل اولدی بیلمیورم، ال چانطامده کلیتلی
دورویوردی. قاچ کوندر بو کورولتونك آراسنده برشی یازمایه وقت اولماشدی.
صوك کونی کویدن اینرکن یرنده بولامادم. فریدونه صوردم، او ایچنده کیمسك
خبری اولدیغنی سویله دی. کیم بیلیر، بونده ده نه مقصدلری واردرد؟ برشی دکل
بو کیدیشه بر تورلو آکلاشامیه جغز. هر کون یکی برشی چیقاریورلر، هر کون
آرامزده یکی براوچوروم آچیورلر.

بن ایسه اونلرک هپسنى نه قادار سه وییوردم؛ باباسنه کندی بابام کی باقیوردم.
آناسنه اكدربن حرمتارله، یوره کدن کلن شفقت اشتیاقلریله باغلانمشدم. قیزی بنم
ایچون بوتون بر حیات ایدی. اوکا اك مربوط، اك صادق بر قوجا، اوته کیلره
اك مطیع براولاد اولاجقدم. آرالرنده دویدیغم صیجاقلقدن باشقه بر سعادت

تخیل ایده میوردم . فقط جمعه کونکی چیرکین سوزلردن سوکرا ایچمه پک
زهرلی برانکسار چوکدی . اوانکسارله بنده ، هپ بو طاپارچه سینه سه و دیکم
انسانلر ایچون ، نه یالان سویلیهیم ، دفترمه چوق آجی شیر یازمش : « کیملرک
آراسنه دوشمشم ، یاربی .. » دیه ایگله مشدم .

بونو اوقویخه ، بیلورم ، چوق قیزدیلم . کیتدجه آرتان اوفکه نک اک بیوک
سبی ده هیچ شبهه سز بو اولاجق . شمدی ده ، امینم ، اللرنده اک قوتلی
سلاح دیه صاقلامق ایستیورلر . معلایه کوستره جکلر ، باق دیه جکلر حالا اینا میور
میسک ؟ .. سنک ایچون نه آغیر شیر یازمش . سنی هیچ سه و میورمش . حقیقه
او کونلر برشیدی ، آکلاتیماز برشی ؟ .. نه یادیغمی ، نه دوشوندیگی بیلمیوردم .
کیم بیلیر او هیجانله معلا ایچون ده نه لر یازدم . انسانک بعضاً او یلد حاللری اولویور که
که دوشوندیکنک عکسنی سویلیور ، حس ایتدیکنک بوس بوتون ضدینی دوشونویور .
نه یاپهیم اولدی بر کره ... فقط معلا بونلری اوقوسه بیله ، امینم که بکا داریلماز .
بنی اوقادار سه وهر ، بنمده کن دیسنه ناصل چیلغین حسارله مربوط اولدیغمی بیلیر .

بر هفته در شیشلیده ، تیزه مدهیم . شو صوک آیلرک بنی نه قادار خراب
ایتدیکی ایشته شمدی یاواش یاواش میدانه چیقیور . بعضاً ده برتورلو کندمه
اینا نامیورم ؛ بویله بر دن بره چو کن بنی یم ؟ . سوکراده دوشونویورم که بوقادار
اوزونتو بوقادار فلاکت ، اویقوسز کیجه لر ، یمکلره دشمن اولان براشتها
صباحدن آقشامه قادار یورغونلق ، اورادن اورایه قوشوب چیرینما ، ناصل اولوب ده
بنی اولدورمه دی ، اصل بوکا حیرت ایتمک لازم . . .

هر کون غزته یه کیدوب برقاق ساعت چالیشیورم . سوکرا هیچ بریرده بر
ثانیه دورمادن اوه کلیورم . انیشتهم ، تیزه م ، بنده کی بو دورغونلغی . کوردجه :
— نهک وار ، سکا نه اولدی ؟ . دیه سورویورلر . برکت ویرسون شدتلی بر
نزله اولدم ده :

— برازراحتسزم ، دیوب همان یاتاغمه چکیلیورم . صارصاق ودالغین بنی
شوراده بوراده کورنلر :

— نه اولدك خسته ميدك؟ ديه عادتاپانياميورلر؛ قاچ زماندر بنی کورمدکلری ایچون هپ خسته ایدم، صانیورلر. اوده کیدوب کلیرکن آرتیق اسکی دوستلره راست کلکدن قورقویورم.

شیشلیده کی آرقاداشلر، سپوردن اکلنجه دن، کز مه دن باشقه برشی دوشونمه. بن بوکنجلر بنی کوردکجه براقق ایسته میورلر؛ هر آقشام چاغیری میورلر. بن ده اللرندن قورتولمق ایچون هپسینه آری آری بریالان بولمايه چالیشیورم. کچنلرده ده دوقتور تحسینی کوردم. مطلقاً استراحت ایت، کز، اکن، هوا آل ديه سویله ندی؛ حتی بنی برآزده قورقوتاجق قادار اصرار ایتدی. حال بوکه جانم هیچ برشی ایسته میور. حیات، امید، آرتیق هرشی بنم ایچون سوندی؛ نه زمان وار که اسکی خولیلره مؤبداً کوزمی قاپادم. ذاتاً تکمیل قورقدقلم باشمه کلد. مکتبده ایکن مأموردیمزلر میدی، کوزمک اوکنه هپ شمسیه سنی اورتاسندن بوغمش، اللری چیقینی آداملر کلیردی. اونلره بکزه مه مک ایچون درت سنه در نه لر چکدم. تجارت تجربه سی زیاندن باشقه بر خاطره بر اقامدی. غزته جیلک عادتا قادین کی برشی. . . . سه ودرسه، ایسترسه سزی مسعود ایدیور؛ فقط ناصل بعض قادینلر هر فدا کارانی آز کورورلر، هر شیئه دوداق بو کرلر سه بومسلک ده طبقی اونلر کی وفاسز. دمین، قورقدقلمه اوغرام، دیدم؛ چونکه بن ده مأمور اولویورم. کچنلرده غزته نک بر ایشی ایچون شمندوفر قومپانیاسی دیرکتورلرندن بریله طانیشدم. نه دنسه بکا چوق توجه کوستردی؛ یاخود کیم بیلیر بکه ده ساده جه بر غزته جی یی قازانمش اولمق ایچون دیدی که:

— مادام که بزم تره نک کذرکاهنده اوطورو یورسکز. کلکز، سزه او خط اوزریده برمفتشات وریم. قومپانیانک سزک کی کنجلره احتیاجی یک چوق. . . . شمديک بو وظیفه، لیاقتکزله یک متناسب دکل آما، بر کره باشلامش اولکز، صوکره چابوق ترقی ایدرسکز.

بو، هیچ خاطر مه کله بن بر شیدی. مکتبده ایکن، نه یالان سویلیه یم تعالینک اک اولاشیلماز ذروه لرنده کوزم واردی. فقط شمدي استراحته اوقادار

محتاجم که بونی بیله قبول ایتدم . ذاتاً حیات انسانی چامور کی ویحیق ویحیق
 اُزد کدن صو کره ایسته دیکی قابله صوقویور . هله بو مأمورک بوینی برده ایچ
 کووه ییلکی ایله بو کوکره، ایسته بنم بو کونکی حالم... کوندوزدا ئره ددیر کتورک
 قارشوسنده ازیلوب بوزولمک، کیجه اوده قان آنانک حضورندن کلین خانمک حریمه
 قادار هپ کوزلری یرده یاشامق بنم ایچون ده مقدرمش . اونلری ، بو مأمور
 وداماد تیپلرینی کوردکجه اسکیدن نه قادار آجیردم . یچاره لر ، قان پدر بر حیات
 ایکن : « یمکه بویورک !. » دییه دعوت بکلرلر، صو کره کونک برنده آدمجغز
 اولونجه ، یا حودده : « آل قاریکی ، کوزوم هیچ بریکزی کورمه سون !. بو
 قادار بسله دیکم آلویرمه دیمی ؟. آرتیق الا الله ... » دییه بوس بوتون قانی پی
 کوسترنجه ساده کندی اوموزلرینه آویلان معیشت یوکنک آلتنده بوتون سعادت
 خولیا لریله برابر چو کرلر . بویله وقتندن اول کوچش قاق کیشی طانیورم . هپسی ده
 آقشاملری آلی بوش دونمه مک ایچون محاسبه جینک کوزلرنده مروت آرارلر ؛ صو کره
 علی الحساب بر قاق لیرا ایسته یه ایسته یه عزت نفسلرندن هر کون برپارچه سنی فدا
 ایتمه یه آلیشیرلر . قاریسنک پارماغنده کی نشان یوزو کنی صاتوب ده یکی دوغاجق
 چوجوغنه قونداق تدارکنه چالیشان ، اوده کی خسته یه علاج آلمق ایچون
 کندی اوکا یمکلرندن محروم ایدن ، طوپ قاپیدن کوپری یه یایان کیدوب کلن
 اوپله زوالیلر وارکه ، کندی بیلدم بیله لی ، نه زمان بر هائله قورومنی
 دوشونسهم اونلرک ایکی یه بو کولش هیولالری بر تورلو کوزلرمدن سیلنمزدی .
 بونک یاننده انسان اولومی بیله سعادت تلقی ایدم بیلیر . هم اوپله بر سعادت که
 اوکا قاووشوب بر از دیکله نمک بیله آرتیق سزک ایچون قابل دکلدیر .
 یأسدن دوغان بر اراده ایله بوتون حیا ته کوزلریکزی قاپامق ایستره کز
 بیله آرقادن اوزانان مینی مینی آلر ، یاورو کزک آلری صوک قوتوش
 یولارینی ده قاپار .

ایسته بنده اونلردن بری اولویورم ؛ هم مأمور ، هم ایچ کووه ییسی .. هم
 اوپله بر ایچ کووه ییسی ، اوپله بر صیغنتی که اونلرک اک طالعه سزی هیچ اولما زسه

بر قاج آيلق طاتلی بر رؤیادن محروم قالماز ؛ اك كوزه باتانی ايلك كونلرده
ينه ازچوق التفات كورور. بن ايسه بو عائله نك يانسه باشی یرده بر محكوم كبی
کیردجكم . صوكراده كیم بیلیر نه اولاجق ؟. هله فخامت خانم ، بكانه لر
ياپاجق ؟. خلقتك اونده خيرچينقله چيلغينلغی ناصل بر برينه قاریشدیردیغنی
تام آلتی آیدر کیجه لی كوندوزلور بر كچن بر حیات ایچنده پك یاقیندن كوردم ،
او كرندم .

بو طاشقینقلر هپ بندن باشقه سنك اوستندن آشوب كوپوردیکی حالد
بيله نه دانیلماز شیدی !. هله شمیدین صوكره اوك ایچنده ، محقق كه ، هر
تعريضك ، هر حقارتك هدفی ساده بن اولاجم . آرتیق بنم كبی بر صوچلو
واركن ایجتكم ایچون او ، قاین آناسنی ، قوجاسنی ، دادی یی ، قیزی
هپسنی اونوتاجق ، هپ بنمله اوغراشه جق ؛ بونلرك هپسنی بلیورم .
ايلك كونلرده ، هپچ اومیورم ، آما ، بلكه بر آز جبری بر سكون ،
خسته نك خاطری ایچون بر آز اعتدال كوسترمك ایستیه جكلردر. فقط كونك
برنده فخامت خانم افندی ینه بردن بره جوشاجق ؛ بو سفرا او جوشقونلغك
اوكنه اك اول بن راست كله جكم ؛ بر ایچ كوو هیسی كبی .. آرتیق اوك
ایچنده نه اولسه قباحه مطلقا بندر . یمكلرك طوزی آز كلسه ، ات بهایه
چیقه ، كدی بارداق قیرسه ، نه دیهیم ، او كون هواده بر ده كیشكلك اولسه
سوز دونه جك ، دولاشه جق ینه بنم اوستمه كله جك ، بكا چاتمق ایچون هر
حالد بر بهانه بو لونه جقدر . شیمدی یه قادار بوكا بکزه ر نه لر كوردم . او ،
هپ دوروب دوروكن :

— بز كوچوكل كمزده بویله آلیشما دق كه .. دیه باشلار ، هر شیئه قصور
بولور ، هپچ بر شی بكنمزدی . شیمدی بونلری ینه کیجه لی كوندوزلو
تكرار ایدجك ، هم آرتیق بر قان آنا تیتیزلكیله ..

یا معلا ، او زواللی نه اولاجق ؟ اونی بندن صوئوتمق ایچون داها شیمیدین
نه لر یاییورلر . حتی بنی ساده جه بو مقصدله اودن اوزاقلاشدیردق لرینه ده آمینم .

صوكره حياتم بوس بوتون برلشنجه اصل اوزمان كيم بيلير داها نه ياپاقلر.
بي چاره آرتيق او ايچنده اك كوچوك حقدن بيله محروم قالا جقدر. صره سي
كلدجه آنه سي :

— اوح اولسون !. سنده بو حريفه وارميه ايدك !.. ديه اونك سوز سويله
مه سنه بيله ميدان ويرميه جقدر .

خاير ، خاير ... بوكا دايانمق قابيل دكل ... هله معلانك بنم يوزمدن اوزومله
سنه هيچ راضي دكل . براز ايله شسون ، نه ياپوب ياپمالي آناطوليك بر كوشه سنه
چكيلوب بر قاچ سنه اونلردن اوزاق ياشامالي . هر شيشي اونو تمق ، هر كس
طرفدن اونو تولمق ايچون بوندن باشقه چاره بولاميورم . ذاتاً معلاييله آرامزده كي
اك صوك قورقولي رؤيانك خاطره سني ده سيلمه يه محتاجز . بونك ايچون هر شيشي
ده كيشديرمك ، ماضيدين بوس بوتون اوزاقلاشمق ، يكي بر حيات
آرامق لازم .

آرتيق صوك حادثات اونك نه ممتاز ، نه مستثنا اولديغني بوس بوتون اثبات
ايتدي . بو حكايه ده هيچ بر كنه اي اولماديغني او كرندم . اويله كه زواللي ، اك
كوچوك شيلري بيله كنه ظن ايدجك قدر فنالغي ادراكدن اوزاق ... ذاتاً
او آراق بنم بوتون چيلغينلقلر مه سبب ساده آنه سنده كي احتراض ، قيزينك ده هپ
بو احتراضه قربان اولوشيدي . يالكر يالاني سويلر كن دوغرويه او قادار بكره تيور
دي كه بنم كنديسنه قارشى بوتون حق سزلقلرم هپ بو آلدانمق ، آلداتيلمش
اولمق قورقوسيله باشلادي .

حالبو كه بي چاره ، بويالان بيله ديمه يه لايق اولمان خطانك جزاسني صوك
كونلرده ناصل فجاعتله چكدي . هله بو ، بنم نظر مده اونى يوكسه لتهن اك زياده
بو اولدي . او ، نه قورقونچ اراده ايمش ، ياربي !. دوم دوز كورونن بر روحك
دهرينلكنده بو قادار اعوجاج كيمك خاطرينه كليردي ؟.

اونك ، بر قاچ آي اول جيو جيلوردن الك پاي تاغني ، اك صيسقه سني آلنه آلوب ده :
— ايشته سزه جواد بكك كوچوكلك حالي !.. ديه اولك ايچني قهقهه يه

بوغوشی کوزمک او کنه کلیور. اوزمانکی چوجوق روحی ایله بو کون آرالرنده
نه قادار اوزاقلق وار !

۲۰ شباط ۳۳۸

شمذیک انسانی بونالتان برحرکتسزک ایچندهیم. یکی هیچ برشی یوق
صحنده خیلی دوشکونلک حس ایدیورم. نشئه سز بر حیات ... هیچ بریره
حیقمیورم. قومپانیاده کی مأموریت مسئله سی تحقق ایتدی ؛ یارین ایشه باشده جغم.
بوصباح عزته یه اوغرا دیغم زمان خسنه اولدینمی سویلدم ؛ برمدت ایچون چالیشه
میه جغم، دیدم. اوکله دن صوکره فریدونی کوردیم. معلا برآز داها ایجه ایش ؛
اولوم تهاکسی آرتیق اسکیمی قادارچوق دکلس. یکی برشی اولمازسه قورتولماسی
محقق ایش. فریدون بونلری سویلر کن الی غرام تننوردیو دایچن برانسان ایچون
بویله بر نتیجه فنا معجزه در، دیوردی. ایچیمده آرتیق سکونته بکزه برشی
دویویورم معلا ایله شیور، اونی یاقینده تکرار کوره حکم دیه دوشونویورم. بنم
ایچون بو، برقوت اولویور ؛ مادتا اوامیدله یاشیورم.

بو آقشام اوده اسکی کاغذلرمی قاریشدریوردم. آله چوجوقلق زماننده کی
دفترلر کچدی. اوزون اوزون اونلری قاریشدرم. ماضی یی بویله تکرار یاشار
کی کونی کوننه کوزینک اوکندن کچیرمک انسانه نه غریب برذوق ویریور
بن بونلری یازارکن هپ اختیارلق کونلرینی دوشونوردیم. آلتش یاشنه کلنجه
« قرق سنه اول بن نه خلطلر ایتشم ! » دیه بو دفترلری بر داها اوقومق
خوش برشی اولاجقدی. بوکا بکزر برذوقی بن بوکون طاندم ؛ ساده ذوق
دیمیهیم، او اختیارلقده دویولاجق خسرانده شمیدین کندینی طانیتدی. ایشه
آلتی یدی سنه اولکی دفترلرده کوزمه ایلشن بر صحیفه :

۱۶ کانون ثانی ۳۳۱

کچنارده فریدون بکه تونلده راست کیشدم. محی الدین شوقی بک کلیولیدن
کلش. بوکونده برآرالق کیدوب اونلری زیارت ایتدم. فخامت خانم تورم

ایتمش ؛ یاتیوردی . اسویچرہیہ کوندردہ جکلرمش ؛ اونک حاضر لگیلہ مٹغولدیلر
قزلری معلای نہ زماندر کورمہ مشدم . صاریشین ، نارین برچوجق . . انسانہ
بر بوشلق ، صانکہ شفاف برشی ، بر دومان حسی ویریور . آلمان مکتبہ
کیدییورمش . محی الدین شوقی بکلہ بوتون مناقشہ لرمز ہپ بو آلمان موداسی
اطرافندہ ساعتلرجہ اوزادی . . .

کوزمک اوکنہ اوآقشام کلدی .
معلای او مینی مینی حالیلہ کوزلرینی آنہ سنک کوزندن آییرمیوردی . زمان
ناصلدہ کچیور ! . بو کونلر کیمک خاطرینہ کلیردی ؟ . . . ہلہ بو صحیفہ یی
او قودقدن صوکرہ حیاتمک صوک کونلرینی کچیورم صاندم . کندمی
کنجکلکن او قادار اوزاق بولدم . بن بو دفترلری شمدی یہ قدر ہپ کندم
ایچون یازار ، باشقہ کیمسہ کورہ جک دیہ قورقادم . اک صوکجیسی اونلردہ
قالمشدی . شمدی آلہ کچسہ کندی آللہ یاقایی ، اورتہ دن قالدیرمایی نہ قادار
ایسترم . معلایلہ آرامزدہ کی قورقولو رؤیایی سادہ او صحیفہ لردن دکل
کوزلرمدن بیلہ مؤیداً سیلمک لازم . ہلہ ، اللہ اسیرکہ سون ، بویازیلر بریابانجینک
آلہ کچسہ . . . بونی دوشوندجہ خستہ کبی اولویورم . سادہ اونی دکل ، ذاتاً
ہپسنی اورتادن قالدیرجم . سنہ لردن بری بریکمش مکتوبلر ، جوابلرینی ،
اوافق تفک خاطرہ لری ، رسملری ، یادکارلری بوآقشام اوست اوستہ ییقدم .
ناصل اولسہ بوس بوتون یکی برحیاتہ کیرہ جک ، بام بشقہ بر آدم اولاجق
دکلی یم ، آرتق بونلری دہ یاقایم ، یوق ایدہ یم ، دیدم ؛ بردورلوآلم وارمادی .
ہلہ باآلم صوکرہ ، دیہ ہپسنی تکرار کلیدلدم .

۲۶ شباط

اوتہ کیلردن حالا سس صدا یوق . آرادہ بر فریدونہ تلفون ایدوب معلای
صورو یورم . قیصہ جہ : « فنا دکل ، برآز دہا ایجہ . . . » دیور . اسکیدن

کندم کیدیوردم . بکا او قدر صوئوق ، او قدر آغیر داوراندی که چکنمیه باشلادم . تلفوندهده برایکی دفعه : « پکی آما برکون بولوشسه قده بر آز قونوشسه ق ، دوشونوله جک اوقادار ایشلرمز وار . وقت کچیرمه دن بر قرار ویرسه ک . . . » دییه جک اولدم . « بویله برشی اولوسه بن سزه خبر ویریرم » دییه همان قاپادی .

آرادن برآی کچدی . فاخر معلای کورده مه مکدن طوتوشویور ، اوته کیلرک حالا متردد داوراندقلرینی حس ایتدکجه یکی بر فلاکت قورقوسی باشی دوندوریوردی . کیم بیلیر ، زواللی معلایه نه لر تلقین ایدیورلر ، اونی کندی علیهنه چه ویرمک ایچون نه لر سویلیورلردی . بوقادار کورولتو ، بویله بر فلاکت معلای ذاتاً ضعیف دوشورمشدی . یایدیغی چیلغینلغک نتیجه سز قالدیغی دوشونمک بیله اونک غرورینی یرتیور ؛ آناسنه باباسنه قارشى پک عظیم بر حجاب دیویوردی . بو پریشانی ایچنده اوته کیلر آرتق نه سویلسه لر قبول ایدمک ، ده آنه سنه تکرار خوش کورونه بیلمک ایچون کیم بیایرنه لر راضی اولمیه جقدی . فحاشا خانم ، « کندی ألمله تابوته قورده اوکا ویرم . . » دییه یمین ایدمن بوقادین ، قیزینک شمدیکی ضعفندن استفاده ایتمک ، اونک ذهنی چامک ایچون عجبا نه لر یایمیوردی ؟

دیگر طرفدن ، نه ده اولسه وقعہ بوتون کویده دیولدیغی ایچون ظواهری قورتارمق لازمدی . حتی ساده جه بو اندیشه ایله نکاحک همان قیلمه سنی الک زیاده اونلر ایستیورلردی . فقط فاخر ، بویله هر کس طرفندن دیولمش اولمای خاطر لادجه بوس بوتون یانیوردی . چوجقلانندن بری باشقلرینک سوزلرینه پک اهمیت ویرمز ، حتی یالان یا کلس اسنادلره کولردی ده ؛ فقط قابیلرده یر طوتان حسلر آنجق هر کسدن کیزلی قالدجه قیمتلی اولای بیلیر دیه دوشونور ، باشقلرینی کندی محرمیتنه سوقماق ایچون او حسلری انکار ایتمیه بیلیر راضی اولوردی .

شمدی یه قادار اوتە کینک بریکینک آغزینە دوشمکدن ، ایگری باقیشلره ،
 اوزاقدن فیصلیلرله کوستریشلره ، مستهزی تبسملره هدف اولمقدن او قادار
 قورقارکن صانکه عنادینه کبی ایشته بوسفر هرشی دویولمشدی . معلانک
 اتحارینی صاقلامق قابل اولماش ؛ طبیعی بوکا برسبب کوسترمک ده لازم کیش ،
 حتی وقته یی دویانلر ذاتاً بر اؤک ایچنده ایکی کنجک یاشاییشه اوتە دنبری معالی
 معالی دوداق بوکدکلری ایچون بوسبی کندیلکلرندن اورتە یه آتمشلردی :

— دویدیگر می فحامت خانمک قیزی تنوردیود ایچمش ؟

— آی اولش می قیزجغز ؟

— اولمه مش اما . . .

— هایدی جانم ، اویله ایسه کوستریشدر ؛ اتحارلر شمدی مودا اولدی .

— والله دکل دوقتورلر قاچ دفعه امید کسمش ، حالاده تهاکلی
 یاتیورمش . . .

— واء واء نه کوزل ، نه نازک بر قیزجغزدی . . . پکی اما سبی نه ایمش ؟

— بيلم ، هرکس برشی سویلیور . هانی اونلره برکنج چوجوق کیدوب

کلیوردی یا ، ایشه اونکله سهویشمشلرده ، آناسی باباسی راضی اولماش می ،
 اویله برشی . . .

— آ ، لا قیردی می بو ؟ . راضی اولیه جقلردی ، او چوجوغک او ایچنده

نه ایشی واردی ؟ . . زواللی قیزک نه صوچی وار . آناسی کوزینی آچایدی ده
 یاوروجنگ قاننه کیرمیه ایدی .

کویک ایچنده داها بوکا بکزر کیم بیلیر نه سوزلر کچمشدی . دنیاده اویله
 ایشسرلر واردر که اوتە کنی بریکنی چکیشدیرمه یه فرضت بولونجه خیاللرنده کی
 بوتون زنکینلکی اورتایه صاچارلر . ایشته اونلردن بر قسمی ده فاخری حقیقه
 بر عرض دشمنی کبی کیردیکی هائله نک عصمتنه حرمت ایتمه مکله اتهام ایتشلردی .
 هله چاقینک بری :

— نه بجریکسز شی مش او ؟ . . انسان برقاچ آی کوکلنی اکندیردکن

صو کرا عیچ بر ایز براقمان صیویشمازمیدی ؟ . بن اولسه علم الله کیمسه نك
روحي دویمازدی . بدلا ! . . . اورتهلغی بو قادار ولوله یه ویره جك نه واردی ؟
دیه آلا ی ایتشدی . فاخر شورادن بورادن ، دوستدن دشمندن بویله بر چوق
شی دویو یوردی . بوتون قورقدقلری کبی بوده باشنه کلشیدی . نه قاداردوشونسه
ایلك بولدیغی چاره دن باشقه خاطرینه برشی کلیور :

— معلا ایله شسون ، دییوردی ، بوراده بردقیقه بیله دورماملی . . بلکه
او زمان هرکس بوفاجعه یی اونوتور ، بزده بر از سکونه قاووشورز .
کونك برنده فریدون بکدن خبرکلدی ، بولوشدیلر . معلا آرتق ایلشمه یه
باشلادیغی ایچون قطعی بر قرار ویرمك زمانی یاقلاشمش ، محی الدین بکك
آرقاداشلرندن عطا بکده قیز طرفندن وکیل اولمشدی . فاخرله فریدون
کیدوب خارجه ده اونی بولایلر . مسئله نك بر آن اولحلنی هپسی ایستیوردی .
ساده فریدون بک :

- قیز طرفنك اوافق بر شرطی وار . دیه سوزه باشلادی . دولاشیق بر
مقدمه دن صو کره دیدی که :

— انشته م کاحك متقابل حقوق ایله عقد ایدیله سنی موافق کورو یور ،
قیز طرفی ده ارکک کبی طلاق حقنه مالک اولسون ، دیور .
فاخر ، بونکلیفی بر از حیرتله قارشیلادی !

— پک اعلا ، دیدی . ازدواج رابطه لرینی علمی بر قفا ایله محاکمه ایدنجه
قادینك حقنی ده غایت طبیعی عد ایتك ایجاب ایدر . ذاتاً بوزمانده ، انسانك
کندی سنی ایسته مین بر قادینه زورله یاشاماسی پک قابل دکلدر ، ظن ایدرم . فقط
بونك هرشیدن اول ، صانکه اک مهم بر شرط کبی موضوع بحث ایدیله سنه قارشی
حیرت ایتهدم دیرسه م اوده یالان اولور . تنی ایدرم که ازدواج مقاوله سنه بویله
قیودك علاوه سی بر طاقم کیزی دوشونجه لردن ، مضمر قرارلردن متولد اولماسون .
ناصل دیهیم ، بو کون احضار ایدیلن زمینده یارین باشقه شیلره تصادف ایتكده
انسانك خاطرینه کلیور آما ، انشا الله بن یاکلش اولایم . . .

فریدون بك تامين ايتدی . عطا بك ده بواندیشهلك وارد اولمديغنى
سويله دی . صوكره ايكيسی يالكرز قالدقلى زمان فاخره دیدى كه :

— چوجوقيسك آبرادر ، بونك هيچ امكانى وارمى ؟ . قىز سنى نه قادار
سه وييور . بوسه وكى ايله شمدى يه قادار بونجه فداكارلغه قاتلاندى ؛ حياتى بيله
تهلكه يه قويدى . براسكى معلايى كوز اوكنه كتير ، برده شمدىكنى دوشون . .
اولدن طبقى آنهسى كى اوده ساده آت ، آرابا دوشونوردى . سنك ايچون
بونلك هپسندن وازكچن برقادين يارين هيچ آيرىلق ايسترمى ؟ . حتى آنهسى ،
باباسى اصرار بيله ايتسه ، آرتيق اوده چوجوق دكل يا قوص قوجا قادين ، سعادتلك
نرده اولديغنى البت ادراك ايدر . قورقاجق هيچ برشى يوق . . . بوساده جه طادت يرينى
بولسون ديه اورته يه چيقان برلاف . . بزم زمانم زده بويله شيلر يوقدى آما
شمدى عصرى ازدواجلر ، معلوم آ ، باشقه تورلو ! . .

اونك ده كووه نديكى ساده بوايدى . كنديسى ، ازدواجك معناسنى عمرلرله
برابر سون بر رابطه ديه تلقى ايدردى . معلا ده قوجاسنى سهودكدن صوكره
آرتيق آيرىلارينه احتمال يوقدى . حالبوكه فاخر ، كوزلرى قپالى ، ساده سكوتنه
قاووشمايى دوشونوركن اوته كيلر كندى ادعالرينى هيچ اولمازسه ايلريده يرينه
كتيرمك ايچون شمدیدن حاضر لانيورلر ، شمدیدن اونى بيك برحيله ايله باغلامق
ايستورلردى .

نهايت نكاح كونى تثبيت ايديلدى . فاخر كده اوكوندن اعتباراً كويه عودتى
قرار لاشديريلدى . بوتون بومذاكرات اشناسنده فاخرى آلت اوسه ايدن بر
شى داها اولدى . عطا بكي بونكاح مسائلنك حلى ايچون توكيل ايدر كن اوکا
برچوق تفصيلات ويرمشلر ، صوك اختلافلك عادلله معلا آراسنده بر رابطه
عقدى ايچون تادرت بش سنه اولكى تصورلردن چيقديغنى ده آكلاشمىدى . فاخر
بونى او كرنديكى زمان اولوم آجيلرى دويدى . آرتيق باشنى قالد يروب كز مه يه
بيله يوزى اوليه جقدى . هر كس بونى دويونجه بيك بر احتمال قوراجق ، كيم بيلير
نهلر سويله جكدى . الك زياده محى الدين بككره شاشيوردى . بونلر نصل اولوب ده الك

محرم شیلری یابانچی انسانلره افشا ایدیورلردی . دیگر طرفدن کنديسی
بوکابوسی اونو تمایه او قادار قوتله قرار ویرمشدی که همان او آقشام اوده کلنجه
چکمه سنی آچدی . کچنلرده بر تورلو قیامادیغی او اسکی یازیلری صباحه قادار
یکیدن اوقوددی . صو کرا برر بر هپسینی یرتدی . بونلری عمرینک صوکنه
دوغرو اوقومق ایچون صاقلامیورمیدی ، ایشته بو کونلرده آرتیق اولن بر
کنجکلک صوکلری ایدی .

*
**

تام بر بو چوق آی صو کرا بر مارت کونی ، فاخر عطا بکله بر قاق دوستک
آراسنده تکرار کویه کلدی . نکاحک عقدنده بوتون شرائطی قیز طرفه بر اقس ،
نه تکلیف ایدیلیرسه قبول ایده جکنی سویله مشدی . کنديسی اوراده حاضر ديه
مهر مؤجل ، مهر معجل مقدارلرینی ده اوکا صور دیلر . شکلیات اوزرنده بر
ثانیه بیله دوشونمک ایسته مدیکی ایچون اوته کیلر او چوز دیدی ایسه او بالعکس
بشیوز اولسون جوابنی ویردی .

شمدی یه قادار بو رابطه یی هر کسدن صاقلامش ، فقط آرتیق صوک کونی
تیزدسنه : « بن اوله نیورم » دیمشدی . انشته سی شاهین بک ، بر معتاد متفلسف
وتجربه کار طور یله نصیحت ویرمه یه قالقدیغی زمان نکاحک مشروط اولماسی
نقطه سنده ده دیمشدی که :

— پکی ، یا قیز سنی تطلیق ایدهرسه نکاحی اوده مه یه مجبور اولاجقمیسک ؛
بونی ده او کردن باغالم .

فاخر بونی صورمایه بیله تنزل ایتمه مشدی . بو عاتله فالجعه سی اورته سنده
اوله شیار دوشونمکله اوته کیلر بکرمش اولمازمیدی ؟ نه ده اوله بو قییدن
ایچری بر صوچلو کبی کیریوردی ؛ معلایه صاحب اولمق ایچون ده ذاتاً نه
دیرلرسه هپسینه راضی اولاجقدی .

نکاح سکونتله ، حتی بر آز برودتله عقد ایدیلدی . فریدون بک اولسون ،

محی الدین شوقی بك اولسون هپسی دورغوندیله. بو قادار کورولتودن صو کرا اولردن نشئه، خنده بکله نه مزدی؛ فقط بر قاچ یابانچینک یاننده ظواهری قورو مایه بيله لزوم کورمیورلردی. فاخرده، صاپ صاری، بر کوشه یه چکلمشدی.

بونی کوردهن غطا بك بيله کیدوب فریدونه:

— یازیق سکا، کنج اولاجقسک، دیمه یه مجبور اولدی. انسان هیچ اولمازسه بر قاچ کله ایله فاخری تریک ایتزمی؟ آرتق هر شی بیتدی، نه اولدی ایسه اولدی. بوندن صو کرا هپسینی اونوتمق لازم، فقط سزحالا صوئوقلقدن واز کچمیورسکز...

بر قاچ دعوتلی، یمکدن صو کره بر آز اوطوروب چیقدیله؛ عطا بك ده فاخرک قولنه کیردی. برابر استاسیونه دوغرو یورودیله. آریلیرکن:

— آرتق اوراسی کندی اوك دیمکدر؛ بر آزدن یاخود نه زمان ایسته. رسهك بر معتاد کیده رسك.. دیدی.

فاخر، آقشامه قادار وقت کچیرمک ایچون یایان قاضی کوینه ایندی. کچرکن قلوبه اوغرادى: کنج لر قوشویور، چارپیشیور، باغیریشیورلردی. ایچنی چکدرک، اوزاقدن بر آز اولنری سیر ایتدی. بوندن تام اون سنه اولنی دوشوندی. بر ادمان بایرامنده ینه بو چایرده ایکنجیلکی قازانان آفاجان مکتب چوجوغی، کندی چوجوقلنی کوزینک اوکنه کلدی.

نه قایغوسز، نه مسعود کونلردی اولر...

آقشام تره نیله دوندی. بر آزده کویده دولاشدی. اجزاخانه ده محی الدین شوقی بکه باقندی؛ بولامادی. صو کرا فریدونی کوردی، بر قاچ آرقاداشیله کزیوردی. فاخر، اوه یالکز کیتمه یه جسارت ایده میور، یا محی الدین بکله، یاده فریدونله برابر دونمک ایستیوردی. اوزون مدت اونى کوزدن قاچیرمما یه چالیشدی؛ آرقاداشلرندن آریلنجه یانه کیتدی؛ هیچ قونوشمادن کوشکه دوغرو یورودیله. قاپی یی دادی آچدی. هپسی آشاغیده اوطورویورلردی.

فخامت خانم فاخري باشيله سلاملادی . معلانك أئده بر اوركو واردی ؛
كوزلرینی قالدیرمادی . یالكز محی الدین بك بر آز شورادن بورادن قونوشدی .
فاخره یكی ایشنی صورتی . فقط بوده اوزون سورمیدی . ینه کندی آرالرنده
قومشولره دائر باشقه بر بحشه دوام ایتدیلر .

فخامت خانم ایلک دفعه سلام ویریرکن صانکه زورله ساکن کورونویور
کیدى . صوگرا ، لاف آراسنده کیم بیایر کیمدن بحث ایدیورلردی ،
فاخرده گوشه ده کی قولتوقده عادتاً سونمش کی ، کوزلری یرده دالغین
اوطورویوردی ؛ قانن آناسنك أوت آرتیق قانن آناسی ایدی ، اونك بر
سوزی ایله کندینه کلدی :

— هرکس بدلا دکل ، ایچ کووه ییسی آلمازکه ...

محی الدین بك بیله داها اون بش دقیقه کچمه دن قاریسنك اورتایه آتدیغی
بولافده کی آغیرلغی آ کلاتمق ایچون کوزلریله اشارت ایتدی . صوکره یمکه
اوطورمشلردی ؛ فخامت خانم ینه بر صره سنی کتیردی :

— شمدی هرکس آچیق کوز اولدی ، کندی بی داوا بسله تمک ایچون
نه یاپوب یاپوب بر چاره بولویور .

حتی هیچ اومولمازکن محی الدین شوقی بك ده بر آراق فریدونه :

— عادل بکدن بر قارت پوستال کلدی ؛ معلانك خسته لغنی دویمش سکاده
سلامی وار . یارین جواب یازلم ، سنده خاطرات أمی ؟ دیه بوش بوغازلقدن
کندی آلاماشدی . عجبا عنادلرینه می یاپیورلردی ؟ . داها ایلک کیجه دن
به بویه باشلارسه صوکره نه اولاجقدی ؟ فاخر ، معلانك خاطری ایچون
هرشیئه تحمله قرار قرار ویرمشدی ، بو ایمالری دویماش کی کوروندی .
فقط او بیله آقشامدن بری قوجاسنك یوزینه باقماشدی ؛ بر آراق کوزلری
فاخردن کچرکن ده قاشلرینی چاودی ؛ باشنی چه ویردی . نه اولوردی ، هیچ
اولمازسه اونده اولسون یوموشاق بر باقیش بولسه یدی ..

یمکدن صوکره یوقاری چیقدی ، کندی اوطه سی بوزولماشدی . معلانك

اوطه قايسندن باقدى ؛ هر شى اسكيسى كې ايدى . ديمك معلا خالا بويوك
آنهسى ايله ياتپور ، اولك ايچنده شيمديك هيچ بر شى ده كيشيمپوردى .
حال بوكه عطا بك مسئله نك تفرهاتى مذاكره ايدركن يالكز بر نكاحله اكتفا
ايديله جكنى ، دوكونه نروم كورولمهدىكنى سويله مشدى . او حالده بونه ديمكدى ؟ .
معلا نك حالا ضعفدن قورتولامديغنى دوشوندى ؛ ايلشنجيه قادار بو شكل
مناسب كورلمش اولابيلير ، ديدى . فقط بويله اوزاق دورمقده عجبانه درجهيه
قادار دوغرو ايدى . ذاتاً شو بر بوچوق آي ايچنده كيم بيلير ناصل تلقينلرله
اونى كنديسندن صوئوتمايه چالشمشلىردى . هله بو آقشام بر دفعه اولسون
قوجاسنك يوزينه باقامسى ده آرتيق بونده هيچ شهبه بر اقامشلى .

هر كس اوطه سنه چكيليوردى . معلا ايله برابر داديسى ده ، يكانه ده يوقارى
چيقدى . اونى ياتاغه ياتيرديلر ، بويوك خانم ذاتاً ياتسويني قيلول اوپومشلى .
اوطه قايسنى قاپاديلر .

اسكيدن برى معلا ياتدينى اوطه ده ايشيق ايسته مز ، صوفاده يانان قنديلدن
آيدىنلق كلسون ديه قاپى هر زمان آچىق دوروردى . ياننده كى اوطه ده فاخر
كې يابانچى بر اركلت واركن ده كيشمه ين بو هادت شمدى اونكه مشروع
قارى قوجا اولدقدن صوكره قالد يريش ، بو آقشامدن اعتباراً قاپى قاپانمشلى .
حتى دادى ، مردپوندن انركن يكانه يه :

— كوچوك خانمك قايسى ايجه كليته نمش مى ، باق !... ديه عنادينه تكرار
تكرار سسله ندى . فاخر ك ، بو كولونچ فقط حتمارتله دولو حر كترلر قيزوب ده
حادثا :

— كچ قالد كنز ! . ديه باغيراجنى كليوردى . لكن هيچ بر شيئه قيزمامايه ،
كىمسه يه اغز آچمامايه قرار وپرمشلى ؛ حتى « كيميسى خسته ، كيميسى
فلا كترلرله شعورينى غائب ايتش ، نه ياپدقلىرى بياپيورلر ، معذور كورمه لى .. »
ديه جك قادار صبر ايدىيور :

— البت ، دييوردى . بو يويله دوام ايده جك دكل يا ، كونك برنده
هرشى دوزه لير ، بز معلا ايله بر بر مزي سهود كدن صو كرا ..
ايرتنى صباح فاخر ، ايشنه كىتمك ايچون حاضر لانيوردى . صوفاده
معلايى كوردى :

— بر آز كليرميسك ، ديدى . بش دقيقه قونوشسه ق ...
كنج قادين سكونتله :

— پكى كليورم ، ديدى ..

فاخر تام بر ساعت قاريسنى بكه دى . صو كره اونك صوفادن كچن
كولكه سنى تكرار كوردى . ديشارى چيقدى . بر داها سويله دى . معلاينه
بو سفرده قوجاسنى بش اون دقيقه قادار بكه تدى . نهايت خيرچين بر طورله
قاپى ايتهر ك ايچرى كيردى :

— نه وار ، رجا ايدرم ؟. ديدى بكا سويله نه جك شى بو قادار عجله مى ؟.
اونده كى خشونت فاخرى بردن بره دوندوردى :

— راحتسز ايتدمسه بويورك ، تشرىف ايدك .. ديه قاپويى كوستردى .
— بن ، حالا كندى طويلايامادم . ايلشديكم زمان ذاتاً اوزون اوزون
قونوشاجغز ..

— پك اعلا ، ديدى ؛ هيچ اصرار ايتميهرك صوصدى . مادتا شدتله
قفاسنه وورولش كى كوزلرى قارارييوردى . اوك ايچنده هر كسدن برودت ،
حتى حقارت بيله كورمه يه حاضر لاشدى ؛ فقط معلانك بو قادار ده كيشه جكنى
كىم اوماردى ؟

آرادن ايكي كون كچدى . يكي هيچ برشى يوقدى . اوك ايچنده هپسى كندى
آرالرنده غايت طبيعى ، غايت ساكن ، ياشيورلردى . حتى ياز كونلرنده كى كى
نشئه بيله اكسيك دكلدى . فقط فاخره قارشى هپسى ده دورغوندى . هله معلاده
دائما اوزاق ، دائما يابانجى بر حال واردى . بر آن ايچون اولسون يالكز قالب
قونوشمق ، اوكا : « ناصل اولدك ؟ » ديه صورمق . بيله قابل اوليوردى . پكى ،

بو حیات بویله ناصل دوام ایده جکدی ؟ نهایت بر مکتوب یازمایه قرار ویردی . شو بر ایکی آی سورهن آریلق کونلرنده اوته کیلرک بیک تورلو تلقینله ایقاعه چالیشدقلری قیرغینلغی سیلمک ایچون صحیفه لر دولدوردی : « سعادتی یالکز سنک کوزلرکده آریورم معلا . واقعاخسته لنگ صارصیتسی چوق فجیع اولدی ؟ بو قادار آجیدن صوکرده سندن اسکی حرارتی بکه مک دوغرو اولامیه جغنی بیلورم . هله آنه کک ، باباکک چکدیکی اوزونتوی اونوتدورمق هر حالده پک کوچ اولاجق . ایشته بونک ایچون هر شیئه ، حتی هر حقارته تحمل ایده جکم . فقط کوزلرکدن بر آز حیات ، بر آز جسارت دیله نیرکن باری سن اولسون طاتلی بر نظری بدن اسیرکمه .. » دیه بیتیردی . بو ن صوکره معلا ده بر زمان ایچون خفیف بر سکونت کوروندی . فاخرکلدجه سلاملیور ، حتی بر ایکی سوز سویلیوردی . اوده بونلری کوروب سهوینور : — یاواش یاواش ایناشدکجه دییوردی ، آرمزده کی بوتون بولو طر سیلینه جک زواللی چوجوق آزمی چکدی یا ؟ ..

اوپنجه آقشامدی ، اوه کلدیکی زمان معلا یی یالکز بولدی ؛ گوشه ده ، قانپه ده باشی ایکمش ، ینه بر شیرلر اورو یوردی . فاخری قاچ کوندن بری ایلک دفعه اوله رق متبسم ، اولدجه صیجاق بر نظرله قارشیلادی . اوکالیشلرینی صوردی ؛ غزته دن نه ایچون چیقدیغنی آ کلامق ایستیوردی . شمدی آناتولی شمندوفر قومپانیاسندن آدیغنی آیلق غزته لرده ایکن قازاندیغنی پارادن داهامی چوقدی ؟ قوجاسنک بویکی ایشندن پک ده ممنون دکل کبی کورونویوردی . لکن او ، معلانک بو سؤالرینه پک سهویندی . دیمک ینه کندی حیاتیله علاقه دار اولویور ، ینه فاخری دوشونویوردی . هیچ شبهه یوق ، بو سؤالرینه پک سهویندی . دیمک ینه کندی ایلریده قوراجقلری عااله ایچون قوجاسنک ایشلرینی ، قازاندیغنی پارایی او کرئمک ایسته مشدی .

ایرتسی کون فاخر اوده ایدی . بو سفر معلا ایله بر ساعت قادار یالکز قالدیلر ؛ آرتیق او ، یاواش یاواش صوقولویور ، کیتدکجه ایصنیوردی .

فاخری اوزون اوزون تأمین ایتدی :

— تلاش ایتمه که هیچ سبب یوق ... دیدی . بنده بر دورغونلق کورولیورسه ، بو ، تمامیه جسمانی بر قیریققدن باشقه برشی دکل ، نه عذاب چکدیکمی بر کره دوشون !... اولومی اوقادار یاقیندن طانیق ، هفته لرحه آتش ایچنده ، اویقوسز یاتمق ، صوکر ا بونلرک هیچ بریسی برشی دکل ده سنی ایناندرامامق ، سندن آجی سوز ایشتمک قولایمی؟.. شمدی بنده کی پریشانلغی کوردکجه سنی سهو دیکمدن حالا شبهه ایدیورسک ، یاخودده آرتق سندن صوئودیغمی سویلیورسک ... والله دکل ... بر آز کندمی طوپلیهیم ، هپسی کجه جک ...

بوسوزلر بلکه اسکی وعدلر کی جانلی ، اونلر کی هیجانلی دکادی . فقط آیلرجه اوزایان بر صارصنتیدن صوکره زوالی چوجوغک بوقادار دورغونلغی ده چوق کورمه ملیدی . ینه او کون معلانک ، هادتا اریر کی قوجاسنک قوللرنده کسندن کچدیکی دقیقه لر اولدی . صوکره ، آرتق آشاغی اینه جکدی ، فقط هر زمان اونک قوللرینه بویله آتیلدکجه صایقلا رکی اسمنی ده سویلردی . فاخر : «هانی؟..» دیه بونی خاطر لاتدی . اوته کی ، کوزلری قاپالی ، خفیجه کسندن کچر کی قوجاسنک اوموزینه باشنی قویدی . هر زمانکی کی قولاغنه : « فاخر جکم .. » دیه فیصلدادی .

بورایه قادار هرشی طبعیاشمک امیدنی ویریور کیدی . معلا یی قازاندقن ، اونک آلنی کندی باشنده حس ایتدکن صوکره آنه سنی یوله کتیرمک چوق کوچ اولمایه جقدی . فقط اورته ده حالا سیلینه مهین اسرارلی ، معمالی بر رنگ واردی . مثلاً ، معلا بویله مستی اولا رق آرده بر قوجاسنه صوقولویور ؛ فقط اوزمانلرده بیله دوروب دورور کن سیلکینوب قاچیوردی . صوکره بعضاده دوداقلرندن :

— آنه مک قلبنی چوق قیردم ، اونک انکسارینه اوغرا دم . کیم بیلیر داهانه آجیلر کجه جکم ...

کې مههم سوزلر دوکولویوردی . عجبا دون بر هیچ ایچون حیاتی تهلکه یه قویدینی کې بو کونده آنه سنک اصرارلرینه قارشى : « پکی، هرشیدن وازکجه-جکم ! . » ديه ویریش بر سوزی واردی ده شمدی بعضاً طاتلی بر باش دونه-سی ایله فاخرک قوللرنده ایکی اوچ دقیقه کندینی اونوتجه خاطرینه ینه اوسوز کلیور، اونک ایچون می بویله تیتريه تیتريه باشنی چه ویریوردی ؟ . بو اسرار حتی ، مؤبداً یرتیلما دی !

صوکر... ناصل اولدی ، هله بوهیچ آکلاشیلا مادی ؛ معلا بر دن بره بوس بوتون دیکشدی .

ایک دولدینی کیجه لزدن برنده ایدی؛ فاخر بر آزدولاشمه یی تکلیف ایتدی . اؤک ایچنده آرتیق بر دقیقه بیله اونی یالکز کورده میور ، قاریسنى کندندن اوزاقلاشدیرمق ایچون هر کسک آل بر لکیله چالیشدیغنی حس ایدیوردی .

هر زمان برابر اوطورویورلر، دیشاری چیقسه خدمتچی ده برابر چیقور، اوطه سنه چکیلر کن دادیسی، اونی کندی آلیله یاتروب قاپی کیتمه یوردی . بو کیجه قوجه سنک کز مه تکلیفنه معلا، پکی دیدی . حاضر لاندیلر . فقط مانتوسنى طو-تمق ایچون اویله بر اوزاتیشی واردی که فاخر، اونک بو قادار متحکم طورینه ایلك دفعه تصادف ایدیوردی . دکز کنارینه دوغرو یورودیلر . سه زین فقط لکسز بر کیجه ایدی . فاخر ، آرالرنده کی دورغونلغی بر آز داغیتمق ایچون شوندن بوندن بر بحثک اوجنی قیملداتدجه او ، یا اودت ، یا خایر ديه قیصه جوابلر ویریور ، یاخودده بوس بوتون صوصویوردی . مهتاب کز مه سنه یالکز اولارق ایلك چیقیشلریدی . اسکیدن بویله بر کیجه ده ساده بر برلرینی دیکله یه بیامک ، ایچون راضی اولیه جقلى فدار کارلق یوقدی . بوتون قیش او ایچنده سوروکله نن کچمسزلکلره هپ بر کون ازلوب بویله بوس بوتون یالکز قالابیامک ، خولیاسیله صبر ایتشلردی . فاخر بونی دوشونورکن :

— معلا ، دیدی آی ایشغنده ایلك دفعه یالکز قالیورز . بو اولسون سکا

بر شیلر خاطر لاتیورمی ؟

کنج قادین ، قورو بر سسله جواب ویردی :

— والله او قادار خرابم که یالکز کندیمی دوشونه بیلورم . باشقه هیچ برشی خاطر لایه جق حالم یوق ..

حال بوکه او ، اوته دن بری صحتنه اهمیت ویرمز ، یمک یمز ، صوئوقلرده دولاشیر ، کندینی هیچ دوشونمزدی . عجباً شمدی خسته لقدن صوکره بوقادار دیکشمش می ایدی ؟ یوقسه اوکا بویله او کره تیورلر ، بویله می سویله تیورلردی . صوکره بردن :

— هیچ حالم یوق دیدی ، بر آز اوطورالم .

اوطوردیلر ؛ بر ایکی دقیقه کچمه مشدی :

— او شودم ، آرتیق کیده لم .. دیه قالدی . اودن چیقالی اون دقیقه اونامشکن دوندیلر .

فاخرده بو آقشام قاریسیله بر آز یالکز قالا جنی ایچون نه قادار سه و نمشدی :
— مطلقا ، دیوردی ، معلا هر کسک یاننده قورقوسندن بویله دورغون کورونویور . شمدی آرامزده اونلر اولما نیجه بلکه آچیلیر ، بلکه بو آقشام بوس بوتون باریشیرز ...

دونوشده اونلری قاپیدن قارشیلایان شی دادینک چیغلقلری اولدی :

— خسته لقدن قالدک قالقهلی بر کون اودن دیشاری آدیم آتمادک ، شمدی کیجه یاریسی ، زهر کبی آجی صوئوقده نه واردی ده چیتیورسک آ کلامام ؟ .. او قادار چکدک ، حالا جانکک قیمتنی بیلدیکک یوق ! . بو ناصل کوکل مش آیول ؟ ..

أولک ایچنده آرتق اونلر بیله داماد ایچون کنایه لی لافلر صاووراجق قادار یوز بولملرلدی . هله معلانک یاردیلشینده کی غروری بیلورلر ، هر فرصته :
« بوناصل کوکل مش ! . » دیه اک ضعیف نقطه سندن هجوم ایدیورلردی . فاخر ، او کیجه دن صوکره قاریسنی هیچ کوره مز اولدی . قارشی غارش به کادکلری پک نادر دقیقه لرده بیله معلانک کوزلری خشین ، منعل بر رنکه بوغولانیوردی .

حقیقهٔ کنج قادینک او کونلرده چکدیکي عذابده اینانیلمیه جق قادار بویو کدی .

آنه سنک هر کونکی آجی سوزلرندن باشقه بوتون اوده کیلر اونی فاخردن واز کچیرمک ایچون متمادیاً تضیق ایدیورلردی .

بر ثانیه بیله یالکز براقیورلر، اوطه دن دیشاری بیتسه آرقاسندن بریسی ده کلیور، حتی صباحاری یوزینی یقناجیه قادار دادیسی ناپینک او کنده بکلیوردی . آرتیق زورله قوجاسندن آیراجقلرینی کندی ده آکلامشدی . دونه قادار فضیله بر نمونه دیه کوستر دکلری بو کنج ایچون شمدی کویا قومشولردن ، اطرافدن ایشیدیش کبی بیک تورلو ماصال اویدورارق هر دقیقه یکی بر فالق آ کلاتیورلر، صو کره بو قادار کوچولتولن بر ارکک یوزندن اولومه آتیلش اولماسنی ده : « آمان ، نه عیب !... » دیه ایکیده بر یوزینه وورو یورلردی . بویله لکه معلا ، آرتیق دویدینی سهوکی بیله انکار ایده جک قادار، صیقیلوب اوتانیور ؛ فاخرده اونک بو حالنی کوردکجه بوتون سعادت رؤیالردن امیدینی کسه جک کبی اولویوردی . هله صوک کونلرده معلا یی بر ثانیه اولسون یالکز کوره میوردی که نه اولویور ، نه وار ، دیه صورابیلسون .

بر آقشام استانبولدن کلیرکن اوکا پک سهو دیکي چیچکلردن آلمش ، کیمسه یه کوستر مه دن یاتاق اوطه سنده کی ماصیه قویمشدی . ایرتسی کون چیچکلری صوفایه آتیلش کوردی . صو کرا بر کون ده کندی چکمه سنی قاریش دیریش بولدی . جزؤ داننده معلانک کوچوک بر رسمی ایله بر کزتی اثناسنده فاخرک کو کسسه طاقدینی قوجه یش یپراقلری واردی . معلا اونلری آلمش ، یرینه کندنده کی رسمی ، فاخرک رسمی قویمشدی .

بو فوق العاده لکلر اک زیاده شو صوک کونلرده آرتیه باشلامشدی . سبیلرینی ده بر ایکی آی اولکی کورولتولرده آرامایه امکان یوقدی . معلا ، اولوم دوشکنده بیله اونی دوشونمش ، هر ثانیه اونی آرامش ، هر فرصته : « سنی اسکینندن چوق سهو یورم .. » دیه فیصیلدامشدی . صو کره عجا

بردن بره نچون ده کیشمشدی ؟. فاخر ، کندیسى يوقکن بر چوق شیلرک
حاضرلاندیغنی بیلوردی . فقط نه اولمشسه اک زیاده شو بر قاچ کون ایچنده
اولمشدی . زیرا داها نکاحدن صو کرا ، ایلک کونلرده بيله معلانک یاواش
یاواش قوجاسنه صوقولان،باشنی اونک آموزلرنده اونوتان ایلیق دقیقه لر
واردی .

ایشته اوچ دوت آون در ، محی الدین بک ده قونوشماز اولمش ، فخامت
خانم بوس بوتون سلامی کسمشدی . فاخرله معلا صوفاده بيله بر برینه
راستلایوب قونوشماسینلر ديه خدمتچیلر اورته ده دولاشیور ، اوك ایچنده
فیصیلداشمه لر ، معنالی باقیشلر انسانی بو نالته جق قدر آرتیوردی .

صوفرا ده ، یمکدن صو کره بر آرایه طوپلاندقلى بر ایکی ساعت ایچنده
هر سوزك آراسنه قاریشان کنایه لر، هله فخامت خانمک بعضاده آچیقدن آچیغه
صاووردیغنی حقارتلر آرتیق هیچ اکسیک دکلدی . فاخر بونلره سس
چیقارمیور ؛ فقط بر آز نور ، بر آز شفا بولمق امیديله معلانک کوزلرینی
آرادقجه اصل محرومیته اوراده اوغرایوردی . اوزاقدن یاقیندن قومشولرک ،
هله قیزیل طوپراقدن رفیعه خانم خاله نك زیارت ایتدیکی کونلرده کر کینلک
بوس بوتون آرتیوردی . بو خانملر کیم بیلر نه لر سویلیورلر ، معلایي ناصل
زهرلیورلردی !. نهایت اویله بر آن کلدی که معلا، فاخرک هر یرده بو فاجعه دن
استخفافله بحث ایتدیکنه : « محی الدین بکک قیزی بنم ایچون کندینی زهرله دی !. »
دیه او کوندیکنه ، حتی : « بن ایسته میوردم اما چاره سز ، زورله آلم .. »
دیدیکنه اینانمشدی . اوکا هپ بویله دویورویورلردی . یوره کدن کلن سسلری
کیزله مک ایچون فاخر هر محرومیته قاتلانیر، بو ماجرانک بو درجه دویولماسی
بيله اونی بدبخت ایدرکن هله شمدی مشروع قاریسی ایچون کیمسه نك یاننده
اغز آچاسنه امکان یوقدی . معلانک شرفی کندینک دیمکدی ؛ حتی داها
فضله اونی محافظه یه مجبور دی . فقط بونی اوته کیلره آ کلاتمق بر تورلو قابل
اولیوردی . هله معلا ، بو بحران ایچنده نه سویله نسه اینانه جق بر حاله

کلهشدى . اويله کوچوچك بر كويده هر وقعه كې بوده پك چابوق دويولش ،
نته كيم چامليجه ده او طوران اكرم بكار بيله كوپرى اوزرنده كيم بيلير
كيمدن ايشتمش ، اتخارك اوچنچى كوني خاطر صورمايه اونلره ككشردى .
او كونلرده ايسه فاخر اودن بيله چيقماشدى . بشنچى كوني فريدون
استانبولده مادام بهزاد پاشايه تصادف ايتش ، دهلفين اونى كورور كورمز
دوردوروب معلاي صورمى . ديكر طرفدن ينه اوفلاكت كونلرنده اوك
مصرفى ، طبيعى ، بردن بره آرتمش ؛ محى الدين بك ده :

— آمان شو حريفه اوغراده بر آز پاره آل ... ديه بهزاد پاشاده كى
الاجنى ايچون فاخرى كوندرمى . اوده ، پاشانك بر معتاد آصنتيه
كتيرمك اميديله ميرين قيرين ايتديكى كورنجه : « محى الدين بك كريمةسى
آغيرجه خسته ... » ديمه مجبور اولمى . دهلفين فريدونى كورور كورمز
معلاي صوردينى ايچون شمدى اوته كيلرده اونك بو خبرى فاخردن آليغنه
حكم ايدىورلردى . حال بوكه بو قادين آغيرجه بر خسته لق ديه اوندن دويدى
وقعه نك اصلنى بوس بوتون باشقه بر وسيله ايله اوكرمى .

دوقتورك اوند بولوندى مدت ظرفنده كويك « بون مارشه » سيله
حسابلى اولور ، بهزاد پاشا كندى تجاخانه سندن يوللايدى بعض اشيا ايله
بو حسابلى قارشىلاشديرردى . تصادفاً اتخارك ايلك كونلرنده دهلفين بو
حسابلى ايچون كويه كلديكى زمان اجزاخانه ده اوغرامش ، اوراده صباحدن
آقشامه قادار اوطوروب عالمك درديله اكنمكدن باشقه ايشلى اولميان بعض
شوم آغلردن بوتون تفصيلاتيله ، حتى مبالغه لرله هر شئي اوكرمى .
صوكره فريدونه راست كلنجه خسته يي صورمش ، فقط نردن و ناصل اوكر-
نديكى طبيعى سويله مه مى . فاخر ايچون بويله شهبه لى سيلمك امكانى
قاليور ؛ اوته كيلر ، محى الدين بك ده ، قارىسى ده بيلنمز ناصل آرايه صوقولان
بر قاچ بدخواهك فيصلدايدى بو ديدى قوديلره اينانيورلر ، اينانماسه لر بيله

فاخر دن واز كچيرتمك ايچون آي بر فرصت ديه بره بيك قاتارق قيزلرينه
آكلا تيورلردى .

ينه بوكا بگزهر بر شى داهها اولدى . فيخامت خانم :

— بن آكلاميورمىم صانكه ، ديمشدى . قيزى سهوديكندن فلان دكل
بنم بر ايكي پارچه قرىتى ثروتمه كوز ديكديكي ايچون بونلرى ياپدى ! .
قاديخجز معذوردى . اونك نظرنده هرشى پارادن عبارت اولديغى ايچون
هر كسى ده بويله صانيور ، نهايت قيزيني ده بويله تنقينلرله كندينه بگزتمه يه موفق
اولويوردى . فاخر ك يانديغى ده اك زياده اونك بويله كنديندن شبهه ايدرك
اوزولمه سىدى . بونلرك اوكنه كچمك ايچون بر ايكي ساعت يالكز قالمه يه بيله
امكان بولاميوردى .

اوزون ترددلردن صوكرام ، تكرار بر مکتوب يازماي دوشونى .
قارشيسنده خسته روحلى ، خسته وجودلى بر قيز واردى . نه اولورسه اولسون
اونى قازانماي بر بورج تاقى ايتديكي ايچون صانكه بوتون قباح كنديسنده
ايمش ، عفوه محتاج اولان ساده او ايمش كى يالواردى ؛ قاريسنك خاطرينه
كلهسى محتمل شبهه لره قارشى كندى بيلديكي حقيقتلرى صايه رق بو سفرده
اوزون اوزون صحيفه لر دولدوردى . « باشقه لر ينك ياننده بر سوز سويله مك
زده ده ، سنك شرفك ايچون بنمكى بيله فدایه حاضرم » ديه يمينلر ايتدى .
صوكرام بوتون بو يازدقلىرى كيجه هر كس ياتمايه چيقاركن معلايه ويردى .
ايرته سى صباح فيخامت خانم ده استانبوله كيتدى . معلايله يالكز قاليرسه
بلكه آكلاشه بيله جكاريني ، آرتيق هر حقيقتى سويله مه يه وقت بولاجنى
دوشوندى ؛ يك سهويندى . فقط آشاغى اينوبده اوطه يه كيرديكي زمان
اونى هر زمانكندن رنكسز ، داهها پریشان بولدى . بوتون كيجه اويوماش ،
آغلامش كى كوزلرينك كنارى سيم سياهدى . قوجاسنك يوزينه بيله باقماي .
بويوك آنهسى ، داديسى ، يكانه هپسى ياننده ايدى . بونلرك آقشامه قادار
اوطه دن آيريلمايه نيتلرى اولمديغى آكلايخه فاخر ، كنديسى يالكز بر اقالرينى

سويله دى . معلا :

— هر كس دن نه ايستورسك ، ديدى نه سويله جكسهك سويله . . . نم
كىمسه دن كيزلى بر شيئم يوق .

ساده بو قادار سوز بيله فاخرى قيزديرمايه ، انكساره اوغراتمايه كافى
ايدى . فقط بو كون مطلقا بر نتيجه يه ايرمك ايسته ديكي ايچون اصرار ايتدى ؛
اوته كيلر اودادن چيقمقله برابر قاينك آرقه سندن آريلماديلر ؛ فيصلداش دقلىرى ،
طيقيردادقلىرى دويولويوردى .

دون آقشامكى مكتوبدن صوكرا ، آرتيق او آيلردن برى آغزندن آغزه
ديشله نوب بوغولان حقيقتلر ك برر برر اورتايه چيقاجنى اومولوركن معلا ده
براز انشراح يرينه بويله متكائف بر انفعال كورمك فاخرى پك شاشيرتدى :
— نه وار الله عشقنه ، ديدى ينه نه اولويورسك ؟ . معلا باشنى چه ويردى ،
سس چيقارمادى .

— بيليورم كه هپ آنهكك خاطرى ايچون كندىكى فدا ايدىيورسك ؛
بندن ده ينه اونك ايچون قايچيورسك ؛ بونى آكلاميورم ظن ايمه . . . فقط
شمدى آرامزده چكينه جك كيمسه يوق ؛ آرتيق سويله ، نه اولويورسك ؟ .
بن هپسنة راضى يم ، معلا . . . دكل ساده آنهكك ، حتى هر كسه قارشى سنك
بيله حقارتلريكه قاتلانم جغم . يالكر ، هيچ اولمازسه بيله يم كه قلوبكده كيزليدن
كيزلى يه ، حالا فاخر ايچون ايشيلدايان صوك برقيويلجيم اولسون سونمه مشدر ؛
ساده بونى سويله ، آلويرير .

معلا ، بوش دومانلى بر نظرله اوكا باقدى :

— نه سويليورسك رجا ايدرم ، ديدى ، كيمدن بحث ايدىيورسك ؟ . .
فاخرمى ؟ . . اوت ، اويله بريسي واردى ؛ ايبى برچو جوقدى ؛ زواللى اولويوردى ! .
— معلا ! . دلى ايدم جكسك بنى ! . عنادينمى سويليورسك بونلرى ؟ .
— فاخر ، چوقدن اولدى دييورم سكا . . . داها دوغروسى بو بررؤيا
ايدى ؛ هر رؤيا كې اوده آز عمرلى اولدى .

— ديمك، بندن بو قادار چابوق بيقدك، تكميل وعدلرك يالاندى ها؟..
 بونجه فداكارلنى كوزه آلديران او آتش شويله بركلوب كچيجى هوسمش
 اويله مى؟. آكليورم، طبقى صارى مانشون، طبقى كوموشلو چانطه ماجرالرى كې دكلى؟.
 — او كونلرده كى سه و كيدن ده شبهه ايدرسهك؟!. آرتق هر شيئه
 آليشدم، نانكورلكك بو درجه سى بيله بنى شاشيريرتماز. فقط ديدم يا،
 شمى آرتق آرمزده هيچ بر شى قالمادى. سويله ديكك كې اچمده حالا
 ايشيدايان بر قيويلجىم بيله اولسه اونى قارارتمق اچون بوتون قلبى سوندوروردم.
 — دكل ياوروم، هيچ بر شيدن شبهه ايتيورم. اصل بر زمانلر بنى نه
 قادار سه و ديككى دوشونويورم ده اونك اچون بو سويله دكلريكه اينانمق ايسته.
 ميورم، هپسنة اونك اچون قاتلانيورم. اوك اچنده چكديكم عذابى سنده
 كورويورسك؟ هيچ برينه سس چيقارييورمىم؟. شيمدى ينه نه سويلرسهك
 بيليورم كه ياخسته لقندن در، ياده آنهكك تضيقندن... بونلرك هيچ برينك
 اهميتى يوق كوزم، بن اصل سنى دوشونويورم، اك زياده سنك اچون
 اوزولويورم.

معلا، خيرچين بر سيلكنيشله باشنى قالديردى. آرتق قوجاسنده فداكار
 حسلر كورمه يه بيله تحمل ايدم ميوردى. اونى حالا فضيلتلى، حالا وفاكار
 كوردكجه عادتاً قصقانيور، قيزيوردى:

— آمان، بنى دوشونمه!.. ديدى. سندن هيچ بر شى بلكه ميورم.
 هيچ كيمسه نك مرهمته احتياجم يوق. بك افندى كويا سس چيقار ميورمش،
 چيقار افنديم!.. ايسته ديككى ياپ!..

بو سوزلرده يك قطى برادا كورمكه برابر فاخر، بر تورلو اينانمق
 ايسته ميوردى. بونلرى هپ اوتة كيلردن او كر نمشدر؛ اوكا زورله بويله سويله-
 تيورلر ديه حالا طوتونا جق بر اميد آرييوردى. بوتون كون اونى بر آز اولسون
 يوموشاتمه يه اوغراشدى. اك خفيف بر ترسلك حس ايتديكى یرده اصرار
 ايتك، هله كيمسه دن مرحت، محبت ديله نمك اونك آلندن كليه جك برشيدى.

شیمدی یه قادار اوافق بر چاتقیناق قارشیسنده بيله حرمت ، حتی تربیه قاعده-
لرینی اونوتور ، سعادتی چیکنه مه یه قادار هر شیئی کوزه آلیردی .

معلا ایچون بو خویندن ده واز کچدی . هر حالده سه وهن بر کنج قیز
بویله چابوق دکیشه مزدی . دون آنی بر هیجان ایله ناصل اولومه آتلیشه
بو کون ده کیم بیلیر نه ایچون سعادتی فدا ایدیوردی .

اونده کی بو قورقونج اراده نك یکی بر مثالی داهـا بر قاچ کون اول
کورمشدی : معلا بوتون قیش لاجورد یو کدن بر جاکت اوروپور ، فقط
بر تورلو بیتیرد میور ، ایکیده برده سو کوب تکرار باشلایوردی . نکاحدن
صوکراده فاخر قاریسینی هپ بو اورمه جاکتک اوستنه ایکیلمش بولویوردی .
یاپیلان یر حالا آوج ایچی قاداردی ؛ هیچ آرتیوردی . بر کون ، بر وسیله
ایله اوکا شو آلردن بری سوروندیکی حالده بر تورلو بیتوب توکنمه ین ایشی
براقماسنی ، بر آزده کندینی دیکله مه سنی سویله مش :

— ذاتاً او کمز یاز ، دیمشدی . نه زمان یاپوب ده نه زمان کییه جکسک ؟

معلا باشنی صاللامش :

— یاز کله دن بیتروب کییه جکم . . دیه اصرار ایتمشدی . آراسی ایکی
کون کچمه دن فاخر جا کتی بیتمش ، اونک آرقه سنده کوردی . عنادمی ،
اراده می آرتیق نه دیه جکنی بیل میوردی ، ساده بو ، نه قوتلی بر حسدی !
او زمان فاخر آجی آجی کولمش :

— زواللی جا کت ! . بو قدر امكن صو کره سن ده صاری مانشونک ،

کوموشلی چانطه نك یانه کیده رسک . . . سن ده نهایت بکا بکزه رسک ! .
اونک عنادینی قاچدر بویله کوروب او کړند کدن صو کره بو کون ده نه
سویلر سه سویله سون داریلما مایه چالشیور ، حتی بو فدا کارلق حسلرینی تقدیر
بيله ایدیوردی . آقشامه قدر اونی بر آز اکندیرمک ، کوزلرنده کی ظلمتی
بر آز سیلمک ایچون اولیه جق شیر یاپدی . تک آرتق اینانسون دییه کندی
آنه سنک خاطر دسه یمیلر ایتدی :

— هر شیدن ، هر کسندن فضله سودیکم او قادینه قارشى اك بويوك
کناهى ايشله مش اولایم . . ديه تویلى اوریپه رك آند ایتدی . فاخرکه اك
کوچوك یمینى بیله بر تنزل عد ایدردی ؛ باشقه زمانده اولسه اوته کنى بریکنى
ایناندرمق ایچون سهوکیلى آنه سنك آدینى اورتیه آتمقدن ایسه :

— جانی ایسته بن اینانسون .. دیر ، دوداقلرینى بو کردی . شممدی
بوکاده قاتلاندى . آرتیق اویله بر هیجان ایچنده ایدی که قوجاسنك قانلى کوزلرندن
یاناقلرنده کی موص مور دالغهلردن معلا بیله اوریکش کی صوصدی .

ساعتلر کچدکجه کنج قادینده خفیفجه یوموشایان ، ایصینان بر حال
کورولویور ، آراده بر کندینى طوتامیه رق فاخرک سوزلربنه کولدیکی بیله
اولویوردی . صوکراینه تکرار خاطرلادینى بر سوز ، بر پیمان وارمش کی
سیلکینور :

— نافله .. دییوردی بو رؤیا چوقدن سوندى ! . سنکله یکیدن
آکلاشمق ، بو رؤیایى بولمق ایچون تکرار دالمق ؟ . بونى عقلکدن چیقار .
اوته کیلر بويوك خانم ، دادی ، یکانه هپسنى قائن آنايه خوش کورونمك
ایچون داماددن یوز چهویرمشر ، فقط آراده بر ، ینه آغزلردن قاچیریورلر :
— بر قاچ کون برابر ، یالکز قالسه کز دییورلردی . بو زواللى کیتدکجه
آچیلیر ، اییاشیر ، بر شی قالمازدی . آنه سى بر کون راحت بر اقیورکه . .
هر دقیقه بیك بر اذیت ایدیور . قاچ کوندر قیزجغزك کوزلردن یاش
اکسیدلیکی یوق . آ ، والله ، بویله کیده رسه یاوروجغه مطلقا بر شی اولور ! .
معلا بو کون فاخره آلنى بیله ویرمه دی . صوکر ا قوجاسنك او ایچنده
چوق مشکل بر حاله دوشدیکنى کندیسی ده کوردیکی ایچون بر آراق دیدی که :
— هله بر ایکی آى صبر ایت ؛ سن ده قورتولورسك ! .

— ديمك معلا هپ بونك ایچون نکاحه بر طاقم شرطلر ، قیدلر قویدیر دیکز

اویلمی ؟

— آی بونی آکلامامشیدک ؟. عالمه قارشى رذالتک اوکنه چمک ایچون باشقه چاره وارمیدی ؟...

— شمدی ده بر ایکی آی صوکره طلاق ایچون کندی حقکزدن استفاده ایده جکسکر ، دکلی ؟ آنهکک باباکک بویله دوشوندیکنی آکلادق ، بوکا سن ده راضی اولویورمیسک ، معلا ؟ .

— سکا دوغروسنى سویلیه یم می ، بن بو نکاحی بیلله ایسته میوردم . عالم نه سویلرسه سویله سون آرتیق اونى می دوشونه جکدم ؟ . بنم ایچون نه سعادت ، نه استقبال ، هیچ بری قالمامشدی . مادام که سنکه برابر یاشایامیه جقدق ؛ نکاح ده اکسیک اولسون دیدم . نه یاپیم ، آنهمله بابام بویله ایسته دی . اونلرک خاطری ایچون ایکی اوچ آی بونی ده چکمه یه راضی اولدم .

— پکی معلا ! بن ایسه ساده سکا کووه نمشدم . فقط حقیقه بنی ایسته . مه دیکی اوکره نیم ، بو آجی سوزلرک یوره کدن کلدیکنی آکلاییم ، او دقیقه ده ..

— نه یاپاجقسک زورله کوزلک اولمازیا ..

فاخر بر آز مستهزی کولدی :

— اوو ... مراق ایتمه ، دیدی زورله بر شی یاپمادیغمی اصل سن ، پک اعلا بیلیرسک ! . ذاتاً زورله کوزلک اولیه جغنی بن ده بیلدیکم ایچون بر دقیقه بیلله بوراده دورمیه جغم . سویله ، هم شمدی کیدیورم ! ..

— خاییر، بوده پک بویوک بر ظلم اولور ! . بندن بر آز اییلک کوردکسه ساده بونی یاپما . . . کچمش کونلرک خاطره سنده بر آز قیمت وارسه ، چوق دکل برایکی آی صبر ایت ...

آرتق حقیقک نچه سنى بوغازنده کوروب ده حالا آلدانق قابل دکلدی . دیمک معلا مغلوب اولمش ، فاخر ایچون قلبنده آنجق نفرته یر قالمشدی . صوک بر چاره ، دیه اوزون اوزون یالواردی ؛ قابل اولدیغی قادار چابوق اونى

بورادن آلوب کوتورمك ايچون معجزه لر ياراتمايه چالیشه جفنی وعد ایتدی .
خایر، دونه قادار :

— بر لوقا قورو اکمه ، بر یر اوداسنه راضی یم، بورادن کیدلم . دیه
کندندن کچن بو قیز شمدی هیچ بر شی دیکله میوردی .
صوکرار بر آراق قیزدی ؛ آجی آجی شیلر سویله دی . ارتیق هر کسله
قلوغا ایده جک ، هر شیئی قیراجق کبی اولیوردی . سعادتنی چالیورلردی ده
بوکا قارشی مدافعه ایچون هیچ بر چاره سی یوقدی . ایلک دفعه اولق اوزره
کندیسنده دهرین بر ضعف دویدی ؛ اراددسنگ سوندیکنی کوردی .
آقشامه دوغرو معلا ، بوتون کون قاینایوب طویلانان هیجاندن ، او
ضعیف قلبک قویتولقلرنده دائمی جدالله تپنه ن ضد حسلردن بیتمش ، بوغولور
کبی کندندن کچدی . دادی ایله یکانه :

— آمان ، نه در بو اوده چکدیکمز ؟ . دیه سویله نه رک صو سهرپرلرکن
فخامت خانمده کلدی . قیزینک اراده بر بایلدیغی چوقدی . او زمان هپسی :
« بو یاشده کی کنج قیزلرده اولور ... » دیه باشلرینی چویریرلردی . شمدی
خانم افندی معلانک رنکنده صولوقلق ، شاقاقلرنده ایصلاقلق کورونجه :
— ینه نه اولدی ؟ . دیه چیغلنی قوپاردی ؛ اوته کیلرده هپ بر آغزدن
یتشیدر دیلر :

— کوچوک خانم بایلدی ده ... معلا بر آز آچیلر کبی ایکن تکرار
کندینی غائب ایتدی ؛ کوزلری تا اوزاقلره دیکیلهرک سونویور :
— آمان آنه جکم ، دوشویورم ، دوشویورم ، طوتوک بنی ! . دیه
چیرپینیوردی . بوتون دنیا ده کی قائن آنالر بر آرایه طویلانسه ، کندیلری
صوصوب فخامت خانمک او دقیقه لرده قوپاردیغی قیامت دیکلرلردی ! . نه لر
سویله مه دی ، یاربی ، نه لر .. ارتق کنایه یی ، لاف آتمای بر اقص ، آچیقدن
آچینه چیرکف پوسکورویوردی . طولومبه جی قووشلری ، میخانه لر بیله بوأوک
معکس اولدیغی چیرکین کفرلره یابانجیدر .

قاچ کوندر سوز آراسنده ایما ایله ، تلمیح ایله صیزان تزییفلر فاخره بعضاً پک آجی کلردی؛ فقط شمدی آچقندن آچیغه کوپوردن برچیر کفه قیزمق بدلاق اولاجغنی دوشونویوردی . کوشه ده بر قولتوغک دیرسکنه اوطورمش هیچ سسنی چیقارمیور ، اودادن چیقمايه بیله لزوم کورمیوردی . ذاتاً آرتق داها نه اولایلردی ؟

عقلی باشنده بر ارککدن بونلرک میایونده برینی دویان انسان ، قارشو- سنده کنک دنیالری دهویره جک قادار قوتلی اولدیغنی بیله کورسهینه اولدورمک ، یاخودده اولمک ایچون بوغازینه آتیلردی . اونده کی بو سکوتی کورده نلر حتی محی الدین بک ، فریدون بک ، هپسی :

— او قادار لافه ناصل تحمل ایتدی ؛ دوغروسی شاشدق .. دیمشلردی . یا نه یایمالیدی ؟ . قارشوسنده کی خسته ، شعورسز بر قادینکن اوکا نه جواب ویريله بیایردی ؟

او آقشام فخامت خانمده بوتون مفسدتی افشا ایتدی . ظواهری اورتکم ایچون بو نکاحی قیدقلرینی فقط بر ایکی آی صوکر ا ناصل اولسه قیزلرینی آیراجقلرینی اوده سویله دی .

آرتیق هر شی آ کلاشیلوردی ؛ هپسندن امید ی کسنجه فاخرده قووولمايه البت راضی اولیه جق ؛ اونلردن اول کندیسی قاچوب قورتولاجقدی ؛ هم بو حقیقه بو قورتولوش اولاجقدی . چونکه بو چیلغین دقیقه لرده شیطانی بر سس :

— احق ! دیه فیصیلدیوردی . مأمور اولدم ، ایچ کوویدیسی اولدم ، آرتیق کنجا کده کی بوتون خولیار بیتدی دیه داها دونه قادار اوزولیوردک ؛ معجزه بیله سنی قورتاراماز صانیوردک ؛ شمدی باق ، بوندن بویوک معجزه می اولور ؟ . سنی اونلرمی ایسته میورمش ، نه اعلا ، ایشته فرصت ! . . قاچ بورادن ! .. آرتیق نه وجدان عذابی ، نه مرحمت ، نه وظیفه ، بوتون بوبوش شیلری ده دوشونمه ، ذاتاً شیمدی یه قادار دوشوندکده نه اولدی ، ده

دوشونورسەك نە اولاجق ؟. همان چىق ، بىكارلىق سىلپىتىنە قورول !... دوشون
استىلالى ؛ باشى ھۋادە ياشامەنك ذوقنى كوز اوكنە كىتىر .. تىياترولر، بارلر،
كىزمەلر ، سياحت ھې سىنك اىچون !... يىنە موشامباكى اوموزىكە وورور ،
ھىچ بىر قاينغۇ دويىمادىن ، دىيانك اوبر اوجنە كىدەرسىك ... ھىم آرتىق نەسىنى
دوشونويورسىك ؟.. شىمىدى يەقادر اوندىن سىن سوئومالىدىك. سويلدىكى يالانلرى
حقارتلىرى اونوتدىكى ؟. قاچىرما بو فرصتى ..

.....
اوتە كىلر صوفرىدە اوطوروركن فاخر ، آرتق دورامادى ؛ سوقاغە
چىقدى . سانكە شىمىدىن قاچيورمىش كې قوشارق كوشىكك آرقاسىندەكى
قىرلردە دوغرى يورودى : « نە ياممالى ، ياربى ، نە ياممەلى ؟ . » دىيە كىندى
كىندىنە سويلەنيور ، ياقاسىنك دوكمەلرىنى ، بويون باغنى سو كەرك بىر آز ھۋا ،
بىر آز نفس آرييوردى .

اونلردىن يىكرمى آدىم اوتەدە بىر آمرىقان عائىلەسىنك كوشكى واردى . بونلر،
بويوك كوچوك چوجوقلىرى ، آنەلرى ، بويوك آنەلرى ، بابالرى ايلەقالالباق
بىر عائىلە ايدى . فاخر اورادىن كچىركن ھېسى صوفرايە اوطورويورلردى . يىك
اودالرىنك پردەلرى آچىقدى . كويىك ظلمىتى اىچىندە بو ضيادار پنجرە انسانە
اوزاقدىن بىر قارت پوستال حسنى ويرييوردى . ھىر طرفى دوزكون بىر يىك
اوطەسى ، يىشىل اورتولو ، بويوك بىر لامبانك آلتىندە پارلايان اشيا ، چىچكارلە
سوسلى تىمىز بىر صوفرا فاخرە بوتون كىندى محرومىتىلرىنى خاطرلاتدى .

صوفرانىك اطرافىنە طوپىلانان بو مسعود رىنكىلى انسانلرك يىك يىشىندە ،
قونوشمەلرندە بىلە دەرىن بىر نشئە ، اونك ھىچ دويىمادىنى ، ھىچ طانىمادىنى
باشقە بىر حال واردى . آرالىرىنە كىرمەنچە ادراك ايدىلەمىەجك بىر قوتلە آرييوب
قارىشمىشار كې ھېسىدە بىر بىرىنە بىكرىيوردى ؛ سعادىت سانكە ھېسىنى بىرىنكە
بويامىش ، طورلرىنە عىنى آھنىكى داغىتمىشىدى . انسان ھىچ بىرىنى طانىمادىن ،
بو باباسى ، بو قارىسى ، بو چوجوغى دىيە بىليردى .

آنه لرینك يىك داغیشی بر شعر ، بابالرینك هپسیله آیری آیری مشغول اولوشی شفقت بر نمونه ایدی . هپسی ده پر حیات ، هپسی ده متبسم کورو - نویوردی . صوکره بردن اورتهیه آتیلان بر سوز او تبسمی بوس بوتون کنیشه تیور ، او شعره برده قهقهه موسیقیسی قاریشییوردی ...

فاخر ایچنی چکهرک یورودی . یولده آغاچلرله قونوشدی ؛ ییلدیزلرله دردله شدی . هپسنه : « نه یاپیم ، نه یاپیم ؟ » دیه صورتی .

صوکره آرتق دوزرکن او آمریقان عائله سنی یمکدن قالمش ، ینه سوقاق اوستنده بر اوطه ده طویلانمش کوردی . کنج قادین پیانو چالیور ، سکنز اون یاشنده آلتون باشلی بر قیز ، پیانونك یننه دایانمش ، کوزلری آنه سنك پارماق لریله نوطه لر آراسنده دولاشیور ، آرا صیرا اونك ایجه سسی ده دویولویور ... بیاص صاحلی بر ارکک کوشه ده کی قولتوقده غزته اوقورکن آرا ده بر آرقادن بویینه صاریلان مینی مینی آللری طوتوب اونکله قونوشویور ؛ ده ها کنج بر آدام ، پیوسی آغزنده ، آیقلرینی اوزاتمش ، کوزلرینی کنج قادیندن آیرمیوردی ...

هپسنك آراسنده او یله جانلی ، صیجاق بر شی واردی که فاخر اوزاقدن اونلری کورونجه ینه کندی کیسه سز لکنی ، یتیم لکنی دوشونه رک تیرددی : — نه قادار اوزاق ، دیدی بویله تمیز ، صیجاق بر یووا بنم ایچون نه قادار اوزاق ! .. بو شفقت بو سعادت بکا مؤبداً مجهول قلاجق ...

صوکره کوزینك او کنه معلا ، کندی قاریسی ، اونك اوی کلدی : — نه اولوردی یاربی ، بزده بویله اولسه یدق ...

.

فاخر او کیجه ده پریشان ، ینه اویقوسز صباچه قادار دوشوندی . بو عائله نك ایچنده یاشامق ایچون آرتیق هیچ امکان قالمامشدی . مادام که اونلر ذاتاً بر ایکی آی صوکره قیزلرینی آیرمایه قرار ویرمشلردی ؛ بر ارکک ایچون اک طبیعی حرکت بو فاجعه یی شیمیدین ، بوس بوتون قاپاتمق اولاجقدی .

فقط ینهده بر تورلو ایچی راضی اولامیوردی . معلا ، بوتون بو آجی سوزلری عجبیا یوره کدن می سویله مشدی ؟

یوقسه کیم بیلیر ، بلکه اوده کندی چکدیکی عذابى بللى ایتهمک ایچون ایچین ایچین نه آجیلار دویویوردی . فاخر هپ بونی دوشوندی . صاقین بو آکلاشیلماز قادین آناسنک ، باباسنک تضییقنه قربان اولارق بو سفرده کندی سعادتى فدا ایتش اولماسون ، ديه قرار سزلقلر ایچنده بونالدى . اکر بوبویله ایسه ، چیلغین بر اوفکده قاپیلوب ده تکمیل رابطه لری بر آنده قیرمانک عذابى بوتون عمرینی قارارته جقدی .

ایرتسی کون استانبوله ایندی . خارجیه اوغرایوب عطا بکی بولدی . شمدی یه قدر دردینی کیمسه یه سویله مزکن بو سفر آرتق تجربه لی آدمیره ده دانیشمق مجبوریتنى حس ایدیوردی ؛ ویریه جک قرار ساده کنديسنک دکل ، خسته ، بدبخت بر قیزکده مقدراتی اولاجقدی .

عطا بك فاخری کورونجه باشنى صاللا دی . مکر عائله ایچنده ایقاع ایدیلن غیر طبعیلمکوردن اونکده خبری وارمش :

— شو محی الدینه نه قیزیورم ، ديه الك اول کنديسى باشلا دی . مکرسه نه دوشونجه سز شیمش ! نکاحی بر آز کجیکدیر دکلرینه باقما ، قیزی آلمیه جقسک ديه او زمان اودلری قوپویوردی . شیمدی ده یاپدقلرینک هپسنى بیلورم . خدمتجیلر کلوب بزم اوده سویله مشلر ، هپسنى دويدم . دوغروسى بوقادارینی چوجوق بیله یاپماز . سن ، فاخر بك ، بو ایشده ناموسلو بر آدام ایچون اعظمی فدا کارلق نه ایسه اونى یاپدک ، حالاده بو قهری چکیورسک ... اون کوندر بو جهنمده ناصل یاشادیگه شاشیورم . بن اولسه م ، هپکزک یوزینی شیطان کورسون ، دیر چیقاردم .

فاخرده بوتون شو بر قاچ کون ایچنده اولان شیلردن خاطرینه کلنلری آکلاتدی . اوده کی حاللری ، معلا یوزینی ییقارکن ، بلکه قوجاسی کلیرده یینه بر

آراق قونوشورلر ديه خدمتچيلرك قاپيده بکله دکلريني ، کيجه لري قاپيلري کيڭله مه مراسمني دويدجه عطا بك يرن دن صيچرايور :

— اولدن عقللري زرده ايش ، دييوردى . شيمدى سنك نكاحلى قاريك دكلى ؟ . اونك اوستنده هر كس دن فضله ، حتى آناسدن ، باباسدن زياده سنك حقك وار . قانون ده ، شريعت ده هپسى سكا بو صلاحيتي ويريور . نهايت فاخر چكدكلريني آكلاتمق دن يورغون :

— پكى ، شمدى نه يامالى ؟ . ديدى .

— نه سويلسهك حقك وار . . ايچ يوزيني بن ده بيلمسهم بو نه رزالت ديه شاشاردم ! فقط كويك ايچنده آرتيق هر كس بو ماسقارالغى دويدى ، هر دويان ده سكا حق ويريور ! .

— كمه حق ويريرسه ورسون ، اونك اهميتي يوق ... شمدى قطعى برقرار ويرمك لازم . اصل دوشونولهك شي بو ... يوقسه كورويورسكزيا ، بو حياته دايانمق قابل دكل ... آرا يرده نه اولورسه بو قيزجنزه اولاجق . بارى بن ميدان ويرميهيم ديه قاچ كوندر صوصدم . صوصدم آما آرتيق بن ده انسانم . صوكره كونك برنده آي ، چوق اولويورسكز ، ديه طاشيويره جكم . او زمان كيم بياير نه اولاجق ؟ ايسيمي شميدن نه ياپاچغى بيلهيم .

عطا بك ده ، وضعيتك تكرار دوزدهليهك قادار آلت اوست اولديغنى اعتراف ايدييوردى . فقط فاخر :

— اويله ايسه آرتيق ياريندن تزي يوق ، بن كيديورم ، خبريكز اولسون . . دينجه صوك بر تكليفده بولوندى . معلايى هر حالده دوشونمك لازمدى . اونك بو خشوتتى يوره كدن دكل ، محيطندن كلن بر تضيق ايله كوسترشم اولماسى بك محتملدى ؛ حتى بويله اولديغى عطا بكك نظرندده محققدى :

— باق ، ديدى ، سن بيله آرا يرده نه اولورسه اوكا اولاجق ، دييورسك . نجه اونك سندن بردن بره صوئومش اولماسى قابل دكلدر . دها دون سنك ايچون اولومه وارنجهيه قدر هر شي كوزه آلدیغنى دوشون ... اوچ كونده

سندن بيقاجق بر قيز عائله محبتى ، محيطك تلقياتى ، نهايت كندى حياتى كې
 بوتون مقدساتى ناصل اولورده چيكنر ؟ . بونلرك هپسنى كلوب كچيجى برهوسله
 يايماق اچون انسان يا دلى اولمالى ؛ ياده پك آشاغى بر سوقاق سورتوكى ! ..
 حتى او بيله ياپماز آجانم ؛ امكنرینه اوبيله آجیر ! . بردها سويليورم ، معلانك
 قولای قولای سندن واز كچمهسى پك قابل دكلدر . بن حالا او فكردهيم .
 فقط بوسسيز ، پيصيريق كې كورونن قيزده حقيقه مرضى براراده وارمىر !
 آرتيق بوكا اراده ديمزلريا ، مدھش برعناد ! .. دوشوندكجه انسانك عقلى الميور :
 آناسنك ، باباسنك راضى اولميه جفنى بيله بيله سنى سهودى ، سنك اچون هرشيئى
 فدا ايتدى ؛ صوكرا اك اوافق برتأثرله كندى اولدورمهيه قالدى . شمدى ده
 آرتق سهوديكنه واردى ؛ اوطورسهيا ، خاير ، ينه بر دهليلك دها چيقاردى .
 والله نه ديهيم ، آ كلاشيلماز بر مخلوقش ، بنده شاشدم ... امينم كه بوسفرده
 ينه آنه سنك خاطرى اچون ، حتى ساده اونك ديلندن قورتولمق اچون
 كندى فدا ايديور .

فاخر سنى چيقارميوردى . ذاتاً هر كون عصيان ايدجك كې اوليوركن
 هپ بو احتمالله صوصميور ، هپ بونى دوشونهرك باشنى اوكنه اكيورميدى ؟
 عطا بك صوك بر تجربه اولسون ديه محى الدين بلكه كنديسى ده قونوشمق
 ايسته ديكنى سويله دى :

— واقعا بو حاله بردقيقه فضله داينيلماز ، فقط مادام كه بوقادار چكدك ،
 برايكى كون دها صبر ايت . باقالم ، بر كرده بن قونوشايم ، باباسى نه ديه جك ؟ .
 بوايشده سنك حقنى انكار ايتك قابل دكل . كچنمك ، هر شيئى اونوتمق اصل
 اونلرك منفعتى اقتضاسى ... حتى شيمدى كيدهيم ، بلكه بر چارده سنى بولورز
 ديركن ده ، نه يالان سويليهيم ، ينه سندن فضله محى الدين دوشونويورم . هر
 شيدن اول اونلرك شرفه خدمت ايتمش اولاجم . بنم بيلديكم بويله ..
 ايرتهسى كون عطا بك كويه كلدى . محى الدين شوقى بلكه قونوشديلر ؛
 فريدونده برابر دى . صوكرا استاسيونده بلكه ين فاخرى بولدى :

— دنياده ، دييوردى ، محى الدينك بوقادار بى چاره اولديغنى اوممازدم ؟
 هله فريدون ؟. كويا كنج ، اوقومش يازمش برآدام اوله جق ... بو ايشلرى
 دوزلمك اچون اك زياده اونك غيرت ايتمه سى لازم كله جك دكلى ؟ نرده ...
 بونلك هپسى ده بربرينك عىنى ، هپسى ده نه ياپديننى بيلميور !... ذاتا شيمدى يه
 قادار باشلرينه نه كلديسه هپ كندى قباحترى ... بو سفرده ينه اويله ...
 نه ايسه ، باشلادق قونوشمايه ... نه سويله دمسه ايكي سى ده حق ويرديلر ، والله
 اويله عطا جغم ديه باشلرينى اكديلر . بن ده آغزيمه كلنى سويله دم : پكى ديدم ،
 فاخر فنا ، آكلادق ؛ دونه قادار اوندن ايسى يوقدى ؛ بوكون ده اوندن
 فناسى يوق ، او كاده پكى ؛ يا سز نه يه كووه نيورسكز ؟. يارين آيرديكز ، نه
 اولاجق ؟. اوندن ايسنى مى بولوب ويره جكسكز ؟. فاخر ، جى ده ليكمش ،
 قيزيكرك كفوى دكلس ! شمدى يه قادار زنكىن طالبلر بربرينى مى قووالا يوردى .
 شمدى ده قاپيده مى بكليورلر ، همان قوجاسندن بوشانجه آلاجق مصرلى
 پرنسلى وار ؟. دها نه آغير شيلر سويله دم . هپسنه ده دوغرو ، حقك وار
 دييورلردى . نهايت نه اولدى ايسه اولدى ديدم . آرتق كچمه نك يولنه ،
 هر شينى اونو تمانك چاره سنه باقك !... بو اوغلان نه ده اولسه انساندر . ياپدقلىكزه
 داغ ، طاش داياناماز ، اونك بو قادار صبر ايتديكى نه دولت ! كونك برنده
 صاووشور كيدرسه عالم نه دير ؟ دوغروسنى سويليه يم مى ، والله هر كس قباحتى
 سزه بوليور . بازى شمدى ايشى طاتلى يه باغلا يوب ديدى قوديلرى قايا تمه يه باقك ...
 اوزا تمه لم ، بورايه قدر اعلا ... انسان محى الدينك او حالنه باقنجه هر شى يولنه
 كيردى صانير ، صو كرا بردن « پكى آما آنه سنه ناصل مرام آكلا ته جغز ! »
 ديه بربرينك يوزينه باقيورلر ... ياهو ، بو ناصل قادينمش كه بويله هپكزى قاصمش
 قاوورمش ، آكلا يامادم كيتدى ! . سويليورم ، سويليورم ايكي سى ده بكا حق
 وير ييورلر ؛ اوت باريشمقدن ، هر شينى اونو تمقدن باشقه چاره يوق ، دييورلر .
 فقط بر قرار ويرميه كلنجه ينه ايكي سى ده « بيا مم كه ... » ديه كم كوم ايد ييور ،
 آلرندن برشى كله يه جكنى اونلرده بيليور ؛ قيزك اوزرنده كى بوتون حاكيت

مکر هپ آنه سنده ایش !. دو غروسی بن بو قادارینی بیامیوردم . او یله بر حاله کلدیم که ، آمان نه خلط ایدرسه کز ایدیگز دیوب چکیله جک کبی اولدم . آما هایدی آرتیق بر کره باشلادق ، یاری یولدن دونمش اولیه لم دیه بر آز داهای او غراشدم . نتیجه ده محی الدین ده آلدن کلدیکی قادار سکونک عود تنه چالیشه جغنی وعد ایتدی .

عطا بك « ... هیچ اومیورم . » دیر کبی دوداقلرینی بو کوب بر آز دوردقدن صو کرا دوام ایتدی :

— سن ینه هیچ برشی اولماش کبی آوه کیده رسک ، ان شاء الله هپسی دوزدلیر ، بوده بویله جه اونو تولور .

فاخر اوفاجق بر امید دیه طوتوشیوردی ؛ فقط بو توسطدن صو کرا آرتیق عطا بك بیله منکسر اولدیغنی صاقلامیوری . احتمال آرا لرنده داهای نه آجی شیر کیمش اولاجقدی که حتی بوایشه قاریشیدیغنه پشیمان اولمش کبی برطوری واردی . فاخر ، بو کاده آیریجه اوزولدی .

اواقشام او کیدیکی زمان محی الدین شوقی بك خیلی ده کیشمش کوروندی ؛ داماد یله شوندن بوندن قونوشدی . آز چوق اسکی کونلری خاطر لاته جق بر حالی واردی . او کندن صو کرا دادینک ، یکانه نک وضعیتیه بر تحف اولدی . فاخره اسکیمی کبی صایغی کوسترلمه سی ایچون محی الدین بك او ایچنده تعلیمات ویردیکی آکلاشیلیوردی . اونلرده ذاتاً بو حیاتک صوکی کلیه جکنی آکلامشیر ، بر طرفدن فاخری اینجتمه مه یه چالیشیورلر ، بر طرفدن ده حالا فیخامت خانمی قیزدیر مقندن قورقویورلردی .

فاخر بر آقشام ده یولده فریدون بکه قونوشدی ، قاریسنک : « بر ایکی ایکی آرخه ایت ، صو کرا ناصل اولسه آریلا جغز . . » دیدیکنی سویا بدی . داییمی بونی قبول ایتهدی :

« — معلانک سزه شدتله مربوط اولدیغی محققدر . بن کندیسنی قاچ دفعه تجربه ایتدم ، آرتق بونده شبهه م قالمادی . شمدی بوتون بو خیر چینلقلر

سزی تأمین ایدرم که خسته لنگ اعصاب و شعور اوزرنده تولید ایتدیکی
پیشانلقدن باشقه برشی دکدر . اونک سوزلرینه نه باقیورسکز ، معلانک
اراده سنده کی شدتی بیلیرسکز . تام آلتی آی بر برکزی سهومشسکزده هیچ
بریمزك خبری اولمادی ؛ هپمزی اداره ایتدی . بوکونده عینی اسرار
انکیز روحك تجلیاتی کوروپورز . هله شیمدی بو بحرانك پك چوق
سبیلری وار : محجوبیت ، عزت نفس یاراسی ، آنه سنك خوشنودسزلنی
نهایت خسته لق قیزجغزی بوس بوتون آلت اوست ایتدی . فقط بنجه هیچ
تلاشه لزوم یوق . حتی آریلام دیمه سنه بيله اهچیت ویرمه ملی . بویله تیپلراوزون
مدت عناد ایدرلر ، صوکره مثلاً تام آریلق فلاکتی قوپاجنی ثانیه ده هرشی
کندی کندینه دوزه ایر ! . . . کوره جکسکزیا بونلرک هپسی زمانله حل
اولونه جقدر . دوغریسی کچیردیکمز ، آز کورولتو دکلدی ؛ اونوتولماسی ده
اوقادار کوچ اولاجقدر . آبلامك عصبیتی ده اوپله ، اوده یاواش یاواش سکوته
دعودت ایده جکدر .

فاخر : « بونلرده بنی اویالامق ، شو بر ایکی آی کچیرمك ایچون اویدو-
رلمش اولماسون ؟ » دیه ترددایتدی . فقط امیدسز خسته لر کی یالاندن اولسون
شفا اومویوردی ؛ سسنی چیقارمدی .

برطرفدن محی الدین بك ، اوکا باقه رقدده اوته کیلر آز چوق فاخره قارشى .
طورلرینی ده کیشدیرمش ایکن اوته دن فخامت خانم ، هر تصادفده اونى عادتاً
کوزلریله بوغمق ایستیور ؛ صانکه جهنم یوطمش کبی ، هروسيله ده آغزی
زهرلی بر آله ورنکیله آچیلیوردی .

آرادن ایکی کون داها کچدی . فاخر ، اوده بولوندیغی زمانلر کندی
اوطه سندن چیقمازدی . اوکون بازار اولدیغی ایچون ایشه ده کیتیمه جکدی ؛
هنوز یاتاقدده ایکن خدمتچینك سسندن اویاندی . قالقوب قاپی پی آچدی . یکانه :
— هپمز حمامه کیدیورز ، دیدی . او یالکیز قلاجق ؛ خانم ، فاخر
بكده سوقاغه چیقسون ، دییور .

بر آز ایلشمك ، باریشقم زرده ، اونلر بویه هر کون خاطره گلهدك
حقارتلرله یکی بر مسئله احداث ایدیورلردی . عجباً فاخر اوده یالکز قالسهیدی .
یرتیق پرده لرله ، قیریق قولتوقلریمی آشیراجقدی ؟

شمدی هله بوتون فیرطنه اک زیاده آنا ایله قیزک جبهه سندن قویویوردی .
معلاده قوجاسنه اذیت ایچون آنه سندن کری قالمیور ، صانکه بر ثانیه بیله
اونی کورمه یه تحمل ایده میورمش کبی هر تصادفده قاشلرینی چاتوب باشی
چه ویریوردی . بر آقشام فاخر ، اوده کلدیکی زمان قاپی پی معلا آچشدی . اونی
کورونجه صانکه نامحرمله قارشیلان اسکی قادینلر کبی قاپی پی قاپارجه سنه
ایتدی ، ایچری قاچدی . صو کرا بعضاًده قوجاسنک یوزینی بیله کورمه دن ،
مثلا صوفادن کچرکن ، مردیوه دن چیقارکن کندیسنه ایشیتدیرمک ، ایچون
عنادینه باغیریر :

— برده آنه سنک اوستنه یمین ایدیوردی ها .. دیه اونک مقدساتنه قادار
هجوم ایدردی . فاخر ، قاچ زماندر کندی شخصنه روا کورولن اک چیرکین
شیلر بیله تحمل ایتشدی ؛ لکن آنه سنک ، او بدبخت قادینک بویه حقارت
پوسکورن ، چیرکف قوصان آغزلره دوشمه سی کوزلرینی قارارتدی . او
دقیقه ده هپسنک یوزینه توکوروب چیقاجق اولدی :

— آه آنه جکم ، دیه ایکله دی . سن که شو قیزی نه قادارسه وودردک ،
نه قادار بکه نیردک ؛ شمدی باق سنک ایچون نه لر سویلیور ؟ ..
کچنلرده قومشولر آراسنده کی دیدی قودیلر ایچون سوز آچیلوبده فاخر
آنه سنک خاطره سنه یمینلر ایتدیکی زمان او ، بر آز اینانمش کبی صوصمش ،
باشنی اکشدی . شمدی تکرار فورانندن آکلاشیلیوردی که معلانک قابنی
ییلان یوواسی کبی زهرله دولدورانلر ، نهایت اونی بوس بوتون قاندرمشلردی .
دوشوندکجه آراده بر ، ینه قاریسنی معذور کوردیکی ، حالا عفو ایتدیکی ده
اولویوردی . واقعا محی الدین شوقی بکده آرتیق باریششمش کبی بر طور واردی ؛
دادی پی ، خدمتجیلری ده حرمتسزلکدن منع ایدیوردی . فقط معلا باباسنک

نە قادار ضعیف اولدیغنی بیلیردی . زواللی آدم نەدە اولسه اک صوکنده قاریسنت آرزولرینه تابع اولاجقدی . شمدی ، محی الدین بکک بوگونکی حاله آلدانوبده فاخرله باریشسه یارین مطلقا هرشی ده کیشه جک، اوزمانده آنهسی کیم بیلیر نهلر یاپاجق ، نهلر سویلیه جکدی . اونک ایچون قوجه سنه قارشی طورینی هیچ بوزمایور، حتی آنه سنه خوش کورونمک ایچون خیرچینلغنی داها زیاده آرتدیریوردی .

معلائک بودوشونجهسی هیچده یا کلش دکلدی . نته کیم فحامت خانم قوجاسنی ده نهایت کندینه بکزه تدی . کرکینلک آرتق اوقادار آرتدی که اؤک ایچنده هرثانیه کورولتو اکیلمز اولدی .

فاخر ، اوطه سندن چیقمیور ، صوفراده برشی یه میور ، فقط سواقدهده حاله قارشی : « اونه ، محی الدین بکک دامادی قارتی لوقنطهده دویورویور.. » دیدیرتمه مک ، دردینی حالا کیمسه یه بلای ایتمه مک ایچون یاتاق اوداسنده براز پینر اکمک کدوله یور ؛ بونی بیله کویده کی بقالدن آلمیه رق استانبولدن کتیریوردی . بوش وقتلرینی قاضی کوینده فوتبول میداننده ، بک اوغلانده بوقس قلوبنده کچیریور ، فقط شوراده بوراده دولاشمه سنه باقوب ایل عالم برمعنا ویره جک دیه اوزونتودن ده اولویوردی . اوپله ایکن اونک هرکسه قارشی اوکوندیکنی ، دیدی قودی یاپدیننی سویله ینلر بیله واردی ...

ذاتاً شمدی یه قادار هرشی ، صوکراده ایشته بوازواج هپ بویله اسنادلره قربان اولمشدی .

فاخر بوگونکی فلاکتی دوشوندکجه باشقه برسبب بولامیور ، آرالرنده کی بو اوچورو می ییقان شی ساده جه او دیدی قودیلر میدر ، یوقسه اوته کیلرک ایجاد ایتدیکی داها باشقه بهانه لرده وارمی ، بونده کی اسرارده نفوذ ایتک بر تورلو قابل اولامیوردی .

عطا بک ، عادلک حکایه سنی محی الدین بکدن دویوب اوکرندیکی ایچون :

— بکا قالیرسه دیمشدی ، بو اوغلان اسویچردهن کلسون ، سنی اوکا
ویریرز ، دیه قاندریلر ! .

فاخر ، بونی قبول ایتیمور :

— ایکسینک آراسنده برشی اولدقدن صوکرانچون بویله بر وعده
قایلسون ؟ دیوردی . ذاتاً چوزولمز دوکوملردن اورولن قالدین قای هله
معلاده بوس بوتون دولاشیق ، حتی برازده مرضی ایدی . انسان بونی تحلیلله
قالقسه روحیات قانونلرینک عجزینی اثبات ایدن مستنالدن برینی کشف ایتش
اولوردی . فاخر بوکا ساده جه :

— امثالسز بر معما ، دیوردی . بر معما که غرور ، کبر ، عناد ، عشق ،
آنا محبتی ، فداکارلق ، آنسزین طوتوشان هوسلر ، صوکره او هوسلرکینه
بردن برده سونو ویرمه سی کی بونک مختلف تظاهرلرینی برر بر بولوب چیقاریورسکز ،
فقط اصل کیزلی نقطه یی ، او قای چارپندیران اسرار انکیز قوتی بر تورلو
آکلا یامیورسکز !

*
**

معلا ایله فرانسزجه درس یاپارکن آنه سی قانا په ده اویونجه یازمق صورتیله
قونوشدقلری کاغدلری فاخر صاقلامش ، شمدی آرادده بر تکرار کوزدن
کچیریوردی . معلانک هر سطرده تکرار ایتدیکی صداقت یمینلرینی ، ابدیت
وعدلرینی کوردجه برده شمدیکی اوزاقلنی دوشونور :

— هپسینک بو قادار چابوق اونوتولاجنی کیمک عقلنه کلیردی ؟ دیه ایچی
صیزلاردی .

بو کاغدلر ، آرالرنده یواش یواش اورولن ، قوتله نک رابطه نک حادثا بر
تاریخجه سی ایدی . مثلاً هنوز ایلاک زمانلرده معلانک ، فاخرله آنه سندن
هانکیسنی ترجیح ایدجکنی شایرمش کی بر طوری واردی . فاخری داماد

ایتمک بحی اوزرندە فخامت خانملە قانن آناسنک قاوغا ایتدکلری کونک آقشامی
او کاغدلرک برندە :

— پکی ، یا سن نه دیدک ؟ دیه معلایه صورمش ، اوده :

— طبیعی سسیمی چیقارمادم ، دیه جواب یازمشدی ، شمدی یه قادار
بوکا بکزر بر لاف کچسه بن هیچ قاریشمازدم . بو کون معتادک خلافتده برشی
سویله سەیدم شهبه یی دعوت ایده بیلیردی . ذاتاً نیجه تلاشه لزوم یوق ؛ بر کره
آنه مک ایستدیکی بی آدم نره ده ؛ اولدیغنی فرض ایتسه ک بیلە بن دده بر ایکی سە
بهانه بولورم . فقط یارین پک قطعی بروضیته دوشه رسەم او زمان نه اولاجق ؟ ..
ایشته اصل بوندن قورقویورم . دیه لم که آنه م ، کونک برندە شو ، شویله
اولاجقدر دیه اصرار ایتدی ، بن نه سویله سەم نهایت ینه ، اونک سوزینی
قبوله مجبور اولاجغم . هایدی ، باشمی آلوب یورو یو ویرەیم دیه ده دوشونویورم ،
فقط بو ، اونی اولدیرمک دیمکدر . کندم بوتون خیاتمده بدبخت اولمایه
راضییم ، فقط آنه می بیلە بیلە ناصل اولدورورم ؟
ینه عینی کاغدک صوکلرندە معلانک تیتردک ، قوتسز یازیسی ایله شو
سطرلر واردی :

— ... نه اولورسه اولسون ، اونلر نه یایمق ایستلرسە ایسته سونلر بن سنی
سەویورم . اولونجه یه قادار بر بر مزدن آیریلیه جغز .
صوکره درس بیتوبده فاخر کاغدلری طوپلارکن معلانک شو صو ک
جمله سنک یانه او کیجه نک تاریخی یازمش ، اونک یانه ده ینه بو ایجه یازی
ایله ایکی سطر داها قارالانمشدی :

— نیچون تاریخ آتیورسک ، بوساده بو کون ایچون دکل که ... بوتون
عمر مده سنی سەوه جکم ! .

بورایه قادار بر آرز ترده بکزه بن حال بوندن صوکرکی کاغدلردم
بوس بوتون غائب اولمش ، صانکه معلانک اراده سی کیتدکجه آرتان بر قوتله
بردن بره جانلانیویرمشدی . اراده بر استقبالی رینی دوشونورکن مثلاً فخامت

خانمله دو قتورك كورولتولرندن كنديلرينه ده بر حصه چيقارسه ديه قورقشله ،
فقط اوزمان ده معلا درت كله بوتون قرارلريني يازمشدي :

— سن نرديه ، بن ده اورايه ...

داها صوكرالري ، معلانك آرتق او ايچنده كي كچمسزلكدن اوصانوب ده
همان هر آقشام تكراره باشلا ديني سطرلر كليوردی :

— بر او ، بر ير اوطه سي بول ، بر لوقا قورو اكمكه راضي يم ، بورادن
كيدلم ..

فاخر شمدی بونلری اوقودجه ، صوكرده ده :

— بني سندن ساده اولوم آيزا بيلير .. كي سطرلره راست كلدجه آجي
آحي كولويور :

— هپسي هپسي يالانمش ، ديوردی . بو قيزتي ايلك كوندن صوكنه
قادر آلدادی ! اسكیدن ، قلبنده چارپمايه استعداد يوق ، بني سهو ده مز ديه
آلداندم . صوكر ا بو ابدیت وعد ایدن يمينلرينه ايناندم . شمدی ده كيم بيلير
ناصل آلدانيورم . شاشيلاجق شي ! . . حياتده بو قدر مغلوب اوله جقمی
خاطرمه كتيرمه مشدم . اونده اويله بر قوت ، اويله بر بويو واركه بني نه
زمان ايستره قولايجه آلداتيوريور ؛ بن كهر شیدن ، هر كسدن شبهه
ايتك فلسفه سنه ايمان ايدنلردن بريسي ايدم !

بر ايكي كون داها بويله كچدی . فاخر ياواش ياواش دو غاجني وعدايديان
سكوني بكه يه رك وقت كچيرمك ايچون نه ياياجني بيلمیوردی . بر آقشام قلوبدن
چيقمش ، تقسيمدن تراموايه بينيوردی . آرابه بردن بره قالدی . فاخر يوز
اوستي يره دوشدی ؛ كوزلكي قيريلدی . او آراق ينه پاراجزداني غائب ايتدی .
او كيجه يي تيزه سنده كچيرمه يه مجبور اولدی . ايرتسي كون كويه دوزر كن فحامت
خانمله عيني ترندد ايديلر . اوده بو كون قزل طوپراغه كورو وجه سنه كيتمشدی .
آقشام ، صوفرايه اوطورديلر . فاخر يمك يه ده ديكي حالد هر زمانكي
كي ينه صوفرايه اينشدی . فحامت خانم ده يمك يه ميور ، ساده زهر

چيكنه يوردى . هله بو آقشام اوکا، بوس بوتون بر حال اولمشدى . او کون قيزيل
طوپراقده قومشولردن ايشيتدکلريني آکلاتيور :

— ينه کيتمش، اوکنه کلن يرده ، سويله مهديکني بر اقامش !.. کوياقيزي
آليه جقمشده، بريالو ارمنش !.. ديه قيامت قوپاري يوردى . شمدى يه قادار کنديلري
هر لاف آچيلدجه بوماجراني تورلو تورلو تاويله قالقوب اورته يه بيک بر ماصال
چيقارمشلر، صو کرا بونلر هر دولاشديغي آغزدن بر باشقه يالان امه رک بويومشدى .
شمدى ينه اونلرک عکسلريني اطرافدن دويدجه هپسني فاخردن بيايورلردى .
فريدون بک انتخاردن اوچ دوت کون صو کره ده لفينه راست کلدیکني
آکلاتمش، محى الدين بک فاخرک خاطر ده دفتريني او قودجه بوس بوتون طوتوشمش،
بو آقشام آرتيق هر آغزدن بر باشقه چينلق طاشيوردى . محى الدين شوقى، اوزمانه
در بويله کورولتولره هيچ اولماسه قاريشماز کي کورونوردى . هله صو ک
کونلرده براز ديرلک دوزنلک آرزولرى بيله کوسترمشکن آرتيق اوبيله حقارته
باشلاينجه فاخر :

— بک افندى ، ديه آياغه قالقدى . ذات عاليکزه نه برقادين نه ده برخسته .
سکزه ! حقارتلريکزه مقابله ايمه يه مجبورم .

ايلردن برى کاه طوتوشوب کاه زورله کيزله ن تآثرلر او ثانيه ده قارشيلقلى
بر عصيان کي باطللادى . هر کس داماده هجوم ايدييور ، هپسنگ آغزندن
طاشان فرياد ، بر کذاب طوفانى کي فاخرک ايچنده کي يارايى بوس بوتون
ييرتييور ، ياقيوردى . دو قنور پچته سني بوروشديروب يومروغنگ ايچنده طوپلامش
هر سوزک نهايتنده النى ماصه نك اوستته وورويور ، فخامت خانمک باغيرمقدن
سسى قيصيلمش، فريدون کوزلرندن زهر وکين آقته رق اونلره باقييور، بويوک
خانم ده صانکه :

— آه بکاده بر شى صورسه لر ، بنده بر شى سويله سه مده هيچ اولمازسه
بنى داماددن طرفه ظن ايمه سه لر . . دير کي باشنى صالليوردى . بردن ، ياربي،
بو کورولتونک اورته سنده معلانک سسى ده دويولدى ؛ فاخرى تحقير ايچون

اوده چیرنمایه باشلادی . بونده کی چیرکینلک باباسنک بیله کوزندن قاجامشدی :
— صوس ، سکا لاف دوشمنز !.. دیه قیزی آزارلادی .

آرتیق هر شی ییقلامش ، بیتمشدی . دیمک معلانک قاج کوندر آرتان
خیرچینلغی ، صوئوقلغی ساده فیخامت خانمه اطاعت ، ساده اوکا خوش کورونمک
ایچون دکل ایدی ؟ اگر اونی بر از سه وسه یدی قوجاسنک بویله خانمدن ،
خدمتچی یه ، باباسندن دایسنه قادار هپسنک هجومی اوکنده قیوراندیغی کورونجه
البت ایچی یانار ، هیچ اولماز سه سنی چیقارماز ، باشی قالیرمازدی . بو شرتلک
فاخرک ایچنده کی صوگ امیدیه شونددوردی . ذاتاً بر قاج کوندر یاواش یازاش
قیزمایه باشلامشدی . قاریسنک هر کنهانی عفو ایتک ایستیوردی . فقط اونده
اوپله بر قومه دیاجی روحی واردی ، باشقه لرینی آلداتمده اوپله براوسته لق
کوسترییوردی که بو بویله دوام ایتدکجه ، باریش سه لر بیله ینه کچنمک قابل
اولمایه جقدی . یالانچیلق ، اولدیغندن باشقه کورونمک آرزوسی ، معلانک
ایچنده یاشایان بوییلان ، آرتیق اک طاتلی خاطره لری زهرله یوب بوغمشدی .

فاخر ، دو قنور محی الدینی چوق سه وهردی . بر آراق معلانک اوکا دیمشدی که
« سن بابامی بیلمزسک ، بوتون هائله نک فلاکتنه ، آنه مک خسته لغنه هپ او
سبب اولدی ؛ بنی ده شمدی اسیر کی صاتمق ایستیور . . . » بو کون ایسه
آرتق باباسنی تا سوقاق قاپیسنده قارشیلیور ، بش یاشنده بیکار کی : « باباجم »
دیه بوینه آتیلیوردی . هله دادیسندن هیچ خوشلانمازدی ؛ چوجوقلقدن
بری « دادی » یه « جادی ! » قافیه سنی اویدیرمیش ، کندینه دشمن دیه
طانیمشدی . شمدی هپسنی اونوتمش کی هر دقیقه فیصلاشیورلر ، کولوشوب
قونوشویورلردی . بوتون کون اؤک ایچنده هر کسه شاقالاشیور ، یکانه ایله
باغچه ده قوشماجه اوینایوردی .

فاخر بوفلاکتدن صوگرا اونی داها آغیر ، داها یوکسک کورمک
ایستردی . حتی آنه سی ده بو شمار یقلاقلره قیزیور ، اراده بر کندینی طوتامیه رق
فاخرک یاننده بیله قیزی آزارلایوردی . معلانک عجب بوتون بونلری ده زورا کی ، هپ

فاخره عناد ایچون یامش اولماسون ، بوده خاطره کله بیلیردی . فقط نهده اولسه ایچی دیشی بوقادار باشقه برروح هر حالده پک تهاککلی برشیدی . بویله دوام ایدرسه ، بو هرثانیه ده کیشن روحک اعوجاجلر ، انخنالرله دولو کیم بیلیر داها ناصل تظاهرلری اولاجق ، بوکون آیریلماسهلر بیلله بوتون عمرلرنده اکسیلمه یین شبهه تورپوسی تکمیل سعادت رؤیالارینی کیره جکدی . یالانی سویلرکن دوغرویه بوقادار بکزه تن آغزیدن یارین نه ایشتهسه ، انسان : « عجبا؟ » دیه قیورانمیه محکومدی . هله بواقشامکی صحنه دن صوکرافاخرک هیچ امید ی قالمادی ؛ حاولوسنی صوفرانک اوسته فیلاتوب دیشارییه چیقدی .

اوکیجه براز مستریح اویودی . هیچ اولمازسه آرتیق قرار ویرمک قدرتی حس ایدیوردی . ذاتاً تردد ایده جک نه قالمشدی ؟ . ایرتسی صباح استانبوله ایندی . تنها بر واپورک کووه رته سنده قاواقلره قادار کیدوب کلدی . بول ، تمیز برهوا ایچنده ، آسوده دوشونورکن : « صاقین برکنه ایشله میهم ؟ » دیه بعضاً ایچنده دوغان اندیشه لردن آرتیق بوس بوتون قورتولویور ، حتی بوزمانه قادار تردد ایتدیکی ایچون یاواش یاواش کندینه قیزیوردی .

دونوشده تصادف اونی عطا بکله قارشیلادیردی . آیاق اوستنده قونوشدیلر :
— نه وار ، نه یوق ، ایسکزیآ ؟ . .

— اوو . . بن چوق آییم . یا یارین ، یا او بر کونده بوس بوتون . قورتولویورم . صوکره قیصه جه هرشیئی آکلاتدی . عطا بک :

— بن هپسینی بیلوردم ، دیدی اونلرک برکره کوزی دونمش ، یوله کلیه جکلری چوقدن بلای ایدی . سن ناموسلو بر آدامک یاپاجنی هرشیئی یاپدک اولادم ؛ بکا قالسه ذاتاً بر دقیقه بیلله دورمازم . فقط دوغروسنی سویلیه میم ، بوایشه سکا اک بویوک اییلکی ده معلا ایدیور ؛ اکر بویله بردن بره عفریت کبی ده کیشمه سهیدی ، اونک خاطری ایچون سن کیم بیایر نه لره قاتلانجه قدک ، داهانه لر چکه جکدک ؟ شمدی سنی ایسته میورلرمش ، اویله می ؟ . . های الله

راضی اولسون دیرسك . اونلر كندی قویولرینی ینه كندیلری قازدقدن صو كرا سن بوقادارله قورتولدیغك ایچون قربان كسمه لیسك !..

فاخر بوندن صو كره اوچ كون بول بول او یودی . براز كندی طوپلامق ایچون اوزون اوزون كزدی . اونلرك یوزینی هیچ كور میوردی .

آقشاملری اوده کلیور ، فقط صوفرایه اوطور میهرق دوغرو اوداسنه چکیلیوردی . هر شیتی دوشوندی ، حساب ایتدی ؛ نهایت صوئوق قانلیقله قرارینی ویردی . نكاحدن بری كچن یكرمی اوچنچی كونك صباحی ایر كندن قالقدی ؛ اشیاسنی طوپلادی . استاسیونده کی ایکی خدمه یه دون کیجه دن تنیه ایتشدی . چانطالرینی اونلره ویردی . صو كره دادی بی چاغیروب معلایه ده خبر یوللادی . كنج قادین آناسنه باباسنه دانیشدقدن صو كره یوقاری چیقدی . فاخر ، اونك اولا كندی اوداسنه كیدوب كوزلرینه سورمه چكد كدن صو كره یاننه كلدیكنه دقت ایتدی . فخامت خانم ، قیزی سورمه هادته آلیش دیردیغی ایچون صباحلری قالقنجه معلانك كوز قاپاقلری عادتاً براز قیزیل بررنك آلیردی . شیمدی ده کیم بیایر ، یابوقر مزیلغی اورتمك ، یاخودینه قوجاسنه عناد ایتك ایسته مشدی . چونكه او ، سورمه یه اوته دن بری اعتراض ایدهر ؛ معلا ده : « نه یاپایم آنهم زور لیور ، ایلریده بر بر رمزك اولونجه سورمه م . . » دیردی .

فاخر ، بو دونکی رؤیانك پریمی ، بو كونکی مشروع زوجه سی ، یارین ده مطلقه سی اوله جق قادینی بر قاچ ثانیه سوزدی ؛ صو كره :
— کورویورسك ، دیدی بن کیدیورم . معلا ساده جه :

— پك اعلا ، دیه جواب ویردی .

— بنمه برابر كلمك ایسته رمیسك ؟ ایسته رسه ك شمیدی برابر کیده لم . ایسترسه ك بن کیده یم ، ائمن کلنی حاضر لیه یم ؛ صو كرا ده سن کل . . . سویله ایسترمیسك ؟ .
معلانك بوینندن خفیف بر اوریورمه كچدی . قطعی برقرار ویریر كن هپ بویه اولوردی . صو كره طبق ایلك مکتوبی آلدیغی زمان : « آنه مك خبری اولماسون . . » دیدیکی کبی ، طبق بهیجه ایله مبجلك دیدی قودیسنه قیزوب ده

فاخر كېتمك ايسته دېكى وقت : « خاير ، كېتميه جكسك . . » ديدىكى كې ،
نهایت ينه دون : « آرتيق سنكه آرامزده هرشى بېتمشدر . . » دير كن اولديغى كې
باشنى سيلكدى :

— خاير ، ديدى .

— پكى ، سويليه جكم شى بوقاداردى ؛ بويوريكنز . .

فاخر بونك بويله اولاجغنى بيلوردى ؛ فقط فريدونك برزمانكى سوزلرينه
آلانمشدى .

معلا ، چيقوبده يالكنز قالنجه صوك يدى سكنز آيلىق حياتك الكطاتلى لوحه لرى
بر قاچ ثانيه ايچون كوزنده تكرار جانلاندى : بوتون ياز شوراده طوتوشان
قهقهه لرى ، آقشاملرى معلايى كوردكجه اسكى زمانك مكتب چوجوقلى كې قورقه
قورقه قابلىرنده كنى فيصىلداش دقلىرى دقيقه لرى ، صوكره بردنبره ناصل شدله
بر برلرينه باغلانيويوردكارىنى خاطر لادى . كوزلىرى قاپادى . اودانك ايچى
قارارىيور ، كيجه لرى چيلاق آياقلىرله ، هر آديمك اوستنده بر قاچ ثانيه
دوروب اطرافى ديكله يدرك هيچاندىن ، صوئوقدن تيتريه تيتريه معلانك ايچرىيه
كىردىكنى برداها كورور كې اولويوردى . شو اوده ، شو صوفاده ، شمدىيه
قادار « فاخر بكك . . » ديه ياد ايدىلن بواوطه ده نلر كچمشدى ؟ . هر آقشام
اوه دوندىكى زمان معلاده بر بهانه ايله يوقارى چيقار ، اوكا وفا ايله سودا
فيصىلداردى . بوتون بوحيات بوراده كچمش ؛ بورؤياشورا جقده دوغمش ، نهایت
شمدى ينه هپسى اوراده سونويوردى . نه هيچانلى كونلردى اونلر ؟ .
قاچ دفعه دوداقلرنده كى سعادت يودوملىرى ايله باشلىرى دوغمش ، آراده هپ
بويله آيرىلق احتماللارنى خاطر لادجه بوس بوتون بر برلرينه صوقولمىلر ، صوكره ،
هرشى هرشى برسوزله قويويورمشدى ؛ صانكه او كونلر يالاندى ، ياشانيلما مشدى ؛
انسان بر درلو اينانه ميوردى ! . . نهایت صوك آيلرك بحرانى دوشوندى .
معلايى اولومه آتان فيرطنه لر كوزينك اوكنه كلدى . او نه اوزون ، نورسز ،
قورقونج كيجه لردى ! .

هله سکز آی اول ایلک کلدیکی کونله شیمدیکی چیقیش آراسنده نه بویوک
فرق واردی !. اوزمان جاذب بر رؤیایه دالارکن دامارلرینه یاییلان مستی ایله
هر شیئی کله جک کونلردن بکاردی ؛ شمدی ماضی یی یاد ایدرک او یانیوردی .
بکله نیلن کونلر کچمش ، یرنده خرابه لر قالمشدی : ایشته معلا ، ایشته فاخر ، ایشته
چو کمش بر یووا ، سونن بر سعادت ...

یوقاری قاتده کیمسه یوقدی ؛ هر یره آیری آیری باقدی ، هر گوشه ده
باشقه بر لوحه نك خاطره سی دوغویوردی .

سیلکسندی ؛ آرتق اولاجق اولمشدی . آل چانطه سنی آلدی . اینرکن
مردیوهن باشنده دادی یی کوردی . بو جاهل قادی ن بیلهرک بیلمه یهرک بویوک بر کنه
ایشله مش ؛ کوردیکی ، دویدیغنی ، یا ککش کوروب ، یا ککش آ کلا یه رق
شوکا بو کایتش دیرمکله بو او بارق ییقیمنه دنیله بیایر که بر آزده او سبب اولمشدی .
فقط صـوک کونلرده ده صانکه خطاسنی آکلامش ، معلا یی بو خیرچین
عناد جیلقدن واز کچیرمک ایچون چالیشیرکی کورونویوردی . فاخر ، او قادار
فقالق کوردیکی بو قادی نه : « اللهه اصمارلادق ، دادی ... » دیه جک قادار
اراده سنه حاکم اولق ایسته رکن کوزلرنده کی یاشی ینه اونک بر سوزی قوروئدی :
— فاخر بک چانطالری کری کوندرسون ، دییور خانم ! ..

فاخر ، اشیاسنی کندی چانطه سنه صیغدیرامامش ، اونلرک کندیسنده کی
چانطه لرینه ده قویمشدی . بونلرک بریله بوتون قیش ، قارده چامورده ،
استانبولدن ییه جک ایچه جک طاشیمشدی ؛ ایچنه ات ، شکر ، پرنج قویمقدن
یامری یومرو اولمش بر چانطه ...

شیمدی بوتون بر عائله ییقلیور ، ایکی کنجک سعادت یی باشقه لرینک احتراصنه ،
محله قاریلرینک دیدی قودیسنه قربان اولویوردی . فاخر ، نه ده اولسه ینه
کوزلری یاشلی ، معلا ده نه قادار صاقلاسه ایچی یارالی آرتیق بریزدن
آریلیورلردی ؛ او آراقده ایکی مشین پارچاسنی دوشونمق ایچون انسان عجا
نه اولمالیدی ؟ . بو ، نه بایاغی ، نه قودوز بر احتراصدی یاربی . . . پاریه

بودیوارلردن کوزەل معبد اولماز ، بوقادیندن فضلە طاپینان بولونمازدی . فاخرک یرنده کیم اولسه :

— یکی ، بنم اوقادار آلاچم وار ، سز نه یوزله اوچ بش غروشلق چانطانک حسابی صوریورسکز ؟. دیردی . سسنى بيله چیقارمادن آشاغی ایندی . دوقتور محی الدین شوقی بك باغچەده چیچکلرله اوغراشیوردی . اوتە کیلرده هر زمانکی اوطەده ایدیلر . باشنی چویروب هیچ برینه باقمادی . سکونتله قاپیدن چیقدی .

اك كدرلی کونلرندن ، اك نشلی زمانلرینه قدر هرثانیه پارادن باشقه برشی دوشونمهین فخامت خانم افندی ، نهایت ایشته مرادینه ایرمش ، قیزی فلا کته کومسه بيله ینه فاخردن آیرمشدی .

*
**

آیریلق محققدی . اونلره قالسه بر ایکی آی دها وقت قازانوب نتیجه یی صوکر اعلان ایده جکلردی . فاخر ، آرتیق دایانه جق حالی قالمامش ، هرشی بر آن اول بیتیرمک ایستیوردی . نهایت آراسی یکرمی یکرمی بش کون کچد کدن صوکر رسمی معامله ده یاپیلوب بیتدی . بو آراقده بيله اوتە کیلر صوک بر بایاغیلقدن کری قالمادیلر . عطا بك بر آی اول نکاحک شرطلرینی تثبیت ایتدیکی کبی بوسفرده طلاقه هاند ایشلرله اوغراشیوردی . بر کون کلوب فاخره دیدی که :

— نه ایسه مسئله قرارلاشدیرلادی ، فقط خانمک سنده چانطالری می وارمش ، نه ایمش اونلری ده کوندرسون دیدیلر ...
صوک کونی صیقی صیقیه ایسته نیلن چانطالر بو سفردە اونوتولمامشدی .
عطا بك بيله :

— والله برادر ، بنده شاشدم ، دییوردی . اوتەده او بارق ییقیلور ؛ برسعات محو اولویور ، قیزلری اولومدن زور قورتولدی ، قورتولونجه یه قادار

چكمه دىكى قالمادى. اونلر حالايوزاللى غرو شلق ايكي چانطه يي دوشونويورلر!..
بونلر ك عقلنده مطلقا بر ا كسيكلك وار... ينه طاللى ايمشسك كه قورتولدك. قربان
كسمه ليسك، ديدم يا، قربان آرتيق اوغلوم، كيت، كز، كيفكه باق!..
راحت سنى دورتدى ده مى كلك، باشنه بلا آرادك؟.. اما ايشك ايچ يوزىنى
بيلمه ينلر فاخر چاپقين ديه جكلر مش، نه خلط ايدرلر سه ايتسونلر ...

صو كرا ينه ايشلره عودت ايتدى :

— سنك آلا جغه كلنجه ...

— جانم، بن

— بيليورم، برشى سويله مه دك اما بونى ده قونوشمق لازم. شمدى،
بو بورجى اونلر قبول ايدويورلر؛ فقط آ كلاشيلان ويرمك ايسته ميورلر. داها
دوغريسى ويره جك حاللرى يوق... واز كيچ شوندىن ده ... برابر نامه يازارسك،
بو ايش ده اولور بىتر.

— والله، عطابك بو كورولتوده آلا جق، ويره جك دوشونمك بنم
عقلمه كمدى. بو پارايى ذاتا ايسته يه جك دكلم، فقط ديديككز طرزده نيچون
بر ابرنامه يازايم؟. بوكاده لزوم كورميورم. هانيا مغلوب ملتار واردركه
اللرندن سلاحى آلينير، اوجاقلرينه دشمن كيررده ينه معاهده يه امضا قويمق
ايسته مزلر اونك كى ..

عطابكك ياننده شاهد ديه بر ايكي كيشى داها واردى. هپ برابر فاخر ك
ضعيف طرفندن هجوم ايتديلر :

— بو پارا معلا خامه ويريله جك ديديلر، ناصل اولسه نكاحى اوده يه جك
دكليديكز، اونلرده بوندىن واز كچيور.

بويله جه اولا ابرنامه لر، صو كرا ده طلاق كاغدلىر تعاطى ايدىلدى.

فاخر شيشلى يه عودتدن صو كرا بر قاچ كون كندىنى ديككه دى. بك اوغلى
طاللىر بك باشقه لاشمش، يكي يكي بارلر، دانس سالونلرى آچيلامشدى.
بر قاچ آي اولنه قادار ساكن بر يوا صايىقلاركن شيمدى آرتق هر كيجه

کچ وقتہ قادار دیشاریدہ قالیوردی . برطرفدن ده شومن دوفر قومپانیا سنده کی
یکی مأموریتی ایچون صیق صیق کویہ اوغرامایه مجبور دی . بوکاده پک صیقیلیوردی .
اسکیدن مثلاً بر بایرام زیارتی ایچون اورایه کیتمه یی دوشونسه بو جنت کی
یرلرک رؤیاسی ، بوتون کیجه کوزندن اوز او یقوی سیلردی . شمدی هپسندن
اوقادار صوئومشدی که اونلرک سمتنه بر داها آیق باصامق ایچون وظیفه سنی
مرکزہ نقل ایتک ، بوده اولمازسه بوس بوتون استعفا ایتک ایچون اوغراشیوردی .
انشته سی ، تیزه سی ، یاقیندن بر ایکی کیشی :

— ده لیمیسک دیدیلر . ایشکی کوچکی نیه براقه جقسک ؟ هم بویله یاپارسه ک
هرکس ، باق یاپدی ، ایتدی ده صاووشدی ، دیر . بن سنک یزنده اولسه م
عنایمه کیدوب اوراده وظیفه مه دوام ایدرم .

فاخرکده عقلی بوسوزلره یاتدی ؛ ذاتاً یاز کلشیدی . آزچوق سربست
اولان بو وظیفه اثناسنده بر آزاراحت ایدہ جک ، چالیشمایه ، اوقومایه وقتی ده
اولاجقدی . بر آی صوکره تکرار کویه طاشیندی . اوراده کی دیدی قودیلر
حالا اکیلمه مشدی . ایشته هرشی اولمش بیتمش ، بر سعادت قیریش ،
هنوز قورولمایه حاضرلاناں بر یووا ییقیلماشدی ؛ بو شوم آغزلر بر تورلو
صوصایوردی !

بو ازدواجک حکایه سی آرتق بوس بوتون دویولمش ، هرکسک آغزنده
دولاشان بیک بر روایت واردی .

کیمی فاخر حقلی بولویور ؛ کیمی ده خیانتله اتهام ایدیوردی . بونلر
اونک قولاغنه ده کدجه باشنی چه ویریور :

— یاھو ، برشی دویدق ، نه وار الله عشقنه ؟ . . دییه صورانلرہ :
— آدام ، بر شیدر اولدی ؛ قسمت دیکلش ، آریلدق . . . کی باشند
صاومه جوابلر ویریوردی . کیمییی ده بر آزارداها ایلری کیدیوردی :
— پکی آما ، سبب نه ایدی ؟ . . نه اولدی ، بو قادار حرارت ، بو قادار
طوتوشمه ، صوکره بر دن بره نه یه آیرلدیکز ؟ . .

بو قادار صیقيجي سؤاللى دور دورمق ايچون ده :

— هيچ آجانم ، دييوردى . . عادى بر آ كلاشاممازلق ... خرچينلق .

— واد واه ، اورته ده مهم بر شى يوقسه ، يازيق دوغروسي . . . فقط

بو خرچينلق كيمك طرفنده ؟ . قباحث اونلرده مى سنده مى ؟ .

اوزمان فاخر قباحتنى بيلنلره مخصوص بر طورله باشى ايكه زك صويوردى .

قصورينى اعتراف ايدن آدامه نه دينر :

— سنده ، آچوجوق ، بو خيرچينلقدن بر تورلوقورتولامادك . او بارق

يقيمى مكتب قاوغاسنه بکزه مزكه . . ياپماماليدك ! .

فقط اوته دن ، اصل فيخامت خانم ، اسكى خويلرندن بر تورلو واز

کميوردى .

اوندن روايتله کيميسى ده فاخرک زنکين بر قيز ايسته ديکنى ، صوکره

آرادينى بولامانجه صاووشديغنى سويليوردى :

— حتى ، دييورلردى . اودن چيقارکن چانطالر آشيرمش ، قيزک مجو .

هراتى آلوب کوتورمش ! .. معلاده اولا آلدانمشکن صوکره بونى اوکره تنجه

اوبيله بو چاقينى ايسته مه مش ! ..

بعضيسى ده بالعكس معلايى لکله مهيه قالقيور ، اونلرده باشقه تورلو يالان

ايجاد ايديورلردى . آرتيق عالمک ديلنه اويونچاق اولملشاردى .

فاخرک کيجه ياتيسى مکتبلرندن ماعدا بوتون حياتى شيشليده ، بک

اوغلنده کچمش ، اوراده طانيدينى کنجلردن پک چوغنه بکزه مه مک ، لوثن ،

سفاهتدن اوزاق قالمق ايچون او قادار مقاومت کوسترمشدى . اوبيله ايکن

نهايت ايسته اک تمیز املرله چارپان بر قلب حکاياه سنده هرکس اونى « عرض

دشمنى » ظن ايديورلردى .

آرتق بونلرک هيچ برينه آديرمامايه قرار ويرمش ، کويک يالکزلغنده

تکرار کتابلرينه قاووشمايه حاضرلانيوردى ؛ بوده قابل اولمادى . باشنک

دونديکى اوبيله دقيقه لر کلدی که اطرافده قاينايان کورولتولى عالمه کندى ده

کوزی قاپالی آتلمق ، یکی ماجرالر ایچنده هر شیئی اونوتمق هوسلرینی دویدی . یاواش یاواش کویده بر چوق کنجلرله طانیشیوردی . یاز کلدیکی ایچون بوتون زنکین هالهلر اوراده ایدی . اونلرک ، پارانی یالکز استهلاکه یارار بر واسطه دیه طانیش اولادلریله یامکتبدن ، یاسپور حیانتدن کوز آشنالغی ذاتاً اکسیک دکلدی . شیمدی نهده اولسه حدودلری دار بر کویده بر آرایه طولانجه اسکی کوز آشنالقلری ، هر دقیقه بر برینی آرایوب بولاجق قادار دوستلق شکله کیردی .

فاخر ایشلرینی هر کون رایکی ساعت ایچنده بیتیردکن صوکره سربست قالیوردی . سپور مراقی بو سکز اون کنجی بر آرایه طولامش ؛ فاخرده ایلک زمانلرده بوس بوتون انزاویه چکلوب چکلمه مک ایچون تردد ایدرکن نهایت کندینی اونلرک آراسنده بولمشدی . برابر دکره کیریورلر ، برابر طاعلره چیقیورلر ، قوشوشویورلر ؛ یاریشدر ، قوت تجربه لری یاپیورلردی . بعضاً اونلردن برینک کوشکنده طولانوب پوکر اوینارلر ، کیجه لری استاسیونده کی غازینوده موزیقا دیکرلر ، یاخود هپ برابر قوروده ، دکر کنارنده شرقیلر سویله سویله یه ، باغیره چاغیره کزرلردی . آراده بر استاسیونده یانه صوقولوب احباب اولدقلری کنج قیزلرله قورونک تهالقلرینه ، چاملغه دوغری چکلدکجه فاخر یالکز او زمان آرقاداشلرندن آریلیوردی .

اوته کیلرک هر یایدینی شی کنجلکلرینه عطف ایدیلرک خوش کوروله بیلیردی . فقط هر کسک دالغالاش بر سر گذشته طانیدینی فاخر ؟ . اونه یاپسه بیک تورلو معنا ویریورلردی . تنها بر حیات ایچنده یاشاسه کندیسنگ اسکیدن بری دکیشمه یین منزویلکنی بیلمه ینلر : « باق ، دیه جکلردی ، حالا طاشق . . . حالا دوشونویور . . . » بویله کنجلرله برابر چیلغین ، پر حیات دولاشدقچه ده :

— توکلی اوچ کونده قاریسینی براقماش . . . شیمدی ده هیچ بر شی اولماش کبی کولوب اوینایور . دیورلر ، کیمیسی ده :

— مکر قیزجغز ، بر آی بیله دایاناماشده بونک ایچون آیرلمش . .
 باقسه کیز آ ، نه چاقین شی ! . . دیه اک کوچوک حرکتی بیله باشقه تورلو
 تفسیر ایدیوردی . بلکه بونلر دوشونمکه دکزدی . فقط فاخر ، آرتیق
 اوتنه کنک بریکنک فیصیلادیغی اک کوچوک شیدن بیله آلوب قیریلایق قادار
 بیتکین ، او درجه ناتواندی . نهایت بر از غرورینه تابع ، بر آزده کهوشکلکه
 اسیر اولدیغی دقیقهلرده قرارویردی که کندیسیده کیجهسی کوندوزی بربرینه
 قاریشان بز حیات ایچنده اویالانه جق ، بو فاجعهیه بر تورلو سبب بولامیان
 بوش بوغاز انسانلر نظرنده — ضرر یوق — هیچ اولمازسه ساهجه چاقین
 دییه طانه جقدی . چوجوقاق دوزنده بیله طبیعتدن باشقه یره مداومت ایتمز ،
 کتابدن باشقه آرقاداش طاشمازکن شیمدی « قرقندن صوکره آزان فاسق
 محروم » کبی اولیه جق چیلغینلقلر یاپیوردی .

کوچوجک کویده هر شی بر ثانیه ایچنده دویولویوردی . کندیسیده
 حقنده اک اوفاق خبرلی کونی کوننه ایشیدیرکن فاخرک بو حاللری شبهه سز
 اونکده قولاغنه قادار یتیشیور ، بعضاً کندی کوزیله کوروپور ، کیم بیلیر
 او زمان نه دوشونویوردی .

بوراده بربرندن بش اون آدیم اوزاق بر محیطده کچن کونلر ، آیلر
 بالعکس اونلری بوس بوتون بربرندن اوزاقلاشدیردی . فاخرک بو چیلغینلقلرینی
 هپ او شیمدییه قادار عیبلادقلری کنجلر آراسنده آواره دولاشدیننی ،
 هله اونلرله برابر قومار اوینادیغنی ایشیتدکجه معلادهده پک طبیعی بر انکسار
 حاصل اولویوردی .

بر قاچ دفعه سوقاقده ، بر کیجهده سینه مانک قاپیسندن کیره رکن بربرلرینه
 تصادف ایشلردی . فاخر ، هان دونمک ایسته مشکن اراده سنی آرتیق اونک
 قارشوسنده ضعف دویمامایه آیشدیرمق ایچون واز کچدی . او کیجه ،
 معلانک سینه ماده کی نشئه سنی ده کورد کدن صوکره بوس بوتون اوزاقلق حس
 ایتدی . بویله بر ایکی تصادفده ، هله بر کون کویک مکتبی شرفه سوقاقلرده

ياپيلان احتفال اتناسنده اونى پك نشتهلى ، قالا باليغه قاريشمش كوردجه او اسكيدن قاله خمار بيله صيريلوب كچيوردى. معلا نكاچدن صوكره بويله كندى كندىنى كوچولتمهسه ، شيمدى ده بو قادار خفيفلكلر كوستره مه سويدى آيرىلق فاخرى بلكه ده بدبخت ايدى جكدى . اونك اول كندى حياتى ، صوكره ده شيمدى يه قادار سعادت ديه ياد ايتدىكى رابطه يى ناصل فداكار حسله قوپارمق ايسته ديكنى دوشونمك ، بالعكس نظر نده مطلقه سنى بوس بوتون يو كسلته جك ، هېچ شېه سز اوندىن آيرى ياشاياميه جكدى . حالبوكه معلا دون اولسون ، بوكون اولسون اوخفته بگزىن لاقيدى ايچنده كندىن اوزاقلاشدجه فاخرده ده آرتق بر ندامت طوتوشماسنه امكان قالميوردى . شيمدى يه قادار اوكا قارشى قلبنده كى - ذاتاً سه و كيدن زياته مرهمته بگزىن - اك صوك حسلرده ياواش ياواش بوس بوتون سيانمشدى .

ينه بر كون سوقاقده يالكر تصادف ايتدى . كنج قادين ، تره ندىن چيقمش اوه كيديوردى . استاسيونله اولرينك آراسنده كى بويولدىن هر زمان برابر كچرلردى . دون كندينه او قادار ياقين بر وجودك بوكون بويله صوئوق ، بو قادار يابانچى كى كچوب كيتديكى دوشونه رك اوزاقدن باقيوردى . معلا اونى كورونجه اولرينه يكرمى اوتوز آديم بيله قلاماش ايكن يولده دوران بر آرابايى چه ويروب بيندى ! . عجيبا فاخر ، كله ده اوكا بر شى سويلرمى صانمشدى ؟ . حالا اونك غرورينى ، چاغريله دن كيمه ين ، صورولمادى سس چيقارمىان ياراديايشنى اوكرنه مه مشدى .

آراسى برقاق كون كچد كدن صوكراده فاخر بوتصادفى اولديغى كى اطرافدن ايشيتدى . هر كس :

— توكللى ، بوچوجوق حالا كويده اوطور ميورمش ! . كچن كون قيزه يولده ينه صاتاشمش ، زواللى كندىنى آرابايه دار آتمش ! ديه فيصلداشيوردى . معلانك اوكونكى خشونتته روحى برچوق سبيلر بولمق ايچون انسان نه قادار سكونت كوسترمك ايستره ايسته سون ، اونك صانكه بويوك بر حادته

اولش كېي كيدوب اوده هرشيئي آكلاتماسنى ، اوتە كىلركده همان قونويه قومشويه بيك برمبالغه ايله يايمايرىنى عفو ايتىك قابل دكلدى .

مهتاب كيجهلى فاخر قىرلره دوغرو چىقار ، باشقه يول اولدىغى اچون اونلرك اوينك او كىندن كچمهيه مجبور اولوردى .

بويله هر كچىشده معلانك خدمتچىلرله كولوشوب باغچهده قوشوشدىغنى دويويور ، ياخودده :

— بابا ، قويون سوتى مى داه قويدور ، يوقسه اينك سوتى مى ؟ ديه هپ او بردن بره انسانه ، سادهجه صفوت ، سادهجه معصوميت حسى ويرن چوجوچه سوزلىرى ايشيدىوردى .

ايلر كچدى ؛ برزمان سونر كېي كورون ديدى قودىلر ينه آراده بر دىلى اوزاتيور ، بو ازدواجك حكايهسى حالا شوراده بوراده سويله نيوردى .

فاخر ، آرتىق كىندى چوجقلىقلر اچنده غائب ايتىشدى . بوياشه قادار انخا كوسترمهين حياتنده شمديكى داغقلىغى ، ياواش ياواش اكلنجه عالملىر ينه دوغرو قاين بوكهوشكلىكى آراده بر كىندىسىده دوشونميه وقت بولمىچه كوچولوب اوتانيور ، تكرار طوپلانمق ايستهديكى اولسه بيله ينه بردن :

— آدم سنده .. نه اچون ، كىمك اچون ؟ ديه دوداقلرىنى بوكويوردى .
دون بربرى اچون چارپان ايكي قلى قىرمقده ذوق بولان شوم آغزلر شمدىده فاخر ك بوكويده ياشاماسنى مناسب كورمىورلردى . صوك كونلرده صىق صىق كلن مركز مفتشلىرىنك كىندىنه عائد ايشلىرىده تدقيق ايتدىكى كوردنجه بوكا هيچ برمعنا ويره ميوردى . صو كره كونك برنده فاخر ك تبديلى اچون قومپانيا نردنده برچوق تشيثلر اولدىغى ميدانه چىقدى . فقط رسمى برسبب بولامدقلىرى اچون هپسى نتيجه سز قالمشدى . محى الدين شوقى بكك بو تشيثلردن خبرى بيله اولمىغىنه فاخر يوره كدن قانعدى ؛ كىندىسى هر يرده دوقتورك اسمى ناصل حرمتله ياد ايدىيورسه اونكده بويله تحريكاته تنزل ايميه جكي محققدى . بواولسه اولسه جان صيقتيسى ايله كىندىلىرىنه ايش آرايان

برقاچ بدخواهك فضولى مداخله سندن باشقه بر شى دكلدى . فقط بر كون ديركتوردن دويديغى سوزلر بو حرمت خاطرهلرينى ده ييقدى :

— بن حائله ايشلرينه قاريشمق ايسته مزدم . فقط محى الدين شوقى بگله اوزاقدن طانيشيوردق . كچنلرده بكا برمكتوب يازدى . سزك تبديلكزى كنديسى رجا ايتدى .

*
* *

ياز كچدى ؛ فاخر كويده برمدت داها قالدى . كيتدكجه بوحيات داها زياده كنديسى ايچون آجى بر رنكه كيرمشدى . اون بش سنه لك تحصيل حياتندن ، اوزون بر تتبع هوسنه موقوف ، صوك درجه دوزكون بر كنجلكدن صوكره بردن دوشوب كوچولمهك اغيرلغنى اوده فرق ايديوردى . يازين آرقاداش آراسنده ياپدقلى اوافق تفك اويونلر يرينه شمدى دوغروودن دوغرويه قلوبده قومار اوينايور ؛ اوماصهك باشنده هررنكدن انسانلرله يان يانه اوطورويوردى . آرتيق كوندن كونه فلاكته ، سفاهته دوغرويقيلان بوحياتدن قورتولمق ، همده « سزك چاليشوب ياپاماديغكزى ايسته بن كندى ائمله ياپيورم . » ديمش اولمق ايچون بورادن بوس بوتون اوزاقلاشمهيه قرارويردى . وظيفه سنك باشقه يره نقلنى ايستهدى . ايكي آقادر اوغراشدى . مسابقه امتحانلرينه كيردى . نهايت بر كون كيمسهيه وداع ايمه دن ، حتى بر زمانلر كوزللكنه اسير اولديغى قورويى ، چاملغى ، دكز كنارنده كي طاشلغى هيچ ، هيچ بر يري — صانكه آرتيق ماضيه بوس بوتون كوز يومق ايستيور كى — صوك دفعه اولسون كزوب كورمه دن تره نه آتلادى . بر آاز صوكراده بوخاطره لرله دولويشيل كوى ، لوقوموتيفدن فيشقيران دومانلرك آرقاسنده قاراردى ، قاراردى ؛ كورونمز اولدى .

تراموايك اوك طرفدن اوكا دوغرو چهوريلان برچفت ماوى كوزى طانيق بك كوچ اولمادى . سياه برپچه ايله چرچيوه له نمش بويارى صولغون سيما ترامواى

یورودکجه برآز داها آرقایه دوغرو دونرکن ، اوزون زماندن بری آرانان ئیئه
 بردن بره راست کلمه نك ویردیکی اینانامازلوق ایچنده فاخر ، ینه هرزمانکی کبی
 ساکن قالمق ایسته دی .

تراموای ، سرکه جیه دوغرو قیویریلان کوشه یی غجیرداته رق کچوردی ؛
 بر قاق ثانیه صوکره بوس بوتون یتیشیله مه جك قادار اوزاقلاشه جقدی . بونی
 دوشونوزکن کندینی باصامقلرک اوستنده بولدی . حالا تردد ایچنده ایدی .
 آرابادن ایچرییه کیردیکی زمان قادینلره مخصوص صررده اونك باشنی آرقادن
 طانیدی . بوسیاه پچه نك کنارلرینی صیرمه ایله ایشله یین صاحلر صوله دوغرو
 براز داها چوغالدى ؛ شمدی براز پنبه له شهن یوزی ده کوزوکدی ، نهایت
 بوس بوتون آرقایه دونه رك کوزلری فاخرک کوزلرندن کچدی .

بوتون دیدی قودیلره ، بوتون ادعالره رغماً معلایی کوردیکی زمان ، ایشته
 بوکون ایلمک دفعه اولارق یولنی ده کیشدیرمش ، اوکا بوقادار یاقلاشمشدی .
 بش آلتی آی اول صابر بك ، فاخرک پك سهودیکی ، پك حرمت ایتدیکی ،
 کورمش کچیرمش برذات اوکا دیمشدی که :

— باق اوغلوم ، آرتق بو بویله یوزومز . بر کره سنك بویله یالکیز باشنه
 بك اوغلنده پانسوئلرده یاشاماك نه زمانه قادار دوام ایده جك ؟ بر آن اول
 کندینه بریو وایپمانك زمانی کلدی . کلدی آما ، ماضیده کی برخطایی ، زیانی
 یوق خطا دیلم ، اونى تعمیر ایتهدن باشقه بر قرار ویرمه یه قالقارسه ك بوده
 کناه اولور . بنجه زمانه اونوتولیه جق هیچ برشی یوقدر . آرادن ایکی سنه
 کچدی . هرایکی طرفده بربرینی طانیدی ایسه طانیدی . هرشی اونوتولدی .
 سنك یاپاجغك شی بو قیزی تکرار آلمقدیر . هیچ اولمازسه یارین کندیکه یکیدن
 عائله اوجاغی قورمازدن اول بر کره داها بونی تجربه ایتهلرک . نه اولور ،
 ساده بر تجربه ... والله اوغلوم ، بو ایشده ثواب واردر ؛ هم سکا ، هم بکا ...
 بنده ذاتاً اوقیزجغزه بر ایلمک ولسون دیه آرایه کیریورم . یوقسه بوزمانده
 قاری قوجا آراسنه کیم کیره ؟ . بوساده جه آناسنه باباسنه اطاعت ایچون

کندینی فدا ایتش بر قیز . . . یوق ، یوق ، اعتراض ایتمه ، بوراسی محقق . .
همده بو، تکمیل فضیلت حسارینک فوقنده بر فدا کارلق . . . دیدکلمه اینانماسهک
بیله ایشته بوسفرکی تجربه ایله هپسی میدانه چیقاجق . عجبا ساده آنه سنک
خاطری ایچون می سندن آریلدی ؟ . شمدی چاغیرسهک ، کل بو حیاتی تعمیر
ایدهلم دیسهک کلیرمی ، کلزمی ؟ . بن هپ بونی مراق ایدیورم . سن بر مکتوب
یاز ، بکا ویر . بن ده اوکا کوندرمک ایچون، باقالم بر چاره بولا بیلیرمی یم ؟ .

فاخر ، شیمدیکی ساکن وسیعیه موقوف حیاتندن ممنوندی . فقط صابر بکک
دیدیکی کبی بر مکتوب یازدی ، ویردی . او آراق معلانک خسته لاندیغنی
دویدیلر ؛ مکتوبی کندیسنه کوندرمهیه بر چاره بولامادیلر . داها صوکره
یکیدن یکیه دیدی قودیلر ایشیدیلدی . اوته کیلر حالا : « قیزی بر تورلو
راحت بر اقیور ؛ بر طالب چیقسه کیدوب بوتون ایشلری قاریشدریور ! » دیه
بیک بر یالان سویلیورلردی . آرتیق بوقادار بایاغیلقدن صوکره فاخر :

— قابل دکل ، بونی تعمیر ایتمهک احتمالی یوق ! . ثوابندن ده وازچدم
بز حسن نیت کوستردکجه اک رذیلانه تفسیرلره اوغریورز . دیه صابر بکده کی
مکتوبی کری آلدی .

او یله ایکن ینه عجبا چاغیرسهق کلزمیدی ، دیه ایچنده قیملدایان بر مراق
واردی . شمدی اونی کوردیکی زمان ده هپ بومراقله طوتوشویور :

— بندن کنه کیتسون . . . دیه هیچ اولمازسه آیاق اوستنده بونی صورمق
ایستیوردی .

معلا ، سلطان احمدده تراموایدن ایندی . آیا صوفیه دن باب عالی یه کیدن
یوله صایدی . فاخر ، حالامتردد ، تراموای دیوان یولنه دوغروقیوریلیرکن
آتلا دی . برقچ آدیم صوکران یان یانه کلدیلر . کوزلری معلانکیلرله برلشدی .
اوثانییه قادار نه یاپاجغنی بیلمیوردی . کنج قادین هر زمان آنه سنک یاننده
اولدینی کبی صوئوق ، ینه او یله اوزاق قالسهیدی ، دورمادن کچه جکدی . فقط معلا ده ده

صانكه فاخر ك سويليه جكي سوزلري بكلر كې بر حال واردى . سكوت اچنده
برقاچ ثانيه يان يانه يوروديلر . صوكره فاخر :

— معلا، ديدى نه اولور ، بر آزى ديكلميسك ؟ معلا باشى قالديردى :

— خاير ، ديدى هيچ بر شى ديكلمك ايسته ميورم .

فاخر ، چكيلوب كىتمك اچون بر ثانيه دوردى . صوكره عنادن ،
غرورندن بر آن اچون فداكارلق ياتق احتياجى دويمش كې تكرار يورودى .
اوندن ذاتاً باشقه تورلو جواب بكله نه مزدى .

بو ، خاير ديشده ده براز مأيوس ، براز بى تاب برادا واردى .

— حالو كه ديه تكرار باشلادى . بنم سكا سويليه جك نه قادار چوق شيم

وار . . .

— رجا ايدرم ، آرامزده قونوشه جق آرتيق نه قالدى ؟ . .

— بالعكس ، اصل شمدى قونوشه جغمز شيلر داها چوق . بلكه سن

پك فرقده دكاسك . فقط بيلسهك ايكيمزى ده نه قادار آلداتديلر ؛ بربرمزدن

ايرمق اچون نه لريپديلر . سكا قارشى بنم نه قصورم اولديسه بوھپ بزي چكده .

ينلرك سوزينه قاپلديغم اچون اولدى . شمدى بن كنديمى داها چابوق طوپلادم .

كىملرك حيله سنه قربان اولديغمزى آكلادم . حالو كه سن ، باقيورم كه صوك

دقيقه يه قادار بنى عفو ايمه مشك . ديمك حالا اونلرك تاثيرندن قورتولامامشك .

آرتيق معلا ، بوقارانلقدن صيريلق لازم ، آرتيق هرشي او كرنايسك . كورويور .

سكيا ، آرامزده قونوشه وله جق پك چوق شى وار . بنجه سن براز انصاف

ايتسه ايدك ؛ ذاتاً كندى كنديكه هيسنى او كره نه بيليردك . هيچ اولمازسه بوكون

هرشي آكلاماليسك . ارادن ايكي بحق سنه كچد كدن صوكره ، او قادار ديدى

قودينك اوستنه ، باق ، بن سنك يانكه قورقا قورقا ناصل صوقولويورم . بوقادارى

بيله سكا آكلاتماليدر كه شمدى يه قادار بنم اچون نه سويله ديلر سه هپ افترا ايدى ؛

بزي بربرمزدن ايرمق اچون اورته يه دوكون شيلر هپ يالاندى . اكر بن

سنى ايسته مه سويدم . .

— قوزوم ، نېچون يورولويورسك . بن سنى دوشونمورم بيله . . سنده
بى آرتىق اونوتورسك ، اولدى دىرسك ! .

— يايما معلا ، بونى ناصل سويليورسك ؟ .. هيچ قابلى ؟ ..
برقاچ سنه اول ، آرادە بر يالكرز قالدقلى زمان ناصلسه ، بوكون دىنه اويله
يان يانه يورويورلردى . معلا ، خستهلق تهلكه سنى آتلا دقندن صوكره شمدى
داها زياده طويلانمشدى . دوز سياه مانتوسنك آلتندە وجودىنك خطوطى داها
زنكىن ، داها زنده كورونيوردى . ساده ، رنكى بر آرز صولوق ، كوزلرينك
آلتى بر آرز كولكهلى ايدى . اسكيدن بويله يان يانه يوروركن خفيفجه
دايانە جقمش كې فاخره صوقولوشى واردى . شمدى همان همان ينه او قادار
ياقنديلر ؛ ايكي قلبك آراسنده كى اوزاقلغندە فاخر بر تورلو ايناناميوردى . اويله
ايكن ينه برشى ، باشقه برشى اونلرى بر برندن اوزاقلاشديريور ، آيرييوردى .
— شمدى بريسي كوره جك ، اطرافدن ينه اوزون اوزون ديدى قودى
ايشده جكر . بوكونه قادار چكديكمز آرتىق آلويرمديمى الله عشقنه ؟ .
— اولمازمعلا ، قونوشالم . كيم كورورسه كورسون ، كيم نه دىرسه ديسون ! .
آرتىق ناصل آلدانديغمزى سنده آكلا ؛ ناصل شيطانى يالانلرله بر برمزدن
آيريلديغمز آرتىق ميدانه چقسون ! ..

— نه يه يارار ، هر شى بيتدى ! .

— خاير ، هيچده بيتمهدى ! . چوق آجى چكدك ، چوق بدبخت اولدق .
هله سن ، آكلاميورم ظن ايمه ، پك خراب اولدك . فقط ديديكك كې اويله
هرشى بوس بوتون بيتمهدى . اصل شمدیدن صوكره بر برمرك اولورسهق
سعادتك قيمتى اوزمان داها آي آكلارز . كچن درسلردن صوكره بر داها
بزي بر برمزدن هيچ برقوت آيراماز . ديكه بنى معلا ... آرتىق بوتون حقيقت
اورتايه چيقسون ، دييورم سكا .. شمدى ديكه مك ايسته ميورسك ، سكا هپسنى
اوزون اوزون يازايم .

— خاير ، خاير ، بكا هيچ برشى يازما ، ايسته ميورم .

— ذاتاً نجہ ہنسندن ایسی بونلری بوس بوتون اونوتمقدہ در .
ماضیہ کوزلریکی قاپار ، همان بکا کلیرسک ، ہرشی قاپانیر ، کیدر .

— خایر ...

— نیچون عناد ایدیورسک معلا ؟ . . اسکیدن بر قوری لوقا اکمک ،
بریر اوطہسی بول ، کیدہلم دیردک ، اونوتدکمی ؟ . او زمان بن ہپ محیطمزی
دوشونوردم ؛ سنی کوچوک دوشورمہمک ایچون راضی اولمازدم . شمدی اللہ
او قوری اکمکک یانہ بر آزده قاتیق احسان ایتدی . باشقہلرینک یانندہ
کوزلرمزی یرہ ایکمہیہ مجبور اولمادن یاشایابیلیرز . ایستہدیکک یردہ ، ایستہدیکک
کی کوچوک بر او بولالم ؛ کل ...

— خایر ، ہم آرتیق آریل . . بریسی کورہجک دیورم سکا ... بن دہ
امنیت صندیغنے کیدہجکم .

— خایر ، معلا ... ایستہمہدیکک شیئی سکا زورلہ یاپدیرمق ایستہم ؛
فقط مؤبداً آلدانماکدہ برتورلو کوکلم راضی اولیور . . .
امنیت صندیغنےک قاپیسندن برابر کیریورلردی . مردیون باشنہ دوغرو
یورودیلر . معلا :

— رجا ایدرم ، کیت ، دیدی . بورادہ طانیدقلرہ تصادف ایتمک قابلدہر .
بکا فئالق ایتمک اولورسک .

— پکی ، ایشکی بیتیرمہکی بکلرم ؛ چیققدن صوکرہ قونوشورز .

— چیقنجه بن دائمہ کیدہجکم .

— پکی ، کیدنجهیہ قادار ...

— جانم ، سندنہ کندی ایشکہ کچ قالیورسک ! ..

— زیانی یوق .. سنی بولمق شرطیلہ ، ہرشیئی غائب ایتہیہ راضی یم .
معلا ، قادینلرک بکلہمہ اوداسنہ کیردی . فاخرده همان اورالردہکی براجزا-
خانہدن ایشنہ تانولہ خبرویردی . تکرار کلدیکی زمان معلانک کیدوب کیتہدیککی

آکلامق ایچون امنیت صندیغنه کیردی . معلا ده بکله مه اوداسندن چیقدی .
اوکا دوغرو یورودی :

— الله عشقنه ، دیدی . بوراده دورما .. قومشولردن بری وارکه صیق
صیق بورایه کلیور . بوکون ده کلیسه بزی کوره جک ، ینه بیک تورلو دیدی
قودی اولاجق .. کیت دیورم سکا ، کیتمزسه ک فنا معامله ایتمه یه مجبور اولاجم .
فاخر قارشیده کی شیراجی دکانه کیردی .

— کیتمزسه ک فنا معامله ایدرم .. دین معلا بونکله شمدی یه قدار سرت
داورامادیغنی اعتراف ایتش اولویوردی . حقیقه ایسته سیدی ، داها جاده نک
باشنده ایکن فاخرک یوزینه بیله باقماز ؛ صوقولمق ، قونوشمق ایچون اونک
بوتون جسارتلرینی اریته جک کله بی بولوب سویله یه بیلیردی .

هر سوزه : « خایر . . » دیدیکی حالد بیله بورایه کلنجه یه قدار اونی
دیکله مش ایدی . آرتیق بو قیزک یوره کنی بوتون آچیق لغنی ایله او قومق قابل اولویوردی .
اسکی کینی ، آریلما کورلتولری آرد سنده کی خویسزلغنی قالماشدی . داها ساکن ،
داها یوموشاق کورونویور ، فقط صانکه قرارندن دونمک ده آلدن اولمادیغنی
آکلاتیوردی . بوتون تلاشی هپ کورولمک قورقوسندن ، هپ باشقه لرینک
یکیدن اغز آچالردن عبارتدی . بوتون بواز دواج حکایه سنک طانیدقلر
آراسنده کی عکسلرندن پک صیقلمش ، شمدی ده ساده بوندن چکینیوردی .
حتی بوکونکی سکوتی ، حسیاتنک اک صمیمی بر اعترافی عد اولونه بیلیردی .
اسکیدن ، هله آریلق کونلرنده ، نه قدار خشین ایدی . شمدی عادتاً نومید
برتوکلای آندیران حالی واردی . تراموایدن باقیشی ، آیا صوفیه دن صایدیغنی زمانکی
تلاشسزلغنی هپ هپ فاخرک بویله قونوشمق ایسته یه جکنی بیلیرکینه ، حتی
بکله دیکنه علامتدی .

فاخر شیراجیده یاریم ساعت قدار بکله دی .
کنج قادین قاپیدن چیقارکن ثابت برباقیشاه ایکی دفعه دکانه دوغرو کوزلرینی
چه ویردی . ایکی آدیم صو کره یه برابر دیلر . معلا بر آقزارمش ، امنیت صندیغنک

مردیونلرینی اینوب چیقماقدن ، اودالرینی دولاشماقدن یورولش کبی ایدی .
بر آزا اول هیچ بو شی سویله مه مشکن صانکه شیمدی ایچریده دوشونوبده
بولش کبی بردن بره :

— هم آرتیق بن اوله نیورم ... دیدی .

فاخر سا کن کوروندی :

— اوله نیورمیسک ، اوزمان اورتده هیچ بر مسئله قالماز کوزم ...
بن یالکز سنک سعادتکی ایستیورم . کندی بختیارلغک ایچون ویرلش بویله
بر قرارک وارسه الله مبارک ایتسون . مسعود اولما کی اک اول بن تمنی ایدرم .
صوصدیله . معلا شمدی اوکنه باقیور ، صانکه کولومسه مه مک ایچون
یوزینی صاقلیور کیدی . فاخر :

— خاطرلارمیسک ، دیدی . آیریلدیغمز صره لرده ایدی ، دیوردک که
سن بنی سودیکک ، بنم یوزمدن اوقادار فلا کته اوغرا دیغک ، اوقادار
فدا کارلغه قاتلان دیغک حالد کویا بن سنی سه و میوردم . بویله سویله میورمیدک ؟ . باق ،
شمدی کورفویورسک یا ، آرادن سنه لر کچدی ؛ سومیه بن تکرار سکاصوقولمق
ایچون هر حقارته کوزلرمی قاپیورم . حال بو که سن ؟ ...

یکیدن برقاچ ثانیه یی سکوت ایچنده کچریدیله . بو کسک کسک سوزلرله
معلا کبی بر قیزی عناندن چه ویرمک قابل اولامیه جقدی . بونی آرتیق پک
اعلا حس ایتدیکی حالد بیله ینه سوزه باشلایان فاخر اولدی :

— قاچ دفعه دیدی ، بابا که مکتوب یازدم . سکاده یازمق ایچون اوقادار
چاره آردم ؛ قابل اولمادی .

— یازدیغک مکتوبلرک هپسینی بیلیورم ، هپسینی اوقودم .

فاخرک بر آراق : «هرشیئی اونوتالم ، بویقیلان یووایی تکرار قورالم ..»
دیه کوندردیکی مکتوبلری محی الدین شوقی بک عجبا ناصل اولشده قیزینه
کوسترمشدی ؟ . شمدی معلانک بو مکتوبلردن ده خبری اولدیغی حالدده مقاومت
ایدیشی آرتیق قرارنده کی شدتی کوستریوردی :

— جاده‌یه چیقورز ، دیدی . آرتق آریلام .

بره‌باطان سراینک کوشه‌سنه کشلردی ؛ فاخر :

— کل براز بورادن یورویه‌لم ، دیدی . ینه جاده‌یه چیقارز . چیقنجه‌یه

قادرده کیمسه‌یه راست کلك قورقوسی قالماز . اورادن‌ده تراموایه ینه‌ر ،
داییکه کیدرسک .

برابر یان سوقاغه صایدیلر . کنج قادین ، ینه بر صرهنی کتیردی .

ده‌میندن بری او ، بردن‌بره بولمیش بر یالان کبی آغزنندن دوکولن ازدواج
حکایه‌سنی تکرار ایتدی ؛ آرتق قوجایه وارا جنی ایچون آرایردن هر احتمال
قالقدیغنی سویله‌دی . فاخرده :

— پکی ، ان‌شالله مسعود اولورسک .. دیه باشنی اوکنه اکیوردی .

آنحق اون بش ییرمی آدیم قادار یورومشلردی . معلا دوردی :

— هم ، بن بیلمه‌دیکم سوقاقلردن کچم ، دیدی . یالکنز قورقارم .

— قورقویورمیسک ، بنمله برابر بولونمقدن می ؟

— بن دونویورم ...

یورودی . صو‌کرا تکرار باشنی چویردی :

— بنی اونوت آرتیق ، دیدی .

فاخر ، هیچ سسنی چیقارمادن مرارته باقیوردی . سه‌ویشن ان‌انلر

آراسنده ، آریلیرکن قویان عصیانلردن ، تهدیدلردن ، یالواریشلردن هیچ‌بری

خاطرینه کله‌مشدی . دمین ، هیچ سس چیقارمادن برابر شوسوقاغه صایدقدن .

صو‌کرا بردن‌بره معلانک کری دونوشنه باقیور ، بوس‌یام چارشافله اورتولن

کوکسک ایچنده نه‌لر چارپدیننی دوشونویوردی .

کنج قادین خیزلی خیزلی اوزاقلاشدی ؛ هیجانندن می ، نه‌دنه آیا صوفیه‌ده‌کی

تراموای دوراغنی کورمیه‌رک دیوان یولنه دوغرو یورودی . استاسیونی

کچدیکنی صو‌کرا آ‌کلامش کبی تکرار دوندی . فاخرده جاده‌یه چیق‌مشدی .

کوشه‌ده‌کی رتونجی دکاننک اوکنده بردها قارشیلانلیر . فاخرک کوزلری

يوسف اوزاقده کی مناره لردن آریلادی . ایچنه تحف بر دورغونلق ، حتی استراحتی آندیران برسکون یاییلمشدی . طبقی آریلایه قرار ویروبده کوشکدن بوس بوتون چیقدیغنک ایرتسی کونی ناصل قورتولوش حسلری دویمش ، او یکریمی اوچ کونلک اوزونتودن صوکر او ح دیمش ایسه شیمدی ده اوستندن بر آغیرلق قالمش کبی ایدی .

— عجبا بن بوقیزی سومیورمی ایمشم؟ . دیه کندی کندینه صورویوردی . حقیقه معلا ایچون قلبنده سهوکی یه دکل مرحمته بیله یر قالمامشدی . یوقسه اونک بو عنادی اولماسه ، کندی سعادتتی کندی آلیله ییقمامش اولسه فاخر ، احتمالکه ساده جه وظیفه حسلریله کنج قادینی آنه سنک پنجه سندن قورتارمق ایسته یه جک ، بونک ایچون ده کیم بیایر نه قادار اوزوله جکدی .

معلا ، باباسنک اوینی براقوب کلسه نه کورولتولر ارلاجق ؛ آنه سی ، دایسی اونکله نه قادار اوغراشه جقلر ؛ اوزمان ده باشقه دیدی قودیلرله ، باشقه حیلرله کندیلرینه راحت ویرمیه جکلردی . کنج قادین آنه سنی خسته حالنده براقوب کلکده تردد ایتسه ده یالکیز فاخری سودیکنی صاقلاماسه یدی بو سفرده محی الدین بکی راضی ایتک ، فخامت خانمی عنادنن واز کچیرمک ایچون برچوق فدا کارلقلری کوزه آلاجقلردی . بلسکده هرشیئی اونوتدوروب براز سکونه قاووشمق کندیلری ایچون آرتیق بر خیال اولاجقدی .

فقط شمدی معلا ده کی بو عناد اسکی خاطره لک بیله هر کون بر پارچاسنی داها قیروب آتیوردی .

بو ردک قارشوسنده اراده سی ، غروری قیلمیدانوب ده :

— نیچون ، ایسته سه م عجبایا پامازمی یم ؟ . دیدیکی زمان :

— آدم سنده ، دکرمی ؟ دیه دوداغنک اوجنی یوقاری دوغروقالدیریوردی . بربرندن بوقادار اوزاق ایکی قلب تکرار برلشه بیلیرمی ؟ . هله اونک عنادی ، یاربئی .. بوقادار عنادجی بر قادین انسانی مسعود ایده بیلیرمی ؟ . هپسی راضی اولسه لر ، هرشی دوزدله سه بیله اونده بو عناد وارکن کیم بیلیر یارین او برکون

ينه نه كورولتولر چيقارير ، نه لر ياپاز . شمدى آ كلايورم كه نه قادار فضيلتلى
اولورسه اولسون اونك كى عنادجى ، حسياتى بويله موفقيتله كيزله ين برقادينه
ياشامق ، اونى سومك قابل دكلدر . ذاتا او سهو كى يى كندى اليه چوقدن
قيرمشدى ؛ شمدى يه قادارده ساده آجيدىغم ايچون ، ساده بندن كناه كيتسون
ديه باباسنه مكتوب يازدم ، بوفلاكتى آرتق تعمير ، ايدلم ديدم . مكر بونلر
مرحمته بيله لايق دكش ...!

*
* *

صابر بك :

— اى صو كرا ، ديه اللرينى اوغوشديردى . ديمك سنكه برابر اول
يره باطان سراينك ياننده كى سوقاغه صايدى ها ...

فاخر :

— صايدى اما ...

— جانم اونك اهميتى يوق ، كرى دونسون ، نه زيانى وار .. سن ايلك
تأثيره باق ... نجه بو بر موفقيت .. سنكه قونوشمش ، برابر امنيت صنديغنه
كيتمش ، دونوشده تكرار قونوشمش .. آرتيق آ كلاشدى .. نه سويلرسه
سويله سون ، نه قادار صاقلارسه صاقلاسون بوقيزسنى سوييور .
— ائى اما ايشته قوجايه وارييور !.

— هايدى جانم ، سنن ده بوكا ايناندىكى ؟ . بوش لاف ... سنى قيزدير مق ،
سنى متأثر ايتك ايچون اويدوروش برشى . بوده سنكه مشغول اولديغنه دلالت
ايدر . يوقسه ، ايسترسه علم الله سنى يانه بيله ياقلاشديرمازدى . هله سنى ...
بر آز سرت برشى سويله سه امينم كه يوزينه بيله باقماز ، چكيليردك . داغ باشى
دكل يا ، جاده اورته سى بو .. برقادينه زورله قونوشولمازا ... كلن وار ، كچن
وار ..

نه ايسه آ كلايه جغمزى آ كلادق . بن سكا ديميورمى ايدم ، بوقيز عجباً ساده

آنه سندن قورقدينى اچونى سندن فاجيور، يوقسه حقيقه سندن صوئودى؟
ديك كه آلدانماشم .

— ائى آما ، چاغيردق ، كلهدى ايسته . . .

— اونك ده اهميتى يوق . حالا آنه سندن قورقويور . دوغرونى بن بو
قىزه حقيقه آجيورم . حتى شيمدى داها زياده تقدير ايدييورم . اونده جداً
يك فداكار بر روح وارمش . آنه سنك خاطرى اچون كندى سعادتندن بيله
واز كچيور .

— بنجه سز ، فضله جه حسن ظن ايدييورسكز . اسكيدن بنده اونك
عنادينى ، قوتلى بر اراده ظن ايدردم . آما بوتون بونلر شعورلو بر فضيلت
اولمقدن زياده خيرچينلقدن باشقه بر شى دكل ايمش . .

— حقسزلق ايدييورسك . باقسه كا ، قيزك بو حاله آجيامق قابلى؟ .

— اسكيدن بنده آجيوردم آما . .

*
**

آراسى ايكي كون كچمشدى ؛ شركتك اك بويوك تورك مأمورى اولان
ناظم بك ، فاخرى جاغيرتدى . يوزى جان صيقتيسندن بوروشمشدى ؛
هيچ مقدمه يامادن :

— جانم براق شونى ، ديدى . واز كچ آرتيق . .

فاخر بر از شاشيرمش ، باقيوردى .

— كچن كون ينه بو قيزه ساتاشمشك .

— رجا ايدرم ، هانكى قيزه ؟ .

— جانم ، شو دوكتور شوق بك قيزينه . . ينه صوقاقده پيشنه دوشمشك .

يولنى كشمش ، زورله قونوشمشك ! . سنك حيات خصوصيه كه قاريشمايه حقم
يوق . صوكره بيليرسك كه بن سنى چوق سه وهرم . بونى ده ينه بر آرقاداش
كجى سويليورم . قاپانسون آرتيق شو ديدى قودى آجانم . .

فاخر هیچ سسنى چيقارمادى. او آقشام بو حكايه يي اولديغى كى آكلاتديغى
زمان صابر بك :

— ايسته بونى هيچ بكنمه دم ، ديدى . سكا قارشى ياپمه جقلىينه حق
ويردم اما اوه كيدوب آناسنه باباسنه يتشديرمه سنه بن ده قيزدم دوغروسى ..
صوكره ، عجباً بونى ناظم بكه كيم سويله دى ، ديه دوشونديلر . صابر بك
دوقتور محى الدين شوقينك كيدوب ده بويله بر شى سويله به جكنى بر تورلو
قبول ايتيوردى :

— ناصل اولور ، انسانك ناصل يوزى طوتار ؟ . بو عاداتا كندى .
كنديلرني كوچولتمك صاييلير . بنجه بونك احتمالى يوق . . خاطر مه باشقه بر شى كليور .
باق ناصل اولمشدر : ناظم بك ده عيني كويده او طور ويور . بكا قالير سه فحامت خانم ، مطلقاً
بو ناظم بكك عائله سى ايله طانيشيور . كيتمش او كار جا ايتمشدر ؛ اوده قوجاسنه سويله مشدر .
ايش بويله جه قادينلر آراسندن اولمشدر . ذاتاً ار كك ايشى اولماديغى بللى .. صوكره
معلايك حر كتنى ده ياواش ياواش معذور كورو يورم . اوده ، سويله مه سه يدى
داها اي اولوردى . فقط سويله مه سنده ده بلكه اي بر مقصد واردى . كيتمش
اوده ، ديمشدر كه ، فاخر سنى سه وميور ديورسكز اما ايسته بو كون ينه
كلدى ، قونوشدى ، بنى چاغيردى . . . بونده هم بر آز قادينلق غرورى
واردر ؛ هم ده احتمال كه بويله لكه آنه سنى راضى ايمه يي اميد ايتمشدر . ذاتاً
قيزه ايكيده برده قوجاك سنى سه وميوردى ، سنى آلداتدى ، يرمى اوچ
كونده بوشادى ديورلر . بوده طبعى او كا دو قونويور . سنك كنديسنى حالا
سه وديكىكى آكلا بنجه بونى اوته كيلر ده سويله مكدە بر ذوق دويمشدر .

صابر بك ، بو سفردە يانيليوردى . چونكه ايكي اوچ كون صوكره
كيدوب ناظم بكه كنديسنى ده قونوشمش ، بو شكاييتك دوكتور محى الدين
شوقى طرفندن ياپيلديغى اوكره نمشدى .
فاخر :

— كوردىكز مى ، ديدى . بونلر مرحمه بيله لايق دكلدر ديمورميدم ،

سزە ؟ . ھلە كيدوب دە بنی آمریمە شكایت ایتەلرینە نەدیرسکیز ؟ . کلۆب
سزە سویلەمیورلر ، انیشتەمە ، تیزدەمە آکلاتمیورلردە کیدیورلر ، ناظم بکک
رسمی نفوذندن استفادە ایتک ایتیورلر . اوقادار سەودیکم ، اوقادار حرمت
ایتدیکم شو آدم ، شو محی الدین شوقی بک بنی بر تورلو آکلایامادی . بکا
ایکی سطر یازسەیدی نە ایسترسە یاپاردم . حتی اونلری راحتسز ایتەمک ایچون
استانبولدن بیلە چکیلیر کیدردم . یوقسە بویلە حیلە ایلە ، دولامباج یوللاردن
بکا هجوم ایتککە عجباً نە امید ایدیورلر ؟ .

او کوندن صوکرە صابر بک دە :

— آرتق بر داھا بو ایش ایچون آغزیمی بیلە آچام ! . دییوردی .

صوک بر ایکی مکتوب داھا

فاخرده صابر بک

• حزیران

..... حاصلی ، نجه بو ، صوک بر تجربه در . استانبولدن آیریلمازدن
بر ایکی آی اول معلادن کوردیکم مقاومت ایچون سزده ، بنده دیمشدک که ،
نە قادار اولسە حالا آنه سندن قورقویور ، قالقوب بکا کلسە بیلە ینە قونودن
قومشودن دیدی قودینک اکسیلسیه جکنی دوشونویور . شیمدی آرتیق بو
اندیشه لرده محل قالمادی . باقالم بو سفر نە جواب ویرەجک ؟

یازدیغم مکتوبی آناسنک باباسنک خبری اولمادن معلایه ویرە بیایرسە کیز
داھا موافق اولور ظنندیم .

با کوده کی دارالفنون حیاته کلنجه

فاخرده معویه

• حزیران

.....
ایشته کوزم ، ناصل اولوب دە با کویه کلدیگمی ، بوراده کچن حیاتک
رنکنی آز چوق آکلاتدم .

با کو چوق كوزل بر شهر . بنی كورسهك طانيه مازسك ، تام یدی كيلو آردم . احتمال كه ثروت واحتشام رؤیالریله بسله نن روحار بوراده بر دارالفنون خوجاسنك ساده یاشاییشنی بر آز سونوك بولورلر . مكتبك ویردیكى پاره یكرمی بش آلتون لیرادن عبارت . پك مزین اولماق شرطیله برده او ویریورلر .

فقط بر شی وار كه انسان او كا قاووشمق ایچون چوله بیله جنت دیه قوشار : سكون ، معلا . . . بوراده نه بر دیدی قودی فیصیلدیسی وار ، نه بر یان باقیش ، هیچ هیچ بر شی . . . ساده كونك برنده قافقاس توركلرینی استقباله حاضرلیورز دیه مفكوره دشمنلرینك آئنده جان ویریرسهك او كا قاریشام .

استانبولدن پك اوزاق ، هیچ خاطریكه كلیه جك بر دیارده ، كوزل ، باغچه ایچنده كوچوك ، ساكن ، بر او وار ، بوراسی سنك اوك ، معلا . . . بوراده اكسیك اولان سنسك . ایستهرسهك كل ، كندی اویكه صاحب اول . بیلمزسك ، ناصل بر هیجان ایچنده جوابکی بکلیورم . آیریلقدن صوكره ، برده بو قدار اوزاقلق بنی بوس بوتون باشقلاشدیردی . نه زمان یوله چیقه جقسك ، دیمه یه بیله قورقویورم ؛ عینی واسطه یله بكا بر تلغراف چكرسك . همان یولجیلنك تفرماتی حاضرلارز

صایر بکسره فاضله

ه حزیران

. مکتوبکی معلایه ویرمك پك قولای اولدی . آدره سنی

یازیورم . ایسترسهك ، حتی ، سن ده دوغروندن دوغرویه کندیسنه یازا . بیلیرسك . سكا بر هفته در مکتوب کوندرمك ایستیورم . فقط اوندن کله جك جوابی بکله دم . ایشته تام اون کوندر سس چیقما دی . انسانك خاطرینه بیك تورلو احتمال کلیور . معلانك جوابی کجیکیر ، سن ده مراق ایدرسك

دیه شمديلك بونلری یازدم. اوده مکتوبی یازاجق، یوقسه تلغرافی چکه جک
نه یاپارسه اوکا کوره آلاجم خبری سکا بیلدیریم

فاخرده صابر بکه

۲۷ حزیران

. دنیاده انسانك خاطرینه کله ین نه لر اولویور ، شو دقیقه ده
نه قادار سهویندیکمی بر تورلو کوز اوکنه کتیره مزسکز . اوچ کون ایچنده
اوست اوسته معجزه لر اولدی .

زنکین اولدم صابر بك ، حقیقه زنکین ! . . .

تفصیلاتی آکلاتمق اوزون اولاجق ، بوراده بر تورك میلیونری ایله
طانیشدم . کچن اوچ دوت آی ایچنده اونك بعض ایشلرنده بولونمشدم .
طالع ده یاردیم ایتدی ؛ بو ایشلر يك ای نتیجه ویردی . بر قاچ کون اول
سنةك حساب یاپارکن بنم ایچون کار حصه سی دیه آیر دقلری شی هادتا بر
ثروت . . . صوگرا ، دوغرودن دوغرویه کندیلریله برابر چالیشمق کبی
بر تکلیف قارشیسنده ده قالدیم . طبعی ، قبول ایتدم . اونلرده شرکته هاند
حصه سند اتندن بر قسمنی بنم اوستمه قید ایتدیلر . یاقینده شرکتك ایشلری
ایچون ویانه یه ، اورادن فرانسه یه کیده جکم . معلا ایچون بشیوز لیرا کونده .
ویبورم ؛ بن کلنجه یه قدر یول حاضرلغی یاپار. استانبولده چوق قالا میه جغم ،
برایکی کون ایچنده اونی ده آلوب یوله چیقماق لازم . فقط شمديکی حالده
بر بو چوق آی قادار ، ده ها باکوده یم . ایجاب ایدرسه بو مدت ظرفنده
بکا مکتوب یازارسکز .

شمدي بر آز اول معلا یه ده بر مکتوب یازدم ؛ بو مرده یی اوکاده ویردم .
کیم بیلیر ، نه قدر سهوینه جکدر .

فاخرک معلا ایله صابر بکه ۲۷ حزیران تاریخنده یازدیغی مکتوبلر
هنوز یولده در . صابر بکدن فاخره

۲۹ حزیران

. . . دیدم یا اوغلو ، انسان صفوتله ، صافیتله حرکت ایتدیکی زمان اکثر

بویله بر عکسیله که اوغرایور . بیلورم که سن آرتق قلبکده بر ضعف دویمقدن
زیاده سادهجه شرف مسئلهسی ایچون ، سادهجه وجدانی وظیفه حسیله اونی
باکویه آلدیرمق ایسته دک . مکتوبلرک کلدیکی کون دوغروسی چوق تردد
ایتم . اودت ، بو قیریلان حیاتک تعمیرینی اسکیدن اک زیاده تمنی ایدن بندم .
فقط صوک وقایع سندن فضله بنی انکساره اوغراتمشدی . بو سفرده ایچمدن
کلن بر سس بو ایشک ینه اولیه جغنی فیصیلدا یوردی . یا کیلماشم . اون کون
قادر معلادن هیچ برسس چیقما دی . صو کرا کونک برنده دو قور محی الدین
شوقی بک بانقه یه کلوب بنی بولدی . سویلدکارینی بورایه نقل ایتک اوزون
اولور ، نه دیه یم ، قیزی اولجه پریشان ایتمشک ، حالاده راحت ویرمیور .
مشک ، جهنمک بوجاغنه کیتمشک ، اورادن بیله اروب یتیشیورمشک ،
« قاف داغنک » آرقاسنه — باکویه اولاجق . . . — کورتوروبده نه خلط
ایده جکمشک ! . . . دها نلر ، نلر . . .

جانم ، دیه جک اولدم ، فنامی ، بو چوجوقده ماضینی تعمیر ایتک ،
دیدى قودیلرک حقسرلغنی اثبات ایتک ایسته یور . . .

محی الدین بک بوسبوتون طاشدی ؛ بنده صوصمايه مجبور اولدم . مکرسه
بو تلاش پکده بوشنه دکلش . زنکین بر میر آلاى متقاعدى قیزی ایسته مش ،
سوز کیلشم . شمدى سنک مکتوبک بو ایشی بوزاجق دیه قورقویورلر ؛
دوغروسی بنده حقلی بولدم . بو ایش آرتیق ، بو قادر دیدى قودى یه دکر
اوغلوم ، ذاتاً اُمینم ، هله بو سفر بندن زیاده سن قیزاجقسک .

دوشونمه لی که بز سنک مکتوبکی معلايه ویریرکن کیمسه دویماسون دیه
المزدن کلنی یایدق ؛ صو کرا او ، کیدوب باباسنه کندیسی سویله مش . آرتق
بونى بنده اولسه م عفو ایتم . نه قدر اوزوله جککی بیله بیله حقیقتی ایسته
اولدینی کبی یازیورم . غربت ایلنده اک کوچک اوزونتو بیله انسانه بر فلاکت
قادر آجی کلیر . فقط اُمینم که بو سفر سنده حاصل اولاجق حس آنجق
تفرتدن عبارتدر .

بە صابر بکەرە فائىزە

۴ تەمۇز

با كودەكى شىركەتە ناسىل خەسەدار اولدىغىنى خىكايە ايدىن مەكتوبى آلام ،
 نىم بوندن اول سكايازديغىم مەكتوب ، طىيى ، او زمان ھىنوز سىنك آلەكە كچمە مشدى .
 شەمدى نە دوشوندىكىكى بىلەمە يورم . فقط يارىم ساعەت اول اول نىقولى ، شوسىنك
 ايلك مەكتوبكى مەلایە ويرمك اىچون واسطە اولان بقال ، كەلدى . ايكىنچى
 مەكتوبى دە يرينە ويردىكىنى سويلەدى . مەللا ، خىر كوندەرمىش . آرتىق
 ھەر شىئە موافقت ايدىيورمىش . آريىچە سكاەدە مەكتوب يازمىش . البت بو كون
 يارين كەلەجكدر . بەكەدە شەمدى يە قادار آلمىشكدر . سىنك بر دىنبرە زنكىن
 اولوشك ھەر دورلو مانى اورتەدن قالدىردى دىمكدر . ھە قاف داغىنك آرقاسە
 كوچك يرينە اوروپا سياحتى اونلرەدە جاذب كورونمىش اولاجق . . شەمدى
 اوغىلوم ، سندن كەلەجك جوابى بەكە يورم . كوندردىكك بىش يوز لىرايى
 بانقەدن ھىنوز آلام . اك چابوق واسطە ايلە خىر كوندەر . اوکا كورە نە
 يامىق لازمە ياپالم .

فائىزە صابر بکەرە

۲۰ تەمۇز

صوك مەكتوبىكەزى دە آلام . نە ياپاجغىز دىيە صورييورسكز . ياپاجق ھىچ
 بر شى اولدىغىنى نىم قدر سزەدە تەقىر ايدرسكز . دويدىغىم انكسارى اوزون
 اوزون يازمايە لزوم كورمىيورم . بونى دە تخمىن ايتك كوچ بر شى دكلدر .
 نە ياپالم قىسمت بويلە ايش . ظن ايدرم كە بن ، آلمدن كلنى ياپدم . اك تىمز
 آرزولرمك قارشىسەنە چىقان شى دائىمى بر تزوير اولدى . سزەدە بىلييورسكز كە
 كىندىمىن زىادە اونلرى ، ھەك زىادە اونك شرفنى ، آتسىنى دوشونويوردىم ؛
 خطا ايتىشم . داھا بر قاچ كون اول ، مەللا بكا جواب ويرەجك ىردە ،
 مەكتوبلرمى كوتورب باباسە كوسترمىش ؛ اودە سزك بانقەيە كلوب قىامتلىر
 قويارمەشدى . دىمك شەمدى ىردن ىرە دە كىشىلەر ؟ كوچوك خانمەدە آرتىق

راضی اولویورمش اویله می ؟ . سزده پک آعلا آکلامشسکزیآ ، قاف داغنک
آرقاسنه کوچک یرینه بردن بره اورتیه چیقان بو اوروپا سیاحتی اونلرده
جاذب کورونمش اولاجق . فقط ظن ایدرم که یوز چه ویرمک صرہ سی بو سفردہ
بکا کلدی . شرکت نامنه یاپاجم سیاحت پروغرامی ده کیشمه دی ، یکر می
کونه قدر یوله چیقیورم . استانبوله هیچ اوغرامادن دوغرو کوستتجه یه
کیده جکم . معالیه لازم کلن جوابی آریجه یازارم ، بلکه ده هیچ بر شی
یازمیه جغم .

صوک

بویوک آطه ۲۵ آغستوس ۱۳۴۰



فیاتی : ۶۰ غروشدر